

Stadtarchiv Siegburg,
Gerichtsprotokolle/Schöffenprotokolle 1415 – 1662

A II/11
Gerichtshandlungen 1521-1531

Bearbeiter, W. Günter Henseler,
Lessingstraße 1,
58566 Kierspe/Sauerland.

Bearbeitungsstand, 12. Dez. 2003

Kierspe 2003

**A II/11, Gerichtshandlungen von den Jaren 1521 und vollendet 1531 auff Weisfreitag,
215 Bl. /430 S.,**

A II/11

Bl. 1^v

Anno [15]XXII,
Seichtem, Loe, schrymmeister,
Zwivell, kurmeister,

Anno et cetera [15]XXIII,
Nesselroide, Roess, schrymmeister.
Loe, kuyrmeister,

Anno et cetera [15]XXV,
Zwivell, Wyss, schrymmeister,
Leye, kuyrmeister,

Anno et cetera [15]XXVI,
Seichtem, Loe, schrymmeister,

Anno et cetera [15]XXVII,
Zwivell, kuyrmeister,
Beissell, Leye, schrymmeister,

Anno et cetera [15]XXVIII,
Staill, kuyrmeister,
Zwyvell, Romp, schrymmeister,

Anno et cetera [15]XXIX,
Staill, kuyrmeister,
Zwyvell, Roess, schrymmeister.

Anno et cetera [15]XXX,
Laer, kurmeister,
Romp, Loe, schrymmeister.

A II/11 1521

Bl. 1r

Gauwyn vam Huys, Alner, Beissell, Emericht Kobbenroide, Loe, Zwivell und Johan Romp, uff godenstach na dem sondage oculi, anno et cetera [15]XXI
Tuschent Teill Knutgen in der Uilgassen, burger zu Sigbergh eyns, Matern und Merten van Bon, geswageren, myt iren mytgelyngen, anderdeils.
Umb alsolchen guider Jacop zu Hoimbergh und Metzgen, syne elige huisfraw seligen, nagelaissen haven, daromb sy zu Sibergh am rechten gestanden synt, derhalver overmitzs vurscrevene scheffen gemoitsont und vur recht erkant worden ist, zom irsten, umb dat begencknys Jacop u er hette im Newenhoff vill schauff sehen schutten, aber sehr wenigh korns wehre daraufen gerissen und Metzgen, eluiden, nagschiet. Davan soll Matern und Merten myt irem zustande vurscreven Knutgen geven acht Kolnische Gulden. Und wat dat dan me gekost und gedragen hait, soll Knutgen betzalen und des dat schuttellgelt, wat des geweist ist, zom besten haven.

Umb de XL Gulden Metzgens moder ir geleynt solde haven, davan soll Knutgen bewys brengen, dem rechten gemeissich sy. Alsdan wilt der scheffen dairover vorder affscheit geven und erkennen.

Vorder umb de guider verschreven uff renthe verpant synt und de erfliche guider seder der eluide doide bis uff desen dach gedayn und wederomb uißgegulden haven, ist erkant, wes gereit guit ist und uff affloese verschreven, och de guider bynnen mytlerzyt gerent und uisgegulden, haven vurscrevene partien zu irem besten und unbesten syn und zusament liden

Bl. 1^r

und dragen sollen. Und wes sust eder parthie an erffschafft bynnen off bussen Sibergh sich anforen hette laiss[en], soll eder eyn dem anderen, wo dat dan were, we mallich dat in den moitsonen, zuverordent ist, uffdragen und insetzen lassen, eme davan erffschafft und werschafft doyn, eder na noittorfft, myt versorgt

sy. Sust umb den bruwekessell, im huisse zu Hoymbergh befonden und vermoirt syn solde, hait der scheffen gewyst, befyndt sich der kessell by Jacops leven uffgebrochen und aynbuwich worden, ist der vur gereit guit erkant.

Aver so hey darna by Metzgens leven, dwile de zu eyner hant gesessen, uffgebrochen were worden, sall hey zur erffschafft bliven und gehoren.

Damyt sullen vurscrevene parthien gentzlichen und zumaill guitlich vruntlich gescheiden, gesatzs und gesont syn und bliven.

Und wilcher dys we vurscreven neit also enheilde, breiche und darweder dede, der selvige sall myme eirwerdigen lieven Hern myt XXV Goltgulden und dem gericht mit XXV Goltgulden erfallen syn. Nochtant solde dese scheidonge van werde in irer macht stayn bliven und gehalden werden.

Darby synt deser zedelen zweyn durch de bostaven A, B, C, D, uis eynander glichludende gesneden, der Knutgen eynen und Matern und Merten den anderen vurscrevenen haven, umb sich eder darna have zu richten.

A II/11 1521

Bl. 2^v

In bywesen Alner, schoultis, Beyssell, Rump, Zwyvell und Loe, uff vridach na dem sondage oculi, im jair XVC XXI.

Item, tuschten Tilgen Kuntgen und Herman Woilffs irer beider huiser, dar Kaldaue, Her Gysgen, Preitger, herin zu wanen plach und dat andert Judenbart geheischen, in der Houltzgassen gelegen, hant beide parthien vurschrevenen scheffen overgegeven, daby de scheffen solchs besichtigt und verdragen, also dat Herman Woilff anstont, de perfey hebevor sall affdoyn, davoer eyne muyre bis hynden eyn stuck, da eyne alde muyre unden in der erden befonden ist, van Knutgens huisse hyndenher, tgen den veirdenhalven scheicht machen sall, der gestalt de perfey da zu syn, davan dan vort sall Kuntgen das pletzgen garden zu syme huisse haven und der perfeyen also over syn guit gebruichen. Solchs ist myt durch gunst und zulaissong Johan Kesselslegers geschiet, umb de parthien de baß zu vreden syn, und de soen sall tuschten Herman Woilff und dem Kesselsleger over des guit bys ande straisse gayn.

A II/11 1530

[durchstrichener Vermerk von anderer Hand]

Anno et cetera XXX, donnerstach na Laurenty, vermytz scholten und scheffen, alle sewen, ys dyt vurscrevene noch eyns beleyt worden und bescheyd gegeve[n], dat Herman Wolff den bowe afflagen off affdoen sall, dey eme under syne da...

A II/11 1521

Bl. 2^r

Alner, schoultis, und Zwivell, scheffen, van irem geheischs uff dach und datum vurscreven.

Item, hait veir ort Kremer solch huiss, as eme umb grontzyns und schoult van Johan Geislairgens vrouwen bekomert was, in irem huisse in eyner kysten beslossen was, verburgt und overmitzs Johan Schutzs und Peter Loer besichticht als burgemeisteren.

Solcht Johan Sloßer by dem Bruhoeve untfangen, we herna voulgt.

Zom irsten,

item II zynen halffkannen,

1 pyntvlesche,

V zynen schuttelen, grois und cleyn,

III mostertzsschuttel,

VI kufferen dupger,

V kesselger, synt zweyn gelapt,

1 alte schartze,

1 alt slaiffdoich,

1 dygelgen,

II messich luchter,

II messich schalen,

an wagen II pengen,

1 dischdoich,

1 zynen teller, 1 saltzvass, VI ißen leffell, IX deckell,

1 rysst [? pyfft? ryfft? pysst?],

1 veill boir[?], II kruitbussen [?],

III hultzen luchter.

1 keyßkorff, 1 hantdoich, 1 thosgen, hultzen teller,

II blyengewicht van IIII off V ponden,

II branrichten,

1 klufft,

II alder betger, vedern und flocken,

1 fuyrhaich, 1 lenge haich,
1 wister[?], 1 alte scheire,
1 frauwenstoill und
1 leitgen myt bryllen.

A II/11 1521

Bl. 3^v

Hervur ist burge, dat byeynander zu laissen und vur de ansprache de vrouwe an veir ort deit Johan Slosser vurscreven.

In bywesen Johan Schutzs und Peter Loer, burgemeisteren, uff vurscrevener zyt.

Item, ist Engelbright van Seilbach, Wilhelms son, umb syner undoigden und moitwilligen handels, hey uff den irsten donrestach in den wynhuisscher bedreven, daromb hey alhe gefencklich gesessen, uff desen dach wederomb uiskomen, darby geloiff und lyfflichen zu Gode und den Hilgen gesworen, solch gefencknys an myme gnedigen lieven Hern, Hertzouch zu Guilge und zom Berghe et cetera, myme werdigen lieven Hern, dem abt, und myme gnedigen Joncheren van Seyne et cetera, iren F[urstlichen] g. und gnaden ire undersaissen und de umb den willen doyn off laissen willen, nimmerme zu rechen, noch wrechen, noch schaffen gedayn werde umb eyncrley sachen willen und dat also stede und veste zu halden, sonder alle argelist.

Darvur ist mytburge worden Wilhem van Seilbach, syn vader.

A II/11 1521

Bl. 3^r

Alner, Gauwyn vam Huyß, Beissell, Rump und Loe, uff vurscrevener zyt.

Item, Johan, Lodwichs uff dem Hogensteynwege, Herman Vlach der jonge und Johan Knutgen, irer slacht halver, daromb sy am rechten gestanden et cetera. Hant vurscreven scheffen durch der parthien naberschafft irer eyn zu dem anderen have van gericht und sich zu guitlicher vereynongen genomen und verdragen, also dat dat sich eder zom anderen liefflich fruntlich als genaber und vrunde halden soll, irer eyn dem anderen zu doyn, eme lieff und wert ist. Ouch soll alle schaden verbeden ist, eder parthie gehat hait, liden und dragen und geyner an dem anderen geynerley sachen van bruchten, smertzen off anderen schaden daruis erwassen, ansprache nochforderunge haven, dan derhalven also liefflich und fruntlich gescheiden syn und bliven. Und welcher des neit enhelde, solde myme Hern und dem gericht myt X Gulden ervallen syn.

Alner und Zwivell.

Item, Wilhem Verffer hait erloiffnis solche erwynungs syn vurfader, nemlich IIC Gulden uff Johan Blanckenbergh geschiett, lude des gerichtsboichs und breve und sigell, Wilhem dat zu penden

Bl. 4^v

und umbzuslayn, we recht ist, darby de ire urkonde untfangen.

Alner, in syme bywesen, uff saterstach na oculi, anno et cetera [15]XXI.

Item, Kanffenheuwer hait Hynrich Mant in de leistonge gemant, vur eynen burgen und zumme van IX Mark. Vur eynen wirt hait Hynrich gekoren Clais, syn broder.

Der schoulten hait eme VIII dage van gerichtswegen dach gegeven.

~~Item, tuschent Teill Knutgens und Matern zu Bon myt synen mytgedelyngen, daromb sy alhe am rechten gestanden, synt gescheiden und verdragen, lude uifgesneden zedele, eder parthie eynen und an untfangen und zu sich genomen et eetera. Und uff eyne pene darweder dede, an weme dat were, myme Hern und dem gericht myt vunffzich Gulden erfallen zu syn.~~

A II/11 1521

Bl. 4^r

Johan Schutzs, burgemeister, und Godart zom Ryßen, rentmeister, in irem bywesen, uff vridach na letare, anno et cetera [15]XXI.

Also Heyntz Vlach umb etlicher scheltwort und versprechens, hey gedayn solde haven. Daromb hey alhe zu Siberch im gefencknys gesessen und uff desen dach wederomb uiskomen ist. Hait vurscrevener Heyntz geloiff und zu den Hilgen gesworen, solch gefencknys an myme gnedigen lieven Hern, Hertzouch zu Guilge und Berghe et cetera, an myme werdigen Hern, dem abt, und an eyne Grave van Seyne et cetera, an iren gnaden undersaissen, an alle den ghenen und irentwegen doyn off laissen willen, an eyner stat van Siberch noch an alle den ghenen in herzu bracht, rait off dait darzu gegeven haven, nimmerme zu rechen noch zu wrechen, myt worden off werken off geschaffen gedayn werde, derglichen verloiff hey, geyne lange metzer bynnen Siberch dragen noch niet me darbynnyen spelen en soll und dat also stede und veste zu halden, sonder alle argelist.

A II/11 1521

Bl. 5^v

Ailbricht van Alner, schoulten und Johan Schutzs, burgemeistere, in irem biwesen, uff saterstach na letare, anno et cetera [15]XXI,
 hait Johan Aldenach zom Voiß gesacht und bekant, we hey Clais Lymberg syne huiß, gnant dat
 Gensseheufft, in der Houltzgassen, myt eyme gertgen darhynden gelegen, verkaufft have und eme och
 denselvigen gartten overmitzs naber und guide vrunde darby und over geweist synt, uisgereynt und gesteynt
 have. Und naderhant have hey Her Herman Blanckenbergh syn huis, dat Paradys geheischen, dar beneven
 gelegen, glichermaissen verkeufft und gewyst, dartuschent dry steyne gesatzs synt umb dat eyn eder wysse,
 wo hey wenden und keren sall.

By den steynen de gesatzs worden, geweist ist, Johan zom Iserenmart, Peter Kreich, Goebell, syn son, und
 Hynrich, des vurscrevenen Clais broder.

A II/11 1521

Bl. 5^r

Anno et cetera XXI, uff mayndach na dem sondage quasimodogeniti.
 Van bevell Joncher Leyen, van wegen myns werdigen Hern, hant de boden Wynant Peler umb eyne eiche by
 syme geboymt houltz im Lomerwalde, dat ungeboymt was, vonden. Vur de ungehorsamheit als de bruchte
 vur V Mark gepant, II kufferen duppen grois und cleyn und uff de finster II quart wyntzs gedroncken.

Van geheischs Joncher Volmar van der Leyen, amptman et cetera, im selven jair, uff dynstach na dem
 sondage vurscreven.
 Na gewißdomb der scheffen hant de boden Greitgen, Herman Wymars seligen doichter, van Wilhem Verffer
 umb IIC Gulden erfolgnys vur pende gegeven den inbouwe in deme huisse zom Beren, we der da steit et
 cetera.

A II/11 1521

Bl. 6^v

Alner, schoultis, in syme biwesen, uff dynstach na dem sondage cantate, anno et cetera [15]XXI.
 Item, Peter Luyr, burgemeister, hait uffgeboden eyn bette van XVI striffen myt iren poillen, eyn
 krallenpaternoster myt eyme silveren jorgen und eyn alt budelgen myt etlichen perlen bestickt, darzu II
 cleyner ryngelger myt V taiffelger zusament steit XIII Kolnische Gulden und VI Schilling uffzubieden,
 zugehorich Girtgen zom Nuwenhuiß.
[Nachschrift.] ist geschat dat bette III Kolnische Gulden, paternoster, jorgen und budell X Kolnische Gulden,
 eyn rynt VIII Gulden, zu schetzen XXII Albus, so overt noch 1 rynck und XXIII Albus, vor Seichtem et
 Cobberode, anno [15]XXII.

Overmitzs vurgenante schoultis, uff deselwe zyt.

Item, hait Lodwich Roitgen in de leiste gemant Johan Kanffenheuwer vur eynen burgen eyne zumme van V
 Mark, II Albus heufftgeltzs, VI Schilling uffzubieden, herkommen Dedrichs van Happenschos und vur eynen
 wirt gekoren, Wynant uffme Steynwege.

Alner, schoultis, und Beissell, overmitzs deselvigen, uff godenstach na dem sondage exaudi, anno et cetera
 [15]XXI.

Item, hait Johan Aldenach, ~~rentmeister~~ zur tzyt, schetzen lassen eyn crallenpaternoster, zugehorich Johan
 Braß seligen, geschat uff XII Mark. Davan zu schetzen 1 Mark.

A II/11 1521

Bl. 6^r

Beissell und Zwivell, uff godenstach na dem sondage exaudi, anno et cetera [15]XXI.
 Peter Loer, burgemeister und Guitgen, syne elige huisfrauwe, hant gegeven und upgedragen irer eynt dem
 anderen alle ire guider, gereit und ungereit, wae und we de gelegen synt off hernamails eyncherwyse gelegen
 moichten werden, neit darvan uißgescheiden, de leste levendige hant van in beiden, de zu keren und zu
 wenden, na irem willen und guitevallen et cetera. Doch off sy eyniche testamenten machen wurden, heean
 neit hynderen und in irer macht gehalden zu werden.

Alner, schoultis, und Loe, uff dynstach, sent Barnabasdach, anno et cetera [15]XXI,
 hait Herman Becker an der Alderportzen und Grede, syne elige huisfrauwe vur uns gesacht und bekant, dat
 sy solchen XXVI Albus jarlicher renthen, als Johan Schutzs, burgemeister, und Schemell Johan in dem

huysse zur Ketten jarlichs vallen hatten da uis, in ire huis an der Alderportzen vurscreven genomen haven und nun vortan jerlichs uff dat hogetzyt Pinsten geven und betzalen sollen. Und willen vurscrevene burgemeister und Schemell Johan iren erven et cetera so dat solch huis zur Ketten nu derhalver gefryet ist, doch genanten eluden und iren erven inbehalden, de affloese uff vurcreven hogetzyt myt XXVI Kolnische Gulden und eyne erschenen termyne.

A II/11 1521

Bl. 7^v

Overmitzs deselvigen, uff vurscrevener zyt.

Dederich Loer und Eiffgen, syne huisfrauwe, hant gegeven und upgedragen, in der zyt als sy des wall moegich und mechtich waren, ire stoeffgen beneven irem huße zur Ketten und Herman Beckers huße an der Alderportzen, dem obgnanten Herman Becker und Girden, syner eliger huisfrauwe, dergestalt, van nun vortan zugehorich syn und zu denen zu dem huisse an der Alderportzen und darby zu bliven und gelofft wertschaffft zu doyn. Und Herman, off wer dat huis besitzen wirt, sollen de kalle tuschen in beiden halden, bussen schaden des andern gehuß.

Overmitzs deselvigen und uff vurscrevener zyt.

Dedrich Loer und Eiffgen, syne elige huisfrauwe, hant vur uns gesacht und bekant, dat sy erfflicher jairlicher renten schuldich worden synt und geven sollen, nemlich VIII Mark, we zur tzyt zu Collen genge und geve synt, van eyme hußgen, gnant Bulichshuisen, up der Mar bußent der Molenportzen gelegen, alle und iecklichs jars uff Unser Liever Vrouwendach Bedroiffnys, off bynnen den neisten XIIIII dagen, den brodermeistern Unsser Liever Frauwen vurscreven, gnant de loirbroderschafft, und zu der behoiff et cetera. Und umb dat de brodermeister der VIII Mark jarlicher renthen sicher syn und bliven moigen, hant vurscrevene elude in zu eyme underpande gesatzs und gegeven ir huis, zur Ketten geheischen, sich alsdan daran zu bekommen der erfflicher renten vurscreven.

A II/11 1521

Bl. 7^r

Alner, schoultis, uff dach datum vurscreven.

Herman uff den Hoeven, waltknecht des Lomerwaltzs, hait uffgeboden II kufferen duppen, zuge[ho]rich Wynant Peler. Kost uffzubieden VI Schilling.

Gauwyn vam Huyß, Alner, beide schoultiße, Beissell und Loe, uff dach datum vurscreven.

Tuschent den hospitalsmesteren, myt namen Kirstgen Klapperbach und Heyntzs van den Bucken, eyns und Bernt Wide anderdeils, umb Petz Lutzgens huß, beide parthien erffgrontzyns inhaven, och eder van in besonder am rechten daromb gestanden, etlicher maissen uisserdyngt haven als nemlich vurscrevene huis dem Hospitaill jairs geldende IIII Mark grontzyns daruff deselvigen XI Gulden, 1 Ort, versessens erwonen haven. Und dwile dan Bernt syn erfolgnys nu och eme dat huis jars me geldende ist, hant de scheffen vurscreven der vrouwen armoit angemyrkt und dese beide parthien daromb entscheiden und verdragen, also dat Bernt Rode den hospitalsmesteren irs gewyns und verseß geven soll VI Overlensche Gulden, der IIII uff sent Merten neistkompt over eyn jair und de ander

Bl. 8^v

III Gulden den sent Merten over eyn jair obgenanten hospitalsmesteren vernogen und betzalen saell, ayn argelist.

Und dat ander gebrech, nemlich V Gulden, 1 Ort, soll der frauwen zom besten bliven. Sust sollent de hospitalsmesteren ire IIII Mark grontzyns an vurscrevenem huße jars vorderen und uffheven, zu behoiff des Hospitalis vurscreven. Und Bernt mach syne IX Mark renthen derglichen gesynnen und de frauwe vur de obgenanten VI Gulden och syn erfolgnys penden, als recht ist et cetera.

A II/11 1521

Gauwyn vam Huyß, Alner, schoultis, Beissell und Wilhem Leye, anno et cetera [15]XXI, uff dynstach na sent Johan Mytzsomer.

Tuschent Dedrich Cleissgen zu Blitzem und Thys Molenkoven irer sachen de van Blitzem betreffen und alhe vur gericht gewest synt, oirsachen dwile Dedrich syns vermeß und lesten affscheitzs vergessen und neit genoich gedaen hait, derhalver Dedrich in de kost und zerong geweyst ist, vur de scheffen zu betzalen int irste uff mayndach vur Pinsten.

De scheffen vertzert XI Mark und 1 f wyntzs, so Dedrich uisbleven was, uff dynstach sent Barnabasdach, Dedrich syme vermeß neit genoich gedayn. De scheffen vertzert III Overlensche Gulden und uff

Bl. 8^r

dynstach na sent Johansdage vertzert IIII Gulden, IIII Albus, heirzu den scheffen iren loyn, int erste der amptman und V scheffen zusamt dem schriver, vur iren ustzioch und loyn eder eyme 1 Goltgulden, macht VII Goltgulden, und uff dynstach na sent Johan Mytzsomer, der amptman und IIII scheffen zusamtz des schrivers, eder eyme we vurscreven 1 Goltgulden. Dat macht also zusament des gerichtsloyn we obgenant ist XIII Goltgulden. Darvur ist burge Teill Verffer, lude syner schrifft van schoilt, scheffen zu Blatzem.

Alner, schoultis, und Wilhem Ley, uff vurscrevener zyt.

So Joncher Volmar van der Leyen, als amptman, de burgen van Dedrich Cleisgen und Teill Verffer we obgnant darvur zu eyme burgen genomen und Joncher Leye de XIII Goltgulden, dwile Teill des neit also uißzugeven willich was, dargelacht hait, dannoch Teill dem vurscrevenen Joncher Leyen vur pende gegeven 1 zynenflesch, und alle dat gheve hey im huisse hait. Des hait

Bl. 9^v

Joncher Leye den wyn im keller als vur de XIII Goltgulden vurscreven gekoren et cetera.

Alner und Wilhem Ley, uff vurscreven dach und datum.

Hyntzs Rock und Elsgen, syne elige huisfrauwe, hant overgeven und uffgedragen ire vorderong und gerechticheit sy an dem Zynckellputz haven, cleyn noch grois, neit darvan uisgescheiden, Dedrich an dem Zynckelputz und Irmgen, syner eliger huisfrauwe, vur sich und ire erven, und geloift werschaff zu doyn.

Alner, uff godenstach na sent Johan Mytzsomer, anno et cetera [15]XXI.

Item, Clais Lymbergh hait in de leisten gemant Coynrait Schroder vur XII Kolnische Gulden erffschafft zu doyn durch Wilhem Wynterschit.

Hait der schoultis eme dach gegeven, bis man zu Geistongen dyngen wirt irstkompt, alsdan de erff zu vollenbrengen, dwile dat guet dar dynckplichtich ist.

Hait vur eynen wirt zum Isermart gekoren.

Kost uffzubeden VI Schilling

A II/11 1521

Bl. 9^r

Alner, schoultis, uff sent Laurentiusdach, anno et cetera [15]XXI.

Johan Roide hait in de leiste gemant Peter zum Rodenhuis vur eynen burgen eyne zumme van II Kolnische Gulden, herkommen Meus Kirstgen van Droistdorff, Joncher Leyen halffen.

Kost in zu manen VI Schilling. Hait eynen wirt gekoren zum Isermart.

Hait der schoultis eme XIII dage dach gegeven.

Overmitzs vurscrevenen schoultis, uff deselve zyt,

hait vurscrevener Johan Roide in de leiste gemant Lodwich Mudder vur eynen burgen eyne zumme van VI Kolnische Gulden, herkommen van Greitgen van Wande.

Kost in zu manen VI Schilling.

Hait zum Iserenmart den wirt gekoren und der schoulten eme XIII dage van gerichts wegen dach gegeven.

Alner, schoultis, uff sent Bartholomeusavent, anno et cetera [15]XXI.

Johan Kanengeisser hait uffgeboden eyne sangwynen fucke vur X Mark, zugehorich Arnt Schomecher.

Hait der schoultis eme XIII dage dach gegeven.

Kost uffzubeden VI Schilling.

A II/11 1521

Bl. 10^v

Alner, schoultis, uff mayndach na Bartholomei, anno et cetera [15]XXI.

Johan zom Iserenmart hait in de leiste gemant Wynant Schelten vur eyne zumme van III Kolnische Gulden, IIII S[chilling], herkommen van Johan Schomecher van Seilschit.

Hait Wynant vur eynen wirt gekoren in den Isermart.

Kost in zu manen VI S[chilling] und eme acht dage van gerichts wegen dach gegeven.

Overmitzs denselvigen, uff vurgenanter zyt.

Derselve wirt zum Iserenmart hait in de leiste gemant Bestgen Vassbender vur eynen burgen und eyne zumme van VII Kolnische Gulden und 1 foder vaß, herkommen van Johan Hilger van Wipperfurde.

Hait wur eynen wirt gekoren zom Iserenmart.
Kost in zu manen VI Schilling.

Johan vam Zwivell, overmitzs denselvigen, uff sent Lenartzsdach, anno et cetera [15]XXI.
Johan zom Iserenmart hait in de leiste gemant Baltasar Vleischeuwer vur eynen burgen und eyne zumme van XXXVII Gulden, herkommen van Johan Schomecher van Seilschit.
Hait wur eynen wirt gekoren. Johan Wirt vurscreven.
Kost zu manen VI Schilling. Und der scheffen hait eme VIII dage dach gegeven.

A II/11 1521

Bl. 10^r

Overmitzs denselvigen, uff vurscrevener zyt,
hait derselve Johan zom Iserenmart in de leiste gemant Berent Bartscherer vur eynen burgen und eyne
zumme van XII malder korns, herkommen van Hern Johan Roiß, sengher uffm Berghe, wilcht Joncher Leye
van wegen myns wurdigen lieben Hern verboden, we syne Eirwerdigeit ire Hern in geyne leistonge gemant
noch daruff geleist wille haven.

Alner, Beissell und Loe uff sent Elisabethdach, anno et cetera [15]XXI.
Johan zom Wolffé hait in de leiste gemant Johan Hoiffnagell vur eyne zumme van XVI Albus uff eyne
rechenschafft, herkommen van deme smyde van Grymbergh.
Hait wur eynen wirt gekoren Meus Becker und hant eme van gerichtzs wegen VIII dage dach gegeven.
Kost VI Schilling.

Overmitzs deselvigen und uff genanter zyt.

Johan Vogelgen und Drude, syne huisfrauwe, hant gesacht und bekant, solche belenonge, nemlich XVIII
Gulden umbtrint, sy an dem garten, Meus Zamps zugehorich, vur der Houltzportzen, tuschten dem
presenßmeister und Kelterboym gelegen, hatten, dat gelt also van Meus wederomb uffgeboet und untfangen
haven und sich des also guder betzalogen bedanckt und gentz-

Bl. 11^v

lichen daruff vertzygen, damyt Meus den garden derhalver weder gefryet und gequiert hait.

Overmitzs deselvigen und uff vurgenanter zyt.

Meus Zamps und Merghe, syne huisfrauwe, hant denselven garden verkeufft und uffgedragen Johan Girachs
in der Uilgassen und Petzen, syner huisfrauwen et cetera. Und geloifft werschafft zu doyn.

Overmitzs deselvigen, uff vurscrevener zyt.

Adam Steynmetzer in der Uilgassen und Freugen, syne huisfrauwe, synt ankommen myt huiß, hoff, garden
zom Birboym in der Uilgassen, tuschten Johan Symons zu beiden syten gelegen, in anerstorven und zugeerfft
ist van Peter Scheiffer seligen und syner huisfrauwe irem swegerhern, vader und moder, und solch ire
gerechticheit sy da[r]jan haven, neit davan uißgescheiden. Hant sy vort verkeufft und uffgedragen Anno, des
vurscrevenen Peter Scheiffers son, und Engell, syner huisfrauwe irem swaiger broder und swegeren, myt in
und uißgulden neit van uißgescheiden.
Und geloifft werschafft zu doyn.

A II/11 1521

Bl. 11^r

Loe, uff avent Marien Praesentatio, anno et cetera [15]XXI
Johan Roide hait in de leiste gemant Johan Kenffenheuwer vur eynen burgen eyne zumme van XIII Albus,
herkommen van Johan Peler, Wynantzsteiffson.
Hait wur den wirt zom Iserenmart gekoren. Eme acht dage dach gegeven.
Kost VI Schilling.

Vermytzs denselvigen, uff genante zyt.

Derselve Johan Roid hait zu leisten gemant, Bernt Bartscherer vur V ½ Mark, herkommen van Thelen zur
Molen.

Hait wur eynen wirt gekoren.

Kost VI Schilling.

Overmitzs denselvigen, uff vurscrevener zyt.

Heyntzs zom Somberen hait zu leisten gemant Peter zom Aren eyne zumme van VII Kolnische Gulden, 1 Goltgulden und X Albus, herkommen van Poilman zu Luithuissen.

Hait vur eynen wirt gekoren. Und der scheffen hait eme VIII dage dach gegeven.
Kost VI Schilling.

A II/11 1521

Bl. 12^v

Meister Johan Schutzs, Godart zom Reesen, beide burgemeisteren, Peter Lair, rentmeister und Aldenach, kurmeister vur denselven, uff dynstach na Kathrine Virginis, anno et cetera [15]XXI.

Peter Glaßmecher hait willen beleiden myt Gretgen zur Lynden und Zylie Blanckenberchs, we dat Herman Leyendecker en sondach zu avent und neichtent spade, im donckelen avent vur syn huis komen sy und syne huisfrau eyne hoir und ovell gescholden have.

Hant vurscrevene Gretgen gesacht, we sy in irem huisse geweist sy und Zylie derglichen uff der straissen gegangen und gehort haven, dat der Leyendecker und des Glaßmechers huisfrau sich undereynander gescholden haven und getzweyet et cetera.

Der Glaßmecher hofft und begert, dat widers zu beleiden.

Vur vurscrevenen burg[e]meisteren, des anderen dags.

Herman Leyendecker vurscreven hait willen beleiden myt denselven perschonen vurscreven, we des Glaßmechers huisfrauwe in irstmails gescholden, in eynen dieff und verreder geheischen have.

Hait der Leyendecker overmitzs den boden zu den perschonen geschickt, solchs van sich zu doyn. Synt sy neit kommen und uißbleven et cetera.

A II/11 1521

Bl. 12^r

Johan vam Zwivell, overmitzs denselvigen, uff sent Kathrinavent, anno et cetera [15]XXI.

Vais zur Blomen und syne huisfrauwe hant zu leisten gemant Johan zom Wolffe vur eyne zumme van XXXIII Gulden, ader Heynrich Molenarcken van Eitorff.

Hait vur eynen wirt zum Iserenmart gekoren. Hait eme VIII dage van gerichts wegen dach gegeven.
Kost VI Schilling.

Godart zom Resen, burgemeister und Aldenach, kurmeister, uff sent anno eps[?]dach, anno et cetera [15]XXI.

Gotschalck im Dailhoeve hait eyn vercken, deße vurscrevene besichtigen laßen und vurbracht, Arnt Schomecher in syme gertgen in den ruck, hynden uff den ars gehauwen have, wilcht vercken vurscrevene burgemeister und kurmeister geacht und geschat uff XII Albus. Alsdan Arnt dat vercken zugewyst und zu sich zu nemen und Gotschalck syn gelt.

Kost VI Schilling.

Beissell, overmitzs denselvigen, uff mayndach na Conceptionis Marie, anno et cetera [15]XXI.

Heyntzs zom Rosenbouym hait Vais zur Blomen lassen fragen solche VII Goltgulden hey eme noch schuldich ist van dem verdrage der erffmaiß und syn maich Joncher Wilhem verdragen, herkommen lude eyner hantschrift, off Vais dat vur syne schoult anneme ader burge darvir sy.

Sprach Vais, hey wille dat betzalen.

Kost VI Schilling.

A II/11 1521

Bl. 13^v

Beissell, uff dynstach na Conceptionis Marie, anno et cetera [15]XXI.

Johan van der Heiden uis dem Kirspell van Muyche hait zu leissten gemant den wirt zum Iserenmart vur eyne zumme van V ½ Mark, herkommen van dem pastor van Steildorff.

Hait vur eynen wirt gekoren.

Kost zu manen V ½ Schilling.

Gauwyn vam Huis, Beissell, Loe, Rompe, Seichtem et Leye, uff dynstach na Conceptionis Marien, anno et cetera [15]XXI.

Meus Zamps huisfrauwe hait richtlich beleit myt Godart zom Reesen, we dat Johan Vogelgen ir zwaen amen wyns verkeufft und ir darin etlich zusage gedayn have. Und so sy den wyn heym gefort, have sich de zusage neit also vonden, auch we de frauwe dem Vogell IIII Gulden daruff gegeven have.

Overmitzs deselvigen, uff vurscrevener zyt.

Wilhem Wynterschit hait beleit myt Kirstgen Schoultis we hey zu Geistongen geweist by Wilm Wynterschit und Johan an der Alderportzen umb eynen kouff Johan Wilhem syne lyfftzucht daselffs verkeufft have. Wilhem have Johan och des geltzs endeils gegeven, und vur dat ander have hey eme Kirstgen obgenant zu burgen gesatzs zu betzalen. So have Johan in och damyt daselffs geerfft, we da lentlich ist Kirstgen kondich.

A II/11 1521

Bl. 13^r

Overmitzs vur scheffen, uff deselwe zyt.

Tuschent Johan Aldenach und Hynrich Smytzs umb den Gulden renthen, Johan Aldenach in dem Iserenmart Hynrichs huise vergulden, in der lichter montzen. Hait der scheffen geweist, Aldenach solle den Gulden renthen heven Radergeltzs myt verlichnonge der lichter montzen na dem Goltgulden, we der zu der zyt, als hey dat gelt uisgegeven, gegulden hait, und de besseronge davan, off der wat were, solde zustayn den erven, hey solchs van kriegen have.

Vur denselvigen.

Hynrich Smytzs hait beleit myt Johengen Jucks, der vur gericht gesacht und bekant, we hey Hynrich den Iserenmart myt aller nutzicheit und besserongen verkeufft have.

Et die.

Johan Knutgen und Johan Vischpach synt overmitzs de scheffen vur gericht verdragen, dat Vischpach eme de IIII Goltgulden in den neisten veir jaren, eder jair 1 Goltgulden, betzalen soll, die nun uff desen neisten meydach angayn sollen, ader Vischpach solde asdan zu Thorme gesatzs werden.

A II/11 1521

Bl. 14^v

Deselwe zyt.

Kerstgen Schoultis hait gesacht, we hey darby an und over geweist, Johan an der Alderportzen syne lyfftzucht Wilhem Wynterschit verkeufft have und vur des geltzs hey endeils burge worden sy. Und Johan have Wilhem och damyt zu Geistyngen geerfft, we da recht ist.

Alner, schoultis, und Beissell, uff godenstach na Conceptionis Marie, anno et cetera [15]XXI.

Johan Moeseler, vasbender, und Metzs, syne elige huisfrau, hant gegeven und uffgedragen irer eynt dem anderen alle ire guider, gereit und ungereit, we de dan synt, neit darvan uisgescheiden, de leste levendige hant syn levenlanck zu gebuchen, und alsdan solchs in de Kirche komen und zu der behoiff vallen solle. Aver so Metze ehe Johan affgayn woede, solde na irem dode zweyn irer bester rock und ire cleynot in de Kirche ervallen und gegeven werden.

Beissell und Rompe, des anderen dags im selven jair [1521].

Severyn Kremer und Irmgen, syne elige huisfrau, hant in der zyt sy des woll moigich und mechlich synt verkeufft und upgedragen XVI Albus erfllicher renthen, uff sent Mertynsdach im wynter zu betzalen, uis irem huisse zum Roden Lewen, an der Groemelportzen gelegen, myt dem garden synem zubehore Hern Bl. 14^r

Tilman zum Schaiffstall synen erven und sonderlichen in syn huis den Cleynen Schaiffstall denen und inkomen sollen. Also wer den Cleynen Schaiffstall kriget und zuvallen wirt, deselvigen XVI Albus renthen mythaven und so daby altzit blyven und gehorich synt, geldende Severyns huis jairs in de kusterye 1 pont wass. Und geloifft werschafft zu doyn.

Alner und Rompe, uff vridach sent Lutziendach, anno et cetera [15]XXI.

Joirgen zu Keir und Engen, syne elige huisfrau, hant verkeufft und upgedragen ire hoiffstat und stoiffe tuschent dem Cleynen und Groissen Spiegell gelegen, eyn hoiffgen hynder dem Spiegell und eyn stelgen beneven Greten zum Hirtzs gelegen, myt iren zugehoren, loß und vry, Joenen zum Esell und synen erven,

also so vurscrevene eluiden huis der Groisse Spiegell und syne erffschafft jairs uff den geldende ist VI Albus deselvigen in dem Groissen Spiegell blivent sollent, sonder Joenen schaden. Und gelofft werschafft zu doyn, so verne der gronther des zyns belieft.

Alner, Schoultten, uff deselve zit.

Der Kannengeisser hait upgeboden eyn banckdoich myt maxsoisger[?] gebloymt, zugehorich Meus Zamps vur III Kolnische Gulden.

A II/11 1521

Bl. 15^v

Overmitzs deselvigen, uff vurscrevener zyt,
hait Peter Roitgen begert und beleit so vurscrevene scheffen und dem gantzen gericht neistleden kundich ist,
Clais Lymbergh durch synen vursprecher Joncher Beissell hait laissen sagen und horen, Peter eme eyn
buchlyns doich geboden solle haven, umb hey alsdan vorder unwillingens van eme untdragen und myt vreden
solde bliven und des syn urkonde int gericht geworffen.

Alner, Beissell, Seichtem, Rompe, Loe und Wilhem Ley, uff vurscrevener zyt [1521].

Myn erwirdiger Here abt, in biwesen Hern Kobberode, presenßmeister, Joncher W. de Bernßauwe, Joncher Volmar van der Leyen, myt anderen syner erwirdigen amptz heren, besichtigen und beleiden laissen, myt burgemeisteren und rait der stat Sigberch und anderen umb solche houltzs Kirstgen Clapperbach an der Molen im Molengraffen gefyscht und heym genomen, zugehorich Johan Broicher geweist. Also dat deselvigen burgemeisteren und rait myt anderen gesacht, gewyst und bekant haven, solcht uff Sibergschen gronde myns erwirdigen Hern und der stat zugehorich, geschiet ist und noch me dabynnen dan eyn armborstschos wegs et cetera, int geynwordicheit Hern Thonis, paster, und Rutger van Gleen und Johan Becker de deselve nacht vischen wolden und Kirstgen vurscreven dar hoirten und fonden, so de uff de platzs qwamen und myt gesoicht, sy des anders, umb der donckelheit willen neit hedden konnen geseyn noch vernemen. Allet in bywesens Clapperbachs vurscreven.

A II/11 1522

Bl. 15^r

Overmitzs Johan Schutzs und Godart zom Reesen, burgemeisteren, uff sent Johansdach Ewangelist, anno et cetera [15]XXII.

Wynant Peler hait beleit myt Kirstgen Walraiffs, Kirstgen am Wyer, Dedrich zu Berchoven und Thomas an der Lynden zu Overkassell. Deselvigen gesacht, sy daby geweist, geseyn und gehort hebevoren uff eyne zyt zu Heisterbach, dat Johan Vogell van Siberch geweist uff eyner kirmyßen. Und dese vurscrevene IIII man de van wegen des Heren hoden sollen, have Kirstgen Walraiff zu dem Vogell gesacht, off hey myt syme swegerhen zuvreden sy. Do have der Vogell gesacht, wa sy dat seichten, deden sy als deiff und verreder. Wilcht have Kirstgen Walraiffs verorkunt.

Schutzs, burgemeister, Aldenach, kurmeister, uff saterstach nach Valentini, anno et cetera [15]XXII.

Peter Peler hait beleit myt Peter van Heiden uißme kirspell van Nuynekirchen, der gesacht und bekant hait vur vurscrevene, we hey desen neisten herwest vergangen over eyn jair, eyn stirenvell, dat eme zu schoynen zu dick was und darzu neit gedeynt have, dem obgenanten Peler bracht, und dat myt eme umb eyn ander vell gebuyt und darvir untfangen have und solchs myt syme eide behalden wilt.

A II/11 1522

Bl. 16^v

Overmitzs Johan Schutzs, burgemeister, und Johan Aldenach, kurmeister, uff godenstach na sent Benignusdage, anno et cetera [15]XXII.

Wynant Peler hait in affwesen Peter, syns steiffsons, beleit myt Gehart Schomecher und Johan Veldener, de gesacht und bekant haven, we Gehart obgenant uff sent Severynsdach neistleden in Peter Pelers vurscreven huys komen sy und syne vell, nemlich IIII velle, de hey by eme in der loe hatte, weder gesont we hey der behovich were zu verarbeiden et cetera.

Doch wewoll Peter des umb des hilgen dags willen neit gerne zuleisse, dan noch eme de vell gelaisseen. Do haven Gehart und Johan vurscreven de IIII vell irst affgenomen. Und darnia have Peter begert, sy eme syne vell, der ouch IIII was, und hait gemacht waren helffen uisdoyn, wilchs de gedayn haven. Und der vell have Peter anstont eyn dat beste zu lappen gesneden und gesacht, solchs were unser liever Frauwen und vur X Mark gegulden. Und deselven haven ouch geyne vell neit me da geseyn noch fonden et cetera.

A II/11 1522

Bl. 16^r

Schutzs und Godart zom Resen, burgemeisteren, uff dynstach na sent Mathys, anno et cetera [15]XXII. Johan Rode hait beleit myt Hynrich Vasbender, so Dreis Schroder en sondach neistleden in Johans huis zu wyne gesessen und syn gelaich vertzert, have Hynrich vur der duyr gesessen und gehoirt Johan Rode vur syner teecken, Dreis syn gelaich geheischen have. Do have Dreis gesacht, hey have syn gelaich dargelacht. Davan Johan neit zu wyssen was und syn gelaich noch geheischen zu betzalen und gesacht, hey wolde eme am lesten de henschen neit schicken noch borgen. Hey wulde ouch nu syn gelaich haven. Do have Dreis sere gebalcht, Gotzs marterlyden und fleischs gesworen und Johan heischen legen und gesacht, hey hette eme doch synen budell myt dem gelde gegeven und eyn hontzfuyt geheischen und gesacht, hey wolde woll eynen gebur in den keller werffen und do glich zu eme getreden. Do have in Johan myt der fuyst geslagen, vort myt dem weydemetzs und gesacht, heischt du mych in myme huisse legen, darzu drewes in den keller zu werffen, do moist ich umbers by syn und vermeint umbers in myme huisse vry zu syn.

A II/11 1522

Bl. 17^v

Joncher Leye, amptman, *[Johan]* Schutzs und Godart zom Resen, burg[e]meisteren, uff godenstach na Mathei, anno [15]XXII, in irem bywesen.

Johan Brocher und Volmar Loir als amboichsmeister hant gesacht, so Peter Scholleneissers huisfrauwe by sy kommen ist und begert have, sy eyn vell in Peter Pelers huis beseyn willen, dem de amboichsmeister so gedayn haven. Do haven sy da fonden eyn vell unser liever Frauwen zeichen uffgehat have. Und Peter hette auch gesacht, solchs were Unser liever Frauwen. Doch have sich darna befonden, Unser liever Frauwen vell in der loe geweist synt.

Und Peter have do gesacht, hey hette dat vell gegulden.

Van geheisch myns eirwerdigen lieven Heren, uff vridach na dem Hilgen Eschdage, anno et cetera [15]XXII. Matern van Bon und syne mytgedelinge hant affgepan Lodwich zu Hoymberch vur vunfftzich Gulden bekentlicher schoult, overmitzs de boden eyn zynen schuttell.

Ailbricht van Alner, schoultis, overmitzs denselvigen, uff dynstach na Invocavit, anno et cetera [15]XXII. Matern und syne mytgedelinge vurscreven hant solche pende uffbieden lassen.

Kost upzubieden VI Schilling

[Nachtrag:]

Overmitzs Peter, den boden, van geheisch des wirtzs zom Iserenmart ist solche schuttell weder geholt uff Paischsavent, anno et cetera [15]XXII.

A II/11 1522

Bl. 17^r

Godart zom Reesen, burgemeister, Johan Aldenach, kurmeister, uff sondach oculi, anno et cetera [15]XXII. Johan Roide hait beleit myt Johann Kanffenheuwer, Herman Leyendecker, Jaspar van Swellem und Johan Hannecken, glaßmechersknecht, so hey syn huis und nuwen bouw in der Engergassen na wynkouff, so hey dat Heuwmari Johan van Molendorff und dem Eiffeler verdyngt hatte zu machen und uffzusetzen, und so hey als gesteren uffgesatzs is worden, darzu dese vurscrevene IIII man myt anderen me luiden geholffen haven und nun desen dach, umb den mytdach, nedergefallen und des houltz damyt vast zubrochen is, so hant deselven IIII man gesacht, sy gehort haven, dat Johan Rode zu den meisteren gesacht und begert have, sy den bouwe myt doyn latzen und ander befestongen versorgen, umb dat vorder geyne schade geschee, dwile alle gereitschafft latzen und neill he syn.

Do haven de meister, nemlich Heumar, gesacht, sy willen *sy* solchs stayn lassen, den bouwe irst uffrichten und dan de doyn latzen anslagen et cetera.

Vurscrevene burg[e]meister und kurmeister hant auch desen dach den bouwe beseyn, so der nedergefallen was, de doyn latzen uff dem bouwe gelegen haven.

A II/11 1522

Bl. 18^v

Loe et Seichtem, uff godenstach na letare, anno et cetera [15]XXII.

Bertram, Oem Johans son, und Styne, syne elige huisfrauwe, hant verkeufft und uffgedragen iren garden in der Colrestraissen, tgen der Alder Herbergen over, tuschten Bernt Roden und der Alder Herbergen garden, schyssende uff de straisse vur heufft und Johan Girlichs, an dat ander heufft Hern Tilman zom Schaiffstaill, der gestalt, dat dat gertgen altzyt in den Cleynen Schaiffstall denen und gehoren soll. Wer den Cleynen Schaiffstall hait, soll ouch dat gertgen myt behalden, loß und vry, we eme darvan herberg zugestorven is. Und geloifft werschafft zu doyn.

Rompe et Seichtem, uff godenstach vurscreven, im jair XXII.

Jelis Sloßmecher Under der Hallen und Greta, syne elige huisfrauw, hant verkeufft und uffgedragen ire anerster[v]nys und kyntdeill in van Meus Zamps, irem swegerhern seligen, anerstorven is und zuersterven mach, an alle den guderen Meus seligen nagelaissen hait, neit darvan uißgescheiden.

Merghe van Swellem, des obgenanten Meus huisfrauwe geweist ist, und ist ankommen doitzhalven Meus vurscreven der guder und uffdacht sy under sich gehat.

A II/11 1522

Bl. 18^r

Alner et Beissell, uff vurscrevener zyt.

Der alte Johan Knutgen und Elsgen, syne elige huisfrauw, hant gegeven und uffgedragen X Albus jerlicher renthen, vellich uff des Hilgen Sacramentsdach, Hern Peter van Wyssen, procurator im Seligen Dall, inbehoiff desselven Cloisters, darvur dat convent verbonden syn soll IIII myssen in der wechen na des Hilgen Sacramentsdach zu leesen und halden vur de selen sy des vur begerende synt, in ire zwey huissger vur der Holtzportzen tuschten dem Strentzer und Lodwich Hoitmecher gelegen, beheltnis Knutgen und synen erven solche X Albus renthen altzit uff Sacramenti, myt X Kolnische Gulden und erschenen termyne afflossen moige und alsdan dat convent solche gelt wederomb belegen soll myt der erven wyst und willen, umb dat de myssen ungehalden neit bliven sollen.

[Nachschrift:]

Anno [15]XLIX ist diesse rentte affgeloist mit X Kolnische Gulden, deis sich die Hern bedanckt goder bezallungen.

Alner, uff vorschreven zyt.

Hynrich Rave hait zu leisten gemant Thewus Kreich vur eynen burgen und XIII Kolnische Gulden, herkommen van Wynant im Spedailshoeve.

Hait zom Somberen vur eynen wirt gekoren.

Hait acht dach van gerichtzs wegen.

Kost VI Schilling

A II/11 1522

Bl. 19^v

Rompe et Zwivell, uff vorschreven zyt.

Johan Kesseler und Engen, syne huisfrauwe, hant bekant schuldich zu syn Clais Lymbergh und syner hausfrauwen Greten und iren erven LXXXIII Kolnische Gulden und hey jars, dat eme Clais und Greta, elude, zugelaissen haven, deselvigen myt IIII Kolnische Gulden verpentzien mach, uff sondach letare off bynnen den neisten XIIIII dagen unbefangen vellich syn sollen, darvur de eluide ire gehuiss zom Swanen in der Holtzgassen tgen der Scheren over, beneven dem Boick gelegen, zu eyme underpande verkoren und gesatzs haven, beheltnis den eluiden de altzit myt X Gulden ½ Gulden afflegen mogen uff vurscrevener zyt, myt erschenen termynen et cetera.

Bl. 19a [eingeklebter Zettel an curie, advocaten, schulteten, scabinis Im Original mit 19a beschriftet.

Zehn Zeilen lateinischer Text mit sehr vielen Abkürzungen, daher von mir (W. G. Henseler) nicht zu übertragen, genannt werden aber ... Schyffer, Thoeniß Holtzenheuer, Wynmari [unterschrieben von:] Thomas Halteren.

Curie atet.... advovaten, schulteten, scabinos, ...poe... cetero.... und n.....pale in Syberch regen... ad quintan domini, ... post exequuto... pa.... in....diate sequent.... ad d...cend... et allegan Len....quan.... excon.... non de.... per... ut et ex eo q... ip.... quend... dict..... Schyffer, Thoeniß Holtzenheuer ex..... a nobiß per contu.... ad..... Wymari z.... per de.... corper... et cetera. Thomas Halteren.

A II/11 1522

Bl. 19^r

Coram Ailbricht van Alner, schoultis, und Johan van Zwivell, uff donrestach na letare, anno et cetera [15]XXII.

Elß Beckers, Ailff Beckers seligen nagelaissen hausfrauw, hait in der zyt sy des moigich und mechtich was gegeven und uffgedragen Hern Jaspar van Vilck, officiant der Kirspelskirchen zu Siberch, Godart zom Reeßen, zur tzty burgemeister, und Herman van Wenghen, burger zu Collen, alle ire guider, gereit und ungereit, we sy de itzunt hait und hernamails erkriegen mach und nalaissen wirt, dergestalt, wanne sy neit en ist als truwehender und testament, ire testament und leste willen zu vollenbrenguen und uißrichten, we sy dat

stellen und ordeneren wirt van vurscrevenen iren nagelaissen guideren, myt hant, halme und myt monde, we zu Siberch gewoinlich ist.

Loe et Seichtem, uff vurscrevener zyt.

Heyntzs Knutgen der alde und Elßgen, syne elige huisfrau, hant verkeufft und uffgedragen ir huis, hoff und garden uff dem Thonisberghe myt der bitzen und zubehoer Hupricht uffme Thonisberghe und Greten, eluden, we sy dat eyne zitlanck van Heyntzen zu pacht besessen hatten, beheltnis Heyntzen und Elssgen, eluden vurscreven, iren erven, in dem guide erff-

Bl. 20^v

licher jarlicher renthen zu haven und zu behalden jarlichs XXXII Albus Radergeltzs, zu sent Merten vellich. Und gelden jars in de froemyss VI Albus.

Wanendizabuten.

Rompe et Loe, uff gnante zyt.

Merge van Swellem, Meus Zamps nagelaissen huisfrau, hait in der zyt sy des wall moigich und meehtieh-was verkeufft und uffgedragen XXV Albus jarlicher renthen, zu betzalen uff sondach letare off bynnen den neisten XIIII dagen unbefangen, uis irem huisse, den Cleynen Widenyst genant, tuschent dem Cleynen Lepart und dem Groissen Wydenyst, oven am Mart gelegen, Wynant Schelten und Agatha, syner elige huisfrau, wilch gelt Merge vursereven, Jelis Sloßmecher und Greten, eluiden, irs mans seligen snoirg geweist, vur ire kyntdeill und anersterffnys Meus und Merge, cluide, in affgegulden hatten, gegeven und betzalt hait, beheltnys Mergen und iren erven solehe renthe jarlichs uff vurserevenem sondach off bynnen den XIIII dagen myt XXV Kohnische Gulden und erschenen unbetzalt termyne affloesen moigen.

Waendendizabuten.

Vacat overmitzs Alner, schoultis, uff mayndach nach dem sondach trinitaten anno et cetera [15]XXIII.

A II/11 1522

Bl. 20^r

Alner, schoultien, et Loe, uff vurscrevener zyt.

Kerstgen im Daymbroich und Greta, syne elige huisfrau, Teill van Schuyren und Metze, syne elige huisfrau, und Johan van Birlekoven und Styne, syne elige huisfrau, hant sementlichen verkeufft und uffgedragen ire gerechticheit und anersterffnys an dem huisse gnant Boisserode, myt dem garten in der Molengassen, tgen Volmar Becker seligen huiss over gelegen, dem vesten Joncher Wilhem van der Leyen, instat syns vaders, we in dat zugefallen ist.

Waendendizabuten.

A II/11 1522

Gauwyn vam Huys et Beissell, uff vurscrevener zyt.

Matern van Bon und Engen, syne elige huisfrau, Merten Vleischeuwer van Bon und Hilgen, syne elige huisfrau, Gehart Druitman und Johan zom Iserenmart, monper van Johan Druitmans wegen, hait sementlichen verkeufft und uffgedragen zweyn garden, eyner vur der Colner Portzen, tgen der Alder Herbergen over, tuschent Bernt Roden und der Alder Herberghen gelegen, schiessende vur heufft uff de straisse, und der ander garde gelegen an der gassen zu der Kroicht wart tuschent Coyntzs Wymar und Heyntzs Acherhennen garden und der Scheren garden over, Bertram Oem Johans und Stynen, eluiden, we in de van Jacop zu Hoymbergh seligen

Bl. 21^v

an und zuerstorven synt.

Wanendizabuten.

A II/11 1522

Rompe et Zwivell, uff vurscrevener zyt.

Johan Kesseler und Engen, syne elige huisfrauwe, hant verkeufft und uffgedragen ire gehuisse garten myt irer zubehorungen bussen der Molenportzen gelegen, gnant de Alde Arcke, we in dat van Boeschennen und syner huisfrauwe, Engens vader und moder geweist, an und zuerstorven ist, Clais Lympbergh van Roipsait und Greten, eluden, burgeren bynnen Sibergh, loß und vry geldende jars dem presentzmeister IX Heller uis dem garten, beheltnys Engen vurscreven und iren kynderen, wanne Johan Kesselers en were an irem huisse zom Swanen, in der Holtzgassen tgen der Scheren over, zu haven und zu behalden IC XIIIII Goltgulden, darvur sy ire erffschafft verkeufft und dat huys davan an Clais Lympberch gefryet haven.

Wanendizabuten.

A II/11 1522

Overmitzs deselvigen, uff vurscrevener zyt.

Johan Kannengeisser hait umb syner selen selicheit willen und van beden Johans zom Salmen seligen zü des kyndes behoiff, umb dat unvergeßen blive, de zu getzuige beleit und ermant, uff Johans seligen lesten willen geweist, darzu und bygeroiffen synt de wairheit

Bl. 21^r

zu sagen, als myt namen Godart zom Reeßen, burg[e]meister und Peter zu Overoide, de dan vur vurscrevenen scheffen gesacht und bekant haven, we Johan zom Salmen seligen, uff syme doidebede an syme lesten gelegen, besat und zuverordent have synen nagelaisen guidern, als nemlichen synen zwen kynderen, van eme und Styngen, eluiden geschaffen, uis und van synen gereiden guideren hey nalaissende ist, haven und werden sullen, eder eime IIC Goltgulden, so balde de zu iren dagen qwemen zu bestaden, geistlich off werentlich. Und so der kynder eyn sterve ehe solchs zu bestetenys qweme, van dem solch gelt uff dat andere zu sterven, also dat dat eyne kynt asdan der zweyer kynder zuverordente gelt, nemlich IIIIC Goltgulden haven solde.

Dan were sache, de kynder beide storven ehe solchs geschege we vurscreven, solde des geltzs in de Kirspelskirche zu Siberg zom bouwe IC Goltgulden ervallen syn und darzu werden sonder indracht off wederrede, derglichen in de Cluse zu Siberg IC Goltgulden besatzs syn sall. Und de ander IIC Goltgulden solden Styngen, der kynder moder, alsdan werden bliven und an sy ervallen syn, wilcht Styngen myt beliefft und myt irem wyßben und guden willen gescheyn ist.

A II/11 1522

Bl. 22^v

Overmitzs deselvigen, uff vurscrevener zyt.

Thys Peltzer hait zu konden beleit Peter Peltzer und Herman Peltzer, de gesacht und bekant haven, we sy daover und an geweist synt als wynkouffsluide, dat Theys Peltzer affgegulden have Hantz Peltzer van Syghen dat virdedeill in dem huiße gnant Royme, uff dem Honermart, beneven dem huis zur Cronen und Thys vurscreven huis gelegen, in wilchem huiße Thys de dry deill gehat have, als nemlich verkeufft vur eynen benompten Pennynck, vur XX Kolnische Gulden.

Und so Hans geloiffde den avent, hey den morgen Thyssen erven willen, ist hey den morgen stillswygens uis der stat getreden und ewech gegangen et cetera, wilcht Peter und Herman als wynkouffslude gesacht und by iren eiden beweren willen, dem so geschiet sy et cetera.

Alner, Rompe, Zwivell et Wilhem Ley, uff vurscrevene zyt.

Geyrtgen zom Nuwenhuys hait gesont und begert solche VI Kolnische Gulden sy hynder den Kannengeisser gelacht, der meynnonge de pende, de sy Peter Loir gegeven und gesat hait, zu qwitten, der Kannengeisser ir weder volgen zu lassen. So dan der scheffen de pende, we recht ist, geschat haven, hant sy dem Kannengeisser bevolen, der frauwen solch gelt weder zu geven und volgen lassen na irem begeren.

A II/11 1522

Bl. 22^r

Hern Kobbenroide, presensmeister, Joncher Volmar Ley, amptman, Johan Girlichs und Johan Roide, in irem bywesen uff neisten vridach na Paischen, anno et cetera [15]XXII.

Tuschent Heyntzs Knutgen und Hennes Ruckert gnant Rutzghen des getzenckzs tuschent in geweist uff vurscrevenen dach hant Wynant Hoiffsmyt, Johan Kanffenheuwer und Cryn Loir gesacht, we sy im Nuwenhuiße zu wyne gesessen haven, do synt Hans Koiller van Flamersheym und Hans Kuckell van Flamersheym, lantgetzeuwer, over den Mart gegangen. Have Wynant Smyt den eynen, dem hey de perde dickmaill beslaigen werden, kennen, eme daromb int huis geroffen zu schencken. Und so de lantgetzweuwer dar komen, have Heyntzs Knutgen bovent uff der leuwen zu wyne gesessen und de dar vernomen und zu in hynaff gegangen, in de eir geboden zu dryncken. Have Hennes Rutzghen vurscreven myt dargeweist und etliche wort horen lassen. Do have Heyntzs gesacht, mych bedonckt, ir hast mych umb uwers Joncheren willen, dan ich hain uch eynmail off zeyn de kost gegeven. Solchs dede ich noch, hast ir mych, sust mois ich liden.

Do have Rutzghen gebalcht und depperlich zu Heyntzen gehauwen. So Heyntzs wust van geweer by eme en hatte, sy hey eme under de taiffell untwichen und Heyntzs also van dem gelaich entreedt wart.

A II/11 1522

Bl. 23^v

Overmitzs Hern Herman Blanckenbergh, Hern Tilman zom Schaiffstall, Johannes Schutzs und Godart zom Reeßen, burg[e]meisteren, Johan Aldenach und me anderen van rade, uff vurscrevene zyt.

So Rutzghen obgenant derhalver in gefencknys komen ist, hant de boden eme gurdell, tesche und degen affgebonden. Hait man in der teschen vonden eyn stuck keese, so grois als eyn palen eyner hant, IIII schoynnagell, ein stupisen, IIII pletzger doichs, der eynt sangwynen, so grois als eyn palen eyner hant, eyn roit, so grois als II vynger und dat drytte wyß, als II vynger breit, eynen kamp, darzu den deghen myt eyme krumen kruix, myt der teschen vurscreven.

Aldenach und Johan Roide, kurmeisteren, uff mayndach na Jubilate, anno et cetera [15]XXII.
 Lodwich Hoitmecher hait beleit und besichtigen laissen overmitzs dese vurscrevene, de kalle, tuschent eme
 und Schopgen, zugehorich Johan uff der Bach in der Uilgassen, we deselve kalle zubrochen ist, eme an syme
 gehusse schade daran gescheyn ist und deglichs geschuyt, dem vurscrevenen Johan zubehoret zumachen und
 verbesseren et cetera.

A II/11 1522

Bl. 23^r

Johan Aldenach und Johan Roide, ~~kuyrmeistern~~, uff donrestach na cantate, anno et cetera [15]XXII.
 Thonis van Roepsait hait gewyst und besichtigen laissen eynen zuyn hynder syme huisse an der gemeynde,
 myt eyner duyrren an den putzs denende und *begert* vermeint den zuyn myt eyner want daruff zu
 verbesseren, so dan de naber als van der gemeynen wegen sich des putzs als van alders antzeint.
 Hant vurserevne kurmeister verlofft, Thonis seyne want myt eyner offenen duyrren, uff de stat der zuyn
 steit, zu machen, umb de naber sich des putzs gebruehen moigen bis zu uisdracht und erkentnys des rechten.
 Und uff saterstach darna, so de want da gestanden hait, synt vurserevne kuyrmeister zusampt Johannes
 Schutzs und Godart zom Reesen, burgemeisteren, dageweist und de want beseyn und vonden haven uff der
 stat der zuyn gestanden hait.

[das Wort „*begert*“ wurde vor der Streichung des Gesamttextes bereits einmal gestrichen, also doppelte
 Streichung; von mir hier schräg gestellt (W.G.H.)]

A II/11 1522

Bl. 24^v

Johan Aldenach und Godart zom Reesen, burgemeisteren, uff dynstach na exaudi, anno et cetera [15]XXII.
 Her Hynrich van Muych hait beleit myt Johan zom Woilff, Clais Lympbergh, Clais Lantschade und Vais
 Schroder de alsament gesacht und bekant haven, so sy als gesteren uff dem begencknys Johans van Walproill
 seligen geweist synt im Wedenhoeve, und daruis an Prymenort geseßen und uff Hynrich vurscreven gewart,
 dergestalt sy sament namytdage ½ verdoyn wolden.

Und so Hynrich da geweist sy, ist Johan Schomecher van Rospach kommen, gefloicht und sere gebalcht have.
 Und have gesprochen zu Hynrich, du sytz he, du und der pastoir laist vyll myssen, XX und XXX myssen
 doyn he zu Sigberch, van unser alderen guide, und syn moder und alderen ligent de heym[?] unbegangen. Du
 saltzs seyn, dat idt neit so zugayn soll. Ouch sytz du da und hais dich gecleit van unser alderen guide. Du
 saltzs seyn, du wirtzs myr noch so wall gevallen als ich dir he gevallen syn.

A II/11 1522

Bl. 24^r

Joncher Leye, amptman et cetera, Johan Aldenach und Godart zom Resen, burg[e]meisteren, uff godenstach
 na exaudi, anno et cetera [15]XXII.

Johan Slosser hait gesacht, we Johan Becker umbtrint XIIIII dage geleden zu eme komen sy, umb eme eyn
 slos in syme huisse affzubrechen. Und so dat gescheyn sy, have der Becker gesacht, ich hain noch zwey slos,
 off hey eme slussell darzu machen wille. Do have der slosser gesacht, jae, waromb des neit. Und so hey de
 sloss geseyn have, hey de werden kennen und gefragt, wa hey de kregen have. Do have der Becker gesacht,
 hey hette sy gegulden. Vragt der ander, wem aff. Sacht der Becker, wat eme daran lege.

Alner, schoultis, uff donrestach na Pinxten, anno et cetera [15]XXII.

Johan Aldenach, burgemeister, hait uffgeboden eyn *groissen* Schyffnobbell und eynen Gulden Leuwen,
 zugehorich Hynrich Smytzs, vur eyne zumme van III Kolnische Gulden zu penden.

1 Albus uffzubieden, VI Schilling.

A II/11 1522

Bl. 25^v

Uff deselve zyt.

Jelis Slosmecher hait zu leisten gemant Jong Heyntzs Knutgen vur eynen burgen und eyne zumme van VI
 Kolnische Gulden, herkommen Johans uff der Bach, synen broder.

Hait vur eynen wirt in des Kannengeissers huis gekoren.

Hait der schoulten eme acht dage dach gegeven.

Kost uffzumanen VI Schilling

Deselve zyt.

Bernt Bartscherer hait zu leisten gemant, Herman Swertzgen uff dem Heckershoeve als eynen burgen eyn zumme van XI Mark mynus 1 Albus, van wegen Doirmengen van Vilcke.
 Hait Swertzgen vur eynen wirt gekoren by den Kannengeisser.
 Hait VIII dage dach van gerichtzs wegen.
 Kost VI Schilling.

A II/11 1522

Bl. 25^r

Ailbricht van Alner, schoultis, uff godenstach na sent Johan[i]sdage Mytzsomer, anno et cetera [15]XXII. Also Johan Scheuff, burger zu Collen, dat gericht zu Sibergh umb willen Joist Peler umb eyne zumme van XVI Overlensche Gulden, XVI Albus, vurgenomen und zu ban brengen wolde. So Johan Scheuff vurscreven hude, datum, alhe erschenen und pantschafft gesont hait, dwile dan de vryheit itzunt zu Siberch ist und Joist vurscreven neit inlendich. Synt daromb Tryne, des vurscrevenen Joist huisfrau, und John, Joisten broder, myt Johan verdragen und eyns worden, dat John Peler de zumme betzalen sall bynnen zwen jaren irstkommen vurscrevene burger zu Collen, alle jars halff, wilcht sy sementlich vur vurscrevenen schoulten bekant und bewilliget haven.

Und des hait Tryne John, irem swager, vur vurscrevene zumme Joisten wardonge eme van synen alderen zuvallen mach bis an iren hußwirt zu eyne underpande gesatzs und gegeven et cetera.

Alner, schoultis, uff donrestach na sent Johansdage Mytzsomer, anno et cetera [15]XXII.

Johan Drymbach van Dattenfelt hait zu leisten gemant Wynant Hoiffsmyt als eynen burgen van wegen Thonis Houtzenheuwer van eyme par rader. Kosten XII Mark.

Hait Wynant vur eynen wirt gekoren by den Kannengeisser.

Kost VI Schilling.

A II/11 1522

Bl. 26^v

Johan Aldenach und Godart zum Reessen, burgmeisteren, uff dynstach na sent Panthaleoynsdage, anno et cetera [15]XXII.

Herman Hellekrae van Duyren, naillsmyt, hait beleit myt Lodwich Mudder des getzenckzs halver, hey gesteren myt Dreis Schroder gehat hait et cetera.

Spricht Lodwich, hey have gesteren im gelaich zom Kranen im wynhusse by Dreis Schroder, Pyntgen und anderen gesessen und myt Pyntgen gekalt et cetera. Da wile have der nailsmyt vurscreven und Dreis Schroder sament gesprochen und geseit, soverne dat irer eyn dem anderen wyn under de ougen gegossen und na de gelaisser myt geworffen haven, so lange dat Herman, nailsmyt vurscreven, uffgevaren, synen degen uisgetzoigen und van sich zu Dreis und anderen zu eme myt gehauwen have, dat Lodwich sich myt schregenstoilen erwert have. Solchs wille hey myt syme eide behalden, dem so geschiet sy.

Vur denselvigen, uff deselwe zyt.

Derselve Herman Hellekrae hait beleit myt Johan van Duyren, nailsmyt, desselven getzenckzs halver, der gesacht hait, we hey gesteren im selven huis zom Kranen vur sich alleyn zu wyne gesessen

Bl. 26^r

und 1 wyns gedroncken. Have hey geseyn und gehort, dat Dreis Schroder Herman Hellekrae, smyde vurscreven, der in eyme anderen gelaich saß, zu sich geroiffen have und gedroncken. Sy der nailsmyt myt eyme glaß wyns zu eme kommen und byeynanderen gesessen haven. Have Dreis zu eme gesprochen und gefragt, wannen hey were. Sprach der nailsmyt, van Duyren. Have Dreis vorder gesacht, off hey och under den knechten geweist were. Have der ander gesacht, jae, und hedde noch eynen broder darby im lande van Gelre. So lange dat Dreis den anderen vorder vragt umb de stede, de da gelegen weren. Und am lestien hatte Dreis in gefragt, der knecht in villicht neit recht bescheiden moicht. So sprach Dreis ich nempts eynen Haller[?] und werfft dir eyn glaß int antzlitzs. Spricht der ander neyn und bede darvur und worde neit wall darover faren. Have Dreis noch eyns so gesacht und der ander derglichen eme so weder geantwort. Damyt have Dreis eme eyn glaß wyns under de ougen gegossen und dat glaß nageworffen, und der knecht myt glasser weder zu eme geworffen und damyt uffgestanden, van leder getzoigen und van sich gehauwen.

A II/11 1522

Bl. 27^v

Johan Staill und Johan Roide, burgemeisteren, uff sent Peter Vinckelsavent, anno et cetera [15]XXII. Thonis Schroder hait gewyst und beleit syne bytze, hey van sent Benignusbrodermeister zu pachte gewonnen und nun eyn stuck myt korne und erwessen geseit hait, dar eme etlichen schaden durch Hammans uffme Thonisberge wieße und zuyne geschiet ist.

Den schaden de kuyrmeister beseyn und getzeyet hant uff VI Albus. Und have vort de zuyne durch de wieße und oven am velde beseyn und zubrochen befonden, darzu eyn offen durlyn, allet an Hammans ende und eme geburt weder zu machen.

Kost V Schilling

Johan vam Zwivell und Johan Aldenach, burgemeister, uff saterstach na Vincula Petri, anno et cetera [15]XXII.

Merghe vam Swellem, Meus Zamps seligen nagelaissen huisfrauwe, hait in der zyt sy des wall moighich und mechtich was verkeufft und upgedragen Wynant Schelten, burger zu Siberch, und Agathen, syner eliger huisfrauwe, ir huyß, backhuis und garten, hynden daran in der Houltzgassen, tuschten dem presenßmeister und Lomer Johans huiße, dat vurscrevene Merghen och geweist ist und Clurmont, gelegen gnant zom Groissen Schuppen Velde.

Geldende jairs Greten Meuschs seligen erven X Mark, zu Heisterbach XXIII Albus, und dem presenßmeister XI Schilling, allet myt consent und bewillonge Gotschalck van der Leyen, burger zu Wipperfurde, nu ire gehilicht und vertrouwede man, myt syner wissen gescheit is.

A II/11 1522

Bl. 27^r

Vort hait vurscrevener Gotschalck geloifft, so Meus Zamps seligen Mergen vurscreven elich huiswirt geweist, eynen son nagelaissen, der eyne zytlanck under den voißknechten gewandert und an anderen enden uißlendich, so dat man dese zyt neit en weyß, off der levendich off doit sy. Und so der wederkommen woede, soll Gotschalck darvir stayn und halden umb Wynant *[Schelten]* und Agatha, eluide off ire erven, des sonder schaden bliven sollen.

Vur vurscrevene scheffen und burg[e]meister, uff denselven dach, na mytdage.

Johan Kannengeisser, burger zu Sibergh, der sich der X Mark jarlicher renthen van Grete Meuschs seligen wegen vurscreven angetzoigen hait, ist kommen, so de verschrivunge davan uff alle Meus Zamps seligen guder bynnen Sibergh haldende is, und hait de X Mark renthen vurscreven an dem huisse Wynant we obgenant gegulden hait und an Wynant und Agathen, eluden, genomen an in zu heven und betzalange zu nemen gewilicht, so verne Wynant und syne erven solchs bynnen jair und dage myt solchem Radergelde, we sich geburt, affloisen, anter geschege des neit, hey alsdan van in vorder bewyst und versorgt worde der jarlicher renthen sicher und gewys syn und bliven moige, darvan eme Wynant hanttestonge und geloiffde gedayn hait.

A II/11 1522

Bl. 28^v

Vur dem selvigen scheffen und burgemeister vurscreven, uff deselve zyt.

Styngen, des Kannengeissers huisfrauwe, ist anstont uff dem helligen Voisse, zo dem Kannengeisser gesacht, want syne huisfrauwe mois myt dem Lysgyn nakomen, und solche bewillonge, ire man gedayn, wederoiffen und wedersprochen und gesacht, sy haven breve und sigell. Wanne der scheffen byeynander kome, wat der dan erkent, bilche sy, de breve belangen willen sy geven und nemen.

A II/11 1522

Vur vurscrevene scheffen und burgemeister, uff denselven dach [uff saterstach na Vincula Petri, anno et cetera [15]XXII.].

Merghe van Swellem vurscreven hait in der zyt sy des moigich und mechtich was gegeven und upgedragen und volmechtich momper gemacht Gotschalck an der Leyen, burger zu Wipperfurde, itzunt ire verhilichde und getruwede man, irs huiß zom Cleynen Widenyst, beneven dem Cleynen Lepart gelegen, und alle der guider, gereit und ungereit sy bynnen Sibergh und dem burchbanne hait und gelegen synt, zu irer beider nutzs de zu versetzen, zu verkeuffen off zu veranderen, we im dar dat beste gevelt und enenkompt.

A II/11 1522

Bl. 28^r

Johan vame Zwivell und Godart zom Reeßen, burgemeister, uff dynstach na Vincula Petri, anno et cetera [15]XXII.

Gotschalck an der Leyen, burger zu Wipperfurde und Merge, syne vertruwede und zuverhilichde huisfrauwe itzunt is, hant in der zyt, sy des moigich und mechtich sint, verkoufft und upgedragen, Vais zur Blomen und Annen, syner eliger huisfrauwen, burgeren bynnen Sigbergh, ire gehuisse, gnant den Cleynen Widenyst bynnen synen veir wenden, beneven dem Großen Widenyst und dem Cleynen Lepart, oven an dem Martte gelegen.

Geldende jairs Unser Lieervrauwen gnant der loirbroderschafft X Mark, vellich uff sondach Invocavit, und jairs XXV Albus, Wynant Schelten zu Halffasten vellich, allet uff affloise.

A II/11 1522

Bl. 29^v

Johan vam Zwivell, uff godenstach na sent Laurentiusdage, anno et cetera [15]XXII.

Peter zom Rodenhuis hait zu leisten gemant Johan Roden vur eynen burgen eyne zumme van X Goltgulden van wegen Heinnen van Lomar.

Hait dach van gerichtz wegen VIII dage.

Vur eynen wirt gekoren.

Kost VI Schilling

A II/11 1522

Vur myme werdigen Hern abt, Godart zom Reesen, burg[e]meister und Johan Schutzs, rentmeister, uff godenstach na Bartholomei, anno et cetera XVC XXII.

Kirstgen van Reide zu Ackerbach hait gesacht und bekant, solcher dryhondert Goultgulden hey Styngen Meuschs, syner steiffdochter, van Otto zom Sternen seligen geschaffen, geven solde, lude des verdrags tuschent in gemacht, hey der eynhondert Goultgulden betzalt have und de ander zweyhondert Goultgulden stoynden noch unbetzalt, der Teill Verffer eyn hondert Goultgulden, van gehort Botgen, an sich genomen solde haven, inbywesens Schelmell *[Schemell]* Johans dat betzalen willen, wilchs Hern Dedrich Meuschs neit willich noch *gestendiech* angenomen, is de an Teillen stayn zu laissen et cetera. Dan de IIC Goultgulden an Kirstgen haven willen, darzu hait

Bl. 29^r

Kirstgen bekant schuldich sy Bruyn Meusch, syme swager, LXXVII Kolnische Gulden, VIII Schilling, VIII Denares, ~~dar hey noch eyn insagen zu have bis an zukumpts syns swagers~~ und Johan syme swager XXV Kolnische Gulden, allet int geinwordicheit Hern Dedrichs *[Meuschs]* vurscreven.

Herna uff der ander syten.

[Johan] Aldenach und Godart zom Reeßen, burgemeisteren, uff godenstach na Bartholomei, anno et cetera [15]XXII.

Tilman van Gleen hait beleit myt Styne Sporen und Thys Wolsleger, so Tilmans huisfrauw deßen morgen in Dedrich Reuffers huis komen ist, have sy zu Styne Sporen, Dedrichs huisfrauwe, gesprochen und gefragt, wa ir man were. Do sprach de frauwe, hey lege en sleiffe. Do have Tilmans huisfrauw gesacht, uwer man hait etliche wort uff mych gesacht, de wolde ich gerne van eme horen wat dat were und de verantworden. Do sy der Reuffer van dem soiller heraff kommen und eyn schyt in de hant genomen, zu Greten, Tilmans huisfrauwe, getreden, de myt dem hair getzoigen und geslagen, wilche blae woeden, de frauwe itzunt geclagt und getzoint hait. Have de frauwe do gesprochen, hais du auch me myt myr zo doyn gehat, dan by myr geslaiffen. Have der Reuffer neyn gesacht, wilcht Thys vurscreven gehoirt hait.

A II/11 1522

Bl. 30^v

Zwivell, uff dynstach na sent Johan Untheuffdonge, anno et cetera [15]XXII.

Johan, der wirt zom Isermart, hait zu leisten gemant Hynrich Smytzs vur eynen burgen van wegen Dedrichs van Ropichteroide, eyne zumme van VII Mark, II Albus.

Hait in den Iserenmart gekoren vur eynen wirt.

Hait VIII dage dach van gerichtzs wegen.

Kost VI Schilling.

Vur demselvigen, uff deselbe zyt.

Derselve wirt hait zu leisten gemant Thonis zom Hirtzs van wegen der Hern van der Mergenheiden, eyne zumme van V Mark.

Hait VIII dage dach van gerichtz wegen.

Kost VI Schilling.

Zwivell, anno et cetera [15]XXII, ipso die Christinae Virginis.

Hyntz zom Rosenboum hait gesont an Johan van Gym[n]ich Under den Hallen scheichtonge und deylunge der gereiden gueder lude syner und syner huysfrauwen Fygins seligen vermechniss und verschrivongen, neemlich eyn drittendeill. Johan vurgenant. Zuicht sich des an dat reicht und scheffenordell und vermeynt, he have eynmaell myt synen steyffkynderen sementlich gedeilt.

A II/11 1522

Bl. 30^r

In biwesen Hern Tilmans zom Schaiffstalle, Johan Aldenach, burgemeister, Johan Roden und Schemell
 Johan, uff sent Symon Judenavent, anno et cetera [15]XXII.
 Item, Her Dedrich Meuschs hait gesacht und bekant, hey van wegen syner nychten Styngen, van Otto, syme
 swager, und Zygen, eluden, syner suster seligen geschaffen, van Gehart Betgen zu Collen, darvur Teill
 Verffer burge syn solde we vurscreven, van wegen syns swagers Kirstgen zu Ackerbach, des geltz in syner
 nychten Styngen vurscreven behoiff untfangen have, XIII Goltgulden an gelde, mynus III Albus, des zweiden
 termyns van den IIIC Goltgulden irs verdrags we vurgenant.

Alner, schoultis, uff donrestach na Symon et Jude, anno et cetera [15]XXII.
 Item, Clais Lymbergh hait zu leisten gemant Rutger van Gleen vur eynen burgen und zumme van VI
 Kolnische Gulden, van wegen Teill Hoeffener van Menden.
 Hait vur eynen wirt in den Iserenmart gekoren.
 Hait VIII dage dach.
 Kost VI Schilling.

A II/11 1522
 Bl. 31^v
 Alner, schoultis, uff Alrehilgenavent, anno et cetera [15]XXII.
 Item, Tilman van Gleen hait zu leisten gemant Peter Strentzer vur eynen burgen eyne zumme van XXXIII
 Kolnische Gulden, herkomen Elen[?] Johan van Ryndorff.
 Hait vur eynen wirt in des Kannengeissers huis gekoren.
 Eme van gerichtzs wegen VIII dach dach gegeven.
 Kost VI Schilling.

Zwivell, uff sent Ceciliendach, anno et cetera [15]XXII.
 Item, Hynrich Dormengen van Ryndorff hait zu leisten gemant, Kirstgen Rademecher und Metzen, Johan van
 Menden as burge, vur eyne zumme van IIII Kolnische Gulden, mynus III Albus, herkomen Dedrich myt
 ...e...
 Hait dach VIII dach van gerichtzs wegen.

A II/11 1522
 Bl. 31^r
 Overmitzs Johan Aldenach, burgemeister, Johan Staill, kuyrmeister und Schemell Johan, hospitailsmeister
 uff mayndach nach Andree, anno et cetera [15]XXII.
 Item, hant deselvigen des Hospitalshuise vur der Colner Portzen, dar Thonis Houltzenheuwer in gewant und
 daruis geroempt ist, desghenen hey darbynne gelassen und verbleven ist, uffgetzeichnet und alda befonden
 we clair herna geschreven steit.
 Zom irsten, uffme soiller eyn bettsteitgen myt eyme lynenbette, myt kaiff gefoilt und eyn alte poille darzu,
 Item, II alder thonnen,
 eyn boitgen van eynde thannen gesneden,
 eyn snydebanck,
 im huisse eyne kyste, zu beslossen, wat darin, ist unbewust,
 eyn moißbrett,
 eyn moißmetzs,
 eyn schuttellkorff myt XVI hoiltzen schuttellen und XVI holtzen teller,
 eyn alt blaisbalch,
 eyn eymergen myt alden synteren,
 eyne weschboide,
 eyne krudeheups,
 eyn schemerßfaß,
 eyn wertschit an eynen ploich,
 eyne saete, eyn korwe,
 noch eyne kyste, zu genegelt, myt aldem pluserye, ist wenichs wert,
 eyn cleyn dischelgen,
 eyn saessell, III erdenkannen,
 eyne kurtte leyder,
 noch eyn dynck we eyn saltzs we...,
 uffme stoiffgen II dylger, de kynder tuschent gelegen haven.

A II/11 1522
 Bl. 32^v

Zwivell, uff mayndach na Lutzie, ~~uff~~ anno et cetera [15]XXII.

Item, Kirstgen Schoultis in der Molengassen hait zu leisten gemant Kirstgen van Steildorff zu Geistongen, van wegen vur eynen burgen synen broder, nemlich vur II malder weyß und III malder korns. Hait VIII dage dach van gerichtzs wegen.
Kost VI Schilling.

A II/11 1522

Johan Roide und Johan Staill, kuyrmeister, uff dynstach na Cristdage, anno et cetera [15]XXII.

Item, Hynrich Werner[? Wever?], zeichenwever, hait besichtigen und beleiden laissen hynder syme huisse den gartten, beneven Wilhem Wynterschit, solchen schaden an muyren, roebben und anderem gemoesse Wilhems swyn eme durch syns selffs gehuisse gedayn hait.

Wilhem schaden de kuyrmeister geacht uff VIII Albus, Wilhem eme darvur geven soll.
Kost V Schilling.

A II/11 1523

Bl. 32^r

Johan Aldenach und Godart zom Reeßen, burgemeisteren, vort Wynant Schelten, Johan Knutgen, Thewus Kreich, Johan Hoeffnagell und andern vyll vromer luide in irem byweßen, uff sondach na sent Thonisdage, anno et cetera [15]XXIII. *[Antonii = 17. Januar]*

Item, Thys van Wipperfurde und Neße, syne elige huisfrau, hait beleit und gewyst, den brant und gehuisse sy van Clais Lymbergh gewonnen und als neichtent, umb de VIII oren, verbrant ist, wilcher brant und fuyr angegangen ist an dem stoiffenoiffen durch den schorensteyn, wilcht schorensteyn eyn cleyn veireckethick loch was, nauwe glichs der want und neit langer uißgefort was in eyn cleyn stelgen, ire koe instoynde denende, dadurch dat fuyr angegangen were. Und hofft daromb, dwile Clais eme geloift den offen und adamsloche anders zu machen und uisforen solde und neit gescheit sy, synen schaden richten solle.

A II/11 1523

Bl. 33^v

Johan Aldenach und Godart zom Reeßen, burgemeisteren, uff sent Sebastianusavent, anno et cetera [15]XXIII. *[Sebastiani = 20. Januar]*

Item, Clais Lymbergh hait beleit myt Lynen, Hynrich Vasbenders huisfrauwe, de gesacht hait, we sy geseyn have, dat uff dem stelgen voll stroe und lauff gelegen have. Datselvige Thys und Neisgen, elude vurscreven, ouch bekant haven, aver bovent dem offen neit gelegen have.

Dat Clais verkont hait.

Johan Aldenach, Godart zom Reeßen, burgemeisteren, Johannes Schutzs, Thonis zom Hirtzs, rentmeister, Johan Staill und Peter zom Wynter, alle vam raide, uff godenstach na sent Blasiusdage, anno et cetera [15]XXIII. *[Blasiustag 3. Febr.]*

Deße vurscrevene myt sampt der hernknecht und statboden, myt anderen vromen luiden, hant besichticht den doden licham Teillen, des halffen knecht van Molendorff geweist, und als gestern, sent Blasiusdach, den avent umb de VI oren, an der Molenportzen bynnen der stat, vur Adam Steynmetzers huisse doit befonden. Den licham besichticht und oven vur, uff syme hoeffde, eyn cleyn wonde befonden et cetera.

Hant deselvigen den licham, van wegen myns werdigen Hern abt und erloiffnys der scheffen, zur erden bestait.

Hait man by dem doden manne fonden, XIX Heller, eynen alden deghen, eyn alt swartzs rock, eyn roit wambusch und alte hoessen. Hant de boden zu verwaren.

De schoyn synt dem dodengrever gegeven, dat graff gemacht hait.

A II/11 1523

Bl. 33^r

Ailbricht van Alner, schoultis, uff sent Appolonendach, anno et cetera [15]XXIII. *[Appolonie = 9. Febr.]*
Herman Vlach hait zu leisten gemant Rorich Steiffbeyn vur eynen burgen van wegen Johan Birkenstroich, eyne zumme van XI Overlensche Gulden.

Hait vur eynen wirt gekoren in des Kannengessers huis.

Kost VI Schilling.

Alner, schoultis, uff vridach na Eschdage, anno et cetera [15]XXIII.

Wilhem Hammecher hait uffgebroken eynen zoymme myt syme gebyß und zwey gebyß, zugehoirich Schuyten van Roedendorff vur verdeynten loyn, VII Albus, hey myt eme eyns sy worden zu geven.
Kost VI Schilling.

A II/11 1523

[Nachtrag]

Ist geschat van Rompe et Loe, vur XIII Albus, na letare, anno et cetera [15]XXIII.

Kost VI Schilling.

A II/11 1523

Aldenach, burgemeister, Johan Schutzs, rentmeister, Johan Girlachs, Herman Vlach und Peter zom Wynter, uff saterstach na Eschdage, anno et cetera [15]XXIII.

Johan Roide und Johan Staill, kuyrmeister, hant beleit myt Godert zom Reeßen, burgemeister, Peter zom Rodenhuis, Wynant Smyt, Baltasar Vleischheuwer, Thonis Nailsmyt und Herman ufme Heckershoeve de gesacht haven, we Herman Woilff en Eschdach en avent in der burger huß geseßen have und have gesacht und gemoirmelt, de kuyrmeister hant myr myn vleischs uis myme zoilpar

Bl. 34^v

genomen. Ich wille sy noch leren, we sy vleischs nemen sollen, und davan vast wort gehat have.

Do have Johan Roide gesacht, wir en haven uch uwer vleischs neit genomen und des ghenen wir gedayn, sy myt wyst der burgemeister geschiet et cetera.

Do hait Herman Woilff burgemeisteren, kuyrmeisteren ~~mit dem ganzen rade~~ gefloicht und gesacht, hey wille sy noch recht leren, off sy in vermeynten zu fexeren, und damyt eynen pott uff der taiffelen entzwey gestoissen.

A II/11 1523

Johan vam Zwivell und Wilhem Leye, uff vridach na sent Pauwelsdage Bekeronge, anno et cetera [15]XXIII.

Item, Teill Knutgen der alde myt synen kynderen und eidomen, nemlich Heyntzs Knutgen der alde, Johan Knutgen der jonge, syne soene, und Kirstgen Schoultis, syn eidom, myt anderen preisteren und notarien, he unden geschreven und da in gesondem lichame und guiden verno[n]ftigen verstande vurgeven und vercleirt, hey sy der meynong as eyn recht cristenmynsche zu leven und sterven, daromb syn testament, hey vurmals gemacht hatte, wederomb vernuwet und verandert have und hait offenbarlich bekant, so as hey syme soene Johan Knutgen dem jongen vur

Bl. 34^r

veir off vunff jaren ungeverlichen eyne overgiffst und uffdacht vur den scheffen zu Siberch gedayn, myt namen eyn dritte deill syner gereider guider, vuran aff zu nemen overgegeven have und dat myt solchem unterscheide, dat Johan, syn son vurscreven, na datum der updracht eme noch III jaire naeynander wirken, kruchen und uillwerck machen solde, as hey na doide syner moder, der Got gnade, bis zu zyt der uffdacht gedayn hatte, des hey neit langer dan eyn halff jaire na der updracht vurscreven gehalden en hait, as van sent Johansmyssen bis zu sent Mertyn. Hait sich daromb Teilgen vurgenant bedacht, umb syner selen selicheit, darin geproiffst und solche overgiffst und uffdacht vur uns scheffen vurscreven wederroiffen und wedersprochen, wederwisst und wederspricht in crafft dys breiffs. Hofft und beteuwt och, hey solche wederoiffonge bilchen gedayn nadem syn son vurscreven eme neit gehalden have, dat zusage, hey eme dartgen geloiffst hatte we vurscreven.

As Johan Knutgen vurscreven dese reden hoirtte, hait he des syn urkonde geboden darup, dat syn vader bekante, dat hey eme eyn halff jaire na der uffdacht gewirckt hatte und sich da erboden, hey sy noch bereit und guittwillich, solchen restant der dry jairen

Bl. 35^v

synem vader zu wircken, up dat de updracht van werde solle bliven.

Darup Tilgen vurscreven antworde und sprach, eme dat nun over all neit gelegen were, nadem syn son Johan vurscreven bussen synen bywesen, wyst und willen, dwile hey in der Kirchen was, alle rader und breder, vort ander gereitschafft darzu denende, affgebrochen und na sich genomen have, och daerde und hoiltzs also vyll verbrucht have, dat zusament berechent ist up hondertundseyßunddrissich Gulden und acht Albus, as XXIII Raderalbus vur ederen Gulden gerechent, und dat in affslach solcher VIC Mark as eme Tilgen vurberort, vurmals in syme testament bescheiden wolde und dat heromb want Johan vurscreven neit umb begerde und bede Tilgen, syns vaders vurscreven, wolde willichen vallen laissen, de overgiffst und updracht, eme vur den scheffen vurmals geschiet was, und soll hey deselvigen hondert XXXVI Gulden und VIII Albus wederomb synen susteren und broderen heruis geven und betzalen off so lange in der deillongen der gereider guider still sitzen bis eder van synen broderen und susteren so vill dar entgegen gebuit hette. Und en soll van den gereider guideren vuraff neit me haven dan syne besetzonge in dem lesten syns vaders testament benompt

Bl. 35^r

und asdan myt synen susteren und broderen de gereide guider myt deilen, as nemlich so manich kynt, so vyll deill, dan so dar weren, seys leffell, solde eder kyndt eynen haven. Und irer geyner me noch myn[der] haven eyns dan der ander.

Und dit we vurgenant ist geschiet uff dach datum vurscreven, in Tilgens vurscreven Waynhuisse, vuir an dem herde, in bywesen der eirsamen und geistlichen Hern Herman Bruynyck van Reven, preister und

notarius, cappelain zur tzit zu Siborgh, und Her Wilhem Berchem, preister, und voir den vurscrevenen scheffen.

A II/11 1523

Zwievell, uff vridach na Invocavit, anno et cetera [15]XXIII. [*Invocavit = 1. Fastensonnt., 6. Sonntag vor Ostern*]

Girlach Lynenwever hait upgeboden eynen swartzen vrouwenrock, zugehorich Bela van Lyntlайн, vur V Mark schoult verdeyntzs loyn.

Kost VI Schilling.

Deselve zyt, vur obgenante scheffen.

Johan zom Isermart hait upgeboden eyne karre myt zwen rader, zugehorich Heitgen van Meckenheym, myt zwen hammen und iren slachseillen vur VI Mark, IIII Schilling, van zerong.

Kost VI Schilling.

A II/11 1523

Bl 36^v

Zwivell et Ley, feria sexta post Conversionis Pauli, anno et cetera [15]XXIII. [*Pauli conversio = 25. Januar*] Meus Becker und Freugin, elude, hant gegeven und upgedragen yre eynt dem anderen alle yre gueder, gereit und ungereit, wae und wie de ytzont gelegen synt off hernamails in eynicher wys gelegen mogen werden, in eynicher wyse, neyt darvan uysgescheyden, de leste levendige hant van en beyden die zo keren und zo wenden van und in wat hant sy lustet off enenkompt.

A II/11 1523

Bl. 36^r

Overmitzs deselvigen, uff vurscrevene zyt.

Anno Scheiffer ist ankommen myt consent Mettelen und Freugen zusamt Adam, irem huiswirt, doitzhalven, Peter Scheifers, syns vader und irer moder, myt huß, hoff zom Birbouym, in der Uilgaß gelegen, myt syme guide und erffschafft in der Wellergaß, de helffschit davan syn vader in zu wanen plach.

Gelden jars dat erve in den Seligen Dall XVII Albus, Martini vellich, und gelderen dat Roßenerve dem jongen Johan Knutgen VIII Albus, II hoynre uff lest Vastavent und der Kirehen jars der Kirchen II Albus.

A II/11 1523

Loe und Zwivell, uff sent Niclaisavent, anno et cetera [15]XXIII.

Johan Nuysgen und Kathrina, syne elige huisfraw, hant verkeufft und uffgedragen Volmar Loir und Dedrich van Groynschit, brodermeister der broderschafft der Bedroiffnys Maria under dem galgen des Hilgen Cruitz, in behoiff derselver broderschafft III Goltgulden erfrenthen, uff sent Mertynsdach vellich off bynnen den XIIIIDagen irst darna volgen unbefangen, in ire gehuisse, hoff, in der Uilgassen, sy in waneten, doch myt LX Goltgulden, uff vurscrevene zyt myt unbetzalten erschenen termynen afflossen mogen, lude der verschrivonge.

A II/11 1523

Bl 37^v

Uff gnante zyt und vur demselvigen.

Wynant Hoiffsmyt hait uffgeboden pende, zugehorich Thonis Holtzenheuwer, nemlich II cleyn kessell, haldent IIII quart, item, eyn kessell van III Schilling, III alder pannen, eyn schoymleffell, zwey dennen bort, vur eyne zumme van burgschafft van XII Mark.

Kost VI Schilling.

Johan Aldenach und Godart zum Reeßen, burgemeisteren, uff dynstach na oculi, anno et cetera [15]XXIII. Thys van Wipperfurde hait beleit und bybracht de wynkouffsluide. Darby geweist hey Clais Lymbergh syn huysfrau vur der Houltzportzen affgewonnen et cetera, de gesacht haven myt namen Gotschalck Smyt und Peter van Wipperfurde, in bywesens Thonis Schroder, der ouch myt by dem gewyn was, dat Clais Thyßen dat huyß VIII jair verleynt hait, zu Cerstmyssen neist verleden angeyngen, alle jair vur XI Mark. Und Clais solde allen noitbuwe machen und machen laissen und wer eym dem anderen solchs zugedroncken have, we solchs gewoinlich sy. Doch dat irste jair hait Clais neit willen vertzien uff Thonis Schroder und den pacht van eme hain willen. Doch geve eme den Thys, wolde hey gerne untfangen, dwile solch irste jair noch an Thonis stoinde. Allet myt irer aller wille.

AII 11 1523

Bl. 37^r

Wilhem Beissell und Emericht van Seichtem, uff dyntach na letare, anno et cetera [15]XXIII.
Tilman und Johan Eußkirchen, gebroder, burgeren zu Bonne, hant bekrononge gedayn uff alle erff und
erfftzale bynnen und bussen Siberg, Bruyn Schomecher seligen nagelaissen hait, ir broder.

Vur denselvigen, uff gnante zyt.

Her Syvert Poley, pastoir zu Droistorff, hait gegeven und upgedragen dat sevendeill an dem alden huysse van
hoeve und garten darby und tgen over gelegen, darzu guit gnant de Alde Herberghe, Rutger Artzs und Fyen,
eluden, syme neven und swegeren, beheltnys dem pastoir syns rechtds am nuwen huiße uff derselver hoiffstat
gelegen, bussen der Colner Portzen,

[Das folgende Protokoll von anderer Hand]

Alner, schoultis, Beissell, Rompe, Loe, Zwivell und Seichtem, uff dynsdach na letare, anno et cetera
[15]XXIII.

Her Tylman, preitgerordens bynen Coelne, Henrich zom Korf yn der Nuyergassen und Guetgen zom
Summeren bynnen Syburch, gebroider und susteren, van Johan Kremer und Fygen, elude, geschaffen, synt
ankomen doetshalven iren alderen myt den zwein huseren Under der Hallen leynt tuschen Lantschaden
hallen und Henrich Smitz huyse gelegen und dat ander beneven Johannis Schutz huyse am Oirde Under der
Hallen genant dat

Bl 38^v

Cleyn Heltgen. Gelden jairs.

Synt deselwe kynder vort ankommen myt eynem huyse vor der Holtzportzern, van irs steyffaders Johanns van
Gymmenich herkommen, tuschen Teyll Pyle und Petrus Ruetgens huyse gelegen, umb eyn summe van geltz, ir
steyffader van der kynder wegen untfangen, in dairvur sulch huys verkouft und uffgedragen hait, luyde eyns
besigeltz scheffenbriefs von desen vurscrevenen scheffen getzoint und verlesen ist.

Geldende jairs yn die vroemisse XV Albus.

Prior und gemeyne convent des Predigercloisters bynnen Coelne vurscreven haint myt wissen und wyllen
Heren Tylman van Syburch vurscreven, yrs convent mytbroider und Heren, verkoufft und uffgedragen
overmitz dem eirbaren und geistlichen Heren Her Jan van Tucht, yren gesryckten und verordenten
vollmechtigen munper myt synem besygelden munpersbrief, van prior gemeiner convent siegel besiegt
voer vorecrevenen scheffen und hynder samentlicher getzoint versien und gelesen ist. Und myr geven
alsulche kyntdeyll und anersterffenisse up genanten Hern Tylman van synen alderen anerstorven und
tzogevallen ist und vort van synem steyffader tzo vermach, he sy damyt befaenen off myt bynnen und
buyssen Syberch yn den burchpanen gelegen, nyt daeven uißgescheiden. Henrich tzo Korf vurscreven und
Grete, syner eliger huysfrau heuseren tzom Summeren und Guetgen, syn huysfrau, syme broider sustern und
yr swegere de sulche tzamender hant an sych gegolden haven, doch beheltniss Johan Under der Hallen, der
kynder steyfvader, an dem cleynen huysken Under der Hallen genant, dat gelegen beneven Johan Grutz
vurscreven gelegen, dairan syner lyftocht tzo gebrughen und langer nyt.

A II/11 1523

Bl. 38^r

Beissell et Johan Rompe, uff dynstach na letare, anno et cetera [15]XXIII.

Johan Pleit van Gymenich und Styngen van Ratyngen, syne elige huisraw, hant gegeven und uffgedragen
irer eynt dem anderen alle ire guider, gereit und ungereit, we sy de itzunt hant und vorder an sich erlangen
und werffen moigen, de leste levendige hant van in beiden, de zu keren und wenden, zu alle irem
wolbevallen und enenkomptzs, doch dat de leste levendige hant des irst afflevigen neisten vrunden eyns
geven soll VI Albus und neit me, damyt de alle alsdan offentgenant synt und bliven solle.

Alner, schoultis, Beissell, Rompe, Zwivell, Loe et Seichtem, uff gnante zyt.

Tuschent Thonis zom Hirtzs als mombers Coyngens, syner nychten van Bon, in bywesen des tholschriver
eyns und der loerer umb de II Gulden renthen van den Buchmoelen Thonis uff sy erwonnen und zugewyt is
et cetera, wilchs sich de loerer der betzalogen bis noch geweigert hant uff ansoichen der van Bon. De loerer
vurscreven vur den scheffen guitwillich angenomen de II Gulden renthen zu betzalen myt versessen
termynen und daromb dynstach na sent Peter he syn sollen betzalogen off pende zu

Bl. 39^v

Zwivell et Loe, uff gnante zyt.

Kirstgen van Ruschendorff und Elsgen Mouysgens, syne elige huisfraw, hant verkoufft und uffgedragen ir deill der wießen, nemlich de halve wieße in van Kirstgens swegerhern und swegerfrau, irem vader und moder, anerstorven und zugefallen ist, dat ander deill irem swager und broder Moysgen ouch geweist ist, hynder Heyntzs Knutgens hoeve gelegen, oven scheissende an de Hamantzsportzs und unden weder den presenßmeister dem gnanten Heyntzs Knutgen und Elsgen, syner eliger huisfraw, gelden.
Waedizabuten.

Overmitzs vurscrevene scheffen ist affgeverdigd tuschent dem tholschriver van Bon und Girtgen zom Nuwenhuiß, dat der tholschriver uff dynstach na sent Peter und Conen alhe syn sall betzalogen van ir zu untfangen ader sich verdragen van der achterstendiger schoult und lyffrenthen, Coyngen van Ketgen zu Bonne verschreven ist, lude breve und sigell, anter dem boiden ist beveill gegeven van dem schoulten in unvertzochlich pende zu geven.

[Girtgen van Neuwenhuiß ist Girtgen Overstoltz zum Neuenhaus. Eine Coenen van Ketge ist 1496 Johann Overstoltzs Schwägerin (2/226v)]

A II/11 1523

Bl. 39^r

Loe und Seichtem, uff vurscrevener zyt.

Johan Deilgen und Drude, syne elige huisfraw, hant verkofft und uffgedragen XV Albus renthen Radergeltzs Johan Staill und Schemell Johan, hospitailsmeister, an der Molnerportzen gelegen, zu behoiff desselven Hoispitails jarlichs zu Lichtmyßen off bynnen den neisten XIIIII dagen unbefangen zu geven und zu betzalen uis iren zwen garden, eynen tgen der Burch, beneven Thonis zom Rosenboym und der ander in derselver sleichten darbovent, beneven Schemell Johans garden gelegen. Und havent bekant, sy darvur ehe datum deßer schrift gegeven van vurscrevene hospitailsmeister untfangen haven XV Rader Kolnische Gulden, doch beheltnys Deilgen und Drude, eluden off iren erven, de affloeße zu Lichtmyssen myt XV Kolnische Gulden Radergeltzs und vur betzalten erschenen termynen affloesen moigen, als XX Raderalbus vur ederen Gulden sprechent.

[Nachtrag:]

Dit vorgenante ist affgeloist im jair 1542.

A II/11 1523

Bl. 40^v

Beissell und Loe, uff godenstach na letare, anno et cetera [15]XXIII.

Meister Wilhem Artzs van Monstereiffell und Druitgen, syne elige huisfrauwe, hant gegeven und uffgedragen irer eynt dem anderen alle ire guider, gereit und ungereit, we sy de itzunt hant off voeder an sich hernamails werffen moigen, de leste levendige hant van in beiden, de zu keran und zu wenden, zu alle irem walbevallen und enenkomptzs, doch na irer beide doide dat deselvige guider alsdan vruntdeilich syn sollen.

Alner, schoulten, Beissell, Emericht van Seichtem und Loe, Aldenach und Godert zom Reesen, burgemeistern, Johanes Schutzs und Johan Staill, alle vam rade, uff vurscrevenen dach und zyt. Thomas, der Waille van Lutge ist hude, datum, erschenen. So hey hebevoir umbtrint eynen maynt vergangen Johan zom Woilff und anderen burgeren zu Siberch etlichen wyn affgeguldens hatte und deselvigen des anderen dags zu Bonne etlich gelt uff den wyn gelevert, in wilcher leverongen sich Thomas vurscreven vergessen, so hey der namen neit alle enkante noch solchs so anstont neit uffgetzeichnete hatte und vermeint Bl. 40^r

hey Johans son zom Woilffe XV Hornsche Gulden gegeven hedde.

Und so der Waille vurscreven deßen dach zu Sibergh komen ist und hey myt den burgeren syn gelt umbgelacht hait, hait sich befonden, hey Wilm Verffer solche XV Hornsche Gulden gegeven und gelevert hait. Und hait sich derhalver van Johan zom Woilff, syme soene, und anderen burgen guder rechentschafft bedanckt.

Loe und Seichtem, uff deselvige zyt.

Johan Guylichs und Greitgen, syne elige huisfraw, hant verkoufft und uffgedragen Johan Staill und Schemell Johan, hospitailsmeisteren, inbehoiff deselvigen Hospitails XII Raderalbus jarlicher renthen zu geven und zu betzalen uis iren huyße, hoeve und gartten vur der Colner Portzen, gnant de Alde Herberghe, der Radermecher vurhyn zu haven plach. Uff sent Girdruidtdach vellich, doch beheltnys de eluiden off iren erven de affloeße myt XII Kolnische Gulden, XX Raderalbus vur ederen Gulden gerechent, uff vurscrevenen dach myt erschenen unbetzalten termynen affloeßen moigen.

A II/11 1523

Bl. 41^v

Loe und Seichtem, deselve zyt.

Hynrich van Roibsait und Neisgen, syne elige huisfraw, hant verkoufft und uffgedragen, Hynrich van Wipperfurde, zu Wynckell, und syner eliger huisfraw ir huissgen und gartten tgen Vais zur Blomen erffschafft, in der Wellergassen am Crutzs gelegen, Tryne Myntgens zu hain plach, neit darvan uißgescheiden.

Waendizabuten.

Vur denselvigen, uff deselve zyt.

Hynrich van Wynckell vurscreven und Tryne, syne elige huisfraw, hait verkoufft und uffgedragen Jaspar Metzmecher und Guitgen, syner eliger huisfraw, solche vurscrevene erffschafft, we sy solchs an sich we virgenant gegulden und geworffen haven, neit darvan uisgescheiden.

Gelden jairs III Mark, des Heyntzs Flachen erven II Mark und Meuschen erven 1 Mark.

Und geloifft werschafft zu doyn.

A II/11 1523

Bl. 41^r

Seichtem und Loe, uff vurscrevenen dach.

Girtgen van Pleiß, Severyn Beckers seligen nagelaissen huisfraw, hait in der zyt sy des woll moigich und mechtich was verkeufft und uffgedragen Thonis Meyssen und Stynen, syner eliger huisfraw, ire gehuyße, hoff und gartten an der Strytgassen, tgen dem Judenkirchoff over, tuschent Johan Zymonis und der Klockenbitzen gelegen. Gelden jars XII Albus in de Kirche und in de loirbroderschafft.

Und geloifft werschafft zu doyn.

Rompe und Seichtem, uff deselve zyt.

Johan van Lomar und Greitgen, syne elige huisfraw, haven verkoufft und upgedragen Clais Lantschaden, irem swager, ire gerechticheit an dem huisse in der Houltgassen, beneven Peter Kr[e]ichs huiße und Johan Blanckenberghs huiße gelegen, nemlich dat halve deill we Greitgen solchs van Johan Lantschaden, irem vurmanne und iren samender kynder anerstorven und zugefallen ist, neit darvan uißgescheiden.

Gelden jars XII Albus dem presensmeister.

Und geloifft werschafft zu doyn.

A II/11 1523

41ad

[lose einseitig beschriebene Einlage 200x150 mm.. Nachträglich mit 41a beschriftet]

Overmitzs vurscrevene burgemeisteren und rait gemeynlich, den selven sent Johansavent zu Mytzsomer, anno et cetera [15]XXIII.

Also Johan van Berchem, wirt zum Isermart, dat nuwe gehuiße beneven syn huis zor Merlen in de Clusengasse gesatzs hait, we eme dat van Peter zum Wynter etlicher maissen vergont ist und beneven der Merlen alztit eyne gemeyne offen sohe gestanden und geweist. Ist darom verdragen overmitzs vurscrevene burgemeister und rait, dat der wirt solche gemeyne sohe durch bede und gesynnen hey an sy gedayn hait und durch fruntschafft hey solchs myt in syn gehuisse bebouwen mach, dat eme itzunt gegont und zugelaissen ist und myt dem underscheide, dat der wirt de soehe unden eyns mans hoechde offen laissen soll, unbebouwt umb off des van noden syn woede, eyn mynschs dar onden hergayn moige. Ouch en soll der wirt geyne perfeye oven over de soehe machen dan de derhalver eyne bliven soll. Und hevan soll der wirt off syne erven jairs der stat geven II Albus uff sent Johansdach zu Mytzsomer vellich.

A II/11 1523

Bl. 42^v

Zwivell und Loe, uff vurscrevene zyt.

Matersche und gantze convent der beslossen Kluyzen bynnen Siborgh hant verkoufft und uffgedragen Peter zum Wynter und Leyngen, syner eliger huisfraw, ire gehuiße myt syme hoeffgen und zubehore an der Kirchoffsmuyre, beneven der Hallen, tuschent dem nuwen gehuisse de kirchmeisteren dar gebouwt hant und Johannes Schutzs huisgen gelegen, myt consent und willen zulaissonge myns werdigen Hern abtzs, overmitzs Hern Herman Blanckenbergh van syner Werdicheit solchs bewilligt umb anderen irer noittorfft und noide, bouwe halver und wideren schaden zu verhoiden.

Gelden jairs den Hern im Seligen Dall II Mark.

Und geloifft werschafft zu doyn.

A II/11 1523

Seichtem und Loe, uff gnante zyt.

Joirgen zu Keir und Engen, syne elige huisfraw, hant verkeufft und uffgedragen Joenen zom Esell und Beilgen, syner eliger huisfraw, zweyn stelle hynder irem huiße und iren garden, halff darby gelegen tuschen dem Cleynen Hirtzs und Tilgen Beckers erve, darzu de portzs und den hoff, we solchs in anerstorven und zugevallen is.

Gelden jars solche vurscrevene erffschafft zusament den Hern.

Bl. 42^r

Im Seligen Dall V Mark, III Schilling, uff sent Laurentiusdach vellich.

Wilchen egenante renthe soll Joene *[zom Esel]* und Beilgen, elude off ire erten, jarlichs betzalen bussen Jorgen *[zu Keir]* und Engen, eluden iren erten schaden, und des sollent de weder heruisgeven Joenen und Beilgen off iren erten vurscreven jarlichs zom besten, uff vurscrevenen sent Laurentiusdach IIII Mark. Waenendizabuten.

A II/11 1523

Zwivell und Loe, uff genannte zyt.

Johan Zymonis und Schemell Johan hant richtlich verboden, Johan dem Kannengeisser, irem swager, solche erte und erffschafft, gereit und ungereit, we Grete Meuschs seligen solchs nagelaissen hait bynnen und bussen Sibergh, solchs neit zu wenden noch zu keren, zu versetzen noch zu verkouffen, sich oder emans damyt anschreven off setzen zu laissen, sy en were des eher noch anders zuvreden.

Kost VI Schilling.

A II/11 1523

Bl. 43^v

Alner, schoultis, uff vurscrevene zyt.

Clais Bartscherer hait zu leisten gemant Herman Vlach den jongen, vur eynen burgen und eyne zumme van X Mark, herkomen Johan, halffen zu Kirenscheide.

Hait vur eynen wirt gekoren.

Hait VIII dage dach van gerichts wegen.

Kost VI Schilling.

AII/11 1523

Alner, uff donrestach na letaere, anno et cetera [15]XXIII.

Johan Henselen hait zu leisten gemant Hynrich Smyt, als eyne burge vur eyne zumme van VIII Kolnische Gulden, van wegen meister Wilm van Ropichteroide.

Hait vur eynen wirt gekoren.

Kost VI Schilling.

Alner, schoultis, Loe und Rompe, uff deselwe zyt.

Clais Lymbergh hait beleit und besichtigen laissen den brant, eme an syme huiße vur der Houltzsportzen, Thys van Wipperfoirde ingewant hait, gescheyn ist.

Hant vurscrevene scheffen solchs gepoit myt sampt der stat werckmeister, de den brant overlacht haven, an holtzwerck und dyllen da geschiet de nemen wolden uff ire kost[en] weder zu machen, XV Kolnische Gulden, uißgescheiden de latzen und dat dach myt den wenden et cetera.

A II/11 1523

Bl. 43r

Aldenach, burgemeister, Johan Staill und Johan Roide, kuyrmeister, uff vurscrevenem dach.

Wilm im Bruhoeve hait gewyst an syme huisgen an vurscrevenem brande tuschten eme und Clais Lymbergh und vermeint eyne soeve beneven dem huißgen, glichs des gevels dachtruppen und Clais garden, oiffen syn solle. Und Clais meynt, hey dat zumachen moige.

Hait der scheffen vurscreven bedoicht und gesacht, Clais de soeve dartuschen offen laissen solle. Dat burgemeister und kuyrmeister vurscreven och bilchen bedoicht und daby gelaißen haven. Und de kuyrmeister hant mytverorlofft, Wilhem den zuyn recht satzen und machen moige.

Aldenach und Godart zom Reeßen, burgemeister, Johan Staill und Johan Roide, kuyrmeister, uff donrestach na letare, anno et cetera [15]XXIII.

Wynant Schelten hait bybracht de ghene, den hey dit jair korn ~~und~~ affgegulden, umb de zu horen we solchs geschiet overmitzs vurscrevene vam raide vercleirt und verhoet und hynderlich dem pastoir ader emans syns rechten.

A II/11 1523

Bl. 44^v

Johan Koch van Buckenroide hait gesacht, we hey eynmaill off dry zu Wynant Schelten komen sy und in gebeden umb gelt uff syn korn, eme das affzugelden, wilchs sich Wynant allet geweigert. Bis am lesten have Wynant eme affgegulden XII malder korns, eder vur XV Albus, zu sent Bartholomeusdage zu betzalen, und have eme solchs myt gelde do betzalt. Und Wynant have domyt gesacht, ist sache, du mych alsdan so levers und dat korn uffslayn worde, will ich dir 1 par hoeßen zom besten schencken.

Solchs der Koch myt syme eide beweren wilt. Und have Wynant me gesacht, so hey kome bynnen eyne maynde off zweime und brenge eme syn gelt weder, wolde hey in des kouffs erlaissen, wilcht Meus Welckener, als der burge, myt by syme eyde beweren wilt.

Thonis van Oeßenkoiffen hait gesacht und bekant, hey Wynant X malder korns glichermaissen in glichem kouff verkoufft have. Und dargeyn underscheide in en were dar Meus ouch vur burge sy, und dat sament by iren eiden beweren willen, off des van noden were.

A II/11 1523

Bl. 44^r

Der wirt Dedrich zu Boickenroide hait gesacht, we Wynant eme umbtrint II jair vergangen, IIII malder korns geleynt have, dat malder zu arne myt IIII Mark zu betzalen, off worde dat korn myn[us] gelden solde hey eme etwas so vyll megeven, dat idt de IIII Mark worde, und bekent, hey sy solchs noch deßen dach schuldich. Und dat korn have zu der zyt de IIII Mark gegulden, und hey solch by syme eide behalden, da des van noden ist.

A II/11 1523

Alner, schoultis, und Zwivell, uff donrestach na letare, anno et cetera [15]XXIII.
Her Herman Blanckenbergh, vromyßhere, hait gegeven und uffgedragen Tryngen, syner natürlicher dochter, eme van Zilien, Greyßen Lodwichs dochter van Droistorff zugeschafft, alle syn elderlich guyt, erff und erffschafft, gereit und ungereit, bynnen und buissen Sibergh in dem burchbanne gelegen, hey na syme doide nalaissende worde und van eme ayn testament und leste willen unverordent off unverwyst ader sust unverhandelt blive, neit darvan uisgescheiden.

Und datselvige Tryngen vur synen neisten erven und nafolger

Bl. 45^v

syns guitz gesatzs gemacht und uisserwelt des gentzlichen alsdan anstont zu gebriuchen und zu behalden, myt dem underscheide, also off sache were Tryngen ayn eyne lyffselige geburt, van ir geschaffen, afflisch worde, dat alsdan solche vurscrevene erffschafft und guitz van Hern Herman herkommen were, wederomb zorucksterven und vallen soll an Her Hermans broder kynder, myt namen Herman, Hynrich, Styna, Johan und Jutgen. Und davan soll Hynrich obgenant de helffschit des vurscrevenen guitz und erffschafft vur sich haven und behalden. Und dat ander halve deill sollent syne suster und gebroderen, alsdan im leven weren, under sich haven und deillen, eyn so vyll als der ander, des deils sich Hynrich neit kroeden noch underwynden soll und derglichen syne suster und broder sich ouch syns deils we vurgenant neit zu kroeden haven en sollen.

Tryngen vurgenant soll ouch neit macht haven, dat huys zum Overstoiltz, in dem sy geyne elige kynder en gewonne ader na en laisse, zu versetzen noch zu verkeuffen, dan we obgenant ir levenlanck gebriuchen. Dan off sy lyffselige erven nalaissende worde, solde solchs asdan vort an de sterven und vallen, we recht

Bl. 45^r

und gewoinalich is.

Und were sache, das Tryngen ehe dan Zilie, syn moder, doitzhalven ayn wyßliche elige geburt affgayn worde, so solde ir moder alle der guider eyne lyfftzuichtersche syn und der ir levenlanck gebriuchen und langer neit und de alsdan in guidem gewoinalichen noitbouwe zu halden und darna weder sterven und vallen an Her Hermans neiste erven we vurscreven. Und darby in sonderheit hait vurscrevener Her Herman me gegeven und uffgedragen Zilien obgenant dat huys gnant dat Paradys, hynder dem Genßheufft, Clais Lymberchs huisse und dem Morenkop, in der Holtzgassen gelegen, sy des gebriuchen und geneissen mach zu versetzen off zu verkoiffen zu iren noden walbevallen und enenkomptzs, ayn argelist. Anders so solch Paradys van Zylien unverhandelt und unverkoufft blivende worde, solde datselvige Paradys alsdan na irem doide vallen und sterven vur eyn erff jaargetzyde, lude des scheffenboichs.

A II/11 1523

Bl. 46^v

Johan Staill und Johan Roide kuyrmeister, Aldenach, burgemeister, Johan Girachs, Herman Vlach und Peter zom Wynter, alle vam raide, uff vridach, neist na Paischen, anno et cetera [15]XXIII.

Wilhem zu Richensteyn van Bonne hait bekroent und beleit de hoiltzen want Johan zom Woilffe an syme gehuisse in der gassen an der Groemelportzen eme weder syn huyß, gnant de Richensteinsche Schuyre, zu nae gebouwet hait und beclaigt hait, de want glichs syner dachtruppen und de donne hey darweder gesatzs

bilchen affdoyn solle, hant vurscrevene burgemeister, kuyrmeister und van raide gesacht und bilchen bedoicht Johan zom Woilff solch vurscreven Wilhelms gehuiße II vois van syner want myt der want und donnen wychen und ruymen solle, wilcht Johan zom Woilff tgenwordich willencklichen gesacht gerne anzunemen und affzudoyen gefolglich geweist is.

A II/11 1523

Bl. 46^r

Overmits deselvigen, uff vurscrevene zyt.

Peter zom Rodenhuis hait beleit und bekroint an syme garden by der Gromelpoortzen, we dat Johan, der kannengeisser, syne doyrlatze am zuyne, an Peters dorpost, geneilt und gefestiget hait und vort im selven garden synen zuyn eme zu nae gesatzs have.

Hant de kuyrmeister vurscreven bescheiden, der kannengeisser solle de geneigelde latzs, hey also an Peters post genegelt hait, dar dat syn wendt, affsnyden und den zuyn recht setzen.

Aldenach und Godart zom Resen, burgemeisteren, uff donrestach na Jubilate, anno et cetera [15]XXIII. Kirstgen Schoultis hait beleit myt Peter van Swirten und Clais van Konyckswynter, so Thonis Bestgen gesteren zur Vulkannen im vollen gelage gesacht hait, Kirstgen have eyne van Wynter, eyne cleynen armen mengen, 1 malter korns itzunt vur VI Mark gerechent, darkome 1 Gulden gelde et cetera und davan vast wort gehat have, so hait datsele mengen Clais vurscreven der dat korn also kriegen solde,

Bl. 47^v

haven itzunt gesacht und bekant, we hey gerne korn van Kirstgen vurscreven gehat hette, und Kirstgen have eme dat korn geboden vur XXVI Albus. Und Clais have eme geboden umb 1 malter, XXIII Albus. Also en weren sy des kouffs neit geworden, und hey en have daromb geyn korn van eme kriegen und wilt dat myt syme eide, off hey des neit erlaissen syn moicht, beweren. Und Peter vurscreven spricht, we hey solche wort van en beiden gehort have.

Johannes Schutzs, Godart zom Reeßen, burgemeisteren, und Johan Staill, rentmeister, uff mayndach, na octave Pinsten, anno et cetera [15]XXIII.

Herman Moilner an der Alderportzen hait beleit myt Coynrait Schroeder genant der Waille, und Peter Snoymecher, de gesacht haven, so neichtent sondach spaide den avent, eyn getzenck vur dem huiße zom Oißen was, dar Johan der Vogell myt geroifftem metzs inwas. Have Herman Molner vurscreven van syme soiller geroiffen und geseyn, der Vogell syn metzs uis hatte und gesprochen, off hey de naber myt eyn erworgen wille. Do have der Vogell gesacht, du ertscher dieff, kom du heraff, du bis myr also wilkom as sy.

A II/11 1523

Bl. 47^r

Johannes Schutzs und Godart zom Reesen, burgemeisteren, uff donrestach na des Hilgen Sacramentzsdage, anno et cetera [15]XXIII.

Hynrich Raiff in der Batstoeven hait beleit myt Meus van Krystorff de vur desen vurscreven gesacht hait, dat hey Wilhem van Voisholler van wegen Jaspars, Wilhems steiffson und Meus knecht geweist is, gegeven have van verdeyndem loyn, hey Jasper noch schuldich was, II Kolnische Gulden, nemlich in dem Krutzbroderhoeve zu Krystorff, de Wilhem daselffs van eme untfangen have und wilt darmyt syme eide beweren.

Alner, schoultis, uff mayndach na trinitaten, anno et cetera [15]XXIII.

Johan zom Woilffe hait zu leisten gemant Peter Strentzer vur eynen burgen eyne zumme van IIII Kolnische Gulden, 1 Schilling, van wegen Roger, wirt zu Muyche.

Hait acht dage dach van gerichtzs wegen.

Hait vur eynen wirt gekoren by dem Kannengeisser.

Kost VI Schilling.

Overmitzs denselvigen, uff genante zyt.

Johan Kannengeisser hait solch verbot und kummer, Johan Zymonis und Schemell Johan *gedayn* uff Grete Meusch selige guider gedayn, verburgt ant recht und in der sachen zu recht stayn wilt.

Ist selffs burge und heufftman.

A II/11 1523

Bl. 48^v

Alner, schoultis, uff godenstach na sent Vitzsdage, anno et cetera [15]XXIII.

Also Kirstgen van Steildorff zu Geistongen Johan den Walen, uis dem lande van Lymburgh, hude, datum, gekummert hait im irsten overmitzs Wilhem Hammecher, bis an de boden, der oirsachen, daromb der Waile vurscreven Kirstgens maigt eyne dochter Davidtzs Snytzeler geheischt, van begerden Davidtzs by iren vader uis der stat an den Dreischs zu komen et cetera.

Synt daromb overmitzs den schoultis vurscrevene itzunt verdragen und entscheiden, also dat Kirstgen uff den kummer und den knecht vertzigen hait, derglichen der knecht wederomb uff Kirstgen und den Hammecher vertzigen, und damyt sy beidesament gefredigt syn sollen.

Und wilcher dyt breiche und herweder dede, solde beiden unße[r]n Hern ervallen syn myt V Gulden und den mechelers myt III Gulden. Nochtant solde dese scheidonge stede gehalden werden.

A II/11 1523

Bl. 48^r

Overmitzs den schoultiss vurscreven, uff deselve zyt.

Der schoultis hait Johan Girachs und Johan zom Woilffe, brodermeister Unser Lieverfrauwenloff erloiffnis gegeven, van wegen der broderschafft vur ire gulde und renthe, lude irer register, myt der stedeboden ire verseß zu penden und myt den penden vort umbgayn sollen, we recht is.

Overmitzs obgenante, deselve zyt.

Clais Lymbergh hait zu leisten gemant Coynrait Schroder vur eynen burgen eyne zumme van, herkommen van wegen Wilm Wynterschit, umb gebrech eyns kouffs van eyner bytzen, hey eme verkeuft und neit enlevert, we verdragen is. Hait acht dach van gerichtzs wegen und zom Isermart eynen wirt gekoren.

Kost VI Schilling.

A II/11 1523

Bl. 49^v

Johan Roide und Peter zom Roidenhuis, kuyrmeister, uff mayndach na sent Vytzsdaye, anno et cetera [15]XXIII.

Peter zom Wynter hait beleit den nuwen bouw, der wirt zom Isermart eme in der Kluyssengassen an syme gehuiße zu nae gebouwet hait und gewyst hey eme syner kefferen uff syme gebouwes, nemlich zwae affgesneden und gekuirt have. Und hait eme daromb den bouwe richtlich doyn verbieden, nemlich also so manchen dach achter deßer zyt dem heufftman, hey den bouwe stayn leist, so manche V Schilling und den arbeitssluiden, so manchen dach de daran arbeiden, so maniche V Schilling zur kuyr, so verne de geclaigt wirt.

Alner, schoultis, und Zwivell, uff mayndach na sent Vytzsdaye, anno et cetera [15]XXIII.

Neesge Zorins hait zu leisten gemant Hynrich Lymbergh vur eynen burgen eyne zumme van XVI Mark verdeyntzs loyns uff rechenschafft, herkommen van Johan Schomecher van Wipperfurde.

Hait vur eynen wirt gekoren by dem Kannengeisser.

Hait dach van gerichtzs wegen VIII dage.

Kost VI Schilling.

A II/11 1523

Bl. 49^r

Johannes Schutzs und Godart zom Resen, burgemeister, Thonis zom Hirtzs und Johan Staill, rentmeister, Johan Rode und Peter zom Rodenhuis, kurmeister, Herman Vlach, Johan Girlichs und Wilm Verffer, alle vam raide, uff sent Johansavent Mytzsomer, anno et cetera [15]XXIII.

Tuschent Peter zom Wynter und Leyngen, syner eliger huysfrau eyns, Johan zom Isermart und Hilgen, syner eliger huisfraw anderdeils, als umb dat nuwe gehuisse und bouwe der wirt in de Cluisengasse, beneven syn huis zur Merlen und weder Peters huiß gesatzs hait, derhalver sich Peter beklagt und overmitzs de kuyrmeister beleit der bouwe eme zu nae gemacht und uff dem syne stoynde, und in sonderheit der wirt eyne kalle gelacht have uff de muyre, sich Peter antzuigt syn syn solle, daromb eme den bouwe zu gehengen neit zu doyn stoinde.

Synt daromb overmitzs vurscrevene burgemeisteren und vam rade guitlich verdragen und damyt ewenklichen gescheiden syn sollen, vur sich und ire erven, also dat der wirt und syne huisfraw off ire erven de kalle tuschent irer beider erffschafft van nun vortan erfflich und ewenklichen machen und buwich halden sollen, bussen hindernys und schaden Peters und Leyngen, eluden, off iren erven und solchs ouch also verfoigen, dat in derhalver van der kallen und bouwe geyn schade en geschee. Ist widers bereit, so sich Peter horen leist, der gront des nuwen bouwes, dar dat huis itzunt uffsteit, syn syn solle. Daromb sollen und mach eder uff dem scheffenboich, wanne dat uff ist, seyn laissen wes sich darin befyndt, eyme ederen zu sime rechten und he an unverloren ist. Vorder bekalt, so Peter und Leyngen, elude, off ire erven zu eynchen ziden gesynt weren de muyre zu bebouwen, solde in van dem wirde gegont und zugelaissen werden. Und so der

bouwe reide were, solde der wirt de kalle weder machen und halden we boven geschreven. Und hant gelofft beide parthien vur sich und ire erven stede und veste zu halden.

A II/11 1523

Bl. 50^v

Johan Rode und Peter zom Rodenhuis, kuyrmeister, uff donrestach na sent Johansdage, anno et cetera [15]XXIII.

Dederich Welckeners huisfraw hait beleit und besichtigen laissen solchen schaden der Jonfferen souwe in der Cluysen ir in irem garden am Over, beneven Wynant Smytzs garden, gedayn haven, nemlich an iren bonnen und muyen, de zumail verdorffe und zunetem gemacht haven, wilchen schaden de kuyrmeister geport und geschatzs haven und bedoichten bilchen im syn solde doch uff XXII Albus gelaissen haven.

Kost V Schilling.

Overmitzs vurscrevene kuyrmeister, uff deselве zyt.

Clais Lymbergh hait beleit und gewyst tuschent Wilm im Bruhoeve und eme eynen zuyn tuschent in beiden gestanden, den Wilm uissgeruckt und anders gesatzs dan hey vurhyn gestanden hait und eme den in syn erve oven am ende, umbtrint eynen vois, den zuyn zu nae gesatzs have, wilcht de kuyrmeister itzunt beseyn und also befonden haven.

Clais clagt solchs myt vur eyn gewalt und we solchs in syme affwesen und ayn synen wissen gescheyn sy. Wilm spricht dar

Bl. 50^r

tgen und ist willich, den zuyn weder zu setzen, we hey vur gestanden hait, in dem de kuyrmeister dat guit bedoichten, doch vermeynt hey den recht gesatzs have.

A II/11 1523

Overmitzs vurscreven kurmeisteren, des anderen dachs.

Wilm im Bruhoeve hait beleit und gewyst und myt darby genomen Lodwich Roitgen, Joris van Boistorff und Johan Peler und oven am zuyne in der erden graven laissen, de da stacker befonden haven, alde zuynstachen und plancken in Wilms garten, de wisten, dat Wilm den zuyn umbtrint ~~ver~~ venae $\frac{1}{2}$ vois Clais zu na gesatzs have.

Zwivell und Johannes Schutzs, burgemeister, uff avent Visitatoires Marien, anno et cetera [15]XXIII.

Kirstgen van Reide zu Ackerbach hait van wegen syns unmondigen kyntzs van Zygen zom Sternen gesont schichtonge und deillonge van alle den guideren, gereit und ungereit, Styngen, syn steiffdochter, van Otto zom Sternen und Zyghen, syner huisfraw, geschaffen, nagelaissen hait,

Bl. 51^v

an Hern Dedrich Meuschs, der sich horen leist, hey des meitgens neister bewantter, och syn momper geweist sy und noch in solcher momperschafft stae und vorder van den Jonfferen des Cloisters zu Seyne bynnen Colne. Und spricht daromb, wes Kirstgen bewißen konne, syme kynde bilchen zustonde, solde eme werden und zuicht sich der sachen ant recht und scheffenordell.

Deselве zyt hait Kirstgen solche guider, we Styngen de nagelaissen hait, richtlich doyn verbieden und bekomenen laissen.

Zwivell, uff mayndach na Vincula Petri, anno et cetera [15]XXIII.

Joncher Leye, amptman et cetera, hait van wegen Hern Herman Blanckenbergh zu leisten gemant, Johan van Aich, nailsmyt, vur eynen burgen van wegen Arnts Schomechers eyne zumme van XI Kolnische Gulden. Hait dach van gerichtzs wegen acht dage.

Hait in den Iserenmart eynen wirt gekoren.

Kost VI Schilling.

A II/11 1523

Bl. 51^r

Zwyvell, uff deselве zyt.

Johan Roide hait zu leisten gemant Lodwich Mudder, vur eynen burgen und eyne zumme, nemlich II elle swartzs doichs umbtrint, de elle XIIIII Albus, van wegen Johans Ailbrichtzs van Eille.

Hait van gerichtzs wegen dach acht dage.

Vur eynen wirt gekoren.

Kost VI Schilling.

Vur denselvigen, de genante zyt.

Johan zom Iserenmart hait uffgeboden eynen swartzen mansrock, zugehoirich Vais Schroder, vur eyne zumme van X Mark.

Kost V Schilling.

A II/11 1523

Johannes Schutzs und Godart zom Reeßen, burgemeisteren, uff godenstach na sent Laurentiusdage, anno et cetera [15]XXIII.

Johan Kannengeisser hait besichtigen und ufftzeichenen laissen solchen huisrait und ingedoyn Greta Meuschs seligen nagelaissen und in irem huiße zom Morenkop befonden ist, Hynrich Zymmerman zugehorich, we herna voulgt.

Item, zom irsten eyne alte kyste,
item, eyne alte sedell am herde,
item, eyne alte langh taiffelgen,
Item, eyne alte kochbanck,
item, eyn alt schaiff,
item, uffme soller zwae alte kysten,
item, eyn cleyn taiffelgen,
Bl. 52^v
item, noch eyn taiffelgen,
item, zwae brantrichten,
item, zweyn schragenstoille,
item, eyn schottellkorff,
item, eyne syhe,
item, eyne schuppe,
item, eyne hauwe,
item, tzwey neue rynck,
item, eyn nagellbor,
item, eyn cleyn stoiffe seeghe,
item, eyn latzshammer,
item, zwae getzauwe,
item, III off V alder holtzer schuttelen,
item, eyn braitpengen,
item, eyn fuyrpengen,
item, eyn hanck myt iseren henden,
item, eyn haspell,
item, eyne sychell,
item, eyn keessellhaich,
item, eyn stuck ketten,
item, eyn snydemetzs,
item, eyn bedelerskorff.

Johan Aldenach und Peter zom Rodenhuis, kuyrmeister, und van rade, uff godenstach na Nativitaten Mariae, anno et cetera [15]XXIII.

Uff solchen kumer Lodwich im Jonckersbroich, als eyn erve, uff solche gereide guit Hynrich Koehirde seligen nagelaissen hait, dardurch solcht syn huis overmitzs der stedeboden zugeslossen ist und Fygen, syn huisfraw, ant recht verbuit hait und in irem bywesen myt uffzeichent und in irem huiße befonden ist, we herna voulgt. Ist burge Johan Vispach.

Bl. 52^r

Item, zom irsten,
III kufferen duppen, eyn groisser dan dat andert,
item, IIII kessell, eyn diegell,
item, V pannen und eyn alt kessell, steit Pantzs seligen Bilgen kynder,
Item, eyne seye, eynen schuttelkorff, myt houltzen schuttelen,
item, zweyn schwartzter mansrocke,
item, eyne vrouwen swartze fucke und eynen peltzs,
item, III kysten, darin VI cleyner slaiffdoicher, III flockenkussen,
item, eyn alt flockenbetgen,
item, eyn cleyn federenbetgen myt der betstat und II slaiffdoicher, eyn schartze,
item, eyn alt wambuschs,
item, zweyn alden lynenkussen,

item, eyn fuyrhaich, eyn lange haich,
 item, zweyn ißeren leffell,
 item, eyn zynen luchter,
 item, eyne schueppe,
 item, eyne vleischgaffell,
 item, eynen sessell, zwae alte boeden,
 item, eyn alt taiffelgen,
 item, zwae beenck,
 item, eyn blaisbalch,
 item, eyn saltzsroempe,
 item, eyne brantrichter,
 item, eynen schraegen.

A II/11 1523

Bl. 53^v

Johannes Schutzs und Godart zom Resen, burgemeistern, Johan Aldenach und Johan Girachs, alle vam
 raide, uff sent Matheusdach, anno et cetera [15]XXIII.

Item, Johengen van Luckenroide hait beleit myt Hennes, smyt van Luckenroide, und Hynrich, syme soene,
 de gesacht und bekant haven, alsolchen kouff van erfflichen guideren und pechten da affkomende Johengen
 vurgenant myt Johan Nuysgen und Kirstgen zu Kyr, syme neven und swaiger, gedayn hait, dat Kirstgen zu
 Geistongen, syn swaiger, denselven kouff syns deils och angenomen und gewilliget have, glichermaissen
 zuvreden geweist und gefolglich sy. Und haven daromb eder dem anderen na lantzsgewoinheit burgen und
 geloeven gesatzs vur erffschafft und werschafft und betzalang zu doyn, als nemlich der smyt vurscreven sy
 burge vur dat gelt und betzalone, und Hynrich, syn son, sy burge vur de erffschafft und werschafft, doch
 ensy neit entlich geluyt van dem pacht burgschafft. Und so have der heufftman auch den pacht myt eyner koe
 als de vur XI Mark und bovent den pacht betzalt, und dat overentzich solde an de heufftzumme komen.

A II/11

Bl. 53adv *[eingeklebter beidseitig beschriebener Zettel, nachträglich mit 53a beschrieben]*

Her Gelis und Girt, elude, haint verkofft und upgedragen Teilgen van Surenbach dem schomecher und
 Mettel, eluden, ir huyss, dat genant is dat huys zom Sumberen, mit dem garden hinder dem huyse gelegen,
 tusschen synen II kandelen und mit dem putz und der perveyen, beheltnisse doch den nederlaisse alreneist
 daby och synen ganck zo haven up den putz und perveyen, gelden de Her Herman Beirbuch II Kolnische
 Gulden und III Schilling in de vromisse. Und der zweyer Gulden sal Tilgen und Metelle, elude, geven van
 dem groissen huyses IIII Mark und Hern Gelys und Girt van dem kleynen huyses des nederlais XIII Albus
 und de vurgenanten III Schilling in de vromisse.

Bl. 53adr Rückseite.

Kathryngen Smeitz heit beleit mit Johann Koihaltz und Herman Muycher, so we dat sy komen syn gegangen
 und haven gesien, dat zwa frauwen Katharingen gedunsen und geslagen haven up der straissen up yrem
 kirchwege.

Vilken up der Arcken is ~~anerstoveren~~ heit an sych erdingt zwey kintdeill, mit namen Herman und Elsgen, so
 wat erffs Lore salige der vurgenanten kinder gelaissen heit.

A II/11 1523

Bl. 53^r

Johan Rode und Peter zom Rodenhuis, kuyrmeister, uff godenstach na sent Matheusdage, anno et cetera
 [15]XXIII.

Item, Clais Lymbergh van Roeksait hait beleid myt Hynrich Swartzs van Woilstorff und Tilgen, Heyntzges
 soene van Wedauw, de gesacht und bekant haven, umb alsolchen zwae erffschafft, als de Clais vurscreven
 itzunt hait und Tilgen zom Bornen geweist is und de ander erffschafft, dem Swartzen Hynrich vurscreven
 gegeven van Hern Otto van Aer, hoispitaler seligen geweist. Hant dese zweyn, als Hynrich Swartzs und
 Tilgen vurscreven gesprochen und bekant, alsolchen laichsteyn, als tuschen derselver erffschafft oven im
 garden steit, itzunt desen dach dar der rechte stae, we hey stayn solle. Und der ander steyn an den
 gehuisseren irs bedenckens, dat der unrecht und Claiss zu nahe staen solle und myt irs bedenckens, dat van
 dem oversten steyne bis vur an de straisse de soynne tuschen in beiden, ederen halff, zustayn solle, doch
 beheltnys unserm Gotzhusse ire gerechticheit.

Joncher Leye, amptman, van wegen myns werdigen Hern abtzs, Johannes Schutzs und Godart zom Reesen, burgemeisteren und Johan Staill, rentmeister, uff sondach na sent Severynsdage [*Severin = 23. Okt.*] , anno et cetera [15]XXIII.

Item, dese vurscrevene, myt anderen fromen luden, hant besichtiget Styngens doden

Bl. 54^v

licham, by Johan Schopgen vur der Houltzsportzen gedeuyt hait und Thonis Peltzer van Virschen doichter was, und daan befonden, vur syme heuffde an der stirnnen eyne wonde, bis an de zennen. Hait Schopgens huisfrauwe gesacht und daby gewyst, eyne trappe in irem huße, dat meitgen affgayn solde, und unden vur der trappen eyn nuwe wassersteyn stoinde, der ecketich und scharp was.

Dat meitgen myt dem heuffde weder den steyn, oven van der trappen gevallen have. Und solchs sy en godenstach neist vergangen geschiet und so jemerlich derhalver gestorven.

Hant deße vurscrevene den doiden licham myt der wonderen und de gestalt entlich beseyn und darby bedoicht irts bedenckens, dem also geschiet sy und vort erloiffnys gegeven, van wegen myns werdigen Hern abtzs und der scheffen, den licham zu der erden zu bestaiden.

Zwivell, uff donrestach na sent Symon und Judendage, anno et cetera [15]XXIII.

Item, Peter Lair vur der Portzen hait zu leisten gemant Johan Hoiffnagell vur eynen burgen, eyne zumme van VI Mark, herkomen vam smyde zu Grymbergh.

Hait vur eynen wirt zum Wynter gekoren und acht dage dach van gerichtzs wegen.

Kost VI Schilling.

A II/11 1523

Bl. 54^r

Gauwyn vam Huyss, overschoultis, und Wilm Beissell, uff dynstach, sent Huprichtzsdoch, anno et cetera [15]XXIII.

Item, Wilhem, Teill Verffers knecht, hait gemompert Wilhem Hamecher, bynnen Sibergh, synen broder in alle den sachen hey zu doyn hait und zu doyn haven mach tgen Meus Welckener, bynnen und bussen im burchbanne van Sibergh, vur gericht off bussen gericht, zu verantworden, zu gewynnen off zu verließen, sich eynich, warafftich momper doyn solde off moichte, in eyncherwys.

Johan vam Zwivell und Wymar vame Loe, uff vurscrevener zyt.

Hynrich Overstoutzs van Droistorff und Elßgen, syne elige hausfrauwe, hant verkoufft und uffgedragen Joncher Volmar vam Nuwenhoeve ire gehuisse, gnant der Alde Berch in der Berchgassen gelegen, myt der stallong, gartten und alle siner gerechticheit, we ire vader und moder, swegerhere und swegerfrauwe, solchs by irem gnant Leye und Luckart, syner eliger huisfrauwe, leven besessen und gebracht haven, niet darvan uißgescheiden. Und havent vurscrevene elude mytgeloiff vur sich und ire erven genanten Hynrichs, syne broder, myt zu vertzigs und uißgang dys vurscrevenen huiß zu brengen, waby Joncher Leye und de syne gescheit bliven moigen we recht is.

Und geloiff werschafft zu doyn.

A II/11 1523

Bl. 55^v

Gauwyn vam Huys, overschoilten, Wilm Beissell, Johan vam Zwivell, Seichtem und Loe, uff godenstach na Huperti, anno eodem XXIII. vursereven

Vurgenante schoultis und scheffen myt der hernknecht und statboden hant angeweldigt, meister Pauwels, zolschrive van Bonne, as recht momper und nafolger Koyngen Ketgens seligen, van sich und syner huisfrauwe wegen, an dat Nuwehuis myt syme zubehore, zugehorich Girtgen nagelaissen huisfrauwe Johan Overstoutzs und iren kynderen, oven am Martte tuschent dem huisse genant Untzenort und dem huße zu Nydeck gelegen, vur alsolehe schoult und lyffrenthe, ungeverlich LXXX Gulden in noch van wegen Koyngen Ketgens seligen an in zu achter unbetzalt steit, lude breve und sigell.

Und so an vursereven huisse Pauwels zu syner betzalange gebrechen were, neit komen konde, ist vort geweldigt an ander ire gueder im burchbanne zu Sibergh, we reecht is.

Kost anzuweldigen V Mark und VIII Schilling dem scholtissen, den boden II Albus, den erven solehs zu verkundigen I Albus.

Overmitzs sementliche scheffen, dynstach na Egidy, anno et cetera [15]XXIII.

Meister Pauwels hait solehs uff doyn bieden, kost V Schilling, zu verkundigen 1 Albus vacat.

Overmitzs Gauwyn vam Huyß, Staill, Beissell, Kobbenroide, Zwivell und Leye, uff godenstach na oeculi, anno [15]XXIII.

A II/11 1523

Bl. 55^r

Zwivell und Rompe, uff donrestach na sent Huprichtzdage, anno ut supra [15]XXIII.

Item, Johan jonghe Schemellhen und Beilgen, syne elige huisfrau, hant verkeufft und upgedragen ire gehuiße und gartten am Dreischs, tuschent Rorich am Dreischs Bulartz und daß Heyntzen erve gelegen, Thonis uffme Nuwenhoeve und Lysgen, syner eliger huisfrauwe.

Und geloifft werschafft zu doyn.

Overmitzs deselvigen, uff genante zyt.

Johan Henselen und Tryngen, syn elige hausfraw, hant verkeufft und uffgedragen ire gehuisse und gartten myt syme zubehoer, gnant Meissenbach, in der Houltzgassen beneven Thonis Mantzs huisse und.

[Leerstelle]... Johan Slossgen und Elsgen, syner eliger huisfrauwen. Geldende jars in de vromyß.

Und geloifft werschafft zu doyn.

[die Lücke im Protokolltext zwischen den Wörtern "und. ... Johan" entspricht dem Original. Vermutlich hatte der Gerichtsschreiber sie für einen Nachtrag vorgesehen, der dann aber doch nicht erfolgt ist. Denkbar wäre, daß hier "Telen Loer" eingesetzt werden sollte, wie im Beleg von 1521 (A II/ S. 210r). Johan Slosgen und Elsgen wären dann die Käufer des Hauses gewesen, wofür auch die Logik des weiteren Textes spräche. auch der Protolleintrag A II/3, S. 78r, von 1526, spricht davon, daß das genannte Ehepaar vorzeiten von Johann Henseler ein Haus in der Houltzgassen gekauft hatte, allerdings Haus zum Morhen "].

Bl. 55b

[hier beidseitig beschriebener Zettel eingeklebt, mit lateinischem Text. Für mich [W.G. Henseler] nur lesbar wie folgt,]

[Vorderseite]

Ex donna post Symonis et Jude.

[Rückseite]

Curae atet schultet, schabinos et cetera judicium temporale in Sygberg regent ad quinta dicta iuridicam et cetera dice ... causam rotationa bilem quare excouari non de barnt pro et ex q... ips iudicium Petrie

Kenfenheuwer et eius uxorem exco..... pro recognito ad Martini de Reg... Wynteren per decention corpora et arrestation om bonociom fuorum et cetera.

Johanys Loen.

A II/11 1523

Bl. 56^v

Loe uff denselven donrestach, im selven jair.

Lodwich zu Hoymbergh hait zu leisten gemant Wynant Hoeffsmyt vur eynen burgen eyne zumme van VIII off IX Gulden ungeverlich, herkommen van Hennen van Dreispach.

Hait in den Iserenmart vur eynen wirt gekoren.

Hait VIII dage dach van gerichtzs wegen.

Kost VI Schilling.

Derselve Lodwich hait zu leisten gemant Dedrich myt der vuer[?] vur deselbe sache, as dat halve deille vurscrevener zumme.

Kost VI Schilling

Zwivell und Loe, uff deselbe zyt.

Peter Snoirmecher und Coene, syne elige huisfrauwe, hant gegeven und uffgedragen irer eynt dem anderen van in beiden alle ire guiter, gereit und ungereit, sy itzunt hain off vorder erwerffen moigen, de leste levendige hant zu kerden und zu wenden, zu alle irem walbevallen und enenkomptzs.

A II/11 1523

Bl. 56^r

Gauwyn vam Huys, Emmerich van Seichtem und Zwivell, uff vurscrevene zyt.

Dese vurscrevene scheffen mytsamt der hernknecht und statboyden hant besichticht den doiden licham Thewys Gesella, peltzerknecht, wilchen licham de man den morgen uff syme bette in Thys Peltzers, syns meister huisse doit befonden und also jelichs verstorven ist, hant vurscrevene och nuyst umbher am licham befonden und daby erloiffnys gegeven den zu der erden zu bestaden.

Johan Roide und Peter zum Rodenhuis, kuyrmeister, uff sent Mertynsavent, anno et cetera [15]XXIII.
 Myn werdiger Her abt hait overmitzs vurscrevene kuyrmeister besichtigen und beleiden laissen den schaden
 syner Wurdicheit in der Honerlachen geschiet, van den koen, dat gesynde in den Bruwehoff hatte laissen
 dryven, wilchen schaden de kuyrmeister geacht have uff Peter Kauffenheuwer was, 1 koe in den Bruhoff
 gedreven.

Johan der Waill hatte och 1 koe und deselvige syns gevallen vur dem Bruhoeve weder gevonen und waren
 noch me koe. En wist Johan neit, wes der waren.

A II/11 1523

Bl. 57^v

Johan vam Zwivell, uff Cerstavent, anno et cetera [15]XXIII.
 Tilgen van Unckell hait zu leisten gemant Hancken Glasmecher vur eynen burgen und eyne zumme van
 XXII Albus Heller, herkomende van Johan zum Widenyst.
 Hait acht dage dach van gerichts wegen, und vur eynen wirt zum Wynter gekoren.
 Kost VI Schilling.

Schutzs und Godart zum Reeßen, beidesament burgemeisteren, uff godenstach na XIIIten dage, anno et
 cetera [15]XXIII.

Jong Heintzs Knutgen hait beleit myt Trynen, Hynrichs frauwen van Eille, de gesacht und bekant hait, we ir
 huiswirt zu arbeiden plach, Drude Vaidtzs zu Molhem umbtrynt IX off X jair, so dat sy dickwile daby ir im
 huiße zu syn plach. So have Drude Vaidtzs vurscreven eynmail zu ir gesprochen, gefadersche, Tryngen, myn
 meitgen ist myr untgangen. Ich bidden uch, dat ir by mynem broder zu Voilbricht gayn wilt und in bidden,
 dat hey myr Tryngen weder schicken wille. Ich en hain nemans dem ich gewenen dorve[?] und wille eme
 walle loenen. Und Peter, ir son, have des myt an ir begert. So have de frauwe vurscreven III werff daromb zu
 Voilbricht gegangen und solchs an Wilhem

Bl. 57^r

und syner huisfraw geworffen.

Do have Wilhem gesprochen, sy hant myr dat meitgen nackentich heymgayn laissen, idt en sall dar neit
 weder, und eme sy ungeloynt bleven. Doch syne huisfrauwe hedde solchs woll gescheyn laissen.
 Und Drude Vaidtzs have me gesacht, wes ich eme neit gegeven hain, wille ich eme noch geven. Und so de
 frauwe solchs weder an sy bracht hait, have Drude gesprochen, Tryn, des en hedde uch myme broder neit zu
 betruwet. Und solche irste bewerffonge have Tryne Vaidtzs mytgehört und wilt dit myt irem eide beweren.

Johannes Schutzs und Godart zum Reesen, burgemeisteren, uff vridach, na Conversionis Pauli, anno et cetera
 [15]XXIII.

Johan Kannengeisser hait gegeven, uffgedragen und volmechtich gemacht, Styngen, syne elige huisfraw, alle
 irs guitzs, gereit und ungereit, we sy dat inhendich haven und an sich gegulden, gewonnen und geworffen
 haven, neit darvan uisgescheiden, in dem hey eher dan sy na willen des Almechtigen Gotzs afflivich woede,
 solchs na syme doide alleyn off selff ander zu irem gevallen und nutzs zu gebuchen und in maissen

Bl. 58^v

we hera voulgt. Also dat Styngen solche erffschafft in guiden gewoinlichen bouwe buwich halden und
 versorgen sall und solchs allet ir leverlanck, wilcht sy och geloifft, dem so zu doyn. Und hevan sall Styngen
 iren dryn kynderen, van Johan vurscreven geschaffen, uis den gemitsten guideren zusament eyns geven
 hondert Goultgulden an gelde und an guder war[e] und in, deselven, geven und vernoigen, eyme ederen syn
 andeill und gebur, so balde sich der kynder eynt bestaiddt und zu beste[t]nys komen ist, geistlichs off
 werentlichs und so vort. So wanne sy sich bestadt haven eder alsdan, wilcht dat were, eme dat syn werden
 und volgen sall. Und so der kynder eynich afflivich worde, syn gebur und deill alsdan uff de ander eynt off
 zwey sterven und vallen sall. Und solche erffschafft soll Styngen neit vorder in dem sy sich veranderen sitzen
 blive worde, besweren noch versetzen, dan off sy unverandert sytzen blive, moicht sy der na irer noittorfft
 gebuchen.

A II/11 1524

Bl. 58^r

Johannes Schutzs und Godart zum Reeßen, burgemeisteren, uff irsten donrestach in der Vasten, anno et
 cetera, XXIII.

Johan Scheuff, burger zu Collen, hait vertzigen uff Johen Peler, der XVI Overlensche Gulden, XVI Albus
 schoult, hey van wegen Joist Pelers und Trynen, syner eliger huisfraw, an sich genomen und vurscrevenem
 burger zu Collen betzalen solde, lude des gerichtsboichs hebevoir im jair XXII geschiet und bekant ist. Und
 hait Johan Scheuff nun deselve zumme myt kosten und bangelt myt Joist vurscreven Johen und Peter, synen
 brodern, gerechent, dat de zumme blift und syn sall XVII Overlensche Gulden, macht XX Kolnische
 Gulden, VIII Albus, und solchen gelt an Roloff Uilener zu betzalen genomen.

Vur denselven, uff deselve zyt.

Item, Peter Peler gnant Kanffenheuwer, und Johen Peler, gebroder, und Anna, syne elige huisfrauwe, hant verkeufft und uffgedragen, Roloff Ulner vurscreven und Elssgen, syner eliger huisfrauwen, XX Albus erffrenthen jarlichs, zu betzalen uff sent Petersdach ad Cathedram off bynnen den neisten XIIIII dagen unbefangen, uis irem kyntdeill und erffschafft vurscrevener gebroderen van iren alderen anerstorven ist und vorder zuvallen mach, im burchbanne Siberg helegen, doch dat deselvigen solchs eynichs jars uff vurscrevene zyt myt XX Kolnische Gulden und VIII Albus heufftzummen myt erschenen unbetzalten termynen afflossen mogen.

A II/11 1524

[Nachtrag]

Ist vort bekant und uffgedragen vur Gauwyn, scholten, Beissell und Seichtem, uff godenstach na oculi, anno et cetera [15]XXIII.

A II/11 1524

Bl. 59^v

Johan vam Zwivell, uff den irsten vridach in der Vasten, anno et cetera [15]XXIII.

Johan van Aich, nailsmyt, hait uffgebroken eynen rock, zugehorich Arnt Schomecher, umb eyne zumme, hey vur in an Her Herman Blanckenbergh gesprochen und burge worden ist.

Kost VI Schilling.

Gauwyn vam Huyß und Wilhem Beissell, uff godestach na oculi, anno et cetera [15]XXIII.

Hynrich Overstoult van Droistorff hait geloiffst und zugesacht vur sich und syne huisfrauwe, umb alsolchen gelt syn moder Pauwels van Zoynß, tholschriver zu Bon[n], und Koyngen, syner eliger huisfrauwen, schuldich synt, umbrint tuschent LX und LXX Gulden. Und de van Bonne sich richtlich erwonnen und an sich erdyngt haven, lude des gerichtzsboichs, so verne dat schoultis und scheffen in an dat huis zom Nuwenhuis vur eyn pant overmitzs de boden in de hant gegeven haven, als darvur solche schoult sall sy Hynrich myt syner huisfrauwe zukomen myt renthen, de sy davan versorgen, we da recht ist, vacat overmitzs de scheffen, anno et cetera [15]XXVIII, uff godenstach post oculi.

A II/11 1524

Bl. 59^r

Rompe und Roiß, uff dynstach na oculi, anno et cetera [15]XXIII.

Johan Knutgen, der schelle, hait in der zyt hey des wall mogich und mechtich was, gegeven und uffgedragen Johan Knutgen dem jongen, syme broder, und Walper, syner eliger huisfrauwen, alle syn elderlich guit, erff und erffschafft, we eme dat van synen alderen an und zuerstorven ist, neit darvan uißgescheiden, im burchbanne van Siberg helegen.

Und des sall Johan und Walper, elude, off ire erven gnantem Johan syn levenlanck alle jars geven VII Kolnische Gulden, zu Druitzeynmyß vellich und langer neit, doch vurbehalten V Mark, III Schilling, Johan in gotzdienst gegeven hait, sollen darzu bliven. Und off Johan sust myt krenckden off anders begaift worde, hey gebrech hette, solde in Knuitgen off de syne na noittorfft versorgen.

Gauwyn, Kobbenroide, Staill, Nesselroide und Roeß, uff godenstach na oculi, anno et cetera [15]XXIII.

Freugens Johengen und Hynrich Mant hant richtlich verboden Johan Kanffenheuwer geyn schrifft int schrynn zu doyn, Clais Sleupgens kynt belangen, irs verdrags noch updracht tuschent eme und Metzs Sleupgens, syner huisfraw.

A II/11 1524

Bl. 60^v

Loe und Roeß, uff godenstach na oculi, anno et cetera, XXIII.

Johan Kertzen, Thonis son im Daill, und Girtgen, syne elige huisfrau, und Guitgen, des vurscrevenen Johans suster, hant verkeufft und uffgedragen Johan Roiden und Coenen, syner eliger huisfraw, ir andeill am garten an der gassen zu der Kroicht gelegen, dat dritteidell, we in solchs zuerstorven ist, dat de zu Lewenstein am selven gartten zwey deyll inhaven, beneven Hynrichs gartten zur Scheeren.

Und gelofft werschafft zu doyn.

Gauwyn vam Huys, schoultis, hait verloiffst und den boiden beveill gedayn pende zu geven Thyßgen Molenkoven nafoulger, syns erfolgnis, lude des gerichtzsboichs van Teill Verffer.

Hait Teill zu pande gegeven II stuck wyntzs.

Rompe und Seichtem, uff vridach, na oculi, anno et cetera [15]XXIII.

Johannes Schutzs und Godart zom Reeßen, kirchmeisteren der Kirspelskirchen zu Sigbergh, vort Johan Kannengeisser und Styngen, eluide, synt ankomen doitzhalver, Greta Meuschen myt dem huiße zom Morenkop geheischen, in der Houltzgassen, tuschent Hern Herman Blanckenberghs gehuisse, Overstoltzs und dem Gensheuffde gelegen, van giftt und besatzen Greta in solchs overgedragen hait, we sich in allen rechten behoirt. Gelden jars in de Kirche 1 pont waß.

A II/11 1524

Bl. 60r

Deselvigen kirchmeisteren und elude vurscreven hant verkeuftt und uffgedragen Clais Lymbergh und Greten, eluide, solch vurscrevene huiß myt syme zubehoer, gelden wie vurscreven.
Wanerzidabuten.

Jong Heyntzs Knutgen und Tryngen, eluide, burgere bynnen Sibergh, hant myt rade der frunde und myt consent des richters, als myt namen scholtis und scheffen irer beider kynder, de sy nu haven off sament verkrijgen werden, und Tryngen, Heyntzen vurkynt, van Freugen, syner huisfrauwen geschaffen, sament eyne kynder gemacht, glich off sy sament van eyme vader und moder weren, also dat de sameten kynder alle ire guder na och irer beider dode glich deillen sollent und och van eyme kynde uff dat ander sterven sall.

Seichtem, Loe und Roeß, deselwe zyt.

Johan zom Woilffe hait uffgeboiden eynen perlengurdell, zugehorich Isfart van Seilbach.
Kost V Schilling.

A II/11 1524

Loe und Roeß, deselwe zyt.

Johan Kanffenheuwer und Koyßman, syne elige huisfrau, hant gegeven und uffgedragen irer eynt dem anderen alle ire guider, gereit und ungereit, da sy itzunt dat haven und vorder an sich kriegen und erwerffen moigen, neit darvan uißgescheiden, de

Bl. 61^v

leste levendige hant van in beiden solchs zu kyren und wenden, na alle irem gevallen und enenkomps, in wat hant sy wilt.

A II/11 1524

Gauwyn vam Huyß und Wilhem Beissell, deselwe zyt.

Coyngen, seligen Daemen zu Ackerbach, und Greitgen, syner eliger huisfraw elige dochter, hait alsolche kyntdeill, als ir van doitlichem affgange Kirstgens, irs eligen soens, dem Got gnedich syn wille, anerstorven und gevallen ist, uffgedragen und geerfft, irem eligen huisswirde, meister Pauwels van Zoinß und iren beiden kynderen, van irs selfs lyffs geschaffen, beheltnys Koyngen irer lyfftzoicht. Und were sache, dat gedachter meister Pauwels ader irer beider kynder van irs selfs lyff vortfracht sonder lyffserven afflyvich worden, sall alsdan solch vurscrevene kyntdeill wederomb sterven und fallen an Coyngens vurscreven neiste erven.

Ouch haven de vurscrevene elude, meister Pauwels und Koyngen, deser nageschrevener maissen sich verdragen, off sache were, dat Jacop, Koyngens elige son, van Coyngens vurmanne geschaffen, na irer beider doide myt synen halven broderen und susteren, van meister Pauwels, syme steiffader, und Coyngen, syner moder, gezyhlt, dat enhgen guit, neit davan uißgescheiden, so we und wae

Bl. 61^r

datselfe syner moder vurgenant durch doitlichen affganck wilne Daymen zu Ackerbach und Greitgen, der vurgenanten Coyngens alderen, anerstorven und geerfft ist, zu gelicher deillongen wulde laissen komen, als echte und rechte broderen und susteren, van eynem vader und moder vortbracht und geschaffen weren, zu deillen schuldich synt.

A II/11 1524

Gauwyn, Beissell, Loe, Kobbenroide und Seichtem, vurgnante zyt.

Peter Bulartzs, Johans son am Dreischs, hait richtlichen doyn verbieden synen vader myt syner steiffmoder we hey dat allerbeste am rechten doyn moicht, geynerley wyß eynche gyfft noch uffdacht tuschent in beiden zu vergonnen noch zu gestaden. Und hofft myt darby, nadem hey eyn vurkynt sy, unvertzigen und van syner moder geerfft sy, syme vader solchs neit zugelaissen werden solle.

Loe, Johannes Schutzs und Godart zom Reesen, burgemeister, uff vurscrevene zyt.

Also Peter zom Rodenhuis und Johan Roide, as kuyrmeister de kuyr zom Rodenhuis besessen haven, ist Freugens Johengen umb eyner wacht willen kuyrbruchtich geweist. So dan Johengen bescheiden was, de kuyr affzudragen synt, wert und wievill wert tgen eynander gevallen, also dat Johengen gesacht hait, wannen eyn de anderen also umb dat syn vereit und brengt als naber, synt geyne irliche stuck, wilchs Johan Roide verorkunt und beleit hait.

A II/11 1524

Bl. 62^v

Also schoultis und scheffen gemeynlich solche supplicatie und clage Kirstgen zu Ackerbach in overgegeven und gehantreicht hait de geistliche Jonfferen und conventzs des beslossen Cloisters Seyne bynnen Colne betreffen, umb alsolche guider Styngen Meuschen, van Otto geschaffen, nagelaißen hait, wilche guider Kirstgen alhe richtlich verboiden. Demna Jonfferen und convent vurscreven eyn mandait vam roymschen richter her uff dat gericht, och Kirstgen eyn zugeschickt haven, und de guder an dem rechten verdedyngens und zu verantworden et cetera, myt begerden Kirstgens an scholten und scheffen in by desem gericht, dar de guider gelegen synt, hant haben wille, lude der supplicatiens. So dan schoultis und scheffen de supplicatie myme verdigen Hern overgeven und daby solchs an syne Werdicheit geworffen haven, hait syne Werdicheit geantwort, we hey de sache uffgenomen hatte, eynmaill off dry dage daromb angesatzs, doch de vereynonge myt allem vlys syne Werdicheit darin gedayn, so neit konde vynden. Und in der uffhaldongen und guitlichen dagen have Kirstgen anders geworffen an Bernsauwe, dem amptman, und etliche vrucht und renthe van den guideren zu sich genomen. Dwile dat geschiet und de guider by eyn in gewarsamheit, bis zu uisdraft blieven solden, haven de Jonfferen Kirstgen vorgenomen bedanckt,

Bl. 62^r

daromb myn Her dat syn umb eyns anderen willen zu verpleiten[?], dat hey selffs veroirsacht hette und syn Wolgeboren auch eyn geistlich man were, eme neit geburen solle, dan wes myme Hern zu doyn steit und geburt, wille hey sich so halden, sich nemans myt reden zu beklagen dorffe haven.

Deselve zyt ist verdragen, dat uff dynstach na dem sondach oculi, in der Vasten.

Den dritten dynstach na Pinsten, den irsten dynstach na Bartholomei und den irsten dynstach na XIIIten dage, in dem solchs geyn hillichdach affnymt, vortme zu Siberg gericht halden soll. Und so alsdan dar eyner Hillige Dage weren, soll man dat gericht darna VIII dage verstrecken umb eder scheffen sich auch darna de bass haven zu richten.

[Otten = Otten zom Sternen]

A II/11 1524

Wilhem Beissell und Wilhem Staill, uff vurscrevener zyt.

Her Tilman zom Schaiffstaille, preister, Peters van Alner seligen son, hait verkoufft und uffgedragen, Johan Roeden und Coenen, syner eliger huisfrauwe, syn huiß, den Groissen Schaiffstall, unden am Martte, tuschent dem Cleynen Schaiffstalle und Starckenberchs huyß gelegen,

Bl. 63^v

vur an bis hynden uis, myt derselver erffschafft und werschafft, so we Johan Roiden vader solchs Peter van Alner seligen vurmails verkoufft und uffgedragen hait. Dan qweme sust eynich gebrech in desen kouff van Hern Tilmans broder off sust synenthalven, soll hey off syne erven affstellen und de eluide off ire erven davan entheven.

Gelden jars datselve huys myme Hern dem abt, uff sent Andreisdach 1 Gulden, beheltnys dem Cleynen Schaiffstall dat hoiffgen, vur an bis hynden uis, und das uis dem Cleynen Schaiffstall zu gebuchen. Edoch, ensall Her Tilman, ader de ghene dat Cleyne Schaiffstall hernamails kriegen werden, dat hoeffgen, so hoe neit bebouwen, idt Johan Roeden und Coenen, elude, an irer stoiffen den dach beneme. De kalle tuschent in beiden sullen sy zusament halden. Und de elude off ire erven ensullen geyn recht noch gerechticheit an der sytten uis zom Cleynen Schaiffstall und am hoeffgen zom Burgerhuis neit me haven dan eynen ganck an den putzs und den so hoe und wyt ire hoeffduryr am putzs ist.

Und des gancks zom putzs und vorder in dat hoeffgen sollent de im Cleynen Schaiffstalle gebuchen. Und bovent den ganck zom putzs mach Her Tilman off syne nakomelyngen zom Cleinen Schaiffstalle bebouwen bis an de kuyche zom Groissen Schaiffstalle. Und geyne pyß noch unreynicheit en soll uis dem Groissen Schaiffstall uff Hern Tilmans sytte gestait werden. Edoch hait Her Tilman vergont, den wasserganck uis dem Groissen Schaiffstalle, lantz den putzs und syn hoeffgen, zu gayn, doch dat geyn vuylings da stayn bliven soll. Gelden datselve huys, der Groisse Schaiffstall, jars in de rendmeisterye uff dem Berch VI Mark, Remig vellich, vurhyn Starckenberchs huis zu gelden plach umb eyn Koilhaus de eluide vam huiß Starckenbergh in ire huis gebouwet hant und dat myt willen myns Hern abt.

A II/11 1524

Bl. 63^r

Her Jaspar, pastoir, Godart zom Reeßen burgemeister, und Johan Aldenach, uff dynstach na Judica, anno et cetera [15]XXIII.

Johan Geislair zom Kranen, der wirt, Dederich zom Horn, Jacop Becker, Clais Lantschade, Joiswyn Doichscherer und Hynrich van Muych hant gesaicht, we sy en donrestach vergangen zom Kranen vurscreven zu wyne gesessen, haven sy Severyn Kremer, ir gelaichsgesell, myt geweist, by in gesessen und Unser Lever Frauwen ovell gescholden, sy eyn offenbair hoir geheischt. Und so der gelaichsgesellen darweder seichten, have Severyn gesprochen, allet idt wair, were dick und vyll, und solchs bewisen wille. Und hey have solchs den anderen morgen wederomb und noch gesacht.

Loe und Roeß, uff dynstach, na Judica, anno et cetera [15]XXIII [Judica = 2. Sonntag vor Ostern].
 Johan van Beyenbach hait gegeven und uffgedragen Elsgen und Johan, irer beider kynt, naturlich van in beiden geschafft, alle syn guit, gereit und ungereit, we hey und de zusament itzunt dat haven und vorder werffen und erwynnen moigen, neit darvan uisgescheiden, also zu verstayn wan er, Johan, neit en ist Elsgen und Johan, irer beider kynt, solchs samenden hant, zu irem nutz geneßen und gebriuichen sollen und moigen, zu iren gevallen und enenkomptzs.

A II/11 1524

Bl. 64^v

Wymar vame Loe und Thomas Roeß, uff godenstach na Judica [Judica = 2. Sonntag vor Ostern] anno et cetera [15]XXIII.

Johan Kanffenheuwer eyns, Hynrichs van Roebrait, Johan zom Woilff und Johan Freugens, van wegen Hynrich, Clais Sleupgens und Metzen, eluden seligen, nagelaissen unmomperlich kynt, anderdeils, in biwesen Clais Lymbergh und Thewus van Wipperfurde, des vurscreven Hynrichs gebroder, hant sich overmitzs vurscrevene scheffen und myt rade und guitbedoncken schoultis und scheffen undereynander als umb de besetzone Clais Sleupgen, syme unmondigen kynde, zu bescheiden und dat ersterffnys van Metze Sleupgens seligen, des vurscrevenen Kanffenheuwerts huisfraw geweist, als de neiste getzipten van des kyndtzs wegen, und seyn ander guitlich vrontlich verdragen und gescheiden, also we herna voulgt, dat der Kanffenheuwer soll vur sich und syne erven haven und behalden dat huyß zom Kelterboym, tuschent Johan Blanckenberchs huiß Kelterboym und Lutzenraitzs huis, in der Houltzgassen gelegen, we hey und syne huisfraw solchs an sich gegulden und geworffen haven und darzu alle und ander erffschafft, hey und Metze, elude, gegulden und geworffen haven, bynnen und bussen Siberg im burchbanne gelegen, dat bewyslich ist, hey myt syner huisfraw gegulden und betzalt haven, davan neit uißgescheiden und widers neit, und darzu noch alle gereide guider, cleyn und grois, we hey und Metze de gehat und nagelaissen

Bl. 64^r

hait, haven und behalden. Und des soll Johan Kanffenheuwer vurscreven Hynrich, syme steiffkynde vurscreven, eyns geven und walbetzalen hondert Kouffmansgulden, as zwentzich Albus, we itzunt zur tzit bynnens Colne wall genge und geve synt, vur ederen Gulden gerechent, und darzu eyn bette myt synen pullen, kussen, lachen und decken, myt syme zubehore, we dat stayn soll. Und de hondert Gulden vurscreven soll Kanffenheuwer betzalen zu zwen termynen, als uff sent Johansdach Mytzsomer irstkompt, vunfftzich derselver vurscrevene Gulden, und de des kyndtzs neisten frunden van vader und moder, da dat kynt de am besten und sichersten hette, leveren und betzalen und denselven dat kynt damyt overleveren, de dat vort zu underhalden und ufftzeyn und de ander vunfftzich Gulden denselven sent Johansdach over eyn jair, denselven frunden, sonder langer vertzoch, betzalen.

Und so sache werde, der Kanffenheuwer den irsten termyn off den zweiden neit en betzalte we vurscreven, und zom jair neit de hondert Gulden vollenkommenlichen betzalt worden, solde alsdan der irste termyn dem kynde off synen neisten, van beiden sytten, ervallen syn. Nochtant solde hey de hondert Gulden schuldich syn zu betzalen, hervur deßen so genoich zu doyn.

Hait der Kanffenheuwer zu eyme

Bl. 65^v

underpande gesatzs syn huiß zom Kelterboym vurscreven und alle ander syne guder, in dem hey in desem bruchich worden, dat kynt sich alsdan damyt, off des kyndtzs neiste erven, so dat neit en were, sich daran zu bekomen und erhollen zom ghenen we vurscreven.

Ist vorder bekalt, dat der Kanffenheuwer alle schoult und wederschoult Clais Sleupgen und syne huisfraw seligen nagelaissen haven, in vorder und weder betzalen soll, bussen insagen, hyndernys off schade des kyndtzs vurscreven off des neisten.

Uff desem vurscrevenen verdrage is vertzert worden XVI Mark. Ist vereedt, der Kanffenheuwer der XII Mark betzalen und dat kynt IIII Mark, sust scheffen und schriver ir recht und vermytzs III Mark eder parthien halff. Ist verdragen, der Kanffenheuwer solchs sementlichen betzalen soll und dem kynde syn gebuyr verlegen und eme an der lester zummen affrechenen.

Loe und Roeß, uff vurscrevene zyt.

Mettell, Peters huisfrau van Boistorff, myt consent Girden, irer dochter, und Kirstgen Kremer, der elige man, hant verkeuft und uffgedragen Johan Kanffenheuwer iren garden, bussen der Houltzportzen, am Spoilgraven, weder de gemeyne und vor Nagels garden schiessen, gelegen.

A II/11 1524

Bl. 65^r

Overmitzs deselvigen, uff genante zyt.

Johan Freugens hait wedersprochen solche uffdacht Meus Becker, syn steiffvader, myt syner moder zu schryne hait schriven laissen. We syn steiffader der neit recht als bilchen gescheyn solde zu schryne bracht hait. Und syn steiffader have damyt scheffen und schriver bedroigen, we Starckenbergh und den scheffen wall indencklich syn solde, wilcht vurscrevene scheffen itzunt myme werdigen Hern so anbracht haven.

Johan Roide und Peter zom **Wynter** Rodenhuis, uff dynstach na quasimodogeniti, anno et cetera [15]XXIII. Tryngen Ververs hait gewyst und sich beclait eynen schaiden, ir an irem gemoesse, peterzilter, roemsche[?] koill und anderes in irem garden an der Papegeyen durch der Papegeyen schuyr und der hoeffduyr van den swynen und vercken gescheyn ist.

Wilchen schaden de kuyrmeister besichtich, och beseyn de suwe, solchs ovell zu schanden gemacht haven und den schaden gepoirt havent uff IIII Mark.

Kost V Schilling.

A II/11 1524

Bl. 66^v

Her Jaspar, pastoir, Johannes Schutzs und Godart zom Reßen, burgemeisteren, uff saterstach na quasimodogeniti, anno et cetera [15]XXIII.

Vreugen, Meus Beckers huisfrauwe, hait in irem doitbedde, so sy alle ire gotzrecht untfangen hait, gesacht und bekant, we sy Johan, irem soene, vur und na gegeven have in affslach der hondert Gulden, sy eme bescheiden und Meus, ir man, eme geven solle, XL Overlensche Gulden betzalt have.

Und so Johan, ir son, tgenwordich was und ir des neit enstoynde, ist Freugen by ir vurworden bleven und bekant, sy eme de XL Gulden an eyn und ander guet gedayn have, wilcht Meus georkont hait myt Her Jasper vurscreven und Clais Lymbergh, und solcht in vurscreven maissen gescheit sy.

Gauwyn vam Huyß, scholtis, Johan vam Zwivell, scheffen, und Joncher Volmar Leye, amptman et cetera, uff dynstach na exaudi, anno et cetera [15]XXIII.

Hynrich Starckenbergh und Wilhem, syn son, hait beleit und besichtigen laissen, daby bekroynt, solchen bouwe, als Johan Roide nemlich syn Wevehuis uffgesat hait, insonderheit de vynsteren darbovent in zu na und over dat ir[e] hangen solden. Darby genanter Hynrich und Wilhem vorder besichtigen laissen den nuwen bouwe in der gassen, we Johan Rode sy da och over-

Bl. 66^r

bouwet have, darzu ire scheichte an irem gehuisse affgesneden, ayn iren wissen.

Hant vurscrevene schoultis, scheffen und amptman bedoicht zom irsten, de vynsteren, we Hynrich und Wilhem clagent, in zu na stayn solden, och also und derglichen, och dat gebouwets in der gassen. Hant dan noch verloift beiden parthien, sy sich overmitzs ire vrunde guitlichen verdragen moigen und myme werdigen Hern darvan eynen schuldigen zu wisen. Were des neit, sy die vereynongen neit treffen kontten, alsdan beide parthien den bouwe zu allen sytten stayn zu laissen, bis zukomen der sementlichen scheffen. Und solche vereinonge tuschent dem neisten gericht gescheyn solle, umb aldan de sementliche scheffen solchs vorder besichtigen, recht und ordell darover zu sprechen und vurbehalden, so Johan Roide antzuicht, de dachtruppe vurmais daruff gegangen have, und zuicht sich des an iren eigen mont und dat vorder zu bewisen und myt dem hyndersten gehuisse, we Starckenbergh in gebeden solde haven, syne arbeitsluide solchs richten und machen. Hey wille in loenen.

A II/11 1524

Bl. 67^v

Overmitzs mynen werdigen Hern abt, Hern Hoult, proist zu Pleis, Joncher Leye, amptman, Gauwyn vam Huyß und Johan vam Zwivell, uff dynstach, na exaudi, anno et cetera [15]XXIII.

Tuschent Meus Becker und Johengen Freugens, irer sachen umb de C Gulden Johengen an synem steiffader vordert, syn moder seligen eme zubescheiden hait. So dan beide parthien ire sachen clacklich overgegeven haven, vurscrevene myme werdigen Hern, amptman, schoultis und scheffen vurgenant, synt demna affgeverdigd, Meus syme steiffsone Johengen geven soll hondert Overlensche Gulden, we zu Collen und Siborgh ganckber syn, und eme de bynnjen jairs als zu IIII termynen betzalen, als zu Pynsten irstkompt XXV Gulden, und dan vort alle virtelljars XXV Gulden, so dat de hondert Gulden bynnjen jars betzalt syn sollen. Und soll damyt alsdan synen steiffader myt alle den anderen guderen gewearden laissen. Und wilche parthie

dit breiche und dese afferdonge neit enheilte, solde myme werdigen Hern abt myt XXX Goltgulden und den mechelers myt V Goltgulden erfallen syn, so dick und manichmaill eynichs deils herweder gedayn
Bl. 67^r

und solchs geclagt worde. Nochtant solde deße scheidong volmechtich in irer macht gehalden werden, und wes Meus off Freugen, syne huysfrauwe seligen, Johengen, irem sone, gegeven hait vur dat, soll qwyt syn, ungerechent bliven.

A II/11 1524

Overmitzs und van geheischs Joncher Leye, amptman, und in biwesen Thonis zom Hirtzs, rentmeister, Johan Henselen, uff saterstach na vocem jucunditatis anno XXIIII.

Also Hynrich Lomar, Johans broder, desen morgen Johan Lodwichs vur syme huisse etlich houltzs und styczell ryser behauwen und machen solde. Suydt hey Johengen uffme Kreuwell myt eyner karren houltzs an den Marte komen faren, Kirstgen zu Ackerbach zu brengen. Und bedoicht, solch houltzs syn were und we hey im Lomarwalde houltzs ligen hette, dat sich vermynnert have. Ist demna Hynrich genantem Johengen in de Blomengasse, dar hey dat houltzs foirte, nagevolgt.

Und iſ so Johengen in suyt komen, have Johengen ingegangen und de duyr hynder sich zugedayn. Hait Hynrich dat houltz do gekant und endeils myt de karren uff den Mart gefoirt, dat zu verwaren laissen umb myt dem houltzs und dem hauwe by dat

Bl. 68^v

andert zu brengen und damyt zu betzuigen, dat houltzs syn were.

Do hait Johengen vurscreven zu Hynrich gesant Thewus Henckell van Wipperfurde und Rutger Artzs eme untboiden, dat hey dat houltzs zelle. Hey will eme solchs betzalen. Solcht hait Hynrich, [so] hey des kontte, myt gnanten zwennen verorkont und beleit und myt Dreis, dem boiden, de dat also an den amptmann vurscreven bracht haven. Hait der amptmann van beiden parthien burgen genomen, myme wurdigen Hern eynen schuldigen davan zu wyßen.

Vur Hynrich ist burge, Thonis zom Hirtzs, rentmeister, und vur Johengen ist burge, Gotschalck Smyt im Dalhoeve und nagesatzs Hynrich Raiffen.

Vurscrevene zyt.

Johan Henselen hait entsatzst solche ingevonge und pendonge, *[die]* Gutgen Loirs an dat huiß, gnant Meissenbach, geschiet ist. Und dat myt recht zu verdadyngen ist burge, Johannes Schutzs.

Johannes Schutzs und Thonis zom Hirtzs, burgemeisteren, Peter zom Rodenhuis und Johan Roide, kuyrmeisteren, uff donrestach na exaudi, anno et cetera XXIIII.

Wynant Schelten hait beleit myt Peter zom Wynter, so dat gantze wullenamboicht uff neist dynstach vergangen byeynander uff der burger huiß, was segelmeister zu keßen. Haven

Bl. 68^r

etlichen wider Wynant gesacht, we hey sigelmeister gekoren were und were do gesacht worden im gantzen amboicht, sy wolden geynen hontsleger darzu haven. Und we Johan Worm zur Vulkannen gesacht hette, we Johan im Bruhove in syme huisse, als hey wyn zapte, im vollen gelaiche, inbyweßen Aldenach, Her Johan zom Horn und me anderen gesacht solle haven, we Wynant in syme hoeve eynen hont have doit geslagen, ouch van dan/*nen*/ have dragen laissen, wilchs Johan Worm kent, hey dat van Johan im Bruhove also gehoirt have dat sagen und kennen. Hait Wynant vur dem amboicht verorkundt.

Dat urkundt Peter zom Wynter uffgehaven und myt den amboichtsliden daselffs verdrunken haven.

Do hait Wynant selffs gesacht, hey have eynen hont in syme hoeve fonden ligen, den hey myt eyme kluppenge vur de portze gestoissen have. Und der sy also da bliven ligen. Des sy hey gestendich, wilcht bekentnys Johan Worm glichermaßen beleit hait. Und synt geschiet in biwesen beider parthien.

A II/11 1524

Wilhem Staill uff mayndach na octava Pinsten, anno eodem XXIIII.

Heyntzs zom Somberen hait zu leisten gemant, Johan, wirt zom Iserenmart, vur eynen burgen van wegen Jacops zu Rommelkoven eyne zumme van IIII Kolnische Gulden, VI Albus.

Hait acht dage dach van gerichtzs wegen, vur einen wirt gekoren.

Kost VI Schilling.

A II/11 1524

Bl. 68ad *[im Original sind die Seitennummern 68v und 68r doppelt belegt. Daher wurde später das Blatt 68v in 68a geändert]*

Johannes Schutzs und Thonis zom Hirtzs, burgemeisteren, uff godenstach, Uns Hern Lichamsavent, anno et cetera [15]XXIIII.

Also Rutger Lynenwever van Gymenich, zom Cleynen Hoyngen gewant, uiß der stat getzoigen, dar nemans geyn wissen, we off in wat gestalt solchs geschiet ist. Und dwile dan de luide und naber ir garn gerne, sy by eme haven, wederhaven wolden und gesonnen, und doch so dat huis an wenden neit gantz befesticht geweist

ist, solchs overmitzs vurscrevne burgemeister entlich gewygen und uffgetzeichnet worden und hynder den schriven in gewarsamheit gelacht.

Herman Stoiffell huisfrauwe overmitzs ire kerff untfangen VIII p[on]t garns silveren gewichtzs.

Dedrich, loir, van Groynschit overmitzs ire kerff untfangen IX p[on]t garns,

Lambricht Loir huisfrauwe untfangen overmitzs ire kerff V p[on]t garns,

Her Herman Blanckenbergh untfangen van wegen Zilien, syner maigt susteren van Droistorff, IIII p[on]t garns.

Item, Her Herman untfangen van wegen Bockenraitzs overmitzs dat kerff XI p[on]t,

Peter, boide, van wegen Greten im Spyche untfangen overmitzs dat kerff XIIIII p[on]t garns,

Jaspar Portzners huisfrauwe overmitzs ire kerff untfangen X pont garns,

Freugen im Dalhove VII p[ont] garns,

Wilhem Hammecher VI p[on]t garns,

Pauwels uffme Hontgen VIII p[on]t,

Peter Kreich III p[on]t garns,

Bl. 68ad *Rückseite*

Item, Pilgram Schoymecher, XXV p[on]t garns,

Peter van Hangelair overmitzs Clais Lantschade XII p[on]t garns,

item, Hynrich Hilgers frauwe zu Geislair XV p[on]t garns, Schemell Johan burge,

Item, Reynart van Geislair III p[on]t garns.

A II/11 1524

Johannes Schutzs und Johan Aldenach, burgemeister, und vam rade, uff Uns Hern Lichamsavent, anno et cetera [15]XXIII.

Clais Lantschade hait beleit und besichtigen laissen de halle, myme werdigen Hern abt zugehorich, Peter van Swirten, syn swegerhere, gewonnen und affgebrochen hait und wederomb eynen anderen bouwe daruff gesatzs und den wider gemacht, dan der alte geweist. Ist solches overmitzs vurscrevne burgemeister und inbiweßen Peters und syner huisfrauwen myt der eillen gemessen worden, dat der nuwe bouwe wider gemacht ist in dat hoeffgen van dem uissersten des hyngersten scheichtzs des alden bouwes, bis an den uisersten scheichtzs des nuwen bouwes myt dem scheicht zwae eillen wider gemacht, und hat dit entlich van sich und Mergen, syner swegeren wegen, beleiden laissen, dwile ire swegerher zu eyner hant sytz umb solcht namails geyne iron off zweydracht zu brengen, verhoit moicht bliven.

A II/11 1524

Bl. 69^v

Johan Roide und Peter zom Rodenhuis, kuyrmeister, uff vurscrevne zyt.

Wilhem Verver hait gewyst und beleit in syme garden beneven der Doiffen, eme an syme gemoesse und anders, hey und syne huisfrauwe im gartten hatten, geschait sy.

Den schaden de kuyrmeister gepuirt hant und bedoncken daby gesacht, dar der schade her geschiet, Wilm vurscreven 1 quart wyntzs darvur schencken solle.

Hait Wilm eyne zygle, hey im gartten vonden, zugehorich Thomas Muyre in den Bruhoff brengen laisen.

Johannes Schutzs, burgemeister, und Johan Staill, rentmeister, uff dynstach na Trinitaten, anno et cetera [15]XXIII.

Johan Staill und Schemell Johan, hospitalsmeister, hant des hospitals huyß vur der Colner Portzen Dedrich myt der mer gewonnen hatte und bynnen nacht und nevell, dwile hey noch syne huisfrauwe solchs nemans kont gedayn hant, daruis getzoigen, solch huyß uffgedayn und darinnen befonden, we herna clair beschreven voulgt.

Zom irsten, uffme soller, eyn betstat, eyne alte kyste, eyne seytte, zwae schaiffen sonder isen, V holtzenteller.

Im huyses, III erden quartkannen, eyne kroich van VI quart, eyne van II quart, VI off VII erden alder dupger, mynner dan quart, V holtzenleffell, V hoiltzenschuttelen, eyne banck, eyn saltzsroemp, 1 pont blyes, eyn spynrock myt IIII spillen.

Uffme stoiffgen, eyn taiffelgen, eyn benckelgen und eynen stoill.

Bl. 69^r

Synt noch zwey alte schaiff im vurßhuisse geweist, der eyn int huys gehoirt, und dat andert soll Greta Jaspars syn.

A II/11 1524

Johannes Schutzs und Thonis zom Hirtzs, burgemeisteren, Godart zom Reeßen und Johan Staill, rentmeister, Johan Aldenach und Peter zom Rodenhuis, alle vam rade, uff donerstach octava Sacramenti, anno et cetera [15]XXIII.

Johan Roide hait beleit myt Johan Eiffeler, zymmerman, Johan van Molendorff und dem Heumar, zymerluide, also hey syn huis in der Engergassen uffsetzen wolde und des umb Starckenberghs huiß, hey daby hatte, neit doyn moicht, have hey in myt dem burgemeister Schutzs besant II off III maill, ouch selffs eme davan gesacht, hey syn huys richten wille. Have Starckenbergh eme weder gesacht, ouch myt vurscrevenem burgemeister Schutzs unboden, hey sy des willich. Doch so hey geyne zymerlude en have, dat Johan Rode dan syne zymerluide solchs richten laissen wille. Hey wille in davan genoichde doyn, wilcher botschafft burgemeister Schutzs itzunt bekant, so geschiet sy. Und sacht myt, we Starckenbergh in umb eyn seill darzu zu lenen gebeden have.

Und so dese vurscrevene zym-

Bl. 70^v

merluide nun in dem richten waren, have Starckenbergh de gass uff und aff gegangen und gesacht zu in, dat sy daran machen und arbeiden we sy willen, des de zymerluide also gestendich synt.

A II/11 1524

Wymar vam Loe und Thomas Roeß, uff dynstach na sent Bonefaciusdage [*Bonifatius = 5. Juni*], anno [15]XXIII.

Coynrait Overstoltzs hait bekroynt und besichtigen laissen hynder syme gehuisse den zuyn und gartten, Johan Nailsmyt dar gemacht hait, und bedonckt eme, de zuyn na uiswische syns huiß und der soe zu na gesat sy.

Gauwyn vam Huiß und Wilhem Beissell, uff godenstach na dem sondage Trinitaten, anno et cetera [15]XXIII.

Greitgen, Peter Beckers dochter zu Siborgh, hait gegeven, uffgedragen und verkeufft, **Peter Glaswotter**, **burger zu Bon** Anna van Geislair eyne, myt Kirstgen, iren eidomp, und Styngen, syner eliger huisfrauwe, und Greitgen, ouch derselver Annen dochter, ire huiß bynnen Siborgh, in der Houltgassen, tuschten dem nuwen Bruhoeve, und Lutzeroitzs

Bl. 70^r

huiß gelegen. Gelden jars in de Kirspelskirche XI Mark und uff den Berch jars XIII Schilling. Und geloiffet werschafft zu doyn.

A II/11 1524

Overmitzs deselvigen scholten und scheffen, uff vurscrevene zyt.

Anna vurscreven myt Kirstgen, irem eidomp syner huisfrauwe, und Greitgen, ihrer dochter, alle vurgenant, hant solch vurscreven huisse vort verkeufft, gegeven und uffgedragen, in allem rechten, we sy dat doyn moichten, und am rechten bondech, was Peter van Caster, glaswoeter, burger zu Bonne, und Tringen, syner eliger huisfraw, und iren erven sich und iren erven davan enterfft und de vurscrevene elude damyt geerfft. Gelden jars we vurscreven.

Geloiffet werschafft zu doyn.

A II/11 1524

Gauwyn vam Huyß, scholtis, Wilm Beissell, Zwivell, Loe, Thomas Roeß, Staill, Wyß und Breidenbach, uff dynstach, na sent Bonefaciusdage, anno et cetera [15]XXIII.

Heyntzs Ax van Bonne hait bekroynt dat huyss zur Wynreven, we syne huisfrauwe

Bl. 71^v

de lyfftzucht daran have. Solchs neit zu verhandelen noch verkeuffen laissen bussen wyst und willen syner und syner huisfrauwe.

Overmitzs deselvigen, uff vurgenante zyt.

Johan van Nuymbricht hait gemompert und volmechtich gemacht Johan Kanffenheuwer alle der sachen und gerechticheit hey zu Lair Jan und den guderan im burchban Siborgh zu doyn hait, zu verdedyngten und verantworden, glichs syne eigen sache were, zo wynnen und zu verlesen, we hey dat am besten doyn moicht.

Vur genante zyt und overmitzs deselvigen.

Tryne, Kirstgen Schoiltis van Geislair huisfrauwe, hait Wyncken, iren son, gemompert und volmechtich gemacht, der sachen myt den im Daymbroich, alhe bynnen Sigbergh zu wynnen und zu verliesen, glicherwyß als ir huiswirt in ouch volmechtich gemacht hait.

Overmitzs deselvigen, uff gnante zyt.

Hynrich Raiff, as burge Johengen uffme Kreuwell, der dait des hoiltzs halver, hey myt Lomar Johans broder zu doyn und alhe verdragen synt, Joncher Leyen instat myns Hern zu pande gegeven syn huyss de erfftzale et cetera.

A II/11 1524

Bl. 71^r

Overmitzs deselvigen vurscreven scheffe, deselve zyt.

Coynrait und Lodwich Waille, gebroderen, hant beleit und besichtigen laissen, dat gehuiße Neisgen Guilichs, vur der Molenportzen, beneven Volmar Loir erffschafft gelegen, ir steiffader und sy irem manne und ir verschreven haven, lude des gerichtsboichs.

So dan de scheffen befonden, der gevell und dach aynbouwiche geweist, hant de scheffen gewyst und bescheiden, dat Neisgen solchs tuschen sent Mertynsdage irstkompt wider machen und bouwen soll. Und geschege das neit, solde man asdan Neisgen vur dat huyß satzen und de gebroder vurscreven darin. Und van dem erleden schaden sollen sy sich halden, lude des gerichtsboichs.

Jongh Leye, amptman et cetera, Wilhem Staill und Johan vam Zwivell, uff godestach na Bonefacius, anno et cetera [15]XXIII.

Johan Roide hait beleit und besichtigen laissen de soehe tuschent dem Cleynen Sumberen und der erffschafft zum Hammer, Peter zom Aren inhendich hait, we de soe alwege dartuschent bis hynden in de garden gegangen have, uff Peters sytten und in syme zuyne.

A II/11 1524

Bl. 72^v

[am linken Seitenrand, in der Höhe der 6. Zeile: „nota, herna im jair XXIX“]

Overmitzs vurscreven amptman und scheffen, deselve zyt.

Peter zom Wynter hait beleit myt Greitgen Wylers, de gesacht hait, we sy den garden hynder der Hellengassen, van sent Thonisbroderschafft eyn jair off III gehat have. Do have sy geseyn, dat eyn ganck uis Greitgen Haynraitzs huiss hynden an den putzs gegangen have, we ouch itzunt steit. Und so spricht Hynrich Raiffen huisfrauwe Greitgen, sy have ouch eynen Schillynek jair lanck gehat, der ganck darher gegangen have, vermeynt der wirt zom Iserenmart darweder und alte moeren begert zu soichen.

Hant amptman und scheffen vurscreven bescheiden, de parthien alle sachen und posten stayn zu laissen bis zukomen der scheffen gemeynlich und scheffenboichs.

Loe, Roeß, Zwivell und Breidenbach, uff vurscrevene zyt.

Greitgen zur Ecken hait uffgeboden zwae frauwenfoecken, zugehorich Joiswyn Doichscherer, nemlich eyne blae fucke, gefodert, und eyne dannette fucke, vur eyne zumme van VIII Kolnische Gulden. Kost VI Schilling.

A II/11 1524

Bl. 72^r

Overmitzs vurscrevene scheffen, deselve zyt.

Johan Lodwichs hait zu leisten gemant Hynrich Raven vur eynen burgen eyne zumme van III malder, 1 sumber weyß und II malder korns, herkommen Mentzer zu Liber.

Hait VIII dage dach van gerichts wegen. Vur eynen wirt zom Iserenmart gekoren.

Kost VI Schilling.

A II/11 1524

Overmitzs Johan vam Zwivell und Thomas Roeß, uff vurscrevene zyt.

Joen zom Esell und Bela, syne elige huisfrauwe, Thonis Doichcherer zom Engelsternen und Thrina, syne elige huisfrauwe, hant besichtigen laissen, solchen nuwen bouwe Joen und Bela, eluide vurscreven, uffgesatzs haven, tuschent dem Groissen Spiegell und dem Cleynen Spiegell, in der Molengassen gelegen. Synt daromb overmitzs vurscrevene scheffen overkomen und verdragen, so dat Thonis und Kathrina, eluide, hant daby verkeufft und zugelaissen Joenen und Bela, elude vurscreven, off iren erven, eyne perfeye hynden uff Thonis und Thrinen, eluden erffschafft gnant Brodererve und tuschen Tilgen Beckers erffschafft zu machen, und dat deselvigen Jan und Bela, elude, off iren erven uis irem gehusse des nuwen bouwes uff solche perfey gayn moigen, wilcher ganck Thonis und Thrina, elude, erfflichen over ire erve, nemlich III voesse, hynder irem gehuisse vurscrevenen

Bl. 73^v

eluden, iren erven und nakomelyngen, uis vurscrevenem, irs nuwen hausses, zugelassen und vergont haven.
 Ouch sollent Joen und Bela, elude, bebouwen de erffschafft hynder Joergen zu Kyr, bis an den mittell des
 putzs und Thonis backhuisduyr und der unhynderlich de uffgayn moige.
 Und dys sollent Joen und Bela, elude, off ire erven erfflich buwich halden und versorgen, de kalle tuschent
 dem nuwen bouwe und dem Cleynen Spiegell, bussen hyndernys und schaden Thonis und Kathrinien, eluden,
 off iren erven vurgenant.

Johannes Schutzs, burgemeister, und Johan Aldenach, uff saterstach na sent Medardus, anno et cetera [15]XXIII.

Alsolench houltzs, also Johengen uffme Kreuwel her in de stat und Kirstgen zu Ackerbach bracht hatte,
 wilchs houltzs Hynrich Lomar, Johans broder, sich antzoich syn were, so dan Hynrich egenant des houltzs
 endeils dat ghene, do uff der karren was myt sich, we kortzs hebevoir geschreven, uff den Mart genomen und
 dat andert vurhyn in Kirstgens zu Ackerbach bewair affgeworffen was, ist solcht houltzs Kirstgen also in
 syne huisong geworffen, was overmitzs vurscrevene getzalt und uffgeschreven ist, nemlich geweist XXVII
 kluppelhoutzer, wilcht houltzs der amptman Leye verloufft hait zu dem konyncks stait itzunt zu stade zu
 nemen.

A II/11 1524

Bl. 73^r

Joncher Leye, amptman et cetera, Johannes Schutzs und Thonis zom Hirtzs, burgemeister, uff mayndach
 nach Medardus, anno et cetera [15]XXIII.

Also Johengen van Menden, Kirstgen Clapperbach knecht, as gesteren, sondach, zu Thorne komen ist, umb
 hey Kirstgen vurscreven syme meister etlich houltzs und dyllen im Molengraven hait vischen und heymforen
 geholffen. So dan Johengen vurgenant itzunt weder uis gefencknys kommen ist, hait hey vur dem amptman
 und burgemeister vurgenant by syme eide und wairheit, darby hey gefragt worden is, gesacht, we umbrint III
 jair verleden hey und syn meister eynen dyll unden der arcken, myt sampt irer maigt, umb de XI oren na
 mytdage, vur halver nacht, daselffs gefischt und in syns meisters huis van syme geheisch und den nutzs
 gefoirt haven, wilcht hey myt syme eide beweren wilt.

A II/11 1524

Her Kobbenroide, presentzmeister, Joncher Leye, amptman et cetera, Johan Schutzs, burgemeister, Johan
 Staill, rentmeister, und Johan Henselen, uff donerstach na Viti [*Viti = 15. Juni*], anno et cetera [15]XXIII.
 Hynrich, Johan Blanckenberchs son, hait beleit myt Heyn van Vilckmolendorff und Thys van Gleem, becker
 uffme Berge, de gesacht haven dat Gehart

Bl. 74^v

gegangen und gesp van des Grevenbroich, kelner uffme Berghe, en neisten dynstach vergangen gescholden
 have, Hynrich vurscreven eyn boißwicht und eynen verreder und we hey neit werdich ensy, hey vur der Hern
 taiffelen stayn solle, wilcher man Hynrich umb geyn guit neit syn enwilt.

A II/11 1524

Johannes Schutzs und Thonis zom Hirtzs, burgemeister, uff mayndach, na Unser Lieverfrauwendach
 zu Elisabeth, anno et cetera [15]XXIII.

Greta van Molenbach, Herman Vlachen maigt, hait gegeven und uffgedragen in der zyt sy des woll mogich
 und mechtich was, Meus, irem soene, solche schoult, as sy an Hynrich Korteler, im kirspell zu
 Meynertzhangen, uisstayn und sy vur in an irem oemen Herman Vlachen vurscreven ussgesprochen und
 betzalt hait, dat na syme lesten zu heven und inzuforderen, zu gewynnen und zu verlesen, we eme solchs im
 rechten zempt und gelegen is.

Johannes Schutzs und Thonis zom Hirtzs, burgemeister, uff sent Laurentiusavent, anno et cetera [15]XXIII.
 Leonart, Peter peltzer knecht, hait beleit myt Johan Doichscherer und Gysen, Styngen Peltzer knecht, de
 gesacht, we sy geseyn haven,

Bl. 74^r

so Lodwich, Johan Roloffs son, en neist sondach vergangen, den avent, und gehoirt, Peltzer vur syme huisse
 sament gekont haven, und we Gehart Lodwich II Albus affgewonnen, de syner frauwen int huyss geworffen
 und gesprochen, de have ich gewonnen, behalt du dat uff treue.

Do have Lodwich zu eme gesacht, haistu och dyn moder getruwet et cetera.

Glich have Gehart do uff Lodwich gevallen und in depperlich myt fuysten umb heufft geslagen. Und so
 Lodwich also under eme gelegen, have Gehartzs huisfrauwe eynen upsticker van Lodwich kriegen und den
 irem meitgen gegeven.

Do sy Leonart dazu komen und dem meitgen den upsticker genomen und gesprochen, wat wilt ir doyn, wilt ir
 den also ermorden.

Have Greta zu dem knecht geloiffen und Gehart na und in myt eyne deghen umbt lyff und vur dat heufft wont geslagen und de frauwe allet myt over den knecht.
 Und so Gehart na dem knecht gehauwen, hait der knecht in syns meisters huyss gewychen und gesprochen, den upsticker hain ich umb des besten willen genomen.
 Und so Gehart na eme gehauwen, hait der knecht eme den deghen genomen. Do have Greta zu dem knecht gelouffen und Leonart myt dem deghen van sich gewynckt und achterrucks gegangen have und
 Bl. 75^v

gesprochen, gaet hyn, ich endoyn uch neit, so lange dat der knecht gevallen sy.
 Have Gehart do myt eyne staiffe kome, eme den rutynck genomen und myt dem staiffe geslagen und derglichen den morgen, so Leonart in Meus Peltzer huis de nacht geslaiffen und in syns meisters huis den morgen gayn arbeiden wolde, haven sy zusament uff in gewart und eme eynen deghen, der Lodwich was, genomen und myt eyne staiffe uff armen und lyff zur erden geslagen, wilcht Thomas Peltzer gesprochen, ouch geseyn have. Und hait Leonart solchs myt als vur gewalt geclagt.

Johan Aldenach und Peter zom Rodenhuis, kuyrmeister, uff godenstach na Kruitwiongen, anno et cetera [15]XXIII.
 Heyntzs Vlach hait gewyst in syme gartten hynder der Burch den schaden, eme van den souwen an synen moerren und anderem gemoeß geschiet sy und gesprochen, de swyn Johans im Bruhoeve solchs gedayn haven, wilchen schaden vurscrevene kuyrmeister geschat und gepurt haven uff X Albus.
 Kost V Schilling.

A II/11 1524
 Bl. 75^r
 Johan vam Zwivell, uff saterstach na Kruitwiongen, anno et cetera [15]XXIII.
 Heyntzs zom Somberen hait zu leisten gemant Peter zom Hammer vur eynen burgen und eyne zumme van II Kolnische Gulden, VI Albus, van wegen jairs van Dodenrode.
 Hait VIII dage dach van gerichtzs wegen.
 Vur eynen wirt in den Isermart gekoren.
 Kost VI Schilling.

Overmitzs vurscrevenen Zwivell, denselven dach.
 Myn werdiger Her abt hait uffdoyn bidden II kufferen duppen und eynen kessell, hynder Elsgen Slosgens.

Gauwyn vam Huyss, Wilm Beissell, Staill, Kobbenroide, Seichtem und Roeß, uff dynstach Egidy, anno et cetera [15]XXIII.
 Beilgen nagelaissen witwe Heynrich vam Steyne bynnen Bon, hait gegeven und uffgedragen Kirstgen zu Ackerbach und Neisgen, syner eliger huisfrauwe, burgeren bynnen Sibergh, ire deill und gerechticheit sy hait am huisse zur Wynreven in der Molengassen, am Groissen Hirtzs gelegen, we recht is. Und des sollent Kirstgen und Neisgen betzalen Rurich Wespennynck de schoult nemlich XV Gulden Radergeltzs, sy eme schuldich sy, we der scheffen erkant recht sy.

A II/11 1524
 Bl. 76^v
 Gauwyn vam Huyß, Beissell, Kobbenroide, Roemppe, Loe, uff vurscrevene zyt.
 Thomas Peltzer hait beleit myt Thys Peltzer, Otto und Peter Peltzer, de gesacht haven, we sy haven gehoirt, dat Gehart Peltzer Thomas vurscreven gescholden have eynen dieff, und solchs wille hey bewisen.

Overmitzs deselvigen, uff vurscrevene zyt.
 Greitgen, Thys Peltzers huisfrauwe, hait beleit myt Jacop van Bruyll und Clais van Rormonde, peltzerknecht, de gesacht haven, we Gehart Peltzer vur Thys Peltzers huis komen sy und Greitgen vurscreven gescholden und gesprochen, sy en were van vader und moder neit froym geboren, und ir man were eyn paffenkynt und weren neit froym genoich zu zuigen.

Scholtis und scheffen hant vurscrevenen Gehart vrede geboiden, neit argest zu keran und weren, myt worden ader werken an Thomas vurscreven, Thyssen und syne huisfrauwe, uff eyne pene van XX Goltgulden, dan an sy zu legen.
 Urkunde de scheffen we gewoinlich is.

A II/11 1524

Bl. 76^r

Roemppe und Kobbenroide. Loe und Roeß, uff vurscrevene zyt.

Heyntzs van den Bucken und Greitgen, syne elige huisfraw, hant in der zyt, sy des wall moigich und mechtich waren, vertzygen uff solche V Mark jarlicher renthen, de Heyntzen vurfader seligen und syne huisfrauwe an dem Walen Johan an der Alderportzen gehat und myt XXX Gulden derselbe Johan und syne ernen affloesen moigen und de zu henden gestalt, gegeven und uffgedragen, Hern Coynrait Kobbenroide, presentzmeister, und synen nakomen, in nutzs und behoiff derselver presenßmeisterien, also dat vurscrevene presensmeister de V Mark renten van nun vort an erfflichen an vurscrevenen Johan und synen erffen heven und boren sollen, uis alle ire gehuissen und erftzalen, im burchbanne Siberg gelegen.

Hait derselbe Johan och geloifft vor sich und syne ernen vurscreven V Mark renthen jarlichs zu geven und zu betzalen vurscrevenen presensmeister off synen nakomen zon erfflichen dagen glicherwys, we sy solchs Heyntzen und Greitgen, eluide vurscreven, zu gelden plagen, doch beheltlich in de affloeße myt XXX Gulden und erschenen unbetzalten termynen, unhynderlich.

A II/11 1524

Bl. 77^v

Overmitzs vurscrevene schoultis und scheffen, gemeynlichen, uff vurscrevene zyt.

Trina, Peter, des vaitz seligen huisfrauwe van Moilheym, hait volmechtich momper gemacht und gemompert Kirstgen van Zuindorff, iren eidomp, alle der sachen Heyntzs Knuitgen der jonge, myt ir vermeint zu doyn und sy myt eme zu doyn hait, zu gewynnen und zu verlesen, we recht is.

Vur denselvigen, uff gnante zyt.

Hynrich van Greven hait gemompert und volmechtich gemacht, Gehart Schoymecher, synen broder, alle der sachen, hey myt Peter Snoirmeccher zu doyn hait, zu gewynnen und zu verlesen, we recht ist.

Vur virgenante scheffen, deselvige zyt.

Anna Peltzers hait vur gericht bekant, sy schuldich sy Gehart Peltzer VII Mark. Und hait geloifft vur gericht, solch gelt gnantem Gehart zu Kerstmyssen irstkompt, sonder vertzoch zu betzalen.

Gauwyn vam Huyß, schoilten, und Wilhem Beissell, uff godenstach na Egidy, anno ut et cetera XXIII. Theill van Bederyngen zu Honff und Styngen, syne elige huisfrauwe, hant verkeufft und uffgedragen Johan Henselen und Tryngen, syner eliger huisfrauwen, burgeren bynnen Siberg, ire

Bl. 77^r

deill und gerechticheit sy haven am huisse zum Cranen, mytzs am Martte, beneven dem anderen huisse zum Cranen und dem huß zum Dorne gelegen, we in solchs van Teilen vurscreven alderen an und zuerstorven ist, neit darvan uißgescheiden, myt syme in und uißgeldens, ire gebur darvan.

Geloifft werschafft zu doyn.

Overmitzs deselvigen, uff vurscrevene zyt.

Peter zom Wynter hait gewyst und sich beclait, so syne huisfrauwe hebevoir vur guider zyt gevallen, und de leybde heill was, so dat sy begontte weder zu gayn, ist Johan Glaßmecher uff eynen avent in ir huis komen und have eynen guiden dronck gehat und syne huisfrauwe van irem sessell vurwartzs myt eyme armen gedonssen, so dat ir de kneeschyve weder uis der stat sy, und konne nu nyrgen komen, und idt sy nu arger dan idt vur eher geweist sy, wilche lembde hey vurscrevene scholtis und scheffen getzoonet hait.

A II/11 1524

Bl. 78^v

Johan Roide und Peter zom Rodenhuis, kurmeister, uff mayndach na Nativitatene Marie, anno et cetera [15]XXIII.

Hynrich Smytzs hait vurscrevene kurmeisteren gewyst, bekroynt und zu erkennen gegeven, we Johengen Guylich eme an syner erffschafft an der Alder Herberghen vur der Colner Portzen, tuschten in beiden, nemlich an eyme appellboym indracht doe und sich des gemerken wille et cetera.

Und Hynrich spricht, der bouym syn sy, und syne alderen den altzit gebroicht haven, van L jaren bis uff dese zyt. So dan Johengen darweder was, hant vurscrevene kuyrmeister beide parthien affgeverdiget.

Und genante bedoichten, hy de lynne trecken leissen, myt irer beider wille und dat zu overgeven et cetera. So dan Hynrich des neit so vollenkommenklich zu vreden, edoch Johengen solchs eynen willen hatte und

Hynrich uff syn beseß und dat zu bewisen und am rechten sich ergeven wolde, daran de kuyrmeister sy ouch gewyst, de scheffen darover zu erkennen et cetera.

Doch hant sy vur guit vurgegeven, beide parthien de appell schuydden und glichsament deillen willen, bis zu uißdracht und erkentnys des rechten.

Gauwyn vam Huiß, scholtis, und Thonis zom Hirtzs, burgemeister, uff saterstach, na des Hilgen Cruitzsdage, anno et cetera [15]XXIII.

Greitgen zu Lewenstein nagelaissen huisfrauwe Franck van den Bucken, Johan van den Bucken, marsteller, und Lysbeth, syne elige huisfrauwe,

Bl. 78^r

Wilhem van den Bucken, Girtgen, syne elige huisfrauwe, und Herman zu Scheiren und Guitgen, syne elige huisfrauwe, soene, doichter, eidomp und snoirghen der vurscreven Greitgens, hant alsamentlichen eyndrechtlichen verkeufft und uffgedragen Johannes Schutzs van des Grevenbroich und Godert zom Reesen, zur tzyt kirchmeisteren der Kirspekskirchen zu Siberg, in nutzs und zu behoiff derselver Kirchen, de hoiffstat und den gront zu der Cleyner Schuyren unden am Martte, tuschent dem Burgerhuiss und dem huisse Wyndeck gelegen, myt alle syme zubehoire und gerechticheit, ir sementlichen deill und gebur sy daran hatten, nemlich drydeill derselver erffschafft, neit darvan uisgescheiden, und dat umb eyne zumme geltzs vurscrevene witwe und ire kynder der Kirchen vurgenant, van jarrenthen und versees, hude, datum, erschenen und vellich geweist is. Dan aff schuldich weren gelden datselve huiß jairs dem presensmeister X Albus und dem bouwe van houltzwerck itzunt uff der platzen stieit, soll vurscrevene witwen und den erven zu irem nutzs, wanne de kirchmeister solchs anders bebouwen willen, weder werden und bliven.

A II/11 1524

Bl. 79^v

Johan Rode und Peter zom Rodenhuis, kuyrmeister, uff saterstach na Remigy, anno et cetera [15]XXIII.

Johan Symonis uff dem Hogensteynwege hait gewyst und sich beclait, solchs bouwes, als nemlich synen keller, hey Herman Woilff verdyngt hait zu machen und zu bereiden, lude irs verdrags und des wynkouffs, wilchs Herman neit na en kome noch genoich doe und gewyst, we de gevellmuyre, hynden am keller, neder gevallen de erde, darna geschossen und also offen ligen blive und Herman uis synem werck unreide gemacht, in an der arbeit gae und in also in schaden brenge et cetera.

Und hait demna derselbe Johan overmitzs vurscrevene kuyrmeisteren laissen verbieden genanten Herman myt synen knechten, hey nun hait und an sich nemen woede, nemans zu arbeiden achter desem dage, syn bouwe en sy irst reide gemacht, uff eyne kuyr, so manchen dach, dem ghenen sy in de arbeit nympzt zur kuyr V Schilling und Herman myt den knechten, so mancher dach eder V Schilling zur kuyr.

A II/11 1524

Bl. 79^r

Thoniss zom Hirtzs, burgemeister, und Johan Aldenach, instat burgemeisters [Johan] Schutzs, uff saterstach na sent Gereonydage anno et cetera [15]XXIII.

Daym Wever und Tryngen, syne elige huisfrauwe, hant zu pande gegeven, Johan, offerman zu sent Agathen bynnen Colne, irem broder und swager, als vur eyne zumme van XXIII Overlensche Gulden, uff rechenschafft vurscreven Johan an derburgschafft, hey weder Johan Wyncken in der Sternengaß vur in gesprochen, zu achter unbetzalt stieit, ir huiss und hoff bussen der Holtzportzen, tuschent Lodwich Roitgen und Clais Lymberghs gehuiße, im burchbanne Siberg gelegen, we daselffs recht is, herkomende daromb der offerman vurscreven dat gericht alhe myt geistlichen rechten vurgenomen, sich daran zom besten myt zu bekommen.

Johan Roide und Peter zom Rodenhuis, kuyrmeisteren, uff godenstach na Huperti, anno et cetera, XXIII.

Gotschalck Smyt im Dailhove hait beleit und gewyst eyne alte muyre im Dalhoeve, be-

Bl. 80^v

neven syner Smytten und Johans Bruwehuis zom Woilffe, an syner perfeyen Johan zom Woilff understande overmitzs eynen knecht, hey dar bestalt hatte, affzubrechen, der muyren sich Gotschalck angetzoigen syn were. Hait daromb richtlich doyn verbieden, solch brechen und bouwe beresten zu laissen, dem heufftman so manchen dach me daran gearbeit wurde, so manche V Schilling zur kuyr und dem arbeider so manchen dach, hey daran wirkt, zur kuyr V Schilling, so verne solchs geclairt wirt.

Johannes Schutzs und Thonis zom Hirtzs, burgemeister, uff dynstach, sent Andreisavent, anno et cetera [15]XXIII.

Johan Doichscherer uffme Honermart hait beleit myt Wynant Schelten und Otto Peltzer, de gesacht haven, we en neisten sondach vergangen, so sy myt anderen daselffs zu gelaich gesessen haven, have Peter Snoirmecher vur der taiffelen hyngegangen und gesprochen zu Johan vurscreven, kanstu dyn frauwe neit selffs neit gebruden, du en moiß eynen knecht halden, der sy dir de vurbrude et cetera.

A II/11 1524

Bl. 80^r

Johannes Schutzs, burgemeisteren, Johan Staill und Godart zom Reesen, rentmeister, uff sent Andreisdach, anno et cetera [15]XXIII.

Johan Henselen hait beleit myt Peter zu Overoide, Johan Juck und Dreis, boiden, de gesacht haven, so sy gesteren zu Ackerbach, in biwesen burgemeister Schutzs, Aldenach, Johan Henselen und Thonis, offerman, myt me anderen zu gelaike gesessen haven, hait Thonis Bestgen gesacht, de boeswichter en synt neit guit genoich dat sy by uns int gelaike sytzen gayn. Und derselve Thonis Bestgen sprach ouch, we der offerman eyn clicksteyn were und neit guet vur eynen offerman ensy und der oirsachen so hey sy alle boißwichter geschulden. Hait in, Henselen, myt flachem degen geslaigen.

Ist Thonis Bestgen, so dit beleit ist, komen myt Kirstgen zu Ackerbach, de vur in gebeden, an vurscreven burgemeister, vam rade und gelachsgesellen.

Und Thonis hait selffs gebeden und umb vertzichnys an vurscrevenen sementlichen, ouch an Henselen und dem offerman, eme dat umb Gotz willen vergeven willen, so hey solchs in dronkenschafft gesacht have. Und so hey solchs me dede, verwilkurt, in alsdan de harder zu straffen.

A II/11 1524

Bl. 81^v

Zwivell, uff donrestach nach Andree, anno et cetera [15]XXIII.

Johan Bitter hait zu leisten gemant Johan, wirt zom Isermart, vur eynen burgen, eyne zumme van IIII Overlensche Gulden, herkomende van Hannes Eckelkoven. Hait vur eynen wirt zom Somberen gekoren. Kost VI Schilling.

Johannes Schutzs und Johan Henselen, uff avent Conceptionis Marie, anno et cetera [15]XXIII.

Tuschent Johan, offerman zu sent Agathen bynnen Colne und Daym Wever, syns broders, umb de XXIII Gulden schoult, Daym hiebevor zu Collen bekant und endeils betzalt hait. Derhalver Daym und syne huisfrauwe, Johan vurscreven ir gehuisse alhe zu Siberch, so hey dat gericht he vurgenoemen, vur eyn pant gegeven hant. Synt daromb vur vurscrevene burgemeister und vam rade verdragen, also dat sy der schoult zuvreden worden synt, dat Daym van desem vurscrevenen allem eme eyns geven soll XIII Overlensche Gulden und eme de betzalen zu Lichtmyssen irstkompt VI Overlensche Gulden und de anderen VII Gulden zu sent Johansmyssen irstkompt betzalen, sonder langer vertzoch. Und des soll Daym dat huyß verkeuffen und veroisseren. Und so hey dat ehe verkeufft, soll hey dat gelt davan dem burgemeister vurscreven in des offermans behoiff leveren.

Bl. 81^r

Anders, so hey des he entuschenit neit verkeuffen worde, soll hey de dage myt der betzalogen halden. Dan geschege des neit, hait Daym verwilkurt, Johan, syme broder, alsdan dat huis clacklis ervallen syn soll, sonder argelist, hey sicks alsdan sonder inrede zu gebrochen, glichs eme dat zugeschat were.

Johan Aldenach und Peter zom Rodenhuis, kuyrmeister, uff fridach na Conceptionis Marie, anno et cetera [15]XXIII.

Jonghe Johan van Erstorff zu Bon und Coynrait Eußkirchen, burgeren zu Bonne, geswageren, hant bekroynt und beleit den bouwe, Johan Slosgen seligen und syne huisfrauwe in der Houltzgassen, tuschent Thonis Mantzs huiße und irem gehuisse gelegen, gedayn hant, we in der bouwe zu nae stae, insonderheit de dachtruppe davan uff dat ir vallen solle et cetera.

Hant vurscrevene kuyrmeister beide parthien ant recht gewyst.

Zwivell, uff saterstach na Conceptionis Marie, anno et cetera [15]XXIII.

Kirstgen Schoultis hait zu leisten gemant Herman an der Alderportzen, eyn burge vur eyne zumme van XX Mark, II Albus, vur Heyn Schoynmecher. Hait VIII dage dach van gerichts wegen. Vur eynen wirt gekoren. Kost VI Schilling.

A II/11 1524

Bl. 82^v

Zwivell, uff dynstach, sent Lutziendach, anno et cetera [15]XXIII.

Clais Lymbergh hait zu leisten gemant Coynrait Wymar vur eynen burgen eyne zumme van X Marck, van wegen Reynnart van Lovenbergh.

Hatt acht dage dach van gerichts wegen. Vur eynen wirt zur Blomen gekoren. Kost VI Schilling.

Zwivell, uff fridach, na dem hilgen Cerstdage, anno et cetera [15]XXV.

Johan Worm zur Vulkannen hait zu leisten gemant Roloff Ullener eynen burgen vur eyne zumme van XII Marck, van wegen Kirstgens uffme Zigenhoeve.

Hait vur eynen wirt gekoren in Heyntz Knutgens huis und hait VIII dage dach van gerichtzs wegen.
Kost VI Schilling.

A II/11 1525

Johannes Schutzs, burgemeister, und Johan Henselen, martmeister, uff sondach na octavia Epiphani domini, anno et cetera [15]XXV.

Hynrich van Muyche hait beleit myt Clais Lymbergh, Clais Lantschade und Lomar Johan, die gesacht haven, we en fridach vergangen Kirstgen Schoultis und Hynrich vurscreven zom Reesen im huisse gespilt haven umb 1 Goltgulden. Und so sy sich im spylle ineint synt worden, have Hynrich synen Gulden in de tesche gestochen. Do have Kirstgen gesacht, den Gulden will ich haven und na Hynrichs teschen getast, eyn metzs Bl. 82^r

uisgetzoigen und de affsnyden hait willen.

Do have Hynrich gesacht, den Gulden laissen ich dir neit. Woultu de tesche affsnyden, eher laissen ich sy dir und have de tesche affgebonden. Kirstgen de gelassen und gesprochen, nun verwarr sy wall. Have hey do gesacht, dem will ich so doyn.

Johan Roide und Peter zom Rodenhuis, kuyrmeister, uff godenstach na sent Thonisdage, anno et cetera [15]XXV.

Meus Peltzer hait gewyst und beleit, we Hennes Vasbender und syne huisfrauwe eme syn und syner huisfrauwen erffschafft an der Syghen gewuyst, da de wyden bussen zytzs gestoifft, auch etlich wyden im gronde affgehauwen, vur duyr hoiltzs et cetera.

Hait derselve Meus vort gewyst in dem waynhuisse, we deselven da in der stoiffen breder und paggen affgedayn und uisgebrochen, derglichen uff me stellen van dem geboyve dylle loß gemacht, auch etliche van dan gedragan et cetera.

Hant vurscrevene kuyrmeister bescheiden, Hennes huisfraw de dylle weder dar zu stellen, zu beseyn, off sy geneilt geweist weren off niet und sich alsdan guitlichen zu verdragen ader des rechten zu gebriuchen.

A II/11 1525

Bl. 83^v

Johan Rode und Peter zom Rodenhuis, kuyrmeister, uff godenstach na sent Agathendach, anno et cetera [15]XXV.

Clais Lymbergh hait gewyst und beleit synen garden an der Gromelporzen, we de souwe den gantz durchgraven haven, derglichen den statgraven darby, hey in pechtongen hait. Und want dan vurscrevene kuyrmeister gar wenich uff dem lande vonden dan gantz durchgraven was und neit eigenklichen sagen noch en wusten wat van roebben off moerren off anders im garden geweist was, hant daromb Claiß ande gheve, dardurch eme der schade geschiet ist gewyst guitlich myt eme zu gewerden off an dat recht zu nemen et cetera.

Ist befonden, Kirstgen Schoultis garde dar beneven, der offen lach, und des vaitzs garde darby myt eyne fuylen zuyne.

A II/11 1525

Johannes Schutzs, burgemeister, Godart zom Reesen und Johan Staill, rentmeister, Peter zom Rodenhuis, Johan Aldenach, Johan Girachs, Peter zom Wynter und Johan Henselen, alle vam raide, uff vridach na sent Appolonisdage, anno et cetera [15]XXV.

Dese vurscrevene myt sampt der hernknecht und statboiden hantt besichticht den doiden licham Heyn Becker knecht uff dem Berg, Kirstgens son van Vilckmolendorff, so der

Bl. 83^r

als gestern, donrestach, in der stat im Bruhoeve zu wyne gesessen, so dat hey eynen guiden dronck hatte. Und als hey den avent uff den Berch gayn wolde, ist hey in der Berchgassen tgen des presentzmeisters hoevedurgen van dem oversten wege in den Hollenwech weder geve sytte weder eyne ecketige leye gevallen, eyn loch hynden int heufft und den hals untaerdirt und derhalver gestorven sy. Und hant anders neit am licham befonden. Havet darby vurscrevene van minem wirdigen Hern abtzs und des gerichtzs wegen erleuffnys gegeven, den doden licham zu der erden zu bestaden.

Johan vam Zwivell, uff godenstach nach Valentinus, anno et cetera [15]XXV.

Heintzs zom Somberen hait zu leisten gemant Johan Domm, doichscherer, als eynen burgen van wegen des schoiltis zu Ockend[dorp] eyne zumme van V Mark, II Albus. Hait VIII dache dach van gerichtzs wegen. Vur eynen wirt zum Isermart gekoren.
Kost VI Schilling.

Zwivell, uff Eschdach, anno et cetera [15]XXV.

Lomar Johan hait zu leisten gemant Peter Under der Hallen vur eynen burgen van dem kauff vam huisse zom Haesen, van wegen Hennes Vasbender vur der Colner Portzen. Hait vur eynen wirt gekoren.
Kost VI Schilling.

A II/11 1525

Bl. 84^v

Johannes Schutzs und Thonis zom Hirtzs, burgemeisteren, uff sondach Invocavit, anno et cetera [15]XXV. Thonis Mant, Clais Lymbergh, Thewus Henckell und Hynrich Lymbergh, gebroder, hant beleit myt Zeris van Wipperfurde, Thys vam Stycht, Joiswyn, doichscherer, und Daym Wever, de gesacht haven, we Daym van Roehesell gesteren, saterstach, zom Woilffe im huisse gesessen und im vollen gelaijche gesacht have, we Greta von Roehesell der vurscrevenen gebroder suster, eyne ketzersche hair sy, und dat wille hey bewysen.

Vurscrevene burgemeisteren, vort Zeris, Thys, Joiswyn und Daym vurscreven dat beleit gedayn.

Jongh Johan Knutgen, Johan zom Woilffe und Vaßbender, burger und luide, uff vurscrevenen sondach na mytdag.

Vur denselvigen hait Daym van Roehesell vurscreven solche wort, hey over Greta van Roehesell we boven geschreven gesprochen hait, öffentlich gesacht, we hey solchs in zornigem gemoide und in dronckenschafft gesacht have, und wes hey derhalver oever sy gesacht, have hey gedacht und geloegen, und dan enwysß neit anders dan van eyner fromer vrouwen van ir zu sagen, hait Daym vurscreven und Clais, syn broder, van Roehesell, geloifft und zon

Bl. 84^r

Hilgen gesworen, solche kummerrechtzs und und fesser sliessen an unserem werdigen Hern, dem abt, und unberen gnedigen Heren Hertzouch zu Cleve et cetera, am Greven van Seyne an der stat van Sibergh, iren burgeren, iren undersaissen an alle den ghenen, umb iren Gnaden willen doyn off laissen willen, an alle den ghenen, de sy zu desem kummer bracht haven, neit zu rechen noch zu wrechen, noch schaffen gedayn werde dan myt recht alhe bynnen Sibergh und anders nyrgens

Gauwyn, schoultis, Beissell, Emmerich, Kobbenrode, Loe, Roeß, Wyß, Breidenbach, Zwivell, Staill und Leye, uff dynstach na oculi anno XXV.

Elßgen Artzs hait myt consent, wanst und guden willen Bestgen Weithaeß, irs eligen mans, gegeven und uffgedragen Rutger, irem eligen soene, van irem vureligen man geschaffen, und Fygen, syner eliger huisfrauwe, solch ire deill sy ander erffschafft, gnant de Alde Herberghe, vur der Colner Portzen gelegen, nemlich eyn deill van dem sevendeill derselver erffschafft, we ir solchs zu und anerstorven is. Und hait clacklich uff irer lyfftzuicht, de sy daran gehat hette, myt willen irs eligen mans vurscreven gentzlich vertzigen.

A II/11 1525

Bl. 85^v

Overmitzs vurscrevene scheffen.

Tuschent Johan Zymonis und Hynrich Smytzs umb de IIII Mark renthen Johan in Hynrichs vurscrevenem huiß jars vallende und an gericht geweist synt, hait der scheffen bescheiden, na ordenong und vermechnys der Fursten. Und der Goltgulde, do in der geldongen gegulden hait, also dat Johan Zymonis nun jars darvan heven und bueren soll XXI Albus dyß geltzs, und ouch neit me gesynnen soll, eme, Hynrich, ouch geven.

Beissell und Leye, deselve zyt.

Greitgen van Vilcke, Peter Beckers doichter, hait verkeufft und uffgedragen Kirstgen Radermecher und Neisgen, syner eliger huisfrauwen, iren garden an der Burch, tgen dem Cruitzs gelegen, beneven Lomar Johans garden und Elß Beckers zur Ecken garden gelegen. Gelden jars dem presenßmeister III Albus. Geloifft werschafft zu doyn.

A II/11 1525

Bl. 85^r

Gauwyn vam Huyß, schoultis, Herman Kobbenrode und Wilhem Leye, uff godenstach na oculi, anno et cetera [15]25.

Overmitzs vurscrevene schoultis und scheffen, also Her Clais, officiant zu Herchen und Herman van Gleen, itzunt alhe zu Siberghe geweist, recht und urdell untfangen umb des kumers willen, eyn den anderen hebevor etlicher dym swyn gnantem Herman myt eyme syner naber hebevoir vurscrevenen Hern Clais ufft eckeren gedayn hait, daromb de beide bekummert geweist, auch beide, Herman und syn gesell, burgen gesatzs haben und vurscrevenen Herman nun weder ufft nuwe van Hern Clais bekommt ist. Demna hant schoultiß und scheffen vurscreven in de sache guitlicher meynongen geseyn und sy guitlich alle irer sachen, der swyn halver herkomen, bis uff dese zyt geschiet, entscheiden, umb och vorder schade daruis erwassen moicht verhoit blive, also dat vurscrevener Herman, van sich und syns mytgesellens wegen, gnanten Her Clais noch heruis geven und vernoigen soll III Overlensche Gulden van eckergelde, kost und schaden Hern Clais daromb

Bl. 86^v

gehat und damyt alle geistlich und werentlich recht irenthalven aff und van neten dan, damyt gentzlich gescheiden syn und bliven sollen. Und wilcher dys neit enhelde, solde unserm wirdigen Hern abt myt XX Gulden und den mechelens myt Gulden ervallen syn. Nochtant solde sy gehalden werden.

Kobbenroide und Zwivell, uff denselven dach.

Joirghen zu Kyr und Engen, syne elige huisfrauwe, hant guitwillenklichen vertzigen erfflichen und ewencklichen gegeven und uffgedragen uff solchen overbouwe Joen zom Esell und Bele, syn elige huisfrauwe, myt irem nuwen gehuisse, beneven Jorghens huis zom Spiegell gedayn *hait* und gebuwet hant, nemlich dat Joen und syne huisfrauwe ader ire ernen den overbou und inbouwe uff Jorgens want altzit doyn und machen mogen, glicherwys dat nuwe gehuisse itzunt gemacht ist, doch vurbehalden, dat Joen und syne huisfrauwe de kalle tuschent in beiden bussen schaden Jorgens und syner huisfrauwe halden sollen.

A II/11 1525

Bl. 86^r

Kobbenroide und Zwivell, uff vurscrevener zyt.

Kirstgen van Steildorff und Elsgen, syne elige huisfrauwe, hant verkeufft und uffgedragen jong Johan Knutgen und Styngen, syner eliger huisfrauwe, ir deill und gerechticheit an dem huße, hoeve und garten, gnant zom Rodenkop, in der Uilgassen, tuschent dem jongen Heyntz Knutgen und Johan Zymonis erffschafft gelegen, nemlich de helffschit an vurscrevene erffschafft, we in solchs van dem alden Nuysgen und syner huifraue, Kirstgens vurscrevene swegerhern und swegerfrauwe, und irem vader und moder anerstorven und zugefallen ist, myt eyme gange uff deselbe erffschafft over Johan Zymonis garden, gelden dat allynge erffschafft zu Ackerbach, zusament jars III Mark.

Gauwyn, Beissell, Staill, Emerich, Zwivell, Leye, Loe, Kobbenroide, Roeß, Wyß und Breidenbach, uff vurscrevener zyt.

Vurscrevene schoultis und scheffen hant gesprochen und gewyst, tuschent jong Johan Knutgen und dem jongen Knutgen, umb de VI Mark renthen,

Bl. 87^v

daromb de beide parthien vur gericht geweist synt, also so we Jong Johan Knutgen den presensmeister syne renthe betzalt und betzalen mois, alsolchen gelt soll hey auch an dem jongen Knutgen heven und uffboeren.

Overmitzs sementlichen vurscrevenen schoultis und scheffen, deselbe zyt.

Also Jong van Erstorf, burger zu Bon, und syn swager hebevoir beleit und besichtigen hain laissen overmitzs de kuyrmeister, we Johan Slosgen seligen und syne huisfrauwe in an irem gehuisse, beneven der Scheiren, zu nae gebuwet, och irs huiss myt irem vehe gebruicht ayn iren wyßen damyt schaden gedayn, och myt dem bouwe irs huiß und wende zubrochen, we sy vurscrevene scheffen och itzunt gewyst haven. Hait der scheffen bescheiden, indem dat sy zusament geyn kalle halden enwillen, so solde eder bouwen ufft syn, dat wasser leiden, dem anderen unhynderlich, we dat allwege geweist is, sust myt dem schaden, wes Slosgen und syne huisfrauwe myt irem bouwe gebrochen und gehydert hetten, solch sy och weder machen, und daromb hey des huiß gebracht, soll hey sich myt eme verdragen.

A II/11 1525

Bl. 87^r

Beissell, Zwivell und Wyß, deselbe zyt.

Hern Johannes Ousheyen van Siberghe, prior, Hern Gotfridus de Slickert[? Flickert?], procurator, und Her Johan Knutgen, profess zu Bodyngen, hant myt consent, wanst und guden willen irer gemeynen mytconventzsherrn volmechtich verkoufft und uffgedragen Heyntz Knutgen dem alden und Elsgen, syner eliger huisfrauwen, Kirstgen Loir gnant Schoultis und Girden, syner eliger huisfrauwen, des vurscrevenen Hern Knutgens broder, suster und geswageren, solch syn kyntdeill in der Uilgassen und darbussent an

huisonge, hoeffonge, gartten, gebouwes und anders im burchbanne van Sibergh gelegen, we eme solchs van synem vader und moder an und zuerstorven ist, myt allem, neit davan uißgescheiden, myt allem in und uisgeldens.

Geloiffet werschafft zu doyn.

Vur denselvigen, deselve zyt.

Meister Hans Bartscherer van Bon hait verkeufft und uffgedragen vurscrevenen Heyntzs Knutgen und syner huisfraw, Kirstgen Schoultis und syner huisfraw vurscreven, solche leyftzuicht hey

Bl. 88^v

van syner huisfrauwen seligen wegen des vurscrevenen Heyntzen suster geweist, an den nagelaissen guderen, ir van irem vader und moder seligen im burchban zu Sibergh und anders zuerstorven waren, gehat solde haven, und hait gentzlich daruff vertziegen. Hait vurscrevene meister Hans und Heyntzs obgenant, eder uff den anderen, irer sachen, geistlichs und werentlichs gerichtzs, we sy solchs under sich und sament zu doyn gehat haven, bis uff dese zyt, sonder eynische argelist vertziegen und des grontlich entscheiden syn und bliven sollen.

A II/11 1525

Seichtem und Wyß, deselve zyt.

Joris van Boistorff vur der Houltzportzen und Mettell, syne elige huisfrauwe, hant verkeufft und uffgedragen meister Johan Staill und Schemell Johan, hospitailsmeister, XXIII Raderalbus erffrenten, zu betzalen uff sent Girdruitdach off bynnen den neisten XIIIII dagen irst darna volgende unbefangen, zu behoiff desselven Hospitals, an der Colner Portzen gelegen, und dat uis irem huisse, hoff, garten und uis alle irer erffschafft bussen der Houltzportzen, tuschen Ailff Becker und Gehart Roprichtzs erve gelegen. Gelden jars IIII Mark den Hern

Bl. 88^r

im Seligen Dall beheltlich den eluden solchs myt XXIII Kolnische Gulden Radergeltz, vurscrevenen sent Girdruindendach off bynnen den neisten XIIIII dagen und unbetzalten termynen affzuloesen.

Zwievell und Breidenbach, deselve zyt.

Kirstgen van Steildorff und Elßgen, syne elige hußfrauwe, hant verkeufft und uffgedragen, Peter, Herman, Johann und Wilhem Vlachen, gebrodere, Hermans seligen soene, uff solche vorderunge und gerechticheit vurscrevene eluide an den stellen und gehuicht in der Uilgassen, tuschten Johann Knutgen und Teill Knutgens seligen erffschafft gelegen und hant gentzlich daruff vertziegen.

Geloiffet werschafft zu doyn.

A II/11 1525

Vur denselvigen, deselve zyt.

Meus van Molenbeck, peltzer, und Neisgen, syne elige huisfrauwe, hant verkeufft und uffgedragen Kirstgen van Steildorff und Elsgen, syner eliger huisfrauwe, eyn stuck wiesen und lantz an eyme stuck, over der Sygen gelegen, gnant uff dem Rodenbuchell. Schuyst myt eyme

Bl. 89^v

orde an werdigen Hern abtzs erve, och an der van Nesselroide zum Drieschs gehorende und an Deilgens wiese, heischt de Zangenmar.

Geloiffet werschafft zu doyn.

A II/11 1525

Loe, Zwivell und Roess, uff vurscrevener zyt.

Johan van Seilbach gnant Woilff zum Leopart und Zilie, syne elige huisfrauwe, hant erfflich und ewencklich uißgedayn und verpecht Johan Eiffeler, zymmerman, und Styen, syner eliger huisfrauwen, ir huß myt syme anhanghe und garten darby, hynder dem Groissen Leopart gelegen und dat alle und icklichs jars vur VIIII Mark uff sent Mertynsdach zu betzalen, off bynnen den neisten XIIIII dagen irst darna volgende unbefangen und myt dem underscheide, dat Johan und Styne, eluide off ire erven, solche gehuisse in gudem bouwe buwich halden sollen, bussen der elude vurscreven schaden. Und so das neit en geschege und de solchs vergenklich aynbuwich werden leissen, off dat sy neit enbetzalde und eyn termyn den anderen erfolgende worde, alsdan und so balde solde vurscrevenen huys myt aller besserongen ervallen syn und den schaden weder verrichten vurscrevenen eluiden.

A II/11 1525

Bl. 89^r

Vur deselvige zyt.

Johan Eiffeler vurscreven und Styne, syne elige huisfrauwe, hant gegeven und uffgedragen irer eynt dem anderen alle ir guitt, gereit und ungereit, we sy dat itzunt hant off hernamails vorder an sich wynnen und

werffen moigen, de leste levendige hant van in beiden, solch zu keran und wenden na irem gevallen, in wes hant de wilt zu irem willen und enenkomptzs.

Kobbenroide, Loe, Leye und Zwivell, deselве zyt.

Tuschent Girtgen zur Scherren und Herman, irs sons eyns, umb de offen soe, der wirt zum Isermart an syme garten hynder der Burch und Her Johan zum Hoen eyne zytlanck zugehalden, so dat dat wasser und fuylnys stayn bliven moiste und der vrouwen vurscreven an irem gehuisse in der Sackgassen schaden gedayn und ir den keller fuylt und anders et cetera.

Hant vurscrevene scheffen bescheiden, und der wirt hait solchs och vur in gewilliget, dat de vrouwe zur Scheren und ire son solche soe in des

Bl. 90^v

wirtzs garden vurscreven soicken und graven moigen. Und so sy der neit envunden und de vergenklich ader sust entgaendeirt were, moigent sy en soe van duynnen steynen machen und muyren zusament myt der muyren eyns vois wyt syn sall, umb dat de soe den vloß und ganck haven moige, we vurhyn geschiet ist, edoch dem wirde synen schaden vorder darin zu verhoiden.

Gauwyn, Beissell, deselве zyt [1525].

Wilhem Kremer zu Bon gnant Haesenkremer hait zu leisten gemant Johan, wirt zum Isermart, van wegen Bypges zu Bircke, veildrever, vur eynen burgen eyne zumme van XIII Gulden.

Hait vur eynen wirt zum Horn gekoren, und hait eme der scheffen dach van gerichtzs wegen VIII dage gegeven.

Kost VI Schilling.

Overmitzs sementliche scheffen, uff vurscrevener zyt.

Johan, wirt zum Isermart, hait bekant, hey uffgeboit und untfangen have van Ailcken zum Cranen XII Goltgulden, hey vurmals Jacop, irem manne, und ir uff eynen garden gedayn hatte und sich derhalver guder betzalang bedanckt hait, umb off solchs hernamails in schrifften off anders befonden werde, dat solchs vanneten und van unwerde syn und bliven sall.

A II/11 1525

Bl. 90^r

Zwivell und Leye, uff vridach, na oculi, anno et cetera [15]XXV.

Lodwich Roitgen, Metze, syne elige huisfrauwe, Peter Roitgen und Elsgen, syn elige huisfrauwe, und Joen Roitgen und Bela, syne elige huisfrauwe, gebroderen und swegeren, hant erflichen und ewencklichen uißgedayn und verpecht Thonis Muyre van Bilcke und Greten, syner eliger huisfrauwen, ir huß und garden in der Ryntgassen, tuschent Greta Jaspars erve und Lodwich Roitgens vurscreven garden gelegen, bussen der Houltzportzen, tuschent synen reynen und steynen, we dat itzunt uisgereynt und gesteynt ist vur den erflichen pacht, nemlich IIII Mark, 1 hoyn den vromyßhern und in de vromyssenbroderschafft jars II hoyner, uff sent Girdruitdach vellich, dat huyß myt dem alyngen garden, de gebroder nun endeils uisbehalden haven, vurhyn zu gelden plach. Wilcht nun Thonis und syne huisfrauwe off ire erven alleyn uißrichten und betzalen sollen uis vurscrevenem huisse und garden eme uisgesteynt ist. Und Thonis syne huisfrauwe off ire erven sollen solch huys

Bl. 91^v

bwich halden und neit vergenklich werden laissen. Und so solchs geschege und dat eyn termyn den anderen erfolgende worde, solde vurscrevene huyß myt aller besserongen und dem garden den gebroderen und iren erven vurscreven ervallen syn.

Vur denselvigen, uff vurscrevener zyt.

Peter Roitgen und Elsgen, syne elige huisfrauwe, Joen Roitgen und Bela, syne elige huisfrauwe, hant verkeuft und uffgedragen Lodwich Roitgen und Metze, syner eliger huisfrauwen, irem broder und swegeren, solche ire deillgerechticheit und anersterffenys am huysse zur Roesen, uff dem Honermart gelegen, und am Wevehuys, hynden dem huisse uff der kirchmuyren, we in solchs van Johan Roitgen, irem broder seligen, zu und anerstorven ist, neit darvan uißgescheiden. Gelden datselfe huis dem presensmeister jars XVI Albus, II hoynre, sent Egidiusdach und zum Nuwenhuis jars II Kolner Gulden und dat Wevehuis jars der Kirspelskirchen 1 punt waß. Gelooft werschafft zu doyn.

A II/11 1525

Bl. 91^r

Johannes Schutzs und Thonis zom Hirtzs, burgemeisteren, uff mayndach na Judica, anno et cetera [15]XXV. Also Johan zom Woilff und meister Hynrich Snytzler vur vurscrevene burgemeisteren, hude, dato, gerechent haven und de rechenschafft so neit glich gedragen, dan meister Hynrich darweder wolde. Edoch hait meister Hynrich bekant, hey, Johan, schuldich sy XII Kolnische Gulden, VIII Albus myt den VI Gulden Johan zu Meyndorff gehaven solde haven. Und dar tgen stoinde eyn taiffell, hey eme van syme houltzs gemacht hette, zu kurten.

Solch syn verdeynst leist hey zu erkentnys der meister, sich daruff verstaynt, stayn, wilch bekentnys Johan zom Woilff verorkondt hait.

Zwivell, uff Palmavent, anno et cetera [15]XXV.

Johan Kesseler in der Houltzgassen und Engen, syn elige huisfrauwe, hant vertziegen uff solche vorderonge und ansprache, sy an Clais Lymbergh und Greten, syner eliger huisfrauwen, zu haven vermeynen uff ire lyfftzucht

Bl. 92^v

und anersterffnys, we in solchs dan zugevallen ist und dat zu behoiff und zu henden Thonis, des vurscrevenen Johans elige son, und dem solchs gegeven und uffgedragen inzuorderen, zu gewynnen und zu verlesen we hey solchs an allen besten zom rechten doyn mach.

Zwivell, uff Palmavent, anno et cetera [15]XXV.

Johan Zymonis hait zu leisten gemant Peter Streitzer vur eynen burgen eyne zumme van IX Kolnische Gulden, IIII Albus, van wegen Joen Kaldaumer uffme Genßwaesem.

Hait VIII dage dach van gerichtzs wegen, und vur eynen wirt gekoren.

Kost VI Schilling.

Vur demselvigen, deselve zyt.

Johan Zymonis obgenant hait uffdoynbieden solche pende eme van gerichtzs wegen van Johan Woilff zom Leopart gegeven ist.

Kost V Schilling, zu verkundigen VI Schilling.

A II/11 1525

Bl. 92^r

Zwivell uff donrestach na Paischen, anno et cetera [15]XXV.

Wilhem Verffer hait uffgeboden solche pende eme overmitzs Alner den schoultis und de gerichtzboiden hiebevoir im jair XXIII, uff meyavent van Johan Blanckenbergh und synen kyndern gegeven ist, nemlich dat huiß zom Kelterboym, de jairliche renthe und grontzyns an dem huisse in der Molengassen, Rutger van Gleen nuwe gebouwet und itzunt inwant, darzu alle gereide guider und dat van macht syner verschrivonge. Kost uffzubeden VI Schilling.

Johannes Schutzs und Thonis zom Hirtzs, burgemeister, uff vurscrevenen donrestach, im selven jair. Meister Johan van Swolle, goltsmyt, hait willen beleiden myt Herman Vlach und Johan im Bruhoeve, we hey myt denselven uff dynstach neist vergangen in Johan Henselens huisse zom Nuwenhuis zu wyne gesessen haven, sy Peter zom Aren zu in int gelach komen, myt worden angehoven und dem goltsmyt eyn glaß wyns under de ougen geschuyt, och darna van scheiden getzoigen und in willen vorder archwilligen. Und so der goltsmyt

Bl. 93^v

deselven zweyn itzunt neit solchs van sich zu doyn hait kunnen brengen, hait hey dannoch das in geburlicher zyt gesont und davan procediert, umb syns rechten derhalver ungehyndert zu syn.

Zwivell, uff dynstach na mia....[?] domini, anno et cetera [15]XXV.

Kirstgen van Steildorff hait zu leisten gemant Hancken Glaßmecher vur eynen burgen 1 sumber weyß, van wegen Peter uffme Blidenberg zu Steildorff. Hait vur eynen wirt gekoren.

Hait VIII dage dach van gerichtz wegen.

Kost VI Schilling.

A II/11 1525

Zwivell, und uff vurscrevener zyt.

Merten an der Alderportzen hait zu leisten gemant Thonis zom Hirtzs, burgemeister, und Joyn zom Esell, als burgen Drude Beckers, syner swegeren, umb eyne zumme van hondert Gulden verdedynt, sy, Drude, eme und syner huisfraw van dem anersterffnys Johan Vogels seligen geven solde.

Hant VIII dage dach van gerichtzs wegen.
Kost VI Schilling.

A II/11 1525

Bl. 94a

[Eingeklebter Zettel; nachträglich mit 94a beschriftet. Diese Notiz gehört jedoch zum Text der Seiten 11/104v, 111/104 und betrifft den tödlichen Unglücksfall des Pastors Alexanders zu Hachenberg].

Item, anno XVC und XXV, des neysten goedestachs nach Aller selendach, do yst besichticht Alexanders thessche, der da wass yn synem leyffen ein officiant der Kyrchen van Hachenbergh und dairynnen befunden an payment III Goltgulden und 1 Andreissgulden und V Oeverlensche Gulden an Pennyck und Heller zosamen. Item, noch VI papiren bloeysger de zosammen ynnen hatten VI Oeverlensche Gulden meyn[us] VII. Item, noch eyn papiren bloeysgen, darynnen hatte entwylicht alt zobroechen sylver, geacht umbtreynt VI Albus.

Hermanus Blanckenbergh, notarius ad praescripta.

A II/11 1525

Bl. 93r

Zwivell, uff donrestach neist na Pynxsten, anno et cetera [15]XXV.

Johan Zymonis uff dem Hogensteynwege hait zu leisten gemant Bernt Bartscherer vur eynen burgen eyne zummme van XIII ½ Gulden uff rechenschafft, herkomende van Hynrich zu Nuynkirchen.

Hait dach VIII van gerichtz wegen, vur eynen wirt gekoren.

Kost VI Schilling.

Gauwyn vam Huyß, schoilten, und Wilhem Beissell, uff sondach trinitaten, anno et cetera [15]XXV. Eva van Frechen, abdysse des Cloisters Seyne bynnen Colne, myt iren capittellares Jonfferen, mytsamt Tryngen Stuppelgans, irer mytjonfferen und irer rechter wyst und guden willen hant gemompert und volmechtich momper gemacht Jacop van Erckelentzs, iren dener und kelner, alle irer sachen vurscrevenen Jonfferen van Tryngens irer mytjonfferen vurscreven halver, van irer suster seligen zu Sibergh anerstorven und zugefallen ist, sy daselffs zu doyn haven off kriegen moigen, och myt in der macht dat Jacop vurscreven eynen momper off zweyn, glicher-

Bl. 94^v

maissen we hey gemompert ist, setzen mach zu gewynnen und zu verleissen.

A II/11 1525

Wilhem Staill und Zwivell, uff vurserevener zyt dynstach na sent Vitzdage, anno et cetera [15]XXV. Gehart Schoynechier und Anna, syne elige huisfrauwe, hant verkoufft und uffgedragen myt consent, wyst und guden willen Peter Peltzer, der vurscrevenen Anna vader und Trynen, syner huisfrauwe, irer steiffmoder, solche erve und erftzaille, landt, wießen, bitzen und anders over der Syghen gelegen, we in solchs van Annen vurscreven, irer moder, anerstorven ist und van irem vader zusterven mach, uff de lyfftzucht Peter, ir vader vurscreven, mytsamt syner huisfrauwen, hey daran gehatt hette, och itzunt vertziegen hant.

Gelden jars.

Geloift werschafft zu doyn.

Overmitzs deselvigen, deselve zyt.

Arnt Schoynmecher hait beleit myt Hern Jaspar, zur tzyt officiant zu Sibergh, Thonis zom Rosenboym, offerman, und Herman Woilff, de gesacht haven, dat Greta Seilspendersche in irem seichbedde vur Hern Jaspar, irem pastoir

Bl. 94^r

vurscreven und den zwennen vurgenanten als getzuigen gegeven und uffgedragen have Arnt vurscreven, irem huiswirt, alle ire guit, gereit und ungereit, we sy dat itzunt haven und vorder kriegen moige na irem doide, dat zu kerden und wenden, na alle syme willen und walgevallen, und davan en sy hey nemans schuld zu geven noch och dorffe geven iren vrunden, und de myt VI Albus afflossen moige, doch uifbehalden solde hey Peter, irem soene, davan eyns geven zeyn Goultgulden und eyn cleit, so hey sich irlisch bestaidt, geistlich off werentlich.

Do have Druitgen, der vurscreven Greten moder, darby gestanden und gesacht, doichter, dat gurdell und paternoster dat ist myn, dat ich dat wederkrigen.

Do have Greta gesacht, moder, dat hait ir myr doch gegeven, und ich idt och walbetzalt.

Und dit sy geschiet in irem bedde we vurscreven und so sy ire cristlich recht untfangen wolde.

A II/11 1525

Bl. 95^v

Gauwyn, scholten, Beissell, Zwivell, Staill, Wyß und Breidenbach, uff deselve zyt.
 Her Hynrich Stuppelgans hait zu leisten gemant Johan Grlachs und Johan Knutgen, synen eidom, als burgen
 vur eyne zumme van VII firtell Gulden, van dem kouffe syner erffschafft Godart van Dollendorff, syn
 swager, myt eme gedayn hait uff rechenschafft.
 Hant vur eynen wirt gekoren, acht dage dach gegeven van gerichtzs wegen.
 Kost VI Schilling.

A II/11 1525

Thonis zom Hirtzs und Johan Staill, burgemeister, Godart zom Reeßen, rentmeister, Johan Aldenach, Johan Rode, Peter zom Rodenhuis, Johan Grlachs und Peter zom Wynter, uff godenstach na sent Vitzdage, anno et cetera [15]XXV.

Thonis Bestgen hait sich beclagt und beleit myt Peter zom Rodenhuis, der gesacht hait, so man gesteren hait gedyngt bynnen dem gericht, sy Thonis Bestgen zu eme komen und gesprochen, wey hey vur Meus Welckner tgen Wilm Hanmecher burge sy und Meus en were itzunt myt synen luiden neit he und hait daby begert myt Peter vurscreven, dat Wilhem

Bl. 95^r

dat gericht bis na mytdage umb de III oren stayn laissen wille. Thonis wille de luide tgen de zyt by de hant bestellen und alsdan irs dyncks wall gewerden.

Do have Wilhem gesacht, des byn ich zuvreden. De wette mach wall erschenen syn, hey moiß ist doch an den VI mennen verbliven.

Daruff have Thonis na synen mennen geschickt, de darbracht und beclagt sich des nun, we hey gemeynt, Wilhem ouch neit gedyngt solde haven.

A II/11 1525

Thonis zom Hirtzs und Johan Staill, burgemeisteren, uff donrestach na Viti [*Viti = 15. Juni*], anno et cetera [15]XXV.

Clais Lymbergh hait beleit myt Johan zom Isermart, Vais Schroder und Huprecht uffme Thonisbergh, de gesacht haven, we Lair Johan in biwesens Clais vurscreven sich umb de huisser, hey eme verkoufft hait, myt Johan van Nuymbricht, der sich der huiser ouch angetzoigen, verdragen hatten. Do have Johan Kanffenheuwer gesacht, den der van Nuymbricht alhe gemompert hatte, dat verdrach laissen ich wall gescheyn, aver ich vertzien uff de momperschafft neit, ich en have zuirst myn uißgelachte gelt weder.

A II/11 1525

Bl. 96^v

Vur denselvigen, deselve zyt.

Clais Lymbergh hait beleit myt Lodwich im Jonckersproich, der gesacht hait, we hey gesteren zom Woilffe, im hiusse, II quart wyntzs geholt und de zustoppen wolde. Have Johan Kanffenheuwer vur der doiren gegangen, zornich geweist, und de frauwen hant in halden willen. Have Kanffenheuwer do gesprochen, haldt mych neit, ich raeßen. Solde mych Clais, der westpheilsche dyeff, also faxeren, neyn nimmerme.

Kanffenheuwer buydt sich zu tho[r]me zu gayn, an Lodwich zu sliessen, sich an in zu halden off de wort also gegangen syn, we recht ist.

Lodwich spricht myt, we Kanffenheuwer solchs myt underscheide gesacht have, wanne Clais off emans anders in umb syne ere und guit brengen wolde und der stat verdryven wolde, den heilt hey vur eynen westpheilschen dieff.

Kanffenheuwer spricht itzunt, Clais have eme myt dem Isermart untboiden, hey wille in der stat verdriven.

Clais gifft des urconde vur den burgemeisteren vurscreven, Kanffenheuwer sacht myt

Bl. 96^r

we hey solchs myt underscheide gesacht have. Dan so hey weder dat kuyrboch gedayn hette, dan worde idt gescheyn.

A II/11 1525

Peter zom Rodenhuis und Wilhem Verffer, kuyrmeisteren uff saterstach na Visitatio Marie, anno et cetera [15]XXV.

Kathrina zur Clocken hait vurscrevene kuyrmeisteren besichtigen laissen iren schaden, ir an iren lynsen, wycken und haveren, vort an irem graesse over der Syghen geschiet ist van den parthien Herman Swertzgens und Teill uff Bruyns hoeve, wilch schaden vurscrevene kuyrmeister gepoirt haven, de zweyn ir darvur geven sollen 1 malder haver, darzu ir uißgelachte gelt.

Thonis zom Hirtzs und Johan Staill, burgemeisteren, uff sondach na Visitatio Marie, anno et cetera [15]XXV. Neta, Mertens huisfrauwe an der Alderportzen hait beleit myt Johan an der Alderportzen und Hynrich, Herman Moilners jongen, de gesacht haven, we Druide Beckers en neisten

Bl. 97^v

vridach den avent vur Mertens vurscreven huis komen sy und have gesprochen, wa bistu swartzter deiff, du hais myr myn huis affgepant, du styfftruck, du hais III pynt vur 1 qwart gegeven, wilcht hait Neta, syne huisfrauwe verorkondt.

Do hait sy Nete geheischen eyne dieffsche hoir und gesprochen, hette ich dich, ich wulde dich erworgen.
Wilcht hait sy ouch verorkundt myt Johan und Hynrich vurscreven, de dat untfangen haven.

Peter zom Rodenhuis und Wilhem Verffer, uff mayndach na octava Visitatio Marie, anno et cetera [15]XXV. Godart am Dreischs hait besichtigen laissen solchen schaden eme an syme korne am Dreischs, by dem Vischers Knutzs, geschiet is van IIII swynen, zugehorich der Alder Katzen, wilcher schaden van vurscrevene kuyrmeister gepoirt ist uff II foder korns, de Alde Katze eme geven sall, darzu syn uißgelacht gelt.
Kost V Schilling.

A II/11 1525

Bl. 97^r

Peter zom Rodenhuis und Wilhem Verffer, uff saterstach na sent Margretendage, anno et cetera [15]XXV [*Margaretha = 13. Juli*].

Heyntzs Acherhen hait besichtigen laissen solchen schaden, eme an syner frucht und gersten over der Syghen van IIII koen des wirtz zom Ißermart geschiet geweist synt und de in den Bruwehoff gedreven, wilchen schaden vurscrevene kuyrmeister gepoirt haven, der wirt Heyntzen geven sall II malder gersten, darzu syn uisgelacht gelt.

A II/11 1525

Thonis zom Hirtzs, burgemeister, Godart zom Reeßen und Johan Roide, rentmeisteren, in irem byweßen, uff mayndach na sent Margretendage, anno et cetera [15]XXV [*Margaretha = 13. Juli*].

Johan zom Woilffe, Johan Freugens zu Widennyst und Hynrich Lymbergh van Roeksait als neisten bewanten frunde Hynrichs, Clais Sleupgens und Metzen, syner eliger huisfrauwen seligen nagelaissen unmomperlich kynt, van des wegen und in syn behoiff, hant bekant, we sy itzunt hude, datum, van Johan Kanffenheuwer des vurscrevenen kyntzs steiffader, van dem ersterffnys

Bl. 98^v

und besetzogen syner alderen seligen, we de frunde myt dem Kanffenheuwer, instat des unmondigen kyntzs hiebevor im jair XVC XXIII, uff godenstach na Judica, vur den scheffen clacklich und ewencklich verdragen synt, lude dysselven gerichtzsboichs, also dat der Kanffenheuwer dem vurgenanten syme steiffkynde geven solde hondert Kouffmansgulden und eyn bette myt syme zubehoer, we dat stayn sall, wilchen hondert Gulden zusamt dem bette myt syme zubehoere, we dat verdragen ist we vurgenant.

Haven de dry vrunde, myt namen Johan und Johan und Hynrich vurscreven, itzunt van dem Kanffenheuwer untfangen und zu sich genomen, zu behoiff und in nutzs des kyntzs vurscreven, so dat sich de parthien vurscreven van wegen des kyntzs van Johan Kanffenheuwer vurgenant guder leverongen und betzalungen bedanckt haven und bedancken, vur vurscrevene burgemeisteren und rentmeister.

Und hait daby der Kanffenheuwer dat kynt den frunden ouch overgelevert, we solchs myt verdragen ist, inhalt we vurgenant, uisbehalden

Bl. 98^r

VI Mark uff dem irsten dage zu des kyntzs andeill vertzert synt vur den scheffen und den iren loyn, vort dem schriver ir gebuyr, de frunde neit untfangen noch gebuirt en haven, dan de VI Mark an den hondert Gulden affgerechent sollen werden.

Und want dan solchen hondert Gulden hynder Heyntzen zom Somberen, zur tzit schriver, zu bewairen gelacht synt, hait derselve Heyntzs solchs gelt, we dat gelevert geweist ist, uff hude, datum, myt willen der vrunde und inbiweßen der burgen etlichen den vrunden, myt namen Johan zom Woilff und Clais Lymbergh, des vurgenanten Hynrichs broder, gelevert und gehantreicht.

Geschiet in biwesen Thonis zom Hirtzs und Johan Staill, burgemeister, uff saterstach na sent Johan Untheuffdong, anno et cetera [15]XXV, lude breve und sigell, Johan und Clais vurscreven dem kynde darover gegeven haven.

Thonis zom Hirtzs und Johan Staill, burgemeisteren, uff sent Peter Vinckelsavent, anno et cetera [15]XXV. Also Johan Lynenwever van Honff eyne zytlanck he gewant und vur guder zyt hebevoren bynnen nacht und nevell van hynnen ewech getzoigen ist, so hey dan etlich garn bynnen und bussen Siberch, umb in davan doich zo machen, an

Bl. 99^v

sich genomen hait und doch deselven neit weder gelevert. Dan we vur ruymich worden ist, hant de luide ir garn also darbracht. Hant burgemeisteren nageloiffen, umb de by dat ir kommen zu laissen. Hant de nageschreven ire kerffen bracht, dat wederdeill, davan man by dem garne vonden hait und in solch gelevert, we herna voulgt.

Item, im irsten hait Tryne, Johans frauwe van Alpach by Bircke, untfangen, overmitzs ire kerff XXXIIII punt,
item, derglichen Wynant Hoiffsmytzs huisfrauwe V punt.
Johan Muyes huisfrauwe ir susteren IIII ½ punt garns.
Heyntzs Rocks huisfrauwe VII punt,
Hennes Vabenders frauwe XII punt,
Johan Guylichs frauwe VIII punt.
Dese nageschreven hant ire kerffer bracht. Und dat wederdeill der kerffer hait man neit by dem garn vonden,
edoch in ir garn weder gelaissen.
Item, im irsten, Anno X punt garns.
Jacop Becker XIII punt,
Baltasar V punt,
Jaspar Portzner 1 punt,
den Joufferen in der Cluysen V punt,
Peter Bulart V punt,
Hollensmyt VII punt, und dat uff eyn underscheit, so einich nageschreven umb dat garn komen worde, ist
eder vur den anderen burge, dat weder zu besseren und zu wederlegen.

A II/11 1525

Bl. 99^r

Thonis zom Hirtzs und Johan Staill, burgemeisteren, Wilhem Verffer, kuyrmeister, Johan Aldenach und
Kirstgen zur Wynreven, uff vridach na sent Johan Untheuffdong, anno et cetera [15]XXV.
Diese vurscrevenen, mytsampt der hernknecht und statboiden, hant besichtigt den doiden licham Itgens,
eyns cleynen meitgens und Hynrichs Woirms dienstboide geweist ist.
Wilcht Itgen gesteren, donrestach, kumt an der Syghen, by der stat Heuwegen, am over hat willen weschen
und darover in de Syghe gevallen, da verdroncken, vortgedreven dat wasser aff int landt zu Blanckenbergh
und da befonden.
Hait Rutger van Gleen, blanckenbergscher amptknecht, so idt eyn arm kynt was, erloiffnys gegeven, den
licham zu Sigbergh zu begraven.
Demna hant vurscrevne burgemeister myt dem raide und hernknecht den doiden licham he im Hospitaill
besichticht und anders neit dan idt verdroncken was an eme vonden und also van wegen mines wirdigen Hern
abtzs und des gerichts erleuffnys gegeven, zur erden zu bestaden.

A II/11 1525

Bl. 100^v

Johannes Staill, burgemeister, und Johan Henselen, martmeister, uff sent Mauritiusdach, anno et cetera
[15]XXV.
Hynrich Striffeler und Teill van Alden Nuymbricht hant van wegen Girtgen, Johan Wolsleger seligen
nagelaissen dochter beleit myt Thonis Bestgen, der gesacht hait, also Johan Wolsleger in syme doitbedde
gelegen, have hey synen zwen kynderen, als Peter und Girtgen, zu bescheiden und besatzs van den gereiden
guider zwey wullendoicher, neit vam besten, och neit vam snoitsten, als nemlich zwey mytteldoicher, und
dat van eyme kynde uff dat ander zu sterffen. Und also Greta sich an Tilman van Gleen verhilicht hait, sy
Girtgen vurscreven irem kynde darin uißbehalden und zubescheiden, zudem vurscrevne ire cleider und
cleynoit, we sy dat have und zu irem lyve gehoirt.

Zwivell, uff dynstach na sent Matheusdage, anno et cetera [15]XXV.

Dederich Loir hait zu leisten gemant Hanecken Glaßmecher, vur eynen burgen Clais Schoymecher, eyne
zumme van XVIII Mark, und VI Mark van eyme malder korns.

Hait fur eynen wirt gekoren by Tilgen van Unckell.

Kost VI Schilling.

A II/11 1525

Bl. 100^r

Gauwyn vam Huyß, schoultis, und Johan vam Zwivell, beidesament scheffen, uff dynstach na sent
Matheusdage, anno et cetera [15]XXV.
Wilhem Verffer hait solche pende, als eme van dem schoultis overmitzs de boiden van gerichts wegen, na
wißdomp der scheffen, lude breve und sigell, syme vurfader Thys Verffer van Blanckenbergh und synen
kynderen gegeben waren.
Vort zu pande untfangen vur IIC IIII Kohnische Gulden, V Schilling.

Kost pende zu geven dem schoiltiss, IIII Albus,

Item, den boden II Albus,

Item, kost uffzubeden VI Schilling.

Hant vurscrevene scheffen geschatzs Johan Blanckenbergh und syner kynder, van Stuppelhennes doichter geschaffen, bitze, vur der Molenportzen gelegen, vur hondert Overlensche Gulden.

Und wat des de bitze jars uißgulde, solde van edem Albus renten XX Albus an vurscrevenen zummen affgerechent werden. So gilt de bitze jars **VIII Albus, macht ouch VIII Kolnische Gulden**, in de kirspelskirche zu Siberg III Mark,

macht XVIII Kolnische Gulden, und dem maeß uff synen hoff jairs 1 Denarius, macht V Schilling.

So de XVIII Gulden und V Schilling affgerechent werden, verblift noch de zumme de bitze geschatzs ist, hondert II Kolnische Gulden, **VIII Albus**.

Bl. 101^v

Item, geschat **VIII** Mark erffgrontzynße an eyne huisse in der Molengassen, Rutger van Gleen itzunt innen want und nuwe gebouwet hait, vur **LI** Kolnische Gulden.

Item, doe it dat schetzgelt van eder Marck 1 Schilling, zusament **XIII** Kolnische Gulden, myn[us] 1 Schilling.

Item, de schetzonge zu verkun[d]igen kost VI Schilling.

Item, vurscrevene scholtis und scheffen herzu willigen und zu lienen, eder vur synen uiszoich II Marck, facit **III** Mark.

Dys vurscreven geltzs hait Wilhem Verffer overmitzs Peter zu Overoide van Johan Blankenbergh untfangen, **XI** Kolnische Gulden, **V Albus**.

So dit vurscrevene dan tgen eynander affgerechent und gekurtzs wirt, gebracht Wilhem noch an vurscrevener zumme und syme uißgelachten gelde **V** Kolnische Gulden, **V Albus**.

Overmitzs Johan Staill, burgemeister, und Johan Aldenach, uff donrestach nach Cecilie, anno et cetera [15]XXV.

Bertram Oem Johans hait van geheisch Wilhem Verffers und van synentwegen gelevert **LI** Kolnische Gulden Radergeltzs Johan zom Woilff dem jongen, und hait damyt geloist de **VIII** Mark renthen in der Molengassen, in Rutgers huisse, darvur in de we heboven affgeschatzs waren.

A II/11 1525

Bl. 101^r

Vurscrevene schoultis und scheffen, uff deselve zyt.

Schoultis und scheffen vurgenant hant durch gesynnen und begerde Bertram Oem Johans, so syns swegerhern Johan Blanckenberghs und syner huisfrauwe myt irer suster und broedere guider, als nun geschatzs worden ist, wilcher guider gナー Bertram syner swegeren Greitgen ire kyntdeill an der bitzen affgegulden und in och damyt vur den scheffen geerfft have, we recht, und we syn swegerhere nun neit im burchbanne en have, hey zu syner betzalogenen kommen konne. Hant eme daromb erleuffnys gegeven, solchs an synen guederen im lande zu Blanckenbergh zu bekomen.

Overmitzs vurscrevene schoulten und scheffen, deselve zyt.

Merten an der Alderportzen und syne huisfrauwe hant uffgeboden solche **VIII** Mark, **II Albus** renthen, Thonis zom Hirtzs, burgemeister, ir van wegen Drude Beckers zu pande gegeven hait, derglichen an Joenen zom Esell syne gereide guit uffgeboden, eder eynen vunfftzich Kolnische Gulden.

A II/11 1525

Bl. 102^v

Johan Staill, burgemeister, und Johan Aldenach, uff sent Gereonysdach, anno et cetera [15]XXV.

Bertram Oem Johans und Hynrich, Johan Blanckenberghs son, geswageren, hant vermitzs vurscrevene burgemeister geboiden und dargelacht, Wilhem Verffer solchen IIC Kolnische Gulden an guidem gelde und silveren gelde, als darvur in ire elderlich guit affgeschatzs und geschatzs sy, weder an sich zu loesen, we solchs in der Kirchen uffgeroiffen sy worden, ader dat van Wilhem weder zu golden begert haven, umb ir gelt. Und synt vorder willich geweist, dat schadegelt, wes Wilhem neit untfangen, darby zu geven. Hait Wilhem na datum syner verschrivungen Radergelt haven willen.

Thonis zom Hirtzs und Johan Staill, uff saterstach darna, anno et cetera vurscreven [*Gereonis = 10. Oktober*] Bertram und Hynrich vurscreven hant overmitzs vurgenante burgemeisteren geboiden und dargelacht, Wilhem obgenant, **LI** Kolnische Gulden Radergeltzs, umb de **VIII** Mark renten, im huisse in der Molen-

Bl. 102^r

gassen, Rutger van Gleen innen want, darvur de geschatzs synt, weder an sich zu loesen und bieden darby dat schetzgelt und ander unkost daruff gegangen, an dem ghevem Wilhem untfangen, affzurechenen, wilche gelt Wilhem sich och geweigert zu untfangen und gesprochen, also eyn gelt als vur de alinge gantze zumme zu untfangen willich sy und solchs neit deillen enwille. Und blive des an wyßdomp der scheffen.

Wilhem Leye, uff der moirdach, anno et cetera [15]XXV.

Gotschalck Smyt hait zu leisten gemant Johan Hoeffnagell vur eynen burgen van XIIII Mark heufftgeltzs, van wegen des smyts zu Grymbergh.

Hait zom Wynter gekoren.

Kost VI Schilling.

Gauwyn und Zwivell, uff sent Severynsdach, anno et cetera [15]XXV.

Man wirdiger Here abt hait zu leisten gemant Hynrich Starckenbergh vur eynen burgen van XXXV Kolnische Gulden, van wegen eyns burgers van Nuyß, lude Starckenberghs hantschrifft.

A II/11 1525

Bl. 103^v

Vur myme wurdigen Hern abt, Gauwyn, schoultis, und Zwivell, uff sent Severynsdach, anno et cetera [15]XXV.

Tuschent Merten an der Alderportzen eyns und Thonis zom Hirtzs und Joen zom Esell, als burgen Drude Beckers und van irentwegen, als umb de C Kolnische Gulden, Drude van den gereiden guideren ir man Johan Vogell nagelaissen hait.

Darumb vurscrevene scheffen itzunt alhe erschenen, solche pende, de burgen gegeven hatten, zu schetzen. Synt daromb affgeverdig vur vurscrevenen minem wurdigen Hern abt und scheffen, also dat Thonis und Joen de hondert Kolnische Gulden schoult vurscreven an sich genomen haven und annemen, als vur ire eigen schoult, vur Cerstmyßen irstkompt, off bynnen acht dagen neist darna volgen zu betzalen. Und hant veroirlofft bekant, off solchs neit en geschege als dan anstont, in ire huisser zom Hirtzs und in Joenen huis zu tasten und ire alle gereitste guider, als wyn, korn, gelt, silver und anders, we sy solchs dan hetten, zu nemen und zu schetzen, glichs off solchs uis

Bl. 103^r

macht und crafft des rechten erwonnen were, und dat sonder alle wederrede. Want de beide burgen, Thonis und Joen vurscreven, dem schoultissen itzunt darvur hanttestonge und geloiffde gedayn hant und darzu kost[en] und richtlichen schaden daromb erleden is. Ouch mach Drude, off sy eynich recht off reden zu Merten vermeint zu haven, darna weder *zu sprechen* myt recht zu sprechen.

Hant scheffen und schriver itzunt umb de schetzonge neit gescheyn ist, als vurscreven ire recht untfangen, III Goltgulden. Und hant doselffs vertzert zom Leopart VI Mark.

Johan Aldenach und Peter zom Rodenhuis, kuyrmeister, uff sent Huprichtzsdach, anno et cetera [15]XXV.

Wilhem Vlach hait gewyst und sich beclait eyner kalckboeden, de syner vurfader Peter Loir seligen lange zyt her fredelichen besessen und in

Bl. 104^v

sym gebruch gehat have, wilch boede itzunt umsoicht und sonder eynich erkentnys, sonder syne wyst und willen, Johan Brocher, loir, zu sich genomen. Have syne vell dar ingelacht. Und dat myt unrecht gedayn solde haven. Und begert daromb, eme solche boide zu verbieden.

Hant vurscrevene kuyrmeister eme de boide verboiden, bis an burgemeister und rait und an dat loirambocht, want sich der Brocher horen leisse, de boiden gemeyn syn solten.

Johan vam Zwivell, scheffen, Thonis zom Hirtzs und Johan Staill, burgemeister, uff godenstach na sent Huprichtzsdage, anno et cetera [15]XXV.

Vurscrevene scheffen und burgemeistere myt sampt der hernkneicht und statboiden hant besichticht den doiden licham Hern Allexander van Betzdorff, pastoir zu Hachenbergh, wilcher als gesteren he zu capitell geweist, de nacht Under der Hallen, in Peters huiß geslaiffen und bynnen nachtzs van dem soiller zu der vynsteren uis in de straisse gevallen, uff dat

Bl. 104^r

heufft geschossen und den morgen vroe, so man zu der vroemyssen geluyt hait, uff dee straisseen doit vonden ist. Hant daromb de vurscrevene erloiffnys gegeven, van wegen myns Hern abtzs und des gerichtzs, den doiden licham zu der erden zu bestaden.

Ist doselffs an gelde in syner teschen befonden, im irsten, an gelde dry Goltgulden und eynen Andreisgulden. An Penningen und Hallern vunff Overlensch[e] Gulden, noch VI papieren blaisger, dainnen waren seys Overlensche Gulden, mynus VII Schilling.

Noch eyn papieren blaisgen. Darinnen hatte etliche alt zubrochen silver geacht, umbtrint uff VI Albus.

Des geltzs Peter Under der Hallen do gegeven, umb den licham zu der erden zu bestaden, III Overlensche Gulden.

Dat andere, van geheischs uns wirdigen Hern abtzs, gelevert Jacop Bartscherer und Johan, des vurscrevenen Hern Allexanders eidomp, nemlich XII Overlensche Gulden, darzu syn pert myt alle syme getzuige und Her Alexander he by sich hatte.

In biwesen Hern Peter Frolich, pastor zu Kropbach, over gelevert und zu iren henden gestalt, overmitzs Thonis zom Hirtzs und Johan Staill, burgemeister, uff sent Kathrinendach, anno et cetera [15]XXV.

A II/11 1525

Bl. 105^v

Johan vam Zwivell, scheffen, Thonis zom Hirtzs und Johan Staill, burgemeistere, und Johan Aldenach, uff mayndach, na Martini, anno et cetera [15]XXV.

Godart zom Reeßen und Greitgen, syne elige huisfrauwe, hant in der zyt sy des wall moigich und mechtich waren, myt vuirbedachtem raide, upsatzs und vryen moitwillen gegeven und uffgedragen, Johan Symonis dem alden und Kirstgen zur Wynreven, brodermeisteren zur tzyt der broderschafft sent Sebastianus, in der Kirspelskirchen zu Siberg, in nutzs und zu behoiff derselver broderschafft etlich renthen und grontzynsse, we Godert vurscreven eme van Fredrich Kelterboym seligen zuerstorven und angevallen synt, myt dem underscheide, we herna voulgt.

Item, dry Mark renthen uis Hynrichs Eckenhayns huisse vur der Holtzportzen, tuschten zu beiden syten Peters Strentzers huisser und erffschafft gelegen.

Item, seven Albus, eyn hoyn, jars vallende in des Holtzenheuwers gehuisse, beneven des alden Johan Knutges huisse und Sloßgens erffschafft vur der Holtzportzen gelegen.

Item, XXIII Albus renthen jars, uis derselver Elsse Sloßgens huisser we obgenant,

Bl. 105^r

gelegen zur ander sytten, beneven dem huiße gnant de Dravendehoe, wilche vurscrevene erffschafft itzunt Clais Sleupgens und Metzen, eleuden, nagelaissen kynt zubehorich ist.

Item, noch VIIIII Mark renthen in dem huiße zur Harderfuyst, in der Holtzgassen, beneven Elssgen Artzs huisse und tgen over Herman Woilffs huisse gelegen. Macht zusament de renthe jarlichs XVII Mark, 1 hoyn, wilche vurscrevene renthe de vurscrevene brodermeister off ire nakomen jarlichs in urbar und zu behoiff vurscrevene broderschafft erfflich und zon ewigen ziden innemen, uffsheven und zu sich untfangen sollen. Und davan sollent deselven brodermeister off ire nakomen jarlichs uff sent Sebastianusdach jargetzyt halden, myt vigilien, comendacien und myt VII myssen, vur vurscrevene elude ire geslecht. Und darvur, dat man des begerende ist, als davan soll man geven van den VII myssen edem preister zu persentien und vur syne kosten III Albus, dem pastoir van vigilien, comendacien und vur syn verdienst VI Albus, schoilmeister

Bl. 106^v

und offerman eder 1 Albus.

Und wat dan me overt und darbovent blifft, soll der vurscrevenen broderschafft zu irem nutzs syn und in der behoiff gekirt werden, doch beheltlich vurscrevenem Godart und Greitgen, eluden, irer beider levendage als ire lyftzucht in beiden und noitorfft an vurscrevene renten zu gebruichen, unhynderlich daran zu behalden. Hant deselven eluide gegeven und zu bescheiden zu eyner lampen vur dem hilgen sacrament in der Kirspelskirchen vurscreven zu broewen jarlich vurcrevene V Mark renthen, vallende in Peter Strentzer huisse, vur der Holtzportzen, beneven Eckenhayns vurscrevenem huisse gelegen, beheltenis denselven eluden ir lyftzucht daran vurscrevene renten zu behalden, he an unhynderlich.

Hait Godart vurscreven gegeven und uffgedragen, Greitgen, syner eliger huisfrauwe vurgenant, iren gartten in Somerhuissengassen, vur der Holtzportzen, tuschten Johan Girachs und Peter Roitgens garden gelegen, we Godart der van Frederich Kelterboym seligen vurscreven zuerstorven is, Greitgen den na

Bl. 106^r

syme doide na irem willen zu gebruichen, zu keran und wenden, in wes hant sy wilt und ir enenkompt.

Hant Godart und Greitgen, elude, vilgnanten sament gegeven und bescheiden in de Cluyße zu Siberg. Zu eyme erfflichen jaargetzyde gegeven soillon werden IIII Mark erfflicher renten, uis dem huiße gnant der Roide Haeße, neist dem huisse zu Wylre und des Hospitalshuissgen an der Colner Portzen gelegen.

Asdan vur vurscrevene Jonfferen in der Cluyßen und convent jarlichs uff sent Annendach jaargetzyt halden sollen und bestellen gehalden werde in vurscrevener Cluyßen, myt IIII myssen und geluchten, vur de elude vurscreven ire geslecht. Und darvur de des begerende synt, hant noch bescheiden und gegeven in dat Hospitaill vurscreven V Mark erffrenten, in gnantem huisse, den Roden Haeßen, jarlichs zu heven und de anstont an beide ende in de Cluyßen und in dat egenante Hospital, so balde de renthe vellich werden zu leveren, zu vurscrevenem dienst zu gebruichen.

A II/11 1525

Bl. 107^v

Gauwyn, schoultis, uff saterstach na Conceptio Marie, anno et cetera [15]XXV.

Dederich zom Hoen hait zu leisten gemant Herman an der Alderportzen, als eynen burgen vur XV Gulden uff rechenschafft, van wegen eyns van Ropichteroide ader by Wynterschit her.

Hait vur eynen wirt gekoren by Heyntzs Knutgen.
Kost VI Schilling.

Overmitzs denselvigen, uff vurscrevener zytt.
Dedrich zom Hoen hait zu leisten gemant Dreis van Huissen, vur eynen burgen van VIII malder weyß, van wegen des jongen Bitters in Walschit.
Hait vur eynen wirt gekoren, by Thewus Kreich. Hait van gerichtzs wegen VIII dage dach.
Kost VI Schilling.

Overmitzs mynen wirdigen Hern abt, Hern Conradus Kobbenroide, presensmeister, und Gauwyn vam Huyß, schoultis, uff vurscrevener zyt.
Tuschent dem Jongen Knutgen, Teill seligen son, und Coenen,
Bl. 107^r
des Jongen Peter Schithecken soens huisfraw, umb deselve Coene geclagt, we der Jonge Knuitgen sy drymaill als irst uis syme huisse und na II maill uff der straissen myt henden an ire backen geslagen solde haven, wilchs ir Knuitgen doch neit dan eynmaill, und dat maill sy ouch zuirst angehauen solde haven, uff der straissen geslagen have myt eyner hant, so hey heym gayn wolde et cetera.
Synt huide, datum, affgeverdigd, dat nemans an den anderen wort noch werck in geinen aegen legen soll. Dan hedde emans myt dem anderen zu doyn, mach myt recht sprechen. Und wilcher darweder dede, solde ervaluen syn myme wirdigen Hern myt XX Goltgulden und darzu vur de ungehoirsamheit, wes der scheffen erkennen werde, am lyve off am gude darumb zu straffen.

Overmitzs vurscrevene schoiltis, deselve zyt am lyve off am gude darumb zu straffen
Heyntzs zom Somberen hait zu leisten gemant, Dreis
Bl. 108^v
van Huissen, als eynen burgen vur eyne zomme van XIII Kolnische Gulden, III Albus und II vaß vur II Gulden, vur Meus van Eitdorff und syne huisfrauwe.
Hait vur eynen wirt gekoren.

Zwivell, uff donrestach na Nuwenjarsdage, anno et cetera [15]XXVI.
Johan Geislair hait zu leisten gemant Johan im Bruhove, vur eynen burgen, eyne zumme van X Gulden, III Schilling, van wegen Even Herman.
Hait vur eynen wirt gekoren, in Kannengeissers huiß. Hait VIII dage dach van gerichtzs wegen.
Kost VI Schilling.

A II/11 1526
Johannes Staill und Thonis zom Hirtzs, burgemeistern, uff satertach na Conversio Pauli, anno et cetera [15]XXVI.
Gehart Peltzer hait Johan Falckenbergh, burger zu Collen, overmitzs synen son, daromb hey dat gericht alhe vurgenomen hait, vur schoult und kostgelt, eme an Gehart gebrech, XIII Goltgulden, XXV Albus, vur eyne pant gegeven, X peltzs, syn son vurscreven angenomen hait.
Kost zu penden IIII Albus, uffzubeeden overmitzs Zwivell VII Schilling.
Und spricht der van Collen, me gebrech VI Overlensche Gulden, kostgelt V Mark, II Albus.
Synt de peltzs myt dem slaiffdoich geschat XXIII Mark, zu schetzen XI Albus, den dryen peltzeren VI Schilling zu verkundigen, die schetzonge VI Schilling, so gebricht eme noch VIII Marck, 1 Albus.
De peltzs hait Gehart geloist und na sich genomen, lude der hantschrift Johan Valckenberghs und des notarius bekentnys he by. Anno et cetera XXVI.

A II/11 1526
Bl. 108^r
Johan vam Zwivell und Wilhem Leye, uff donrestach na Eschedach, anno et cetera [15]XXVI.
Hynrich van Morsbach, segensnyder, und Styngen, syne elige huisfraw, hant verkeufft und uffgedrangen Johan Zymonis, Lodwichs son, und Styngen, eluiden, burgeren zu Sibergh, alle ire anersterffnys, gereide guider und ungereit, we in solchs van Greta Meuschs, irer swegeren und moenen, anerstorven und zugefallen ist, im burchbanne zu Sibergh gelegen, neit davan uißgescheiden.
Und geloifft werschafft zu doyn.

Zwivell und Leye, uff vurscrevener zyt.

Johan Zymonis hait zu leisten gemant Rurich am Dreischs vur eynen burgen eyne zumme van XI Goltgulden, van wegen Johan Swertzgens uffme Dreischs.
Hait VIII dage dach van gerichtzs wegen. Vur eynen wirt gekoren.

A II/11 1526

Bl. 109^v

Vur denselvigen, uff vurscrevener zyt.

Drude Beckers hait zu leisten gemant Rutger van Gleen, als eynen burgen, vur eyne zumme van XXXII Gulden, van wegen Peter uff der Trappen zu Herchen. Hait VIII dage dach van gerichtzs wegen.
Kost VI Schilling.

Vurscrevener zyt.

Jonge Johan zom Woilff hait zu leisten gemant Peter Strentzer, als eynen burgen van wegen eyner frauwen im Spyche, vur eyne zumme van XXI Albus. Hait VIII dage dach van gerichtzs wegen. Vur eynen wirt gekoren.

Kost VI Schilling.

Uff deselwe zyt.

Jonge Johan zom Wolff hait zu leisten gemant Rutger van Gleen vur eynen burgen eyne zumme van VII Gulden uff rechenschafft, van wegen Jacop van Menden. Hait van gerichtzs wegen VIII dage dach. Vur eynen wirt gekoren by Johan zom Wolffe.

Kost VI Schilling.

A II/11 1526

Bl. 109^r

Overmitzs Zwivell, uff vurscrevener zyt.

Johan Swertzgen hait hait zu leisten gemant Johan zom Isermart, als eynen burgen vur eyne zumme van XIII ½ Gulden, VIII Albus, van wegen Rodeman zu Berchem. Hait VIII dage dach van gerichtzs wegen. Vur eynen wirt gekoren.

Kost VI Schilling.

Overmitzs Zwivell, deselwe zyt.

Wilhem Vlach hait zu leisten gemant Herman an der Alderportzen, vur eynen burgen van wegen Johengens van Rocklyngen, vur eyne zumme van III malder korns, eder malder vur VI Mark. Des betzalt III Goldgulden. Hait acht dage dach van gerichtzs wegen.

Kost VI Schilling.

Deselwe zyt.

Wilhem vurscreven hait zu leisten gemant Herman vurscreven als eynen burgen vur korns, im selven kauff ouch vur eynen uiswendigen man.

Hait VIII dache dach van gerichtzs wegen.

Kost VI Schilling.

A II/11 1526

Bl. 110^v

Deselwe zyt, vur vurscrevene scheffen.

Wilhem Vlach hait zu leisten gemant Tilman zom Hirtzs, vur eynen burgen vur den Jonckeren van Eckelkoven, vur eyne zumme, nemlich 1 malder korns, vur VI Mark.

Hait van gerichtzs wegen VIII dage dach.

Kost VI Schilling.

Deselwe zyt.

Wilhem vurscreven hait zu leisten gemant Reynhart Loir, als eynen burgen vur V malder korns, eder VI Mark, van wegen de wirtfrauwe zur Warden.

Hait vur eynen wirt gekoren int huiß zom Woilff und van gerichtzs wegen VIII dage dach.

Deselwe zyt.

Wilhem hait noch zu leisten gemant den Smyt uff der Hollen, als eynen burgen vur Scheiffgen van Boistorff, vur 1 malder korns, des na der leistongen betzalt, XVII Albus.
Kost VI Schilling.

Bl. 110^r

Zwivell, uff vurscrevener zytt [1526].

Wilhem Vlach hait zu leisten gemant Hanecken Glaßmecher vur eynen burgen, van wegen des schoultissen van Soiffen, vur II malder korns, eder VI Mark. Hait van gerichtzs wegen VIII dage dach.
Kost VI Schilling.

Deselве zyt.

Wilhem hait noch zu leisten gemant Rutger van Gleen, vur eynen burgen, Elies son van Boistorff, vur 1 malder korns, vur VI Mark. Des betzalt 1 Goltgulden vur V Mark.

Hait VIII dage dach, van gerichtzs wegen.

Kost VI Schilling.

Vurscrevener zyt.

Wilhem Vlach hait zu leisten gemant Rutger van Gleen vur eynen burgen van Herman in der Flussen zu Mollendorff, vur 1 malder korns, dat malder VI Mark. Hait VIII dage dach.

Kost VI Schilling.

A II/11 1526

Bl. 111^v

Deselве zyt.

Wilhem hait noch zu leisten gemant denselven Rutger vur eynen burgen, van wegen Schringen van Mollendorff, vur 1 malder korns, kost VI Mark.

Hait VIII dage dach.

Kost VI Schilling.

Overmitzs denselvigen, uff vurscrevener zyt.

Wilhem Vlach hait noch zu leisten gemant Peter zom Wynter, als eynen burgen vur Kruyß Kirstgen van Geistongen, vur 1 malder korns, kost VI Mark.

Hait VIII dage dach.

Kost VI Schilling.

Deselве zyt, vur vurscrevene scheffen.

Item, Wilhem hait noch zu leisten gemant Peter zom Wynter, vur eynen burgen eyne zumme, nemlich 1 malder korns vur VI Mark, van wegen Heyn Schroder van Kepell.

Hait VIII dage dach.

Kost VI Schilling.

A II/11 1526

Bl. 111^r

Zwivell, uff vurscrevener zyt.

Wilhem Vlach hait zu leisten gemant Tilman van Gleen vur eynen burgen vur 1 malder korns, van wegen eyns uißwendigen mans. Hait van gerichtzs wegen VIII dage dach.

Kost VI Schilling.

Gauwyn, schoultis, Rompe, Kobbenroide, Roeß, Seichtem, Breidenbach und Wyß, uff mayndach, na dem sondage oculi, anno et cetera [15]XXVI.

Johan Nuyssgen hait hynder gericht gelacht XII Kolnische Gulden, als XX Albus vur ederen Gulden gerechent, vur de heufftzumme gotzhaller und wynkouff, als darvur jonge Johan Knutgen syn elderlich guit, nemlich den Rodenkop gnant, in der Uilgassen, beneven dem Jongen Heyntzs Knutgen gelegen, syme swager Kirstgen van Steildorff und dat noch ungedeilt sy, affgegulden have, der meynongan, als der neiste syn elderlich guit vur deselve zumme Knutgen uisgegeven have zu beschuden, der oirsachen, Knutgen solch gelt neit van eme have umfangen

Bl. 112^v

willen. Hait Nuyßgen myt gesacht, off Johan Knutgen eynche bekrononge in dem gelde hedde, eme das zu duyr gelacht ader sust eynich neit uffrechtich were, zu besseren ader zu weisselen.

[Nachschrift:]

Sulch gelt hayn ich weder entfanghen, Johan Nuyßgen. Urkunde myne hantschrifft, up godestach na Vyti, anno XXVI.

A II/11 1526

Overmitzs vurscrevene scheffen, deselve zyt.

Johan Nuyßgen vurscreven hait richtlich doyn verbieden Johan Knutgen vurscreven myt demselven vurgenanten guide neit zu schryne zu schriven, so solch syns vader und moder guist geweist und hey des naher dan eyn vrembder zu gelden vermeint zu syn.

Emmerich van Seichtem und Thomas Roeß, uff dynstach na oculi, anno et cetera [15]XXVI.

Peter Smyt van Bircke und Mettell, syne elige huisfrauwe, hant verkeufft und uffgedragen Otto Glasmecher und Berten, syner eliger huisfrauwe, solche gerechticheit und anersterffnys in van Heynen van Birlekoven und Neten, syner eliger huisfrauwe, irem swager, susteren und swegeren anerstorven und zugefallen ist, nemlich dat

Bl. 112^r

achteideill an dem Nuwenhuiß, gnant Boesseroide, in der Molengassen, tgen Volmar Beckers huisse over gelegen und darzu an dem alden gehuisse dat virdedeill, itzunt Otto vurscreven inwant, myt iren garden und zugehoren, myt iren in und uisgulden gelden, dat allynge erve, de zwey huisser, jarlich V Mark, dem pastoir zu Siborgh des 1 Mark und zu Pleis IIII Mark, ist noch ungedeilt.

Gelofft werschafft zu doyn.

Wilhem Staill und Johan Rompe, uff vurscrevener zyt.

Tuschent jongh Heyntzs Knutgen eyns und Kirschtgen van Zuyndorff, vaigt zu Mulheym, und Trynen, vaidtzs Kirschtgens swegerfrauwen anderdeils, als umb de gebrechen, herkomende Heyntzen vurscrevene huisfrauwe daselffs, zu Moilhem by Trynen alderen gedeyst und verdeyst have, dermaissen deselvige alhe myt kummerrecht beslaigen, och daromb geduyngt haven und vur gericht geweist synt, demna hude, datum, overmitzs vurscrevene

Bl. 113^v

scheffen den beide parthien ire sachen gentlichen gegeven und overgegeven haven, de dan eynen guitlichen uißspruch derhalver gedayn, och beide parthien we sy solchs geloifft, angenomen haven, nemlich also, dat zom irsten de beide parthien zusament den Herren als dat gericht afflegen sollen. Und der vaidt, mytsamt syner swegerfrauwen sollen Heyntzen vur solche syne zusprache und vorderunge, hey an sy richtlich gelangt hait, eyns geven nuyn Kolnische Gulden, als XX Albus vur ederen Gulden gerechent. Damyt sollen sy alle irer sachen zuvreden und gentlichen gescheiden syn und bliven. Wilcher van in beiden parthien dys verdrachs neit enheilde und darweder dede, solde myme wirdigen Hern und gnedigen Hern myt XX Gulden erfallen syn und den mechelens myt X Gulden. Nochtant solde dit verdrach crefftich syn und in macht gehalden werden. Ouch hait der vaidt und syne swegerfrauwe solchen IX Gulden vurscreven itzunt vur vurscrevene scheffen gelevert und betzalt, so dat Heyntzs sich des bedanckt, sy und ire burgen derhalver qwyt gescholden hait.

A II/11 1526

Bl. 113^r

Wilhem Leye und Breidenbach uff vurscrevener zyt.

Dreis van Lynnich, schroder, und Tryne van Hoynsbergh, syne elige huisfraw, hant gegeven und uffgedragen irer eynt dem anderen alle ir guist, gereit und ungereit, sy itzunt hant off hernamails an sich kriegen und werffen moigen, de leste levendige hant van in beiden, de zu keran und zu wenden, na alle irem gevallen, willen und enenkompt.

A II/11 1526

Zwivell und Rompe, deselve zyt.

Hynrich Zyberman zom Schopgen hait bekant, solchen kommer, hey vur eyme jair uff Joist Doichscherer van Attendorn, des doichs halver, hey eme alhe affhendich gemacht, gedayn hatte an Peter Strentzer, de vorderunge hey sich am Strentzer zu haven vermeint, dat Hynrich deselve syne sprache an Joisten hait verkeufft dem Strentzer vurscreven vur VIII Kolnische Gulden, und damyt uff den kummer und alle syne vorderunge vertziegen.

A II/11 1526

Bl. 114^v

Leye, Rompe, Loe und Breidenbach, uff vurscrevener zyt.
 Tuschen Thomas Peltzer und Gehart Peltzer des versprechens und schelwort, Gehart Thomas zugesprochen
 und angedayn hait, daromb Thomas Gehart an gericht gelangt synt guetlichen vertragen.
 Und Gehart hait gesacht, hey enwysse van Thomas neit, dan van eyme eirbaren fromen gesellen.

Loe und Seichtem, deselwe zyt.
 Wilhem Vlach hait zu leisten gemant Pilgrim Schoynmecher vur eynen burgen, van wegen Lomar Johans,
 eyne zumme van ...*[Leerstelle]*....
 Hait van gerichtzs wegen acht dage dach.
 Kost VI Schilling.

Vur denselvigen, deselwe zyt.
 Wilhem Vlach hait uffgeboiden solche pende, hey van dem Broicher, loir, hait.

A II/11 1526
 Bl. 114^r
 Seichtem, Roeß und Wyß, uff godenstach na oculi.
 Bruyn Meuschs hait verkeufft und upgedragen Schemell Johan, syme swaiger, solch syn kyntdeill, nemlich
 dat vunffte deill am huisse, gnant der Groisse Sterne, am Martte, beneven dem Cleynen Sternen und der
 Sackgassen gelegen, we eme solchs zuerstorven is.
 Gelden jairs unßerem wirdigen Hern abt 1 Denarius Andree.

We Thonis Worm und Johan Staill, burgemeisteren, solchen kouff und vertzich Bruyn vurscreven vur in
 gedayn, umb hey uißlendich reyzen moist, an vurscrevene scheffen bracht hant.
 Wannedizabunt.

Rompe und Loe, deselwe zyt.
 Peter Peler und Merge, syne elige huisfrauwe van Waldorp, hant gegeven und uffgedragen irer eynt dem
 anderen, alle ire guit, gereit und ungereit, we sy itzunt dat hant und vorder hernamails an sich wynnen und
 werffen moigen, neit darvan uisgescheiden, de leste levendige hant van in beiden solchs zu kerden und zu
 wenden, na alle irem gevallen und enenkomptzs.

A II/11 1526
 Bl. 115^v
 Kobbenroide und Leye, deselwe zyt.
 Rutger Artzs und Fygen, syne elige huisfrauwe, hant verkeufft und uffgedragen Johan Guilichs und Greten,
 eluiden, solche zwey deill, eme van Hern Syvart, pastoir, irem oemen und swaiger, und Elssgen Artzs des
 vurscrevenen Rutgers moder und Bestgen, syme steiffader hiebevoir gegeven und uffgedragen is, luide des
 gerichtzboich, sy hatten an der Alder Herberghen, buissen der Colner Portzen gelegen, we in solchs
 zuerstorven is, neit darvan uißgescheiden, beheltlich Rutger Hern Sivartzs andeill an deme nuwen huiß ist
 unverkeufft der bowe daran, aver, der gront ist myt verkeufft und vertzygen.
 Wanndizabunt.

Vur denselvigen, deselwe zyt.
 Schemell Johan als getreuehender seligen Metzen zom Oissen mytsamt meister Johan Schutzs van des
 Grevenbroich, syns mytgesellen, damyt sy samender hant, we recht is, ankommen synt, hant verkeufft und
 uffgedragen, Peter van Overpleis, loir uff dem Orde, und Elsgen, eluiden, solche huis uff dem Orde, dar sy
 itzunt inwanent, myt alle syme
[Fortsetzung auf Blatt 115^v]
[Nachtrag]
 Anno et cetera LX, am 1ten aprillis, haben Thill, Johann und Lambricht, Peters seligen soene, diesse rentte
 affgeloist. Und die kirchenmeister haben sich gueder bezallungen bedankt.

Bl. 115^r *[Fortsetzung von Blatt 115^v]*
 zubehoer vur der Molenportzen gelegen, beheltlich vurscrevener truwehenderen zu dryn myssen zu halden
 laissen. Itzunt Her Dedrich Meuschs heit jarlichs uis vurscrevenem huisse zu erffrenten zu geven VIII
 Overlensche Gulden, als XXIII Raderalbus vur ederen Gulden, zu betzalen, uff sondach letare vellich, doch

beheltnys vurscrevener eluden der affloesen myt II C Overlensche Gulden und erschenen termynen uis behalden uff vurscrevenem sondach letare.

Zwivell und Rompe, uff vurscrevener zyt.

Johan Swertzgen hait uffgeboden solche pende, eme van dem wirde zom Iserenmart gegeven ist.
Kost VI Schilling.

Kobbenroide und Loe, deselве zyt.

Peter zom Wynter hait zu leisten gemant Hynrich Smytzs vur XV Albus burgschafft, van wegen Dedrich Kremer van Ropichterode.

Hait VIII dage dach.

Kost VI Schilling.

Deselве zyt.

Peter zom Wynter hait zu leisten gemant Thonis zom Hirtzs und Peter zom Rodenhuis, as burgen vur Hancken Glaßmecher, vur IX Kolnische Gulden, vur eyne wirt zur Blomen.

Kost XI Schilling.

A II/11 1526

Bl. 116^v

Overmitzs schoultis und scheffen gemeynlichen, uff vurscrevener zyt.

Tuschent dem werdigen Hern prior des Cloisters zu Bodyngen eyns und Hynrich Woirm anderdeils, als umb 1 Gulden renthen, des vurscreven priors steiffader myt Hynrich egenant an gericht geweist und eyn heufftordell derhalver gegeven is, haldende, dat des priors steiffader den Gulden renthen zugewyst und Hynrich in kost[en] und schaden.

So dan Hynrich de verschrivonge, sprechende uff den Gulden renten, noch hynder sich hait, ist affgeverdigd, Hynrich deselvige tuschent Pinxten irstkompt hynder dat gericht zu bewair verschaffen soll. Und alsdan wilt der scheffen na dem heufftordell seyn bescheit davan geven, wer de billich haven solle, och eder sich darna have zu richten.

Gauwyn und Kobbenrode, uff vridach na oculi, anno et cetera [15]XXVI.

Johan Kanffenheuwer und Keitzell, syne elige huisfrauwe, hant verkeuft und uffgedragen Wilhem Verffer und Belen, eluiden, eynen Goultgulden off dat guit wert darvir

Bl. 116^r

und IIII Albus erfflicher jairlicher Gulde[n] und renthen zu betzalen, alle und icklichis jars uff dat hogezyt Cerstmyssen off bynnen den neisten XIIIII dagen darna volgen unbefangen, uis irem huisse und syme zubehore gnant zom Kelterboym, beneven Johan Blanckenberchs huisse und der ander sytten Lutzeroitzs huiß in der Houltzgassen gelegen, beheltlich vurscrevenem Johan und Keytzelen, eluiden off iren erven, solchs altzit uff vurscrevener zyt, myt XXIII Goltgulden und der erschenen termyne unbetzalt were, off dat guit wert darvir affzuloesen.

[Nachtrag]

Anno [15]LVI, am XXIIIten decembbris, ist diesse rentte affgelost und Johan Worm und sin kinder haben sich gueder bezallungen bedanckt, we sie suilchs an sich hiebevor gegolden.

A II/11 1526

Zwivell und Loe, deselве zyt.

Hynrich van Muych und Girde, syne elige huisfrauwe, hant verkoufft und uffgedragen Heyntzen zom Rosenboym und Guitgen, eluiden, II Kolnische Gulden erffrenten und jargulden, uff sondach Invocavit, ist nemlich der erste sondach in der Vasten, off bynnen den neisten XIIIII dagen irst darna volgen unbefangen, uis irem huisse und syme zubehoere, gnant Stailbergh, tuschent der vromysshern guide und dem huiß zur Lynden in der

Bl. 117^v

Houltzgassen gelegen, beheltlich vurscrevenem Hynrich und Girden, eluiden, der afflossen alle und icklichis jars uff sondach Invocavit myt XXX Kolnische Gulden vurscrevener montzen und werongan, we bynnen Collen wall genge und geve ist, und den erschenen unbetzalten termynen, lude breve und sigell darover gemacht synt.

Roeß und Seichtem, scheffen, Peter zom Rodenhuis und Wilhem Verver, kuyrmeister, Johan Aldenach und Peter zom Wynter, alle vam raide, uff vurscrevener zyt.

Clais Lymbergh hait gewyst und vurscrevene scheffen und vam raide besichtigen laissen, solchen alden bouwe und gehuiße, den Morenkop, beneven syme huisse den zu messen und zu beleiden, der meynongen, eynen nuwen bouwe darzu setzen, umb der neit widers dan der alte was, gemacht werde und nemans hernamails sagen moige, der nuwe bouwe anders were, ist eme also weder zu machen erloufft worden.

A II/11 1526

Bl. 117^r

Gauwyn, schoultis, und Johan vam Zwivell, uff vridach na letare, anno et cetera [15]XXVI.

Meister Pauwels van Zoynß, burger zu Bon, hait gegeven und uffgedragen Johan Nuysgen und Trynen, eluiden, solche gerechticheit und recht als dem gronthern hey hait und haven moicht an des obgenanten Nuysgens huisse, tuschent des jongen Heyntzen und Johan Zymons erffschafft gelegen, umb Nuysgens solchs kouffs als der jonge Johan Knutgen myt Kirstgen van Steildorff, syme swaiger, derselver erffschafft gedayn, naher zu syn, behetelich dem vurscrevenen Pauwels und den ernen irs jairlichen grontzins an vurscrevener erffschafft zu behalden.

Deselve zyt.

Uns schoultis hait vrede geboden Arnt Schoynmecher neit zu legen in eynchem argen, myt worden off myt wercken, an Otto Peltzer, und dat uff eyne pene van L Gulden, so sich dat bewislich erfonde.

A II/11 1526

Bl. 118^v

Zwivell, uff mayndach na Maria Anunciatio et cetera, XXVI.

Herman Swertgen hait zu leisten gemant Kirstgen zur Wynreven vur eynen burgen van wegen Clais, boide van Reide, eyne zumme van VIII Mark.

Hait VIII dage dach van gerichtzs wegen. Vur eynen wirt gekoren.

Kost VI Schilling.

Thonis zom Hirtzs und Johan Staill, burgemeister, uff dinstach na Maria d...., anno et cetera [15]XXVI.

Johan Doichscherer hait beleit myt Hynrich van Merem, Gehart Peltzers knecht, und Cristoffell van Romonde, Thomas Peltzers knecht, de gesacht haven, we Johan vurscreven und Ailff Becker en sondach vergangen vur Teill Verffers huisse eyns kalffs halver zu zwyst komen synt. Haven sy do geseyn, dat Tilgen Becker Johan vurscreven myt eyme steyne in eyne sytte geworffen hait. Und Ailff have ouch na eme geworffen zweymaill und Johan weder na Ailff, aver irer geyner troffen have.

Godart Isermartzs son spricht, we hey geseyn have, so Johan

Bl. 118^r

und Ailff also in zwyst geweist, dat Ailff eynen steyn in der hant gehat have, Johan damyt willen werffen, wilchen steyn Tilgen, syn broder, eme uis der hant genomen und hey Johan damyt geworffen have. Und do have Ailff na mehe steynen geseyn, ouch kriegen, und zu Johan geworffen und Johan derglichen zu in wederomb, de doch neit troffen et cetera.

Hait derselbe noch beleit myt Johan zom Haesen. Der spricht, we hey myt Ailff und Hilgen vur Geislairs huisse uff eyme vaß gelegen have. Do sy Johan Doichscherer daher uffkommen gayn. Have Ailff do zu dem gesprochen, woultu ouch noch eyn kalff gelden. Und derhalver synt de also zu worde kommen, eyn den anderen have heischen legen, so dat Ailff eynen steyn genomen und Johan hait willen werffen, den worff hey verhyndert und vaneynander bracht have.

A II/11 1526

Peter zom Rodenhuiß und Peter zom Wynter, kuyrmeisteren, uff dynstach na vocem, anno et cetera [15]XXVI.

Johan Knutgen der alte hait beleit und besichtigen laissen

Bl. 119^v

de bytze, hey unßerm wirdigen Hern abt vort prior und convent affgewonnen, luide breve und sigell, hey davan untfangen. Vermeldende eyn proist zor Cruicht, altzt wanne des van noiden were, den zuyn eynsdeils machen solle laissen et cetera. Wilcher zuyn sich itzunt befonden, der zubrochen ist. Derhalver eme van des proist koen in derselver bytzen, an syner sait, schade geschiet.

Den schaden vurscrevene kuyrmeister itzunt besichticht und geacht haven. Der proist eme darvur geven soll 1 malder roebsait.

Johan vam Zwivell, scheffe, Thonis zom Hirtzs und Johan Staill, burgemeister, und Johan Roide, rentmeister, uff sondach exaudi, anno et cetera [15]XXVI.

Dese vurscrevene, myt sampt der hernknecht und statboiden, hant besichticht, den doiden licham Pauwels van Wielputzs, des halffen zom Schopgens broder, wilcher Pauwels en neisten vridach vergangen myt synem nabern van Lomar, als eyn kirspelsman daselffs, zu Bon myt den Hilgen, na alder ge-
Bl. 119^r

woinden, gegangen und uff der wederkomptzs myt etlichen van Buwell, de he myt iren Hilgen geweist waren, in der Heiden, uff deser siten Hangelair, zu getzenck kommen als man he sachte.

Ist Pauwels da gewont worden und her by den artzeder worden bracht, doch den anderen dach gestorven.

Hait man den licham beseyn, we vurscreven daran befonden, zwae wonderen, eyne uffme houffde, am lyncken ende und eyne, de ander wonde, an der lyncker syden eyn cleyn loch. Dat Pauwels gesacht, eme myt eyme spitzen langen wielschen spieß gestechen were.

Hait man erloufft, van wegen uns wirdigen Hern abtzs, den licham zu der erden zu bestaden.

Overmitzs Zwivell, deselве zyt.

Johan Symonis der jonge hait uffgeboden solche gereide pende, eme van Peter Strentzer gegeven synt.
Kost VI Schilling.

A II/11 1526

Bl. 120^v

Zwivell, deselве zyt.

Johan Roide hait uffgeboden eyn gurdelen, zugehoirich ...[Leerstelle]... vur ...[Leerstelle]... Mark.
Kost VI Schilling.

Gauwyn vam Huyß und Johan vam Zwivell, uff godenstach na exaudi, anno et cetera [15]XXVI.

Peter zom Wyntter und Leyngen, syne elige huisfrauwe, hant gegeven und uffgedragen irer eynt dem anderen alle ire guider, gereit und ungereit, de sy itzunt haven off vorder hernamails an sich wynnen und werffen moigen, neit darvan uisgescheiden, de leste levendige hant van in beiden de zu keren und zu wenden, na alle syme walgevallen und enenkomptzs, sonder eynche insagen off wederhyndernys des irsten afflivigen neisten erven.

Vur vurscrevene scheffen, deselве zyt.

Clais Lymberch van Roebrait und Greta, syne elige huisfraw

Bl. 120^r

hant verkeufft und uffgedragen Kirstgen Loir gnant Schoultis und Girden, syner eliger huisfrauwen, ir huiß, stallonge, myt dem allynge gebuwes und garden, myt alle syme zubehore, gnant de Alde Arcke, vur der Molenportzen, tuschent Reynhart Loir und dem alden Verffhuisse gelegen, darzu eynen garden, scheissende an Dederich Loirs hoff und uff den Molengraven.

Gelden jars XVIII Denares.

Geloift werschafft zu doyn.

A II/11 1526

Gauwyn und Zwivell, deselве zyt.

Grietgen zur Ecken hait in der zyt, sy das wall mogich und mechlich was, gegeven und uffgedragen Thonis zom Hirtzs und Johannes Staill, kirchmeisteren der Kirspelskirchen zu Sibergh, in nutzs und zu behoiff derselver Kirchen, iren garden uff dem Orde, an dem Cruitzs, dar Johan Symonis over, zu allen syden weder de erffschafft Thonis zom Rosenboym gelegen, tuschent synen steynen.

Bl. 121^v

Gelden jars derselve garde in de vromyssen VIII Albus, in de Kirspelskirche ½ pont waß und uff den Berch unßerm wirdigen Hern abt 1 hoyn und X Thaler.

Geloift werschafft zu doyn.

Peter Johan Girachs und Johan Henselen, kurmeister, uff sondach exaudi, anno et cetera [15]XXVI.

Johan Knutgen der jonge hait beleit und besichtigen laissen synen wasserganck, van syme putze uff de straisse gaynde und sich daby beklagt, we eme solche vloss durch den jongen Heyntzs Knutgen und syn gesynde zugeworffen werde, umb dat vloß neit synen ganck haven moige. Hait Johan noch gewyst, eyne want an irem hoeve tuschent in beiden, we Heyntzs de in syme hoeve in des anderen hoeve gedreven have et cetera, wilcht de beide vurrscrevene kuyrmeister Heyntzen gesacht affzustellen.

A II/11 1526

Bl. 121^r

Johan vam Zwivell, scheffen, Thonis zom Hirtzs und Johan Staill, burgemeistere, uff dynstach na trinitaten, anno et cetera [15]XXVI.

Theill Verffer hait volmechtich momper gemacht und gemonpert, we recht is, Heyntzs van den Bucken, der sachen Thyßgen Molenkoven nafolger zu eme zu doyn haven vermeye. Daromb de beide he an gericht staynt. Und so Teill itzunt na Antrept zeyn moiß, so hey dan den dyncklichen dach neit he geseyn konde, Heyntzs alsdan syn recht und unrecht zu verdedyngen, der sachen zu gewynnen und zu verlesen.

Vur vurscrevene scheffen, deselve zyt.

Wilhem Verffer hait uffgeboden solchen garden, eme van Johan Blanckenbergh zu pande gegeven is.
Kost VI Schilling.

A II/11 1526

Bl. 122a [eingeklebter Zettel mit sechs Zeilen, von Johan Valckenberch. Nachträglich mit 122a beschriftet. Schrift ist von mir nicht zu übertragen]

A II/11 1526

Bl. 122^v

Vur denselvigen, uff gnante zyt.

Vais huisfrauwe zur Blomen hait zu leisten gemant Dreis van Huissen, vur eynen burgen, vur II malder korns, 1 sumber, 1 fass] vyschen van wegen jong Bitter.

Hait vur eynen wirt gekoren.

Hait VIII dage dach van gerichtzs wegen.

Kost VI Schilling.

Deselvige zyt.

Heyntz zom Somberen hait zu leisten gemant Koyntzs Wymar, van wegen Lodwichs zu Hoymbergh, eyne zumme van V Goltgulden, VII Albus. Hait VIII dage dach. Vur eynen wirt gekoren.

Kost VI Schilling.

Thonis zom Hirtzs und Johan Staill, burgemeister, uff uns Hern Lichamsavent, anno et cetera [15]XXVI.

Johan Roide hait willen beleiden myt Kirstgen Clapperbach und Volmar Loir, des getzenckzs halver, Johan Roide und der

Bl. 122^r

Brocher en donrestach vur der Molenportzen sament gehat, we dat ankommen syn solde.

Hant de zweyn, als Kirstgen und Volmar vurscreven, van der sachen neit willen sagen, dan gesprochen, so er noch me darby geweist, so solchs geseyn und gehort haven, wanne de myt darby komen, willent sy sprechen in kundich und wißlich ist.

Hait Johan Roide vorder gesprochen, hey have des beleitzs den irsten dach an Thonis, burgemeister, gesont zu doyn, wilcher sich des neit, so der ander burgemeister, syn mytgesell, und der schriver uißblendich zu Nuyß van der stat wegen zu dage waren, neit annemen wolde, eme doch solchs an symre rechten unhynderlich zu syn.

zukomen.

A II/11 1526

Thonis zom Hirtzs und Johan Staill, burgemeisteren, Johan Roide, rentmeister, uff fridach na octava Sacramenti, anno et cetera [15]XXVI.

Johan Schomecher van Lomar, Godart und Thonis, syne broder,

Bl. 123^v

hant beleidt myt Dreis van Huissen, Johan Kesselsleger und Jacop van Wielputzs, die gesacht haven, we gesteren, donrestach, den avent, Engelbricht Hilleshem[?], van Markelsbach und Gehart van Kaldenbach vur Dreis huisse vurscreven wyn gedroncken und da gehalden haven. Sy Engelbricht vurscreven in Dreis huis gereden. Da Godart van Lomar vur irst den spies geboden, aver in neit troffen. Und na myt Johan Schoman, des broder sicks gewerdt, sy do uis dem huisse vur de duyr gereden und zur vinsteren in myt dem spies den Schoman uff eynen arm gestoissen. Do weren de gebroder heruis komen, und also were dat getzenck

Vur vurscrevene burgemeisteren, deselvige zyt.

Engelbricht und Gehart van Kaldenbach hant willen beleiden myt Clais van Benroide und Sleumar van Lomar, och deselven getzencks halver, we dat ankommen syn solle.

[*Bennrath, Kirchspiel Much? Benroth, Kirchspiel Nümbrecht?*]

A II/11 1526

Bl. 123^r

Hant deselven zweyn gesacht, we sy itzunt van der sachen neit sprechen willen, sy en werden myt recht darzu gedrongen et cetera. Hant de zweyn Joncheren sich getzoigen uff Kirstgen Somerhuiß, dem solchs ouch bewust syn solle. So der dan itzunt neit in der stat ist, verhoffen daromb, so sy deselven hernamails by de hant brengen werden, in solchs an irem rechten unhynderlich zu syn, dan damyt zu vollenstayn vermeynnent und weder irer konden sy haven moichten und denende were unverswegen.

[*von der Hand des Kirchenmeisters Thonis Worm*]

Item, anno XXVI jayr, bekenen ich, Thonyß Worm und Johan Stayll, kyrchenmeyster zor tzyt zo Sygbergh, dat wyr inphangen haffen van Heyntzen zom Summeren sulche fun[f]tzich Kolnische Gulden, wyr hynder in gelacht hatten, wilch L Kolnische Gulden wyr van dem jungen Heyntzen Knuytgen inphangen hatten, datselff gelt get wyr an Jengyn in den Wenden, weder belacht haffen, nae luyde breyff und segell, urkuyntz myn, Thonis vurscreven, eygen hantschryfft.

A II/11 1501?

Bl. 123a [zehnzeiliger Zettel aus dem Jahre 1501[!?]. Nachträglich mit 123a beschriftet].

Item, Bruyn Schomecher hait Theisgyn van den gekuymert, dat hie sull gesacht haven, hie have gesessen zo Sigbergh in deme Thorne. Und doe hie da uiss sulde komen, do moiste hie eynen eidt deme schultissen doyn, dat hie des neit wrechen wouerde an werecklichen noch an geistlichen noch keiserlichem rechte. So hait hie gesacht, der officiaell van Collen have in absolveirt van dem eide, und wanne wouerde, so moichte hie den eidt wall brechen. Und dat ist gescheit in Johans huise zom Kranen und bywesen des wyrtz Walramen in der Houltzgassen und me anderen et cetera. Und ist dyt gescheit, des satersdages na sent Agnetendach. Und Bruyn vurscreven hait dyt beleit uff sent Pauwelsdach Conversion, in deme huise zo Starckenbergh. Anno XVC und eyn.

A II/11 1526

Bl. 124^v

Zwivell, uff sondach nach Bonefacius, anno et cetera [15]XXVI.

Jonghe Johan zom Wolffe hat zu leisten gemant, Gotschalck Smyt vur eynen burgen eyn zumme van IIII Mark, van wegen Lodwich im Jonckersbroich. Hait VIII dage dach van gerichts wegen, vur eynen wirt zom Leopart.

Kost VI Schilling.

Peter zom Rodenhuis und Johan Henselen, kuirmester, uff mayndach na sent Vitzsdage, anno et cetera [15]XXVI.

Johan Dom, doichscherer, hait gewyst und besichtigen lassen in syme garden, solchen schaden, als Johan Bulartzs am Dreischs swyn eme an synen tuyren und anders gedayn. Wilchen schaden vurscrevene kuirmester geport und geacht haven uff X Albus.

Kost. V Schilling.

Van gerichts wegen, alhe zu Sibergh, ist Johan, hantteschenmecher van Collen, zu pande gegeven und hey dat gericht alhe myt geistlichen rechten geladen, van wegen Joist Pelers, deselven huis vur der Holtzportzen.

A II/11 1526

Bl. 124^r

Gauwyn, schoultis, Wilhem Staill, Zwivell und Breidenbach, uff godenstach na Viti [*Viti = 15. Juni*], anno et cetera [15]XXVI.

Tuschent dem jongen Johan Knutgen und dem jongen Heyntzs Knutgen, als umb de beleit vurscrevene parthien myt den scheffen huide, dato, gedayn haven, we herna voulgt.

Zom irsten hat der scheffen bescheiden, als umb de alte want, vur an der portzen, den ganck vam putz betreffen. Also soll Heyntzs Knutgen eyne nuwe swelle unden an de want lassen machen, aider de alte richten, myt dem wynckelhaich und in dat loit, glich we de gestanden hait, daromb, dat der ganck neit widers geenget werde, dan blive, we solchs geweist is. Zom anderen, myt dem eschboym, den soll Heyntzs Knutgen affhauwen, an swelgen und ryßern glich stuven, glichs syner erffschafft, umb dat de druppen davan, noch eynich fuylnis derhalver, uff Johans erffschafft ader uff syn werck envalle.

Bl. 125^v

Und myt der dachdruppen hynden am garden soll Heyntzs dat dach so kurtten und machen, dat de dachdruppe davan uff Johans erve niet en valle, dan uff dem syme blive.

Als myt dem houltzs, Johan dem anderen zu na gelacht hait, sall Johan solch houltzs also uff syn erve legen und da bynnen behalden, so dat Heyntzen solchs neit zu na en lighe. Sust myt dem pyss overgeissen, we sich Heintzs des beclagt, so dan der scheffen solchs neit geseyn en hait, noch itzunt neit geseyn en kan, noch en weyß, sall daromb Heyntzs Johan myt recht vurnemen zu kennen off leunen.

Overmitzs vurscrevene scheffen, deselве zyt.

Tuschent den truwhenderen und testamentuier eyns und den ernen Elß Beckers, allet betreffen allerdeils, als umb de III Gulden renthen Alff Walraiff, becker, und Beilgen, eluden, uff dat huis zur Ecken myt syme zubehore, myt wyst Elssen vurscreven verschreven hatten, lude breve und sigell, wilche breve und sigell ouch dat

Bl. 125^r

testament Elssen vurscreven scheffen itzunt genoichsam verhort und geport haven. Hant daromb vur eyne underichtong, dem rechten gemeissich, gesprochen, also, dat truwhender und ernen vurscreven de LX Gulden heufftgeltzs myt den versessen unbetzalten termynen myt anderer kentlicher schoult vurirst uis und van den alyngen nagelaissen guideren Elssen vurscreven termynen und betzalen sollen. Wanne dat allet geschiet und ire beste wille verricht ist, wat dan overde, sollen sy sich halden und dat glich deillen, lude des testamentzs.

A II/11 1526

Overmitzs vurscrevene scheffen, deselве zyt.

Tuschent dem jongen Johan Knutgen und Johan Nuysgen umb ire zusamende erffschafft, den Rodenkop, in der Uilgassen gelegen, irer deillongen halver, hait der scheffen bescheiden, so balde als korn und ertzen vam lande ist, sollen de beide parthien off irer eyn besonder zweyn scheffen herbescheiden overmitzs de de lyne zeyn laissen,

Bl. 126^v

mytzs durcheinander, solchs glich deillen und dat loß daromb nemen. Und myt dem huisse sollent sy zusamten uisverlenen und eynen pacht den glich deillen ader irer eyner solchs selffs behalden in dem hey deit, dat eyn frembder deit, und den noitbouwe ouch sament liden und versorgen.

A II/11 1526

Gauwyn, schoultis, Wilhem Staill und Johan vam Zwivell, uff godenstach na Viti [*Viti = 15. Juni*], Anno et cetera XXVI.

Her Jaspar Pistoris zu Vilcke, regenter der Kirspelskirchen zu Sibergh, Herman van Ronghen, pistor zu sent Apostelen bynnen Colne, truwhendere Elß Beckers seligen volmechtich, vort Alff Walraiffs und Lyßgen, syne elige huisfraw, Tilgen Walraiffs und Gutta, syne elige huisfraw, Johan van der Lynden zom Haeßen und Styngen, syne elige huisfraw, und Alcke, Ailffgen Beckers selige huisfraw, der obgenanten Styngen moder, als van wegen Hynrich, irs sons, hant alsament verkeufft und uffgedragen Johan Knutgen dem Jongen und Styngen, eluden,

Bl. 126^r

dat huis zur Ecken myt bruwehuis, backhuis, stallongen und alle syme zu und ingehore, neit darvan uisgescheiden, als we den truwhenderen vurscreven solchs overgegeben und volmechtich gemacht synt, lude der uffdacht und des testamentzs und den ernen vurscreven solchs daher anerstorven und zugefallen is. Gelden jars, sent Benignus, II Mark, III Schilling, IIII Denares, unsren Hern abt III Denares und in de Cluse XIIII Albus.

[*Nachtrag*]

Ist overmitzs Rompe und Leye affgeloist, uff godenstach na reminiscere, anno et cetera [15]XXVI. Matersche undurot daruff vertziegen. Gelofft werschafft zu doyn.

[*Nachtrag auf eingeklebtem 10zeiligen Zettel ohne Nummerierung*]

Nota Zedell.

Und off Hynrich vurscreven weder zu lande kommen worde und darweder syn wolde, ist burge Johan van der Lynden zom Haesen und Styngen, vurscrevene erffschafft und werschafft zu doyn und Johan Knutgen und Styngen, elude, darvan schadelos halden, so verne als Hyntzs vurscrevene andeill dragende weren.

A II/11 1526

Overmitzs vurscrevene gemeynlich, deselве zyt.

Tuschent dem Jongen Heyntz Knutgen und dem Jongen Johan Knutgen, als umb de vinsteren an Johans huisse oven over Heyntzen want hangen solden et cetera.

Hait der scheffen bescheiden, Heyntzs solle de want zuirst richten int loit, we der scheffen, we vurscreven, bescheiden hait. Wanne dat also gemacht ist, wilt der scheffen darby kommen. Befyndt sich dan, de vynsteren Bl. 127^v

over Heyntzen hangen, sall Johan mynneren und kurzen. Befyndt sich aver, dat des neit en ist, sollent sy och also bliven.

A II/11 1528

Overmitzs vurscrevene scheffen, deselve zyt.

Tuschent meister Pauwels, zolschriver zu Bonne, und Hynrich Overstoltzs, der pendong und schetzong halver, meister Pauwels, we recht, gedayn und zugelaissen ist, umb de itzunt begert zu schetzen, we vurmails me geschiet.

Hait der scheffen itzunt wederomb begert an meister Pauwels, de schetzong nach eynen mayndt, na desem dage, stayn wille lassen. So de gebroder Hynrich und Otto he entschent irer sachen zuvreden werden solden, alsdan solde meister Pauwels sonder vertzoch betzalt werden. Geschege des alsdan neit, solden Hynrich und Otto, gebroder, allen schaden meister Pauwels selffs geleden, myt betzalen und de schetzonge, sonder vorder vertzoch gescheyn, vacat overmitzs Gauwyn vam Huyß, Staill, Kobbenroide, Zwivell und Leye, uff godenstach na oculi, anno et cetera [15]XXVIII.

Bl. 127^r

Gauwyn, schoultis, Staill, Zwivell, Rompe, Roeß und Breidenbach, deselve zyt.

Wilhem Verffer hait lassen schetzen den garden van Johan Blanckenbergh und Bertrams Oems Johans, Johan vurscreven zugehorich und inhendich hait, van der schoult und gewisdomp der scheffen. Ist geschatzs vur LV Kolnische Gulden. Gilt jars der jarde IX Albus, so de affgerechent werden van edem Gulden 1 Albus. So blifft noch der garde darvir, de geschatzs ist, XLVI Kolnische Gulden.

Deit dat schetzen van eder Mark 1 Schilling, macht XI Mark, IIII Schilling.

1527

Johan Blanckenbergh, Hynrich, syn son, und Bertram Oem Johans und Styne, syne elige huisraw, des vurscrevenen Blanckenberghs eidomp und kynder, hant vur vurscrevene scheffen desen selven dach Wilhem Verffer vurscreven den garden vurgenant als vur de XLVI Kolnische Gulden erfflich verkeufft und uffgedragen und gentzlich daruff vertzygen.

Greitgen, Johan Blanckenberchs dochter, hait solchen vurscrevenen kouff und updracht beliefft und gewilliget, glichs ir vader, broder, suster und swaiger, we boven geschreven, gedayn haven, overmitz Peter vom Rodenhuis, burgemeister, Johan Roide, rentmeister, uff dynstach na Margarethe, anno et cetera [15]XXVII [Margaretha = 13. Juli].

A II/11 1527

Bl. 128^v

Wilhem Staill und Breidenbach, deselve zyt.

Kirstgen Schoultis, loir, und Girde, syne elige huisraw, hant verkeufft und uffgedragen Heyntzs Knutgen dem alden und Elsgen, syner eliger huisfrauwe, irem swager, broder und swegerin, ir deill des huiß und hoeffs, nemlich de helffschit daran, in der Uilgassen, an der Eich, we solchs in zuyne und steynen gelegen is, in van Teill Knutgen und eluden, irem swegerhern und swegerfrauwen anerstorven und zugefallen ist und sy vortan sich gegulden und geworffen hatten, myt alle syme zu und ingehore, tuschent dem Zygenhove und Bernt Roden erffschafft, davan neit uißgescheiden. Gelden jars dat alinge erve.

Rompe und Roeß, deselve zyt.

Wilhem Vlach hait uffgeboden eynen kessell, zugehorich Johan Brocher, vur verdroncken gelt.

A II/11 1527

Bl. 128^r

Gauwyn, schoultis, und Staill, vurscrevene zyt.

Lodwich, Johan Roloffs son, hait gegeven und uffgedragen Bertram Oem Johans und Stynen, eluiden, solchen halven uiloiffen und syne gerechticheit, hey an dem oiffen hatte, Bertram vurscreven und Johan Roloff, syn vader, sament gebrucht haven, och de infart tuschent in beiden, we sy solchs sament under sich gehat haven. Und hait gentzlichen vur sich und syne erven daruff vertziegen.

Hait Lodwich verkeufft und uffgedragen Bertram Oem Johans und Stynen, eluiden, syn huyß und hoff in der Uilgassen, by der Clitzenportzs und beneven Bertram vurscreven, we syn vader und moder solchs besessen und gebrucht haven, eme davan zuerstorven und angefallen is, und eynen garden Roloffs Johan vurscreven vur eynen erfflichen pacht van der susteren gewonnen, beheltenys dem Gotzhuiße irs jarlichen pachtzs gelden.

A II/11 1527

Bl. 129^v

Vur den scheffen gemeynlichen, vurscrevene zyt.

Elssgen, Johan Roloffs seligen huisfraw, hait van wegen irer unmondigen kynder, van Johan geschaffen, vurscrevene hynder gericht gelacht, gotzhaller, wynkouff und zallpennynck, Bertram Oem Johans irem steiffson Lodwich uff erve gegeven und uißgegeven hait, nemlich X Mark.

Dwile Bertram des neit van ir untfangen hait willen, der verhoffnong, sy van irer kynder wegen als der neiste in dat verdrach und kouff zu stayn. Und hait och laessen verbieden Bertram myt solchem guide neit zu beschriuen noch zu versichern, der meynong, iren kynderen solchs vur dat gelt gescheyn solle.

Lodwich Roloffs vurscreven hait syne hantschrift vur gericht geschickt, haldende we eme Bertram umb solch syne erffschafft nagegangen. have und des gheven hey eme geloiff have, hey eme neit gehalden, wille daromb

Bl. 129^r

eme och neit halden und vermeint, hey eme och neit schuldich zu halden.

Ist Lodwich selffs komen vur de scheffen. In och datselvige montlich gesacht, intgainwordicheit syner steiffmoder. Hofft de frauwe solchs we recht stercken[?] solle.

[Nachschrift]

Uff der Kynderdach, anno XXVII ist solche gelt oververmitz Wilm Rosedell untfangen, lude der hantschrift heby stigt.

A II/11 1526

Zwivell und Breidenbach, deselве zyt.

Tilman Heß van Rodendorff und Tryne, syn elige huisfraw, hant verkeufft und uffgedragen Kirstgen van Reide zur Wynreven und Nesen, eluiden, ire gerechticheit und anersterffenys sy hatten und haven moichten an dem huße zur Wynreven in der Molengassen, beneven dem huis myt syme zubehoer gelegen. Gelooft werschafft zu doyn.

Zwivell und Roß, deselве zyt.

Her Jaspar, zur tzit regenter der Kirspelskirchen zu Siberg,

Bl. 130^v

und Herman van Ronghen, pistoris zu sent Apostelen bynnen Colne, treuwehenderen Elsse Beckers zur Ecken seligen, hant uis macht Elssen vurscreven testament gegeven und uffgedragen Ailken, Aleffgen Beckers seligen huisfraw, solchen garden, Elssen zugehorich was, vur der Houltzportzen beneven Coynsgen van Huissen und Overstoutzts gelegen, myt syme zubehoer, vur verdeynt loyn, Ailcke by ir verdeynt und schuldich bleven was, lude irs testamentzs und irs lesten willen.

Gelden jars dem pastoir 1 Mark.

Vur denselvigen, deselве zyt.

Severyn Kremer und Irmgen, syne elige huisfraw, hant verkeufft und uffgedragen Hern Tilman zom Schaiffstall erflicher jairrenthen XIII Albus, ire zor tzty bynnen Colne woll genge und geve synt, uff sent Johansdach zu Mytzsomer vellich, off bynnen den neisten XIII dagen, uis irem huisse, hoeve und garden zom

Bl. 130^r

Roiden Lewen an der Gromelpotzen gelegen, neit darvan uisgescheiden. Gelden jars datselfe erve vurscreven Hern Tilman XVI Raderalbus erffrenten, doch dese vurscrevene XIII Albus jars altzitt in den Cleynen Schaiffstall denen und gehoren sollen, beheltenys den eluden davan der XIII Albus renthen jarlich uff sent Johanisdach off bynnen den neisten XIII dagen vurscreven myt XI Goltgulden und erschenen termynen affzuloesen.

A II/11 1526

Zwivell, deselве zitt.

Hynrich zom Leopart hait uffgeboden eynen pantzer, zugehorich Palant, des wirtzs zur Warden, vur XIII Mark, II Albus vertzertzs geltzs.

A II/11 1526

Bl. 131^v

Johan Staill, burgemeister und Peter zom Rodenhuis, rentmeister, uff mayndach na sent Margaretendach anno et cetera [15]XXVI [Margaretha = 13. Julij].

Hynrich zom Leopart hait beleit myt Wynat Schreigen van Molendorff und Dedrich van Eitdorff, de gesacht haven, we sy geste[r]n, sondach, zom Leopart in Hynrichs huisse zu wyne gesessen haven, haven sy gehoirt

eyn geruicht van wyveren uff der straissen, und dat Johan Worm vur Hynrichs duyren eynen deghen ussgeruckt uißgetzogen gehat have. Do Hynrich uff sime gader have gelegen. Do haven sy de duyr zugeslaigen, we vurscrevene burgermeister und rentmeister myr solchs anbracht haven.

Thonis zom Hirtzs und Johan Staill, burgemeister, uff dynstach na sent Matheusdage, anno et cetera XXVI.
Hynrich van Walproill hait beleit myt Thonis Muyre und Wilhem Smyt, de gesacht haven, we sy en neist sondach vergangen, im nuwen

A II/11 1526

Bl. 131^r

Bruhaus zu wyne gesessen haven. Im gelage sy Hynrich vurscreven und Lair Johan zu worde kommen, so dat Lair Johan Hynrich eynen deiff gescholden have. Do have Hynrich gesprochen zu eme, wat hain ich gestoillen. Have Lair Johan do geantwort, myne eichelen zu Wolstorff, wilcht Hynrich ouch myt in verorkunt hait.

Thonis zom Hirtzs und Johan Staill, burgemeister, uff vurscrevene zyt.

Her Johan zom Wynter hait geboden und dargelacht IIC Kolnische Gulden an golt und silverengelde, darzu gotzhaller und wynkouff, Peter zom Rodenhuis, als hey syme vader und Wilhem Verffer gedayn hait uff den kouff des huis zom Wynter, hey myt syme vader gehat hait, dwile hey uißlendich geweist is. Und vermeint daromb, hey als der neiste so solch kouff in eyme mayndach ungeverlich geschiet, dwile hey uißlendich was, und sonderlichen so geyne erffsachafft noch uffdacht darover geschiet is, dat verdrach van neten und hey der neiste des kouffs und verdrachs, in nutzs syner unmondiger kynder

Bl. 132^v

zu syn, wilche IIC Kolnische Gulden vur vurscrevene burgemeister vur Heyntzs Knutgen, Wilhem Verffer und me anderen getzalt synt, so Peter Roithuis solchs zu zellen noch zu untfangen neit gemeynt was, und hait daromb Her Johan den wynkouff, nemlich VII Mark und 1 Raderalbus zom gotzhaller, hynder gericht gelacht, darzu 1 Goltgulden und 1 Phns schilt, eyn Colsche Stoisser und 1 Thornis, als vur golt und silver, van wegen der IIC Gulden, so de hynder Heyntzs Knutgen in gewerde hant ligen. Selbich vurscreven gelt hayt Peter zor Gronecken weder inphangen up sent Matheydach anno et cetera 1. juny XXVII.

Johan vam Zwivell, uff vridach na Huperti, anno et cetera [15]XXVI.

Johan Roide hait zu leisten gemant Peter Peltzer vur eynen burgen eyne zomme van.../*Lücke*... wegen Rutzgen van Droistorff.

Hait VIII dage dach van gerichtzs wegen. Vur eynen wirt gekoren.

Kost VI Schilling.

Vur demselvigen, deselve zyt.

Dederich, loir und brodermeister der loerbroscherschafft, hant uffgeboden solche pende in van Johan Neußgen gegeven is.

A II/11 1526

Bl. 132^r

Thonis zom Hirtzs und Johan Staill, burgemeister, uff vridach na Martini, anno et cetera [15]XXVI.
Meus Peltzer hait laissen updyn und besichtongen syn huißgen vur der Colner Portzen, Ricken Johan ingewoint hait. So der stillswegens daruis getzoigen, hait man im huißgen befonden, we clair herna voulgt.
Item, eyn cleyn roister,
item, eyn dischen,
item, eyn moißbret,
eyn moißmetzs,
eyn alt schuttelkorff,
eyn holtzen luchter,
eynen haspell,
eyn alte heippe,
dry alder stoilger,
eyn schemmerßveßgen,
eyn stuck bedtstat,
eyn cleyn martkorffgen,
eyn stroesessel.

An holtzs und rysseren, geacht vur 1 Albus.

Ist noch da befonden eyn alt schaff und eyn heuwegen, das Jaspars was und hey sich angetzogen desselben und eyne kyntzsweege, sprach Meus, hey eme geleynt hette.

A II/11 1526

Bl. 133^v

Vur denselvigen, deselve zyt.

Lodwich Mudder hait uffdoyn und besichtongen laissen solche peckelgen, als der peltzerknecht, wilcher he gefencklich gesessen, alhe gelaisseen hait und Lodwich vurscreven daran gewyst, as vur de schoult, der knecht eme verbleven.

Item, was im gepack syne roit bonet, hey plach degelichs zu dragen, eyn gefrontzelt hempt und eyn slecht hempt, waren beide alt, syn alte wirckpeltzs und zwey alte overhoissen.

Zwivell, uff avent Praesentatio Marie, anno et cetera [15]XXVI.

Johan Roide hait zu leisten gemant Dreis van Huissen als eynen burgen van wegen Bipgens van Birck, vur XV Kolnische Gulden van erschenen pentzien. Hait VIII dage dach van gerichtzs wegen. Vur eynen wirt gekoren.

Kost VI Schilling, den scheffen hergemoidt.

A II/11 1526

Bl. 133^r

Wilhem Staill, uff sent Thomasavent, anno et cetera [15]XXVI.

Johan vam Zwivell hait zu leisten gemant Kirstgen Schoultis vur eynen burgen Walraiffs zu Merten, eyne zumme umbtrint III Gulden.

Vur eynen wirt zum Isermart gekoren. Hait acht dage dach.

Kost VI Schilling.

Staill und Zwivell, deselve zyt.

Johan zom Isermart hait zu leisten gemant Johan Domen van wegen Anno zu Lair, syns swagers, vur IIII malder korns.

Vur eynen wirt zum Wynter gekoren. Hait acht dage dach.

Kost VI Schilling.

Wilhem Staill, deselve zyt.

Ald Johan Knutgen, Teillen son, hait zu leisten gemant Dederich zom Hoen und Clais Lantschade, als burgen vur Bertram Oem Johans und Hynrich Blanckenberghs son, eyne zumme van IIC Gulden. Hant acht dage dach. Vur eynen wirt gekoren, by Theis Kreich.

Kost [keine weitere Angabe]

A II/11 1526

Bl. 134^v

Wilhem Staill und Johan vam Zwivell, uff sent Thomasavent, anno et cetera [15]XXVI.

~~Her Tilman zom Schaffstall und~~ Peter zom Rodenhuis haift geboden Peter zom Wynter und Leyngen, eluiden, solchen LXXV Kolnische Gulden, in noch gebrechent an dem kouffe des husse zom Wynter, sy myt eme gedayn und affgegulden haven, darzu eynen Goltgulden zom vertzichpennynck und hant begert an den eluiden, sy ouch doyn in erffschafft und werschafft, we sy solchs geloifft und verdragen ist.

Hait Peter zom Wynter gesprochen, we syn son komen sy und in den kouff stayn wille, in auch ire uißgelachte gelt weder geboden have, we scheffen, burgemeister und schriver kondich sy. Haven eme ouch myt den boiden verboiden geyn gelt vorder zu untfangen noch erffschafft zu doyn. Daromb hey dat recht darover erkennen laisse. Haift ~~Her Tilman und~~ Peter Roithuis solche vurscreven gelt alsdo hynder gericht in gewarsamheit gelacht bis ant recht und hoff neit, de eluide inrede zu saige und kouff halden sollen. Hait Peter zom Wynter bekant, hey myt eme den kouff gedayn have. Und have ouch IIC Gulden daruff untfangen, wilcht Roithus verorkunth hait.

A II/11 1527

[Nachschrift]

In biwesen Thonis zom Hirtzs und Johan Staill, burgemeister hant Her Tilman und Peter zom Rodenhuis solche vurscreven gelt untfangen, orkonde Her Tilmans vurscreven hantschrifft. Her an geschreven, anno et cetera [15]XXVII, uff godenstach na letare.

Ich, Thilman, myn eigen hant.

A II/11 1526

Bl. 134^r

Wilhem Staill, uff sent Thomasdach, anno et cetera [15]XXVI. [Thomas = 21. Dez.]

Heyntzs zom Somberen hait uffgeboden solche pende eme overmitzs de boiden van Hammen[?] am Zynckelputzs gegeven ist.
Kost VI Schilling.

Zwivell, deselve zyt.

Heyntzs zom Somberen hait zu leisten gemant Baltasar Vleischheuwer vur eynen burgen Thonis Nailsmytzs vur X Mark, myn[us] II Albus.
Hait vur eynen wirt gekoren zom Isermart. Hait VIII dage dach.
Kost VI Schilling.

A II/11 1527

Thonis zom Hirtzs, burgemeister, und Kirstgen zur Wynreven, martmeister, uff mayndach na octava Epiphania domini [*Epiphania = 6. Januar*], anno et cetera [15]XXVII.
Thonis Nailsmyt hait beleit myt Hupricht Nalsmyt in der Houltzgassen und Bernt van Bircke, syme knecht, de gesacht haven, we Thonis vurscreven und Piter Smyt, uis dem lande van Hoymbergh, syn knecht geweist, sich sament gewort haven. Hait Peter da gesprochen zu Thonis, du bist
Bl. 135^v
eyn fuylich und bist darzu neit froym. Und dat wille hey bewisen, und solchs sy en neisten saterstach geschiet, wilcht Thonis verorkunt hait myt den vurscrevenen.

A II/11 1527

Uff dynstach na sent Appoloniendage, anno et cetera [15]XXVII.
Van gerichtzs wegen alhe zu Siberch ist Rodolff Kannengeisser van Collen vur pende gegeven overmitzs de boiden van Joist Peler, so dat gericht alhe van Rodolffs vurscreven wegen geladen wart Joist vurscrevene huis und erffschafft de besseronge, so idt ouch vur verpant is.
Kost uffzubeden VI Schilling overmitzs kuyr.

A II/11 1527

Johan vam Zwivell, scheffen, Thonis zom Hirtzs und Johan Staill, burgemeister, uff sent Mathysavent, anno et cetera [15]XXVII. [*Matthias = 24. Februar*]
Vurscrevene scheffen, burgemeistere und rait, mytsampt der hernknecht und statboiden hant besichticht den doiden licham Joris Nemans van Overdorst, wilcher uff donrestach sent Valentynsdage neist vergangen zu Seilschit vur Heynen huisse uffme Berghe in getzenck geweist und den anderen dach vridach alher zu Sigbergh vur den
Bl. 135^r

artzeder komen.

Hait man den doiden licham besichticht, daran befonden an syme heuffde eyne wonde, so man sachte, myt eyne byell geworffen were und de lyfhe eme derhalver entgenste were. Und an eyner hant wenich wont geriptzs off gestoissen geyn hyndernys brengen moicht.
Hant vurscrevene verorlofft, den licham zur erden zu bestaden.

A II/11 1527

Thonis zom Hirtzs, burgemeister, Johan Roide, rentmeister, Johan Girlachs, kuyrmeister, uff vurscrevene zyt. Jongh Heyntzs Knutgen hait gewyst und besichtigen lassen, de want tuschent eme und Jongh Johan Knutgen, we de myyr under der want itzunt stee recht und van alders lange zyt so gestanden have, und we de want daruff stae und vermeye, de nit affzubrechen und solchs platzs anders zu gebuchen. Jong Johan Knutgen wanst, an der want eyn zaploch sy, und derhalver de want gewychen syn solle. Hant de vurscrevene burgermeister und van raide beide parthien beschieden, solche zu stayn laissen, bis zukomptzs der scheffen, umb de darover zu erkennen.

A II/11 1527

Bl. 136^v
Thonis zom Hirtzs und Johan Staill, burgemeister, Johann Girlachs, kuyrmeister, uff mayndach na sent Mathyas, anno et cetera [15]XXVII.
Tilman van Gleen hait richtlichen verbeden laissen Peter zo Overoide solche myyre an Tilmans vurscrevenem gehuiße und Peters erfftzalen. Peter hait understanden zu brechen, neit vorder da an zu brechen noch zu arbeiden, bis ant recht uff eyne kuyr dem heufftman Peter, ouch den arbeider eder so manchen dach, so manche V Schilling zur kuyr.

Johan vam Zwivell, uff vridach na Eschdage, anno et cetera [15]XXVII.

Johan zom Ißermart hait zu leisten gemant Clais Bartscherer vur eynen burgen vur Pack van Scharenbroich, eyne zumme van XX Albus.
Hait eynen wirt gekoren zom Ißermart.

Kost VI Schilling.

Vur demselvigen, deselve zyt [uff vridach na Eschdage, anno et cetera [15]XXVII].
 Johan zom Isermart hait zu leisten gemant Johan Kannenschirper als eynen burgen vur Jacop van Menden,
 umb eyn malder haver.
 Vur eynen burgen zom Ißermart.
 Kost VI Schilling.

A II/11 1527

Bl. 136^r

[eingeklebter einseitig beschriebener Zettel von der Hand Johan Steyns]

Mynen fruntlych groyten, wysset, leve Hintze, als myn huysfrauwe Else gelt hayt hynder dat gereycht tzo
 Syburch gelacht, so begeren ych fruntlych van uch, dat yr myr doch dat wylt schycken. Und wat uch van
 gereisch wegen gehuyrt, dat behalt, und dat ander sceycket myr.
 Steyn Johan van Geystynch.

[Nachtrag:] Sulch gelt ys enfangen van Wyllem Rossedelle, des kelleners son vam Steynne.

Vur denselvigen, uff vurscrevener zyt [uff vridach na Eschdage, anno et cetera [15]XXVII.]
 Johan Roide hait zu leisten gemant Dreis van Huijsen vur eynen burgen eyne zumme van V Kolnische
 Gulden, van wegen Bipgens van Byrcke, und eynen wirt zum Leopart gekoren.
 Kost VI Schilling.

Overmitz denselvigen, uff vurscrevener zyt [uff vridach na Eschdage, anno et cetera [15]XXVII].

Herman Vlach hait zu leisten gemant.

[Text bricht an dieser Stelle ab]

Zwivell und burgemeister Johan Staill, deselve zyt.

Thonis, Johan Kesseler son in der Houltzgassen, hait gemonpert synen vader und bewilliget umb de schoult
 syn vader sent loerbroderschafft schuldich ist, wes syn vader darin macht und machen wirt, de broderschafft
 an syme huisse off garden zu versorgen zu solcher vurscrenen schoult, soll em wall genoigen.

A II/11 1527

Bl. 137^v

Johan Staill, burgemeister, Johan Henselen, kuirmeister, uff sondach Invocavit, anno et cetera [15]XXVII.
 Rutger Artzs hait beleit myt Kirstgen Kremer Under der Hallen und Gehart Schomecher van alle de gesacht
 haven we Hynrich Vasbender gesteren, saterstach, im huisse zom Leopart zu Rutger vurscreven gesprochen
 have, du hais myr mynen budell mit IIII Goltgulden gestoillen, und hey have solchs IIII off V maill gesacht,
 we Rutger eme de IIII Goltgulden gestoillen have, wilcht Rutger verorkont hait und zuigt sich deis myt an
 Hynrich, den wirt, der auch spricht, we de wort so geschiet synt.

Johan Henselen und Peter zom Rodenhuis, kuyrmeisteren, uff mayndach na reminiscere, anno et cetera
 [15]XXVII.

Tuschent Druide Beckers in der Molengassen und Theus Dochscherer irer erffschafft, nemlich ire garden zu
 beiden deillen hynden iren huissen gelegen, hant vurscrevene cuirmeister de lyne myt irer beider wille
 getzoigen, stecken dartuschent gesatzs, dar sy steyne vort zusamen setzen sollen.

A II/11 1527

Bl. 137^r

Gauwyn, schoulten, und Beissell, dynstach na reminiscere, anno et cetera [15]XXVII

Clais Lymberch hait zu leisten gemant Johan Kenffenheuwer vur eynen burgen eyne zumme van XII
 Overlensche Gulden, van wegen jonge Peter zu Pleiß.

Vur eynen wirt gekoren zom Somberen.

Kost VI Schilling.

Deselve zyt, overmitzs vurscrevene scheffen.

Wilhem Verver hait uffgeboden eynen selveren rynck, eme van Severyn Kremer vur pende gegeven is.

Kost VI Schilling.

Beissell und Roiss, deselbe zyt.

Johan van Bellekussen zu Dollendorff hait als volmechtich momber syns vaders, uis contrackt und verdrags, syn vader und Peter zom Wynter sament gehat haven, gegeven und upgedragen Peter zom Wynter und Leyngen, eluiden, solche V Mark renten, dat halffe deill davan Johans vurscreven vader van syme soene Johan anerstorven und zugefallen was an dem huisen

Bl. 138^v

in der Schruttelgassen, dar Johan Moisseler itzunt inwant.

Und gelofft werschafft zu doyn.

Overmitzs Gauwyn, scholtis, Beissell, Emmerich, Roiß, Zwivell, Wyß und Breidenbach, uff vurscrevener zyt.

Tuschent Wilhem Verter eyns, Johan Blanckenbergh, Bertram Oem Johans und Hynrich Stuppelgans anderdeils. Als umb dat gebrech Wilhem uis macht irs ordels zugeburde et cetera, hant Blanckenbergh myt syme sone und eidomp hanttestonge und geloiffde gedayn dem scholten Wilhem vurscreven tuschent Paischen irstkompt van syme gebrech zuvreden stellen, so vyll erffs und guitzs verkeuffen, als darvur eme syn gelt werde, anter de boiden hant bevell glich zu penden ader deselben in dat slos zu setzen, lude des gerichtzboichs.

A II/11 1527

Bl. 138^r

Overmitzs mynem eirwerdigen Hern, Hern Johannis Furstenberg, abt, Volmar Leye, Gauwyn, schoultis, Beissell, Wilhem Leye, Roeß, Zwyvell und Wyß, uff vurscrevener zyt.

Tuschent Peter zom Wynter und Peter zom Rodenhuis, des kouffs halver, der Wynter dem anderen Peter dat huis zom Wynter verdayn und verkeufft hait, hant vurscrevene myn erwirdigen Wolgeborenen Hern zu sampt Joncheren und scheffen den wynkoiff verhoirt. Und beide parthien hant solchs obgenantem myme wirdigen Hern und scheffen overgeven wes ire Werde und Lieffden darin sprechen werden zu halden und zuvollentzeyn, de dan eyn uißspruch gedayn haven, also dat Peter zom Wynter und syne huisfraw den anderen Peter myt dem huisse erven, erffschafft und werschafft doyn sollen, we recht is, solch huis bynnen XIIIII dagen ruymen und eme indoyn. Derglichen soll Peter zom Rodenhuis in weder anstont bynnen gnanter zyt betzalen

Bl. 139^v

und leveren wes hey eme neit betzalt en hette und eme darvan genoichde doyn. Off emans dan myt rechte darin sprechen und darweder wulde, soll dat recht eme ungeweigert syn. Und wilche van in beiden dese so neit genoich en dede, solde myme wirdigen Hern myt L Goltgulden ervallen syn, der wederparthien myt XXV Gulden und den mecheles myt XXV Gulden, so dick und manichmaill solchs geclagt worde. Nochtant solde deser spruch gehalden werden.

Zwivell und Leye, deselbe zyt.

Peter zom Wynter und Leyngen, elude, hant verkeufft und upgedragen Peter van Lair zom Rodenhuis und Coingen, syner eliger huisfraw, ir huis zom Wynter myt syme zubehore, an dem Kirchoeve uff dem Orde an den Mart schiessende over de gasse am Rodenhuis gelegen. Gelden jars datselve hus dem presentzmeister VI Mark.

Gelofft werschafft zu doyn.

A II/11 1527

Bl. 139^r

Beissell und Wyß, uff vurscrevener zyt.

Bertram Oem Johans und Styngen, syne elige huisfrauwe, und Hynrich, Johan Blanckenberghs son, hant verkeufft und uffgedragen Johan Knutgen, Teill Knutgens son, dem elsten, solche VIIIII Mark erffrenten sy haven in Rutgers huisse van Gleen, in der Molengassen, tuschent Hynrich Roemers und des Brochers huisseren gelegen, uff Martini vellich, doch vurscrevenen eluden und Hynrich off iren erven altzit der affloesen myt LI Kolnische Gulden, als XX Albus, der XXX uff eynen Goltgulden, gemontzs synt, und den Hornschen Gulden vur XIIIII Albus zu legen, vur ederen Gulden gerechent, uff vurscrevenen sent Mertynsdach, an eyner alyngen zommen und erschenen unbetzalten termynen beheltlich.

Vur denselvigen, deselbe zyt.

Bertrams Oem Johans und Styngen, elude vurscreven, hant verkeufft und uffgedragen Johan Knutgen dem alden vurscreven, Teill Knutgens son,

Bl. 140^v

vunff Kauffmansgulden myn[us] eynen Albus erffrenten uis irem huisse und hoeve myt alle syme zubehore, neit darvan uisgescheiden, an der Klytzsportzen, in der Uilgassen gelegen, we sy solchs Lodwich, Johan Rodolffs son, affgegulden haven und vort uis alle den guideren, de elude im burchbanne zu Siborgh ligen haven. Uff Martini vellich.

Und were idt sache, eyn termyn vellich worde und unbetzalt blive, soll Knutgen off de syne myt dem irsten gericht erfolgen, beheltelich den eluiden und iren ernen altzit der afflossen uff vurscrevenen sent Mertynsdach, off bynnen XIIIII dagen ungeverlich, myt hondert myn[us] eynen Kauffmansgulden myt den erschenen termynen unbetzalt weren, doyn moigen, und dat zu betzalen myt gelde we vurscreven, als den Goltgulden vur V Mark und den Hornschen Gulden vur XII Albus, heufftzumme und rentte.

A II/11 1556

[Nachtrag von anderer Hand.]

Anno et cetera LVI, am IXten marcy, nemlich uff maendach post occuli, hait Walper Knutgen bekant uffentlich, das diesse rentte vurgemelt affgelacht sie worden, in zitt irs mans seligen leben, und hait sich gueder uffrechtiger leverunge und bezallungen bedanckt.

A II/11 1527

Bl. 140^r

Overmitzs vurscrevene scheffen, deselve zyt.

Johan Knutgen der alte vurscreven hait gemompert und volmechtich momper gemacht, Johan Knutgen dem jongen, syme broder, solche vurscrevene renthe zu haven und inzuvorderen und alle ander guider, Johan zubehorich, und dat zu syme nutzs und urbar.

Overmitzs de scheffen, deselve zyt.

Her Tilmann zum Schaiffstalle, preister, hait verkeufft und upgedragen Johan Roiden und Coenen, eluiden, solchen gront und platze in der Engergassen, we Johan und Coene den itzunt bebouwet hant, beheltnys jars der Kirspelskirchen III Albus. Und were sache, dat solche huis und stallonge da verget vur sy verbrant worde, solde Her Tilman des platz behalden, XII voisbreit.

Johan Roide hait dem gericht und den scheffen betzalt solche gelt, als in geburde van dem huisse zom Schaiffstalle, zu schryne zu schryven, want Her Tilman und hey des itzunt neit zuvreden waren.

A II/11 1527

Bl. 141^v

Beissell und Wyss, uff vurscrevener zyt.

Peter Lair uffme Orde und Elsgen, eluide, hant verkeufft und uffgedragen Thys Peltzer und Greitgen, eluiden, solche kyntdeill und gerechticheit, als sy haven an dem housse zum Cranen, myt syme zubehoer, am Martte gelegen.

Gauwyn, schoultis, Beissell, Leye, Rompe, Zwyvell und Seichtern, uff vurscrevener zyt.

Tuschent dem jongen Johan Knutgen und Jong Heyntzs Knutgen als umb de alte want vur an der portzen tuschent in beiden.

Daromb hude beleit und bescheitzs overmitzs vursrevene scheffen darover geweist is, hait de scheffen vurbescheit gegeven, dat Heyntzs de want van hynden an bis vur de alte want in den wynkelhaich und int loit setzen und richten soll, ader eyne nuwe want soglich dar machen lassen. Und so de soglich in dem wynkelhaich und loit gemacht is, soll Hyntzs der dachdruppen II vois we gewoinlich is gebruchen und neit widers. Und were

Bl. 141^r

sache, dat Heyntzs de want vergenklich vallen lassen wolde, umb syn houltzs darzu legen, spricht der scheffen, soill Heyntzs syn houltzs glichs der swollen uff dat syn legen, doch beheltelich Heyntzen off den synen, off sy Scherman weder eynen bouwe daruff setzen wolden, irer dachdruppen asdan da[r]jan unverloren, sust myt dem houltzs Johan Heyntzen zu nae gelacht, soll Johan solchs bynnen XIIIII dagen uff dat syn legen, dat idt dem anderen neit zu nae en lige.

Heyntzs hait hevan appoliret.

Overmitzs vurscrevene scheffen.

Tuschent Thonis zum Hirtzs und Tilman zum Cleynen Hirtzs, als umb den nuwen bouwe, Thonis vurscreven gedayn, der kallen halven et cetera.

Hait der scheffen solchs besichticht und na befydonge vuraffscheit gegeven, also so Thonis synen bouwe uff gefoirt hait beneven dem anderen, wes Thonis dan Tilman an syner kallen
Bl. 142^v

gehyndert hait, soll hey weder besseren und machen. Sust myt der uffvart sall Thonis dat wasser van syme dach leiden in de straisse off anderes, dat idt uff Tilman neit envalle noch eme schaden an en doe. Und Tilman sall dan vort de underste kalle halden bussen Thonis schaden, dat eme davan geyne schade geschee an syme gehuisse.

Deselve zyt, overmitzs vurscrevene scheffen.

Tuschent Tilman van Gleen, als umb de muyre an syme huisse Peter zu Overoide da an bestanden affzubrechen, synt affgescheiden, und der scheffen erkant hait, dat de muyre irer beider ist. Und wes Peter Tilman zu na gebrochen und gehyndert, soll hey eme weder richten und de muyre weder besseren und doyn machen besser und neit arger.

Beissell und Leye, deselbe zyt.

Peter, Joncher Bernsauwe, camermeisters dener, hait gesont bynnen geburlicher zyt umb eyn beleit tgen Johan Henselen zu halden, etliche sachen, hude, desen dach, begangen synt.
Und dwile syne konde uißwendich und itzunt

Bl. 142^r
neit by der hant is und hey so balde by de hant brengen wilt, eme dat an syme rechten neit zu hyngeren, dan dys syns gesynnens de gicht zu behalden.

A II/11 1527

Overmitzs schoultis und scheffen gemeynlichen, vurscrevene zyt.
Ailff, wirt zu Ronderode, hait volmechtich momper gemacht und gemompert, we recht is, Johan van der Heiden zom Haesen, alle der sachen und vorderunge, hey am langen Johan van der Koilgroven zu doyn hait und hey myt recht gesprochen hait, umb off Ailff neit he en were, syn recht zu verdedyngen, zu gewynnen und zu verlesen, we recht is.

Overmitzs deselvigen, vur genanter zyt.

Tuschent Hynrich und Otto Overstoltzs, gebroderen, ist verdragen solchen inganck als umb ire gebrechen sy zuvreden worden synt und angenomen haven. Hant hude, datum, verwilligt beidesament. Ist och vuraffscheit gegeven, sy den tuschent sent Michelsdage irstkompt endigen sollen. Dan geschege des neit, sall der inganck we vur geschiet alsdan van neten syn und eder asdan uff syn vryen vois stayn sall.

A II/11 1527?

Bl. 142a [*eingecklebtes, einseitig beschriebenes Faltblatt, 180x285 mm, nicht von der Hand des Siegburger Gerichtsschreibers, nachträglich mit 142a beschrifft*]
Werdeger, andechte, in Gotvader und allerleyster Her, ich arm underdaen geven zo Euer Werdigen Liebden demoetlichte zo kennen, as ich och zo mehemalen gedaen haven ab ich och vermeynen Euer Werdiger Liebden etlichermaessen kuendich sy und nu eytzont zom dryttenmael, so we ich den schultiss, nemelich den vaidt van Bunne, dartzo myt etlichen scheffen des gerychtz unser stat Sygburch gehat haven und yr gewonliche gerechticheit darvan gegeven, myr eynen alden bouw zo besichtigen, want ich in meynunge was, denselven bouwe affzubrechen. Und haven darumb begert, dat der schultyss vurscreven myt etlichen scheffen mych wolde bewesen, we vern ich myne dachdruppen des alden bouwes vurscreven navolgen sulde myt recht. Uff dae ich myme naber, nemelichen der junge Johan Knuytgen, noch neman zo na intaste, syn ich bescheiden van schoultis vurscreven, wyl ich denselven bouw laessen staen. Dat moge ich doyn, so moge ich och myner dachdruppen gebuchen. Dan sy sache, dat ich hultz wyl dar lagen, as he verstanden have, des ich eme neyt gesacht hatte, warzo ichs gebuchen wolde. Dan myn wederpart vurscreven en sacht es eme och dat mael neit. So en solde ich dat hultz neit vorder lagen, dan de swelle lege, vam selven gebauwe des vurscrevenen huys. Demna han ich begere, myr zo vergunnen eynen tzuyn zo setzen uff de platze. Myner dachdruppen hait myr och neit mogen gedeyen, dan so verblyven by der swollen des gehuyses. Darumb mych arm underdaen gantz sere befrempt und och begert have, in wat oersachen ich sulcher dachdruppen enberen sal, daby och noch mehe myr levendiger noch lygender kunden oever wist syn werde, sulcher gerechticheit zo enberen, anroeffen und bydden, noch hude, by dage, so ich arm underdaen allerdemoetlichste kan und mach Unser Werdiger Liebden mych wyl doyn hanthaven by alder gerechticheit und mych weder uff mynen vryen voyss zo setzen, bys also lage derselvege junge Johan Knuytgen myr sulche gerechticheit der dachdruppen myt recht aff erwonnen und erdynkt haet, bynnen der stat Sygburch aberfecht anter ich arm underdaen in aller byllicheit underrycht mocht werden, aff dat Unser Werdiger Liebden wyl de naber doyn verhoeren off emans kundich sy, dat de dachdruppe eme zostae und

myr neit, aff wyl Unser Werdiger Liebden werckmeyster darstellen uff unrechtz kost und laessen beseyn, off de drupp eme zostae und myr neyt. Want myr sulche druppe aff yst gewyst, sunder rede und wederrede, warumb ich sulche gerechticheit enberen sal, wan myr sulche neit gescheyn en mach des ich neit en hoffe zo Unsers Werdigen Liebden so moist ich mych des wyders beclagen.

Bydden, des Unser Liebden umb eyn gnedich troystlich antworde, mych dat beste dana wyse zo rechte, wylche der Almechtige Got Under Liebden des derlanger in gotlicher regement solcher walfart starck, frolich gesunt gefryst und gesparen zo myr zo doyn.

Goitwyllige Herren undedaen, der junge Heynt Knuytgen.

A II/11 1527

Bl. 143^v

Overmitzs Rompe und Zwivell, deselbe zyt.

Johan Kesselsleger in der Houltgassen und Thonis, syn son, der den vader he innen gemompert und volmechtich gemacht hait, hant verkeufft und upgedragen Gotschalck Smyt und Wilhem Hammeccher, brodermeisteren sent loerbroderschafft, in nutzs und zu behoiff derselver broderschafft, XII Albus erffrenten und jaigulden uis irem huisse zum Swanen, in der Houltgassen, beneven dem huisse zum Bouck gelegen, uff sondach reminiscere vellich, off bynn den neisten XIIIII dagen ungeverlich, beheltnys Johan und dem sone vurscreven off iren erven, der affloesen myt XII Kolnische Gulden, uff vurscrevenen sondach und den erschenen unbetzalten termynen.

Rompe und Roess, deselbe zyt.

Hynrich van Walproill uffme Vleugeroide, und Leene, syne elige huisfraw, hant gegeven und uffgedragen irer eynt dem anderen, alle ire guit, gereit und ungereit, we sy solchs itzunt hant und vorder an sich gelden und werffen moigen, de leste levendige hant van in beiden, solchs zu keran und zu wenden, in wes hant de wilt, zu alle irem walgevallen und enenkomptzs.

A II/11 1527

Bl. 143^r

Loe und Wyß, deselbe zyt.

Jorgen zu Kyr und Entgen, syne elige huißfrauw, hant verkeufft und uffgedragen Joenen zum Esell und Ailcken, eluiden, eyn stuck gardens hynder irem huisse gelegen, so breit Jorgen und Entgen solchs dat da haven und XXVIII vois lanck. Und hant darzu verkeufft und uffgedragen Joenen und Ailcken, eluden virgenant, XII Albus erffrenten und jaigulden uis irem huisse und erffschafft, da sy inwanent, zu betzalen. Und geloiffst werschafft zu doyn.

Rompe und Roeß, deselbe zyt.

Hynrich van Muych und Girde, syne elige huisfraw, hant verkeufft und uffgedragen Johan Symonis dem Jongen und Styngen, eluiden, XXVII Raderalbus erffrenten und jaigulden zu betzalen, uis irem huisse gnant Stailbergh, in der Houltgassen, myt backhaus und garden und alle syme zubehore, tuschten Hern Herman Blanckenberghs huisse und dem huisse zur Lynden gelegen, uff sent Geirdruitdach vellich. Geloiffst werschafft zu doyn.

A II/11 1527

Bl. 144^v

Zwyvell und Leye, up vurscrevene zyt.

Dedrich Loir und Dreis Schroeder, brodermeister sent Anthonisbroderschafft, hant verkeufft und uffgedragen Thonis Worm zum Hirtz und Kathrinien, eluiden, eyn stuck gardens, gelegen hynder dem huisse zum Oissen und beneven Druide Beckers, Johannes zum Oissen seligen, och vurhyn in de broderschafft gegeven hatte. Geloiffst werschafft zu doyn.

[von anderer Hand]

Zwyvell und Leye, up vurscrevene zyt.

Thoenis Worm zum Hyrtz und Johan Stayll, kyrchenmeisteren zor zyt der Kyrspellskyrchen zo Sybergh, hant myt wyst, wyllen und goedem consent des vaitz gemeynlichen verkuyfft und upgedragen Heyntzen zum Sumberen und Goeytgen, eluden, iren garden an der Wellergassen, am Cruitz am Orde, thegen oever Johan Symons erffschafft gelegen, unde zo beyden sytten weder Thoenis zum Roesenboeymen scheyssende, gelden jairs deselbe goede in de froemiß VIII Albus, in de Kyrspellskyrche 1 puynt was und up den Bergh 1 hoeyn und X Heller, we in solch van Greitgen zur Ecken gegeben is. Geloefft werschafft zu doyn et cetera.

A II/11 1527

Bl. 144^r

Thonis zom Hirtzs und Johan Staill, burgemeister, donrestach na letare, anno et cetera [15]XXVII.
 Her Tilman zom Schaiffstalle und Peter zom Rodenhuis hant beleit myt Her Herman Blanckenbergh und
 Johan Roiden de gesacht, we Peter zom Rodenhuis overmitzs Her Tilman gesteren Peter zom Wynter
 dargelacht und geboden have LXXV Kolinische Gulden, eme noch an dem huisse zom Wynter des kouffs
 halver noch gebreichen an Sleifferen und Schreckenbergher, als nemlich VII Sleiffer vur XXXII Albus und
 VII Schreckenbergher vur XXXII Albus, umb in damyt zu betzalen, wilcht Peter zom Wynter also neit
 untfangen have willen.

Uff saterstach na letare, anno et cetera [15]XXVII.

Van gerichtzs wegen alhe zu Siborgh ist Andreis Hoitmecher van Collen daromb dit gericht van synent
 wegen van den geistlichen richteren van Collen durch schulde Joist Pelers geladen is worden und pende
 gegeven de besseronge an Joisten vurscreven huisse.

Kost uffzubeden overmitzs Zwivell VI Schilling.

A II/11 1527

Bl. 145^v

Zwivell, uff Mendellavent, anno et cetera [15]XXVII.

Johan Aldenach hait solchen kumer entsatzs, de van Droistorff eme uff syne erffschafft, an der Burch
 gelegen, gedayn haven, we recht, des zu gebuchen.

Thonis zom Hirtzs und Johan Staill, burgemeister, uff godenstach, sent Walperdach, anno et cetera
 [15]XXVII.

Gutgen Loirs hait beleit myt Pauwels uff der Arcken und Werner Portzener, de gesacht haven, we Koynrait
 Wymar en mayndach neist vergangen, den avent spade, umb de IX oren, so de duyren geslossen waren, vur
 ire huis komen sy, da Lodwich zu Hoymbergh und Tryngen, syne huisfrau, myt by geweist syn.

Spricht Pauwels vurscreven, we Koynraet vurscreven Guitgen Loirs eyn hoir geschulden have.

Spricht Werner, we Koynrait sy eyn hoir geschulden have und darzu gesprochen, wa Wilhem Vlach sy hey
 en sy neit vroym genoich, heruis zu komen.

Hait Guitgen vorder beleit myt Hans van Sygen und Thonis van Nuymbrich, iren zwen knechten, de
 gesprochen haven, we Koynrait vurscreven Guitgen gescholden have eyne uisgeschotte paffenhoir und
 Wilhem Vlach eynen vleisch-

Bl. 145^r

verkeuffer. Bistu froym, so kom heruis, und da en soll geyn guit van komen.

Spricht Rutger van Gleen und Theis Glaßmechers, we Lodwich zu Hoymbergh untegin symē irem huisse
 gesacht have zu Koynrait, ehe swaiger, wat wilt ir machen, hait ir den duvell myt drynin.

Und Tryngen zu Hoymbergh sprach, lever broder, umb den doit den Got geleden, syt doch zuvreden,
 gedeynde dynger en synt neit zu wederdoyn.

Thonis zom Hirtzs und Johan Staill, burgemeisteren, uff mayndach, sent Servaisdach, anno et cetera
 [15]XXVII.

Ailff Walraiffs hait beleit myt Hynrich Loirmengens son, de gesacht hait, we Schopgens Anna gesteren,
 sondach, sich myt Ailffs vurscreven vrouwen getzweyet have. Und Anna have gesacht, dat ir man in de
 moille gae en moiltere. Do have Ailffs vrouwe gesacht, uff ir man ir zu na gemoltert have. Have Anna do
 gesprochen, ja.

Overmitzs Zwivell, deselve zyt.

Johan, wirt zom Ißermart, hait uffgeboden solche pende eme van Thonis Nailsmyt gegeven synt.

A II/11 1527

Bl. 146^v

Zwivell, uff dynstach, na exaudi, anno et cetera [15]XXVII.

Clais Lymbergh hait zu leisten gemant Peter zu Overoide vur eynen burgen Kirstgen Moilner zu Birlekoven,
 eyne zumme van III Overlensche Gulden.

Hait acht dage dach van gerichtzs wegen. Vur eynen wirt gekoren.

Johan vam Zwivell und Wymar vame Loe, uff dynstach na sent Vitzdage, anno et cetera [15]XXVII.

Johan zom Isermart und Hilgen, syne elige huisfrauwe, hant guitwillencklichen eyndrechtlichen geloiffst, de kalle an der Merllen, irem gehuisse in der Cluysengassen, beneven tuschen den boiden Peters zum Wynter und Leyngen, eluiden, gehuisse gelegen, vortan erflich und ewencklichen zu halden und verfoegen vur sich und ire erven, bussen hyndernys und schaden Peters und Leyngen, eluden, und iren erven, umb in derhalver geyn schade an iren gehuchte gescheyn moige, we deselven eluide solch hebevoir, im jair XXIII, zu sent Johans Mytzsomer overmitzs burgemeistere und rait verdragen synt, inhalt dys gerichtsboichs.

A II/11 1527

Bl. 146^r

Gauwyn, schoiltis, Beissell, Wilhem Leye, Zwivell und Loe, uff vurscrevene zyt.
Joncher Volmar vam Nuwenhoeve gnant Leye hait volmechtich momper gemacht und gemompert Joncher Wilhem Leye, synen son, der sachen des umbgancks halver hynder syner erffschafft in der Molengassen obgenanter Joncher Leye zu Wilhem Vlach und Guitgen Loirs vermeynt affzustellen, by und beneven der statmuyren und der Molenportzen, darin zu handelen.

Overmitzs vurscrevene schoilten und scheffen, deselve zyt [1527].

Tuscent Ailff van Ronderode und Johan Doesseler, veildrever, als umb den kummer Ailff uff Johan Koilgroever, nemlich umb XVIII Goltgulden, der Koilgrover Ailff schuldich is, alhe gedayn hait und solch bekummerde gelt dem Doesseler, als hey sich vermyst, zustayn solde. Hant daromb beide parthien, als Ailff und der Doesseler, solchs zu eyne guitlichen uißspruch und hynlegonge an vurscrevenen scholten und scheffen gegangen synt, de dan eynen uißspruch gedayn haven, nemlich also, dat Johan Doesseler solch gelt alle bynnens Sigbergh uffheven und zu sich nemen mach, nachdem hey etlich bewys seyn leiß eme solch zustayn solle und syn schoilt,

Bl. 147^v

da hey des zu doyn hait, damit betzalen. Und soll vur de XVIII Goltgulden burge setzen off Ailff tuscent dem neisten bewys bybrengen moicht, dat eme zugelaissen is tuscent dem neisten, solchs dem Koilgroever zustendich und syn were. Dem rechten gemessich, wille der scheffen dan seyn und horen und in alsdan vorder sagen, we sy sich halden sollen.

Hant bede burgen gesatzs dem so zu doyn. Vur Ailff is burge, inhalt des gerichtzboich.

Der Doesseler hait solch gelt verkoren, bit darzu neit uffzuheven und solchs uff eyne pene myme werdigen Hern abt myt XX Gulden und des mechelers myt X Gulden desem so nazukomen.

Vur obgenanten schoiltis und scheffen, deselve zyt.

Johan Doesseler, veildrever vurscreven, hait volmechtich momper gemacht und gemompert Joiswyn Doichscherer, der sachen tgen Ailff van Ronderode und den Koilgroever, umb off der Doesseler syne kontschaft und bewys herschicken worde und neit he gesyn konde, alsdan syn recht zu verdedyngun und zu hoeden, glichs off hey selffs he were, in der macht zu stayn.

A II/11 1527

Bl. 147^r

Beissell und Loe, denselven dach.

Her Herman Blanckenbergh, vicarius der vromyssen, hant in der zyt hey des wall moigich und mechtich was, gegeven und uffgedragen Hynrich, Johan Blanckenberghs son, syme maighe, solche kyntdeill Herman Blanckenberghs, der zukome was und vurgenanten Hern Herman, syme oemen, versat und vur under pant gegeven hatte, overmitzs notarius und andere priestere und frome luide, vur alsolche zumme geleyntzs geltzs, vurgenantem Hern Herman, syme maighe, Herman geleynt und verlacht hait, we hey des bekannte hatte, van syme oemen untfangen zu haven, we eme solchs van syner moder anerstorven is und vorder van synen alderen zusterven und vallen mach, neit davan uißgescheiden.

Her Dedrich Meuschs und Her Tilman zom Schaiffstall alle hant betzucht, de scholt und geleynt gelt, gewest is hondert XXV Goltgulden, VI Raderalbus, X Heller, als Her Herman ewich zo.....

Vur denselvigen, deselve zyt.

Johan Blanckenbergh vurgenant hait alsolche gyfft und uffdacht, syn broder Her Herman, syme soene Hynrich we boven geschrevan, bewilliget und och off hey synche lyfftzicht off gerechticheit an demselven syns sons Hermans kyntdeill hette, daruff vertziegen.

[Am linken Buchrand quer geschrieben:]

Anno et cetera XXVIII, godenstach post oculi, overmitzs Beissell und Wyss, bekant.

A II/11 1527

Bl. 148^v

Und hait derselve Johan vorder gegeven und uffgedragen, obgenantem syme sone Hynrich, deselven Hynrichs kyntdeill, we eme dat zuerstorven is und vorder zusterven mach, neit davan uisgescheiden, voder gentzlichen uff syne lyfftzucht vertziegen hait, umb Hynrich noch neit van syme vader ...edt worden und andern synen kynderen zu iren bestetenys gegeven hatte.

A II/11 1527

Gauwyn, schoultis, Wilhem Beissell, Wilhem Leye, Johan vame Zwivell und Wymar vam Loe, uff vurscrevene zyt.

Geirtgen, nagelaissen witwe wilne Godartzs van Steynen, myt Ropert, Wilhem, Beilghen und Heßgen, iren kynderen, van Godart vurscreven geschaffen, hant alsamentlich und eder besonder verkeufft und uffgedragen Kirstgen van Reide und Neißgen, syner eliger huisfrau, alle ire gerechticheit, andeill und gebuyr eyns huyß und wonyng, gnant zur Wynreven, bynnen Sibergh, in der Molengassen gelegen, myt syme zubehoere und gerechticheiden, myt in solchs zuerstorven und angevallen is, davan myt allen, neit aff noch uisgescheiden. Und want dan noch ein kyntgen, gnant Tryngen, im leven ist, datselfe noch unmondich und neit by desem kouffe noch uisgange geweist, so synt moder und kynder vurscreven sament und besonder dar

Bl. 148^r

vur guit worden, dat datselfe kyndt so waille as sy und glichs inne, so wanne idt zu synen mondigen dagen kommen ist, desen kouff strack und stede halden, bewilligen und believeren soll, darvur sich de moder und kynder verplicht und verbonden haven erffsachwelder und weldersen zu syn zon ewigen dagen we vurgenante schoultis und scheffen Joncher Beissell solche hude, datum, an andere ire mytstoilbroedere und scheffen, der kouff und uffdracht vur in gescheit is, bracht haven, we vurgenant. Geloifft werschafft zu doyn.

Overmitzs vurscreven schoultis und scheffen, deselbe zyt.

Beilgen van Steynen, nagelaissen witwe wilne Hynrichs van Steynen, hait uis macht vermechenyss und leste willens irs mans tuschen in uffgericht, versigelt gemacht is, verkeufft und uffgedragen Kirstgen zur Wynreven van Reide und Neisgen, syner eliger huisfrau, burger zu Sibergh, alle ire gerechticheit, andeill, gebuyr und anersterffnys eynes huyß und wononge, myt alle syme zu und ingehoere, gerechticheit, gnant zu der Wynreven, in der Moillengassen, bynnen der stat

Bl. 149^v

Sibergh gelegen, we ir solchs van macht des vermechnys an und heymgevallen is, davan neit uisgescheiden. Ist och verdedyngt und bekant, off sache were, dat Kirstgen und Neisgen, eluden vurscreven, off iren erven nu off hernamails umb dys erffs und kouffs willen zu eynchem kunde, last, forderongen ader anspraichen qwenen, solche kunt, last und vorderunge ader anspraiche sall und wilt Beilgen vurscreven und ire erven in alztzt zu irem gesynnen affstellen, ire erffsachwalt syn stayn und bliven zoe den ewigen dagen, we obgnanter Schoultis und Beissell beidesament scheffen, solchs overmitzs ire gewonlich urkonde an andere ire mytstoilbroder, darvur dat vertzich geschiet is, bracht haven. Geloifft werschafft zu doyn.

Johan vam Zwivell, Johan Staill und Peter zom Rodenhuis, burgemeisteren, uff sondach, sent Johansavent zu Mytzsomer, anno et cetera [15]XXVII.

Vurscrevene scheffen und burgemeisteren hant mytsampt der herenknechte und statboiden beseyn Hynrich Smytz kynt, dese nacht vergangen, tuschten XI und XII oren, under

Bl. 149^r

syme korne uff dem bette, so vunff balcken und dat gebouwe bovent den betten myt dem korneren zubrochen und neder uff de kynder gevallen is und also doit bleven, fonden haven.

Und anders neit an dem licham befonden, dan myt den balcken und dyllen uff den scholderen und sytten swartzs geqwacktzs und under dem korne verstickt geweist.

Hant daromb veroirlofft, van wegen myns werdigen Hern abtzs und des gerichtzs, den licham zu der erden zu bestaden.

A II/11 1527

Johan Staill und Peter zom Rodenhuys, burgemeisteren, uff donrestach na sent Johansdage zu Mytzsomer, anno et cetera [15]XXVII.

Girtgen, Johan Wolslegers seligen nagelaissen dochter, hait in biwesens Teill van Aldennuymbricht, syns oemen, beleit myt Hynrich Striffler und Johan Slosser, syns eidomps, de gesacht haven als hilichslude, dat sy van Greten Wolslegers, des meitgens moder vurscreven, uff iren hylich, sy myt Tilman van Gleen gedain

hait, gebeden synt myt anderen luiden, dat uff dem hylich geluydt und verdragen sy, als umb de zwey huisger, genant zom Kreifftzs, in der Berchgassen gelegen, Johan
Bl. 150^v

und Greta, des kyntzs vader und moder vurscreven, gegulden und davan noch XXX Kolnische Gulden schuldich bleven weren, de sy jars hant gelden moissen myt V Mark an Conrait Meuschs erven. Ist daromb uff dem hilich mit Greten vurscreven und Tilman van Gleem, irem huiswirt, verdragen, dat sy zusament den kynderen, van Johan und Greten vurscreven geschaffen, solche ire huisscher van den V Mark jairrenthen vryen und qwiteren sollen, bussen der kynder schaden.

Myn erwerdiger Here Durchlaucht Johannes Furstenbergh, abbas, Hern van Warenbergh, proist zu sent Ciriaix, Peter van Gymenich, rentmeister, uff mayndach na Visitaio Mariae, anno et cetera [15]XXVII. Tuschen Clais Lymbergh eyns, Thonis Schroder und Thys van Wipperfurde, als umb dat verbrantte huis vur der Holtzportzen, Clais vurscreven zugehorende, Thys und Thonis eme beide affgewonnen und durch ungeluck, dwile Thys darinnen gewant, verbrant is. Umb wilchen schaden sy allerdeils davan gehait auch umb versessen huysynss sy etlicher maissen vur gericht geweist synt,
Bl. 150^r

omb hude, datum, vur myme erwerdige Hern vurscreven overmitzs ire vrunde, myt namen Johan Roiden, Heynts zom Somberen, Johan zom Ißermart und Johan Kanffenheuwer, den sy solchs myt halme und monde overgeven haven, guitlich gescheiden und verdragen, nemlich also, dat Clais und Thys umb den schaden sy sament gehat, des brantz halver herkomende, we der dan geweist is, neit davan uisgescheiden, geyner an dem anderen davan neit heischen vorderen noch och geven en soll, dan wes eyn eder davan schaden gehat und geleden hait, daher komende soll eyn eder och selffs liden und dragen, und umb den huiszynss Clais an Thonis vorderde, der scheffen eme och etlichs zugewyst hait. Darvur hait Thonis itzunt myme werdigen Hern und vrunden II fuder wyntzs geschenkt, we in solchs uis macht dys verdrags verdragen und geheischen is. Und Thonis soll Clais davan myt dem huiszyns vurscreven betzalt haven, damyt sy alsament vurscrevene sachen gentlich gescheiden syn und bliven sollen. Und wilcher van in herweder

Bl. 151^v

dede und dys verdrags, we vurscreven, neit enheilte, soll myme werdigen Hern abt myt XX Goltgulden und des mechelers myt der haldender parthien myt X Goltgulden ervallen syn. Nochtant soll solchs gehalden blieven.

Gauwyn, scholtis, und Emerich de Seichtem, uff dynstach na Visitatio Marie, anno et cetera [15]XXVII. Joris van Nuynkirchen hait zu leisten gemant Johan, wirt zum Isermart, vur eynen burgen van II Kolnische Gulden vur Johan Rodenman.

Vur eynen wirt zum Wolff gekoren.

Hait VIII dage dach, van gerichts wegen.

Kost VI Schilling.

Kobbenroide, Zwivell und Leye, deselve zyt.

Tilman van Gleem hait uffgeboden solche pende eme van Peter Streitzen gegeven synt.

Kost VI Schilling.

A II/11 1527

Bl. 151^r

Breidenbach und Seichtem, uff godenstach, der VII broderdach, anno et cetera [15]XXVII. Schamell Johan zom Reesen, Thewys Kreich und Thonis Mant, brothermeistere sent Benignusbroderschafft, hant erfflich und ewencklich uisgedayn und verpecht iren bongart bussen der Molenportzen, beneven dem Hern bongart uffme Berge und Dedrichs van Engelskirchen garden gelegen, we der broderschafft solchs van den Perlerschen kynderen zubescheiden und gegeven is, doch beheltlich Schamell Johan vurscreven des syn levenlanck zu gebreuchen, dem vurgnanten Dedrich van Engelskirchen und Even, syner eliger huisfrau und iren rechten erven alle und icklichis jars erfflich zyns vur III Mark, we altzit bynnen Collen gilt, uff sent Girdruitdach vellich, doch beheltlich Schamell Johan daran syner lyfftzucht, we vur zu behalden. Gelden jars derselbe bongart der vrouwen zur Clocken X Albus.

Darvur hait Dedrich und Eva, elude vurscreven, iren garden, darby gelegen, vur eyn underpant gesatzs und verwilkurt vurscrevener broderschafft.

A II/11 1527

Bl. 152^v

Johan Henselen und Peter zu Groneck, kurmeisteren, uff sent Margretavent, anno et cetera [15]XXVII [*Margaretha = 13. Juli*].

Her Tilman zom Schaiffstalle hait gewyst und sich beclait den nuwen bouwe und gyffell, Johan Roide uffgesatzs, we hey eme an syme huisse gebrochen an wenden und anders und den bouwe uißerster gesatzs dan der alte gestanden have. Und have eme derhalver und damyt zu nae gebouwet, sonder eynich syn ansprechen ader affwilligen. Hait eme daromb den bouwe richtlichen doyn verbieden. So manchen dach hey daran na desem dage arbeiden leist, so manche V Schilling zur kuyr, und den meisteren myt den arbeidern, sy na desem dage daran arbeiden, ederem so manche V Schilling zur kur, so verne solchs geclait wirt. Arbeider zusament geweist VI perschonen.

Johan Roide spricht, de want myt der wyrmen tuschent Her Tilman und eme hoere zu syme huisse und sy syn. Und de calle dartuschen moisse hey ouch halff halden, lude Her Tilmans eigener hantschrifft, so dat hey uff dat syn gebouwet have. Und er gestee Hern Tilman daran neit und wille daromb solchen bouwe vort machen und ant recht verburgen.

A II/11 1527

Bl. 152^r

Vur den vurscrevenen.

Under anderen worden tuschent Hern Tilman und Johan Roiden hait Johan Roide gesprochen, Her Tilman have eme dat huis verkeufft und in dem kouff geloifft, so der wyn uffslaige, zwey stuck wyns inzulaissen, und des neit gedayn have. Daromb zwey stuck wyns me van eme untfangen dan hey doyn solde, wilcht Her Tilman vur den vurscrevenen verorkunt hait.

Kobbenroide, Zwyvell, Leye und Breidenbach, uff vurscrevene zyt.

Meister Wilhem Hoidensnyder hait zu leisten gemant Herman Molner vur V Mark van eyns van Eitdorff.

Hait VIII dage dach van gerichtzs wegen.

Vur eynen wirt gekoren.

Kost VI Schilling.

Zwivell, uff dynstach na Jacobi, anno et cetera [15]XXVII.

Teill Verffer hait zu leisten gemant Thonis Nailsmyt vur eynen burgen eyn stuck wyns vur den Sleumar.

Vur eynen wirt zum Isermart gekoren.

Kost VI Schilling.

A II/11 1527

Bl. 153^v

Johan vam Zwivell, Johan Staill und Peter zom Rodenhuis, burgemeistere, uff mayndach na Laurenty, anno et cetera [15]XXVII. [*Laurenti = 10. August*]

Vurscrevene scheffen und burgemeister, mytsamt der hernknecht und statboiden hant besichticht den doiden licham Teillen, Peter Peltzers son, wilcher gesteren, sondach, myt eyme reisigen knaben, so myn gnediger lever Her Hertzouch zu Cleve et cetera he was, eyn getzenck gehat, dat Teill denselven in eyn arm wontgestechen. Ist eyn ander reisch knecht zukomen, den Teillen geiagt. Und Teill hait gefluwen in Johan Snytzlers huis uff den soller und hait zu eyner vynter uisgesprongen und gevallen in eynen zuynstachen, beneven syme gemecht, in sich gestacht und ist derhalver gestorven.

Hant eme de vurscrevene, van wegen myme werdigen Hern abtzs und des gerichtzs, erloffnys gegeven, den licham zu der erden zu bestaden.

Zwivell, uff sent Bartholomeusdach, anno et cetera [15]XXVII. [*Barholomei = 24. August*]

Heyntzs Acherhen hait zu leisten gemant Wynant Smyt vur eynen burgen, des Heumars vam Broich im Lomar, eyne zumme van XIIIII Kolnische Gulden.

Vur eynen wirt gekoren.

A II/11 1527

Bl. 153^r

Zwivell, uff vurscrevene zyt.

Dedrich zom Hoen hait zu leisten gemant Theys Kreich vur eynen burgen Rutgers van Gleen, amptsknecht, umb VC garffen, halff gesneden und halff ungesneden.

Vur eynen wirt gekoren.

Kost VI Schilling.

A II/11 1527

Johan vam Zwivell, Peter zom Rodenhuis, burgemeister, und Thonis zom Hirtzs, rentmeister, Her Tilman zom Schaiffstalle, uff sent Bartholomeusdach, anno et cetera [15]XXVII.

Teill Verffer ist uisgegangen bussent syn gehuysse und wanonge uff de straisse, buyssent eynichs gedechs und schuyr ungeleidt, myt guder vernonfft und vryen moitwillen, over seven vois lengden, we recht is, und derglichen Tryngen, syne elige huisfrau, und hant gegeven und uffgedragen irer eynt dem anderen alle ire guit, gereit und ungereit, we sy dat itzunt hant und vorder an sich wynnen und werffen mogen, bynnen und bussen Sibergh gelegen, neit davan uisgescheiden, de leste levendige hant van in beiden solchs zu kerden und zu wenden, in wes hant de

Bl. 154^v

wilt, zu alle irem walgevallen und enenkomptzs, we deselwe eluide sachten, sy och hebevoir irer eynt dem anderen gegeven und uffgedragen have, lude des gerichtsboichs und geschiet sy solchs in der macht zu bliven und gehalden zu werden. Und doch hait Teill geordeneirt und bewilliget, dat huis, der Kreuwel, da sy itzunt in wanent, dat solch huis an Tryngen, syner huisfraw, neisten erven, na irer beider doide sterven und vallen soll. Want de noch eyne dochter zu Mondorff hait, unvertzigen isader wan syne huisfraw solchs na irem doide, off de de leste hant were, ordeneren und bescheiden worden.

Item, hant deselven Teill und Tryngen, eluide, deselwe zyt gegeven und uffgedragen, sy des wall mogich und mechlich waren, Johan Meye, Teillen vurscreven maighe, dat Vervehuis, hynder irem huisse dem Kreuwel gelegen, myt dem putzs, we de elude solchs samender hant an sich gegulden und geworffen haven und darzu alle verffgetzuch, in dem alyngen gantzen Verffehuis, als kessell, buyden und alle ander gereitschafft zu

Bl. 154^r

dem verffgetzuch ist, deynt und gehoirt, neit davan uisgescheiden, idt sy in dat Verffhuis gevestigt gemoit ader neit, doch beheltlich Tryngen vurscreven daran ire lyftzucht zu behalden. Hant de eluide vurscreven demselven Johan Meye zubescheiden und gegeven sollen werden dryhondert Goltgulden off dat guit wert darvur, uis und van iren alyngen guideren, gereit und ungereit, we sy de haven und nalaissen werden, eme na irer beider doide anstont werden und gehantreicht werden sollen, und dat sonder vertzoch und argelist und solchs myt umb getruwen dienst, derselve Meye den eluiden vurscreven gedayn und bewyst hait und noch vorder doyn soll. Want derselve Meye by syner moenen vurscreven so off syn oeme na willen des Almechtigen Gotzs afflivich worde, ire levedage lanck bliven und denen soll, by ir wanen, dat Verffhuis regeren, arbeiden helffen, de schoilt inmanen und vorderen, na alle syme besten vermoigen, zu allen dyngen dat beste doyn

Bl. 155^v

und vurkeren, glich off in solchs selffs angeyngē und eyme getruwen dener zu doyn geburt und dat by syner moenen kost, we Meye och solchs vur vurscreven scheffen, burgemeisteren und anderen, och syme oemen und moenen vurscreven zugesacht und geloifft hait zu doyn.

A II/11 1527

Item, hait Teill vurscreven geeordeneirt, gegeven zu werden myt consent, wanst und guden willen syner huisfrau, altzit zu spenden, armen luiden gegeven sollen werden, solche IIII malder korns erffrente, de eluide jarlichs lude verschrivong zu Nuyrwenich vallen hant, und dat alle und icklichs jars den armen zum besten und noetsten zu kerden, man dat beste doyn mach.

Item, hait Teill vurscreven noch geordeneirt, gegeven und belacht sollen werden myt consent, wanst und guiden willen vurscrevene syner huisfrau, vunffteyn Goltgulden erffrenten uis und van synen nalaissende guideren, am sichersten gemacht und belacht sollen werden, de jarlichs zu heven, da man des gewyß und sicher sy und allersicherste und beste man de belagen und versichern mach, jarlichs zu heven umb

Bl. 155^r

dry myssen alle wechen davan zu gescheyn und gehalden sollen werden, vur ire beide selen und darvur sy des dan vorder begerende synt.

Item, hait Teill vurscreven besatzs uff den Berch in dat Cloister 1C Overlensche Gulden eyns zu geven.

Item, hait hey besatzs in de Kirspelskirche zu Sibergh zu eyner orgelen IC Overlensche Gulden eyns zu geven.

Item, hey hait besatzs in dat Hospitaill an der Colner Portzen IC Overlensche Gulden eyns zu geven.

Item, hait hey besatzs Hern Gillis, syme neven, sent Augustinusorden, eyne swartze kappe.

Item, hey hait besatzs Clais, syme neven van alle synen guideren eyns zu geven VI Albus Colschs.

Want meister Teill und Tryngen, eluide vurscreven, vur denselven Clais, als sy sachten, zu Collen an Stertzgen eyns, dar hey sy versatzs hatte, for in moissen betzalen IIC Overlensche Gulden, dartgen sy noch neit dan eyn foder wyntzs kriegen en haven. Dat andert steit noch an eme zu vorderen. Solchs ist vort georkondt an Wilhem Staill, scholtis, Leye, Rompe, Zwivell, Wyß, Seichtem und Breidenbach, uff dynstach na Michaeli, anno et cetera [15]XXVII.

A II/11 1527

Bl. 156^v

Zwivell, uff vridach na Egidy, anno et cetera XXVII.

Gillis Slosmecher hait zu leisten gemant Dreis van Huissen, eynen burgen des Sleumars, van VII Kolnische Gulden.

Vur eynen wirt gekoren, in des Kannengeissers huis.

Hait acht dage dach van gerichtzs wegen.

Kost VI Schilling.

Breidenbach, uff dynstach na Michaeli, anno et cetera [15]XXVII.

Cathrine Verffers hait zu leisten gemant Lomar Johan vur eynen burgen vur den Sleumar, vur IIII aym, IIII fuder wynds, dat foder XXVIII Kolnische Gulden.

Hait VIII dage dach.

Vur eynen wirt gekoren.

Kost VI Schilling.

Staill und Zwivell, uff vurscrevene zyt.

Heyntz Knutgen dey alte und Elsgen, syne elige huisfrau, hant wedergegeven verkoufft und uffgedragen Hynrich Overstoltz van Droistorff und Elsgen, eluden, solchen veirdendeill am Zygenhoff myt syme zubehore, Hynrich und Elsgen, eluiden, vurmals verkeuft und uffgedragen hatten, lude verschrivonge vurscrevene eluiden, wilcht gelt de elude bekanten sy weder untfangen haven und sich guider betzalogen bedanckt haven, auch in ire verschrivonge weder overlevert.

A II/11 1527

Bl. 156^r

Wilhem Staill, Rompe, Leye, Emmerich, Seichtem, Zwivell, Breidenbach, Roeß und Wyß, uff godenstach na Michaeli, anno et cetera [15]XXVII.

Johan Roide hait beleit und besichtigen laissen vurscrevene scheffen, we Hern Tilman zom Schaiffstall eme an syner kuchen den schecht am hoeffgen darweder muyre, das eme zu nae gae und ouch bynnen syne dachtruppe gemort have. Bekroent vort uff syme soller, we Her Tilman syne stoiffgen durch syne schechte geslossen und gevestiget have, have ouch syne balcken van der stoiffen durch syne wende gelacht und de zwaen offen vynsteren zugemacht und uff dem oversten soller gewyst, we de wyrme syn sy und haven synen bouwe daruff gesatzs. Und sy solten de kalle beide halden, und hait dit bekroent bis an recht.

A II/11 1527

Bl. 157^v

Overmitzs vurscrevene scheffen, deselве zyt.

Her Tilman zom Schaiffstalle hait derglichen beleit und gewyst, we Johan Roide an syme huisse de vynster unden an der straissen gemacht und gebouwet, anders dan sy vur geweist synt, also dat Her Tilmans vynster an syme huisse neit uffgayan moigen, we vur geschiet is.

Vort uffme soller, we Johan Roide synen bouwe uff und in syn huis gebouwet have, und de kallen en gesteit heij Johan neit vorder dan Johans huis gereicht hait, und vur uff der straissen glichs syme huisse neit.

Und bekroent vort, we Johan Roide synen nuwen bouwe bovent der stoiffen wider in syn hoeffgen gebouwet have, dan verkoyfft is ~~dan he solehs glichs dem alden machen solde~~, und have ouch zwey kellerlocher dar gemacht, de ouch hebevoir neit da geweist synt.

Overmitzs vurscrevene scheffen, deselве zyt.

Burgemeister Staill, Thonis zom Hirtzs, Johan Zymonis, Kirstgen zur Wynreven, van wegen des vaitzs und gemeynen, hant bekroent solchen bouwe Her Tilman zom Schaiffstalle hynder

Bl. 157^r

der burger huisse gedayn hait und sich hain horen laissen, solchs der gemeynen und zum Burgerhuis gehoeren solle. Her Tilman konde dan bybrengen, des neit en sy, steit ant neiste, dat scheffenboich uffgedayn wirt.

A II/11 1527

Overmitzs vurscrevene scheffen, deselве zyt.

Tuschent Johan Worm und syner huisfraw eyns und Hynrich zom Leopart und syner huisfraw anderdeils, umb de scheltwort und gebrechen sy under sich gehat und gedayn haven. Daromb Hynrich und syne huisfraw de anderen myt recht vurgenomen gehat, wilchen scheltwort und irthomen vurscrevene scheffen an sich genomen, ouch beide parthien den scheffen overgegeven hant zu vereynigen, de dan eynen uisspruch darover gedayn haven, nemlich also, dat Johan Worm gesprochen hait, hey van Hynrichs frauwe neit anders en weyß,

dan van eyner eirlichen frauwen, derglichen och Hynrich, noch syne huisfraw, van Johan, noch van syner huisfraw en weiß

Bl 158^v

dan van irlichen luiden.

Und damyt sollent sy gantz und zumaill irer gebrechen gescheiden und gesont syn.

Und Johan Worm sall zu desem gelaich betzalen II Overlensche Gulden.

Und Hynrich und syne huisfraw sollent ir anclaigne und gerichtsgelt selffs dragen.

Und wilche parthe dit breiche noch enheilte, solde myme werdigen Hern abt myt IIII Goltgulden erfallen syn und den scheffen myt II Goltgulden, so dick und manichmaill solchs geschege.

Nochtant solde deser spruch gehalden bliven.

A II/11 1527

Overmitzs vurscrevene scheffen gemeynlichen, deselwe zyt.

Tuscent Andreis Hoitmecher van Collen huisfraw und Joist Peler egenanter Joist vurgenant Andreis schuldich is, daromb eme overmitzs hauß, hoff overmitzs de boeden van Joist zu pende gegeven is, wilche schoilt itzunt gerechent und bekant ist, XII Overlensche Gulden, V Schilling. Synt daromb verdragen overmitzs vurscrevene scheffen, dat Joist der frauwen itzunt betzalt hait II Overlensche Gulden. So blifft noch X Overlensche Gulden, V Schilling.

Bl. 158^r

Der sall Joist der frauwen betzalen, zu Cerstmyssen irstkompt II Gulden, zu Halffasten II Gulden, zu Pynsten II Gulden, und dat andert zu sent Matheusdage irstkompt walbetzalt syn sall. Und sall ir solch leveren zu Collen in ir huiß. Geschege des neit, solde de irste zumme verloren syn.

Breidenbach und Wyß, deselwe zyt [1527].

Peter Koehirde und Tryne, syne elige huisfrauwe, hant gegeven und uffgedragen irer eynt dem anderen alle ir guit, gereit und ungereit, we sy dat itzunt hant off vorder an sich kriegen, wynnen und werffen moigen, de leste levendige hant van in beiden solchs zu keran und wenden, in wes hant de wilt und ir enenkompt. Doch hait Peter bewilliget off Tryne, eher dan Peter afflivich worde, dat alsdan iren kynderen solch dat ghene, zu irem lyve gehoirt, werden und bliven solde.

Overmitzs sementlich scheffen, deselwe zyt.

Heyntzs Acherhen hait uffgeboden de pende, eme van Johan Henselen gegeven ist.

A II/11 1527

Bl. 159^v

Johan Staill und Peter zom Wynter, burgemeisteren, uff mayndach na Remigy, anno et cetera [15]XXVII.

Anna Schopgens hait beleit myt Johan van Hamme, moilnerknecht, der gesacht hait, we hey hebevoren umbtrint im meye vergangen zu Annen vurscreven gesacht have, dat sy Ailff Walraiffs sagen wille, dat hey in de moille kome und holle syn meelle, dat sy gemalen.

Peter zom Rodenhuis, burgemeister, und Johan Henselen, kurmeister, uff mayndach na sent Gereonysdage, [10. Okt.] anno et cetera [15]XXVII.

Heyntzs Knutgen der jonge hait willen beleiden myt Vais, des halffen son uffme Dutzerhoeve, dass Heyntzs und Hennes am Dreischs, we Rurich am Dreischs gesteren, sondach, zu Knutgen vurscreven gesprochen have, als sy van der Kirchen kommen synt, ich hain dir eyndusent schillsteyne gelevert, der loynnes du myr. Solchs will ich offenbarlich nasagen. Wilcht Heyntzs Knutgen do verorkunt, dat das Heintzs uffgehaven. Hait Heyntzs Knutgen daselver vur de burgemeister laissen verboiden.

Dat zu betzuigen synt uis bliven, doch Heyntzs syner geburlicher zyt he innen gebrucht hait.

A II/11 1527

Bl. 159^r

Johan Staill und Peter zom Wynter, burgemeisteren, Thonis zom Hirtzs, Johan Roide, Johan Henselen und Heyntzs Knutgen der alde, alle vam raide, uff sondach na dem moiredach [15. Okt.], anno et cetera [15]XXVII.

Vurscrevene burgermeisteren und vame raide, mytsamt der hernknecht und statboiden, hant besichticht den doiden licham Heyntzs Vlachen, wilcher gesteren, den avent spaide, im huisse gnant Prymenoirt, doit bleven is.

Hait man an demselvigen vonden eyne cleyne wonde bovent dem memgen an syner rechter sytten und geyne wonde an dem licham neit me gefonden, und alß man sachte, deselwe wonde myt eyme spitzen brackerfelder gestechen were.

Hant vurscrevene burgemeistere van wegen myns werdigen Hern abtzs und des gerichtzs den licham zu der erden zu bestaden erloiffst.

Peter zom Wynter, burgemeister, und Johan Aldenach, uff sent Severynsavent /22. Okt./, anno et cetera [15]XXVII.

Overmitzs vurscrevene burgemeisteren ist Heyntzs Vlachen seligen tesche

Bl. 160^v

de Her Tilman zom Schaiffstalle bis an dese zyt im huisse Prymenoirt in gewairsam behalden, beseyn und darinne befonden worden im irsten, in syner teschen was, eyn buydell, in dem vynck befonden an gelde XI Albus, III Heller. Im selven buydell an gelde VI Albus, IIIII Heller.

Noch eyn cleyn budgelgen, da neit innen was.

Item, in der teschen in dem vynck befonden eyn Joichannispennynck van XXXII Albus, eyn Hornschen Gulden, und an Wyssem gelde an dryn stucken drogent V Albus.

Item, noch in der teschen eyn rolle was, syn bedeboich, eyn bryll, eyn kamp und eyn beynen paternoster.

Item, in eyme buydell eyn rechenszedell, heilt up Belen, van XXV Overlensche Gulden schoilt und VIII Overlensche Gulden tgen II oissen und etliche herynck und stockfischs.

Item, eyn cleyn schryfttaiffelgen, eyne citacio uff Thonis Nailsmyt und eyn zedell uis der a....eck.

Item, synen gurdell myt dem heuwegen[?] hatte roit hefftter.

Solcht ist noch hynder Hern Tilman in gewarsam verbleven.

Deselwe tesche myt dem gelde, we dat dan geweist ist overmitzs Hern Tilman, in biwesens des schrivers Heyntzs Flachen seligen huisfraw gelevert worden, uff Alrehilgendach, anno et cetera [15]XXVII.

A II/11 1527

Bl. 160^r

Wymar vam Loe, uff godenstach na sent Symon und Judendach, anno et cetera [15]XXVII.

Jelis Sloßmecher hait zu leisten gemant Johan Brocher, loir, vur eynen burgen vur Meus van Eitendorff eyne zumme, nemlich LI Kolnische Gulden.

Hait VIII dage dach van gerichtzs wegen.

Vur eynen wirt gekoren in Kannengessers huis.

Kost VI Schilling.

Overmitzs denselvigen, deselve zyt.

Clais Bartscherer hait zu leisten gemant Peter zu Groneck vur eynen burgen des berren[?] zu Holttorff eyne zumme van V Overlensche Gulden.

Hait VIII dage dach van gerichtzs wegen.

Vur eynen wirt gekoren in Kannengeissers huis.

Kost VI Schilling.

Zwivell, uff mayndach na Huperti, anno et cetera [15]XXVII. *[Huperti = 3. November]*

Heyntzs Knutgen der alde hait schichtong und deillong bynnen geburlicher zyt gesonnen an Johan Meuschs, syme eidomp, van den gereiden haven und guideren, Johan und syne huisfraw sament gehat und sy nagelaissen hait.

A II/11 1527

Bl. 161^v

Zwivell, uff vridach na Huperti, anno et cetera [15]XXVII. *[Huperti = 3. November]*

Her Nicolaus Beseler, prior, Her Wilhelmus van Collen, procurator, und Her Gillis van Monstereiffell, ordens sent Augustin bynnen Collen, hant schichtong und deillong gesonnen van wegen irs conventzs van Hern Gillis egnant herkomende, an Tryngen Ververs, Teille Ververs nagelaissen huisfraw, van den guideren gereit und ungereit, de eluide als oeme und moene vurscreven sament gehat und hey nagelaissen hait, Hern Gillis gebur und andeill davan.

Hait de witwe geantwort, we sy vurscrevenen convent neit davan bekenne, want solch allet ir sy, dat zu wenden und keren, solchs uis macht, gifft und uffdacht ir man seligen und sy sament gedayn haven.

Zwivell, deselve zyt.

Hynrich Striffeler hait uffgebroken solche pende, eme van Herman Schomecher gegeven is.

A II/11 1527

Bl. 161^r

Zwivell, deselве zyt.

Herman Daekuyll van Bodyngen hait zu leisten gemant Thonis zom Hirtzs vur eynen burgen Bernt Roiden, eyne koegell van IIII f. swartzs doichs.

Van gerichtzs wegen VIII dage dach.

Vur eynen wirt gekoren.

Kost VI Schilling.

Overmitzs Zwivell, deselве zyt.

Herman Daekuyll vurscreven hait zu leisten gemant Bernt Roiden eynen burgen vur Thonis zom Hirtzs, eyne koegell van IIII f swartzs doichs.

Vur eynen wirt gekoren.

Kost VI Schilling.

Deselве zyt.

Johannes Staill und Thonis zom Hirtzs, kirchmeisteren, hant zu leisten gemant Johan Wolff und Peter zom Wynter, als burgen Johengens an der Wenden, eyn zumme van L Kolnische Gulden Radergeltz und dat schriffgelt.

Vur eynen wirt gekoren.

A II/11 1527

Bl. 162^v

Deselве zyt.

Heyntzs zom Somberen hait zu leisten gemant Lomar Johan, eyn burge vur den wever van Lomar, eyne zumme van X Mark.

Vur eynen wirt gekoren.

Zwivell, uff donrestach nach Kathrine, anno et cetera [15]XXVII.

Johan, wirt zom Ißermart, hait zu leisten gemant Johan Domen, doichscherer, eyne zumme van XI malder haver, vur Peter van Kortsyffen im Nuynkirchen.

Vur eynen wirt zom Ißermart gekoren.

Hait VIII dage dach, van gerichtzs wegen.

Kost VI Schilling.

Vur demselvigen, deselве zyt.

Johan zom Ißermart hait zu leisten gemant Johan Dommen, burge vur VII malder haver, vur Johan van Baldensyffen gekoren zom Ißermart.

Hait VIII dage dach.

Kost VI Schilling.

A II/11 1527

Bl. 162^r

Johan Staill und Peter zom Wynter, burgemeisteren, uff mayndach na Cerstdage, anno et cetera [15]XXVII. Theus Kreich hait in affwesens syn swaigers Johans van Eußkirchen, und van des wegen beleitzs, gesonnen und begert an Hynrich Stryffeler und Ailffs Walraiff, als umb dat getzenck tuschent Johan vurscreven und dem jongen Johan zom Wolff, en neisten saterstach, der Kynderdach, vur dem huisse zom Wolffe geschiet is, we der junge Johan zom Woilffe uis syns vaders huïße geloiffen, dem anderen int hair gevallen und da uff synen swaiger gewont solde haven, we Theus solchs anbracht und van den anderen solchs, wes in davan kondich sy, beleitzs begert, we stederecht is.

Hant vurscrevener Striffeler und Ailff gesprochen, we er mehe, nemlich Johan Slosser, Jacop im Bruhoeve und de maigt solchs ouch geseyn haven und willent derhalver neit sprechen, de anderen sprechent myt in. Thewus det orkunden, hey des beleitz bynnen den irsten III dagen gesonnen hait.

A II/11 1527

Bl. 162ad^v [Text von anderer Hand, jedoch gleich wie S. 145^v/146^v. Nur auf Seite 145^v wird Koynrait Wymar genannt und auf 162a Koynrait Werner. Seite später mit 162a beschriftet]

Overmitzs deselvigen, vurgenante zyt.

Tuschent Hynrich und Otto Overstoultzs, gebroderen, ist verdragen solchen inganck als umb ire gebrechen sy zuvreden worden synt und angenomen haven. Hant hude, datum, verwilligt beidesament. Ist auch vuraffscheit gegeven, sy dairtuschent sent Michellsdage irstkompt endigen sollen. Dan geschege des neit, soll der inganck, wie vur geschiet, alsdan van neten syn, und eder aldan uff synen vryen vois stayn soll.

A II/11 1527

Thonis zom Hirtzs und Johan Staill, burgemeister, uff godenstag sent Walperdagh, anno et cetera [15]XXVII.

Guitgen Loirs hait beleit myt Pauwels uff der Arcken und Werner Portzener, de gesacht haven, we Koynrait Werner an mayndach nei[s]t vergangen, den avent spade, umb de IX oren, so de duyren geslossen waren, vur ire huis komen sy, da Lodwich zu Hoymbergh und Tryngen, syne huisfrauwe myt by gewest syn.

Spricht Pauwels vurscreven we Konraadt vurscreven Guitgen Loirs eyn hoir geschulden have.

Spricht Werner, we Konrait sy en hoir geschulden have und darzu

Bl. 162adr *Rückseite. Ohne Nummerierung.*

gesprochen, wa Wylhem Vlach sy hey en sy neit vroym genoich, heruis zu kommen.

Hait Guitgen vorder beleit myt Hans van Sygen und Thonis van Nuymbrecht, iren zwen knechten, de gesprochen haven, we Konrait vurscreven Guitgen gescholden have eynen uysgeschotte paffenhoir und Wilhem Vlach eynen vleischverkeuffer. Bistu froym, so kom heruis, und da en solle geyn guit van komen.

Spricht Rutger van Gleem mit Glaßmechers, we Lodwich zu Hoymbergh untgein irem huisse gesacht have zu Koynrait, ehr swaiger, wat wylt ir machen, hait ir den duvell myt daryn.

Tryngen zu Hoymbergh sprach, lever broder, umb den doit, den Got geleden, sy doch zuvreden, gedaynde dyngere en synt neit zu wederdoyn.

Johan van Zwyvell und Wymar vame Loe, uff dynstach na sent Vitzdage, anno et cetera [15]XXVII.

Johan zom Isermart und Hilgen, syne elige huisfrauwe, hant guitwillencklichen eyndreichtlichen geloifft, de kalle an der moillen, irem gehuisse in der Cluysengassen, beneven Peters zom Wynter und Leyngen, eluiden, gehuisse,

Bl. 162ad^b

gelegen tuschen den beyden vortan erfflich und ewincklichen zu halden und versorgen, vur sich und ire erven, bussen hyndernys und schaden Peters und Leyngen, eluden, und irer erven, umb in derhalver geyn schade an iren gehuchte gescheyn moige, we deselven eluide solch hebevoir im jair XXIII, zu sent Johans Mytzsomer overmitzs burgermeistere und rait verdragen synt, inhalt dys gerichtsboichs.

Beysell und Loe, denselven dach.

Her Herman Blanckenbergh, vicarius der vromyssen, hait in der zyt hei des wall moegich und mechtich was, gegeven und uffgedragen Hynrich, Johan Blanckenberghs son, syme maighe, solche kyntdeill Herman Blanckenberghs der zukome was und vurgenante Her Herman, syme oemen, versat und vur under pant gegeven hatte overmitzs notarius und anderer prestere und frome luide vur alsolche zumme geleyntzs geltzs vurgenant Her Herman syme maighe Herman geleynt und verlacht hait, we hey des bekante hatte, van syme Bl. 162^{br} *Rückseite*

oemen untfangen zu haven, we eme solchs van siner moder anerstorven is und vorder van synen alderen zusterven und vallen mach, neit darvan uisgescheiden.

Her Dederich Meuschs und Her Tilman zom Schaiffstaille hant betzuicht de scholt, und gelaynt gelt gewiest is hondert XXV Goltgulden, VII Raderalbus, X Heller, als Herman enwech zogh.

Peter zom Rodenhuys, burgermeister, und Johan Henselen, burgermeister, uff mayndach na sent Gereonsdage, anno et cetera [15]XXVII.

Heyntzs Knutgen der jonge hait wyllyn beleiden myt Vais, des halffen son uffme Dutzerhoeve, dass Heyntz und Hennes am Dreischs gesteren, sondach, zo Knutgen vurscreven gesprochen have, als sy van der Kyrchen kommen synt, ich hain dir eyndusent schillsteyne gelevert, dar loynnes du myr. Solchs wyll ich offenbarlich nasagen, wilcht Heyntzs Knutgen do veorkunt, dat das Heyntzs uffgehaven.

A II/11 1527

Bl. 162ad^c

Hait Heyntzs Knutgen deselven vur de burgen laissen verboiden, dat zu betzuigen, synt uysbliven, doch Heyntzs syner geburlicher zyt he inne gebracht hait.

A II/11 1527

Zwivell, uff donerstach na Agnete, et cetera XXVII.

Reynart Loir und Koynrait, syn swager van Bonne, hant rechtlich gesonnen an Heitgen van Dollendorff schichtongh und deillonge der erffguider und erffschafften, Wilhem zom Horn und Elßgen syner huysfrauwen vurscreven, Reynartzs vader und steiffmoder geweist, gehat und nagelassen haven, neit davan uißgescheiden, des de neisten, von wegen irs vaders und swegerher.

Heitgen antwort, hey have des Schemell erve van syner suster halver anerstorven sy und vorder anersterven moge, syme swager Dederich solchs eynsdeyls umb ander lieffnys, hey eme gedayn und weder doyn werde, gegeven und dat andel verkoufft, da by hey dat laisse, was Reynhart

Bl. 162ad^{er} Rückseite

und syme swager zusteit, in dem valle wylle hey sy bylaissen und umb neit an hynderen.

Deselve zeyt, vur demselvigen.

Reynart und Coynrait vurscreven hait derglichen schichtong und deillonge gesonnen an Dederich zom Hoen, solcher vurscreven erffguider.

Antwort Dederich, hey have etlich vorderunge, koufftz und vermechnys myt syme swager Heitgen gehat. Und Reynartzs vader solde myt syner huisfrau etliche gifft und uffdracht gedain haven, in den gerichtsboichern geschreven stayn solde, und zuigt des dae an, und was da eyme ader zustae, have hey ayn guit genoigen und erkenne, dat Reynart und den synen iedt zustae. Davan wille hey doyn. Dat gericht off emans erkenne billich sy van der zyt bys daezu zu doin.

Vur denselvigen, vurscrevene zytt.

Reynhart vurscreven hait geboden und dargelacht ayn Thornis Dederich

Bl. 162a^{dv} 1527

zom Hoen als vur eynen gotzhaller des kouffs, hay myt Heitgen gedayn hait und hofft, das naher zu syn dan Dederich.

Reynhart hait noch darby gelacht 1 Goltgulden geboden den Thewis Kreicht als wert vur wynkouff over dem kouffe verdayn sy und spricht weider, sy das zu clayn, wylle ine geven, nemantz van Dederich noch Thys haint sych das angenomen.

A II/11 1527

Romp und Kobbenroide, deselwe zyt.

Heitgen van Dollendorff und Greitgen, syne elige huysfrauwe hant verkoufft und uffgedragen Dederich zom Hoen, irem swaiger, ire deill des huiss zom Hoen, mit dem huyses hynden daran, in der Cluysengassen gelegen, myt backhaus und stallongen und alle irem zu und ingehoeren, neit davan uißgescheiden, nemlich de halffschit ~~van Elsgen zom Hoen~~ an vurscrevene erffschafft, we in solchs van Elsgen zom Hoen seligen vurscreven Heitgins suster anerstorven

Bl. 162ad^r Rückseite

und zugevalien ist. Gelden jars deselwe erffschafft und alynge huys mynen Heren abt V Kolnische Gulden, Martini vellich, in de Kirspellskirche III Marck.

Ist Dederichs deyll dat halffe huis vur an der straessen bys hynder weder den stall, de sytte zu der gassen, Teill Verffere huis, und den stall alleyn, dat huis hynden an der Cluysengassen, halff zu der Clusen zu, und den hoff weder der Cluysen erve, glichs dem schacht an dem hyndersten huiße. Und der perfeyen sollen dat wederdeill Reynart und de sine neit gebuchen, doen daselvige zumachen.

Volmar van der Leyen, Gauwyn vam Huyß, Beissell und Ley, vurscrevene zyt.

Tuschent Johan dem Jongen zom Wolff und Johan van Eußkirchen der slach hairreuffens und wonden halver, synt guitlich gescheiden und verdragen overmitz vurscrevene und ire vrunde ~~van Eußkirchen~~

Bl. 162ad^{ev}

zu beiden deillen. Also dat Johan van Eußkirchen dem jongen Wolff vur syn smertzen und artzsloen geven soll VI Kolnische Gulden. Und damyt sollent sy alle ire sachen strack gescheiden, gesatzs und gesontz syn und mynen werdigen Heren abt des reuffens und stechens halver beidesament bidden und gelden, dan off myn werdiger Her sust idt widers eyncher parthien wolde solde och verdedyngen und affdragen bussent den anderen. Ouch en soll geyner uff den andere, vur eme noch hynder eme, he off anderswae sagen, dat overluydt. Wilche dat van inen beide dede, den ander myt zwein erbaren bewißen mocht. Off wilcher dese scheidonge neit enhelde und herweder dede, solde mynem werdigen Hern myt L Goltgulden erfallen syn, der haldender parthien und den mechelers myt XXV Goltgulden. Nochtant solde de scheidonge strack gehalden syn und blyven.

Bl. 162ad^{er} Rückseite

Leerseite

Bl. 162adfv
Leerseite

Bl. 162ad^r Rückseite
Leerseite

Bl. 162^g
Leerseite

Bl. 162^g Rückseite
Leerseite

Bl. 162^h
Leerseite

Bl. 162^h Rückseite
Leerseite

A II/11 1530

Bl. 163adv [*eingeklebter einseitig beschriebener Zettel, 90x230 mm, Text von fremder Hand; nachträglich mit 163a beschriftet*]

Anno XXX, up donrestach na Laurencius.

Overmitz Wilhelm Staeyl, scholtis, Herman van Copbenroede, Leye, Romp, Layr, Breidenbach, Sechtem, hait Lodwich und Coinrait, gebroder, layssen beleiden und in darup bescheit gegeven, dat gehuysse overgayn Gullychs vur der Mollenportzen, beneven Volmar Leye erffschafft gelegen.

Und der scheffen gesteit dyssen zweyen gebroderen, Conraet und Lotwich, dat dat huyss gans anbouwiche ist, der schorstein balde noch felet, och dachloes an vyl enden und sunst wie vurscreven balde nederfellich weyr. Ouch behelt duysser vurscrevene scholten und scheffen diesse vurgenante gebroder by deme vurbeleide und bescheide, as up des gerichtzboich geschreven steyt.

A II/11 1528

Bl. 163^v

Wilhem Staill, vridach na Nuwenjarsdage, anno et cetera [15]XXVIII.

Johan Zymonis hait zu leisten gemant Johan zom Isermart, eynen burgen vur Hynrich Scharenbroich van Zeyndorff, eyn zume van VII Mark und 1 f. korns, minus 1 Schilling.

Vur eynen wirt gekoren.

Vur demselvigen, deselve zyt.

Item, Johan Zymonis hait zu leisten gemant Bernt Bartscherer eyne zumme van IX Mark, XXVII Heller, van wegen Hynrich van Euyskirchen.

Vur eynen wirt gekoren.

Uff vurscrevene zyt, overmitzs Staill.

Peter zu Groneck hait uffgeboiden solche wolle, als eme van Hanecken Glaßmecher vur pende gegeven ist.
Kost VI Schilling.

AII/11 1528

Bl. 163^r

Johan Staill und Peter zom Wynter, burgemeisteren, uff sent Agnetendach, anno et cetera [15]XXVIII.

Item, Tilgen Wailraffs hait beleit myt Thys Leyendecker van Dusseldorf, de gesacht hait, we gesteren, sent Sebastianusdach, na vesperzyt Loirmengen und Swertzges Herman in Tilgen huis by in in syn stoiffe kommen synt, dergestalt sy Tilgen zu archweldigen.

Have Loirmengen in by dem halsse genomen und gesprochen, du verredder. Und Herman have in by eyne armen genomen, we sy in ermorden wolden. Und so sy syne huisfrau dartuschen gevallen, und Tilgen have uis syme gewichen in Reinhart Wonderlichhs huis und sy in also entwoeden, wilchs Tilgen bermlich geclagt hait und Thys dat also myt syme eide buyt zu beweren.

Zwivell, uff donrestach na Agnetis, anno et cetera [15]XXVIII.

Johan Roide hait zu leisten gemant Dreis van Huissen vur eynen burgen, Bipgens van Bircke, eyne zumme van ICV Kolnische Gulden.

Hait acht dage dach.

Vur eynen wirt gekoren.

A II/11 1528

Bl. 164^v

Zwivell, uff donrestach na Agnete, anno et cetera [15]XXVIII.

Reynart Loir und Coynrait, syn swager van Bonne, hant richtlich gesonnen an Heitgen van Dollendorff schichtong und deillonge der erffguider und erffschafften Wilhem zom Horn und Elssgen, syne huisfrau, vurscreven Reynartzs vader und steiffmoder geweist, gehat und nagelaissen haven, neit davan uisgescheiden, als de neisten van wegen irs vaders und swegerhern.

Heitgen antwort, hey have des ghenen eme van syner suster halver anerstorven sy und vorder anersterven moge syme swager Dedrich solchs eynsdeils umb ander lieffnys, hey eme gedayn und vorder doyn werde, gegeven und dat andert verkeufft, daby hey dat laisse wes Reynhart und syme swager zusteit. In dem valle wille hey sy bylaissen und umbers neit an hynderen.

Deselwe zeyt, vur dem selvigen.

Reynart und Coynrait vurscreven hant derglicher schichtong und deillonge gesonnen an Dederich zom Hoen, solcher vurscrevener erffguder.

Bl. 164^r

Antwort Dederich, hey have etlich verdrage, kouffs und vermechnys myt syme swager Heitgen gehat, und Reynartzs vader solde myt syner huisfraw etliche gifft und uffdacht gedayn haven, in den gerichtsboicher geschreven stayn solde und zugt des daran ~~und~~ wes da eyme ederen zustae, have hey eyn guit genoigen und erkenne, dat Reynart und den synen iedt zustae. Davan wille hey doyn, dat gericht off emans erkenne billich sy, van der zyt bis darzu zu doyn.

Vur denselvigen, vurscrevene zyt.

Reynhart vurscreven hait geboden und dargelacht eyn Thornis Dederich zom Horn, als vur eynen gotzhaller des kouffs, hey myt Heitgen gedayn hait, und hofft des naher zu syn dan Dedrich.

Reynhart hait noch darby gelacht 1 Goltgulden geboden, den Thewys Kreich, als wirt, vur wynkouff over dem kouffe verdayn sy und spricht vorder, sy des zu cleyn, wille me geven, nemant van Dedrich noch Theus haven sich des angenomen.

A II/11 1528

Bl. 165^v

Johan Staill und Peter zom Wynter, burgemeisteren, uff sondach na Conversionis Pauli, anno et cetera [15]XXVIII.

Johan van Euskirchen hait beleit mit Gyßen, Hern Conradus, presenßmeister, dener, und Johan Hoiffnagell, de gesacht haven, we sy hant geseyn, dat der jonge Johan zom Wolffe, Johans son, gesteren, sent Pauwelsdach, zu hoemyssenzyt, als Thys zo Lichtenbergh syn kynt myt synen naberen zu der erden bestaden wolde, have Johan uis der ryen van den vrunden tgen dem huisse zom Leopart zu Johan van Eußkirchen, der den Mart uffqweme, heym zu gayn geroiffen, myt eyme deghen und den van Eußkirchen geiagt bis tgen den Hogensteynwech und have do myt eyme steyne na eme geworffen, aver in neit troffen.

Uff mayndach, den anderen dach, vur vurscrevene burgemeisteren.

Johan van Eußkirchen hait zu vorder konden bracht Thys Wolsleger und Ailff, smyt zom Hoyn, de gesacht haven, we sy vur dem huße zur Vulkannen haven gestanden und hetten geseyn, der jong Wolff Johan vurscreven geiagt und myt eyme steyne na eme geworffen have tgen Aldenachs huße und Hogensteynwech. Und spricht Johan myt, solchs vyll lude geseyn haven.

A II/11 1528

Bl. 165^r

Johan vam Zwivell, uff dynstach na Conversionis Pauli, anno et cetera [15]XXVIII.

Johan Staill, burgemeister, Thonis zom Hirtzs, rentmeister, Johan Henselen und Peter zo Groneck, kuyrmeisteren, hant besichtigen lassen dat loch im Thorne, dar Bestiayn van Mentzs durch Heyntzs Acherhen zu Thorme kommen und uisgebrochen was.

Hait sich de moyre im Thorne befonden, de starck und vest und neit veralt geweist is, so dat derselve Bestiayn solchs myt der zyt gebrochen und dat myt gereitschafft und argementen gedayn mois haven, so solchs neit anders zu sehen was.

Johan Henselen und Peter zu Groneck, kuyrmeistere, uff godenstach na sent Blasiusdage, anno et cetera [15]XXVIII.

Greitgen, Peter Vleischheuwers huisfraw, hait gewyst und besichtigen lassen de souwe in irem garden an moiß, roeben, moeren und anders geschat haben und an Hynrich Lymbergh garden inkomen waren. Den schaden vurscreven kuyrmeister gepoirt haven uff XII Albus.

A II/11 1528

Bl. 166^v

Deselве zyt.

Vreughen im Dalhoeve hait derglichen den schaden, in irem garden geschiet ist, beleit.

Ist van den kuyrmeisteren geacht uff III Mark.

Deselве zyt.

Peter boide hait den schaden in syme garden gewyst, in derselver slaichten geschat ist uff VI Albus, allet durch Hynrich Lymbergh geschiet ist.

Johan Staill und Peter zom Wynter, burgemeister, uff donrestach na Blasy[us], anno et cetera [15]XXVIII.

Johan Henselen hait willen beleiden, we recht is, we Johan zom Isermart en vergangen dynstach im Nuwenhuis im gelaich eme zu na gesprochen solle haven, ere und gelymp betreffen, nemlich myt Clais Lymbergh, Vais Schroder, Vreuges Johengen, Hynrich Lymbergh und Lair Johan van Wolstorff, de gesacht haven, we me gelaichsgesellen solch ir wort gehort haven. Und sy hedden sere wall gedroncken zu II off III qwart umb, und begerden daromb, solchs bis zu der ander bykomptzs stayn zu lassen und hant myt bekant, sy dat orkonde hant helffen verdragen.

A II/11 1528

Bl. 166^r

Peter zu Groneck und Johan Henselen, kuyrmeister, uff donrestach na Blasy [*Blasii = 3. Februar*], anno et cetera [15]XXVIII.

Johan Staill und Peter zom Wynter, burgemeisteren, hant richtlich doyn verbeden Johan Roiden den bouwe, hey an dem Cleynen Wydenyst in der erden am keller de gemeyne understeit, zu overbuwen und machen lassen uff eyne kuyr, van wegen der gemeynen, so manchen dach, hey na desem dage daran arbeiden leist, so manche V Schilling zu kuyr. Und derglichen Herman Wolff und anderen verboiden, neit daran zu arbeiden. Und das dar en bovent ouch so manchen dach eder zur kuyr V Schilling.

Johan Staill, burgemeister, Johan Zymonis, Johan Henselen und Kirstgen zur Wynreven, alle vam rade, uff godenstach na Appolonie, anno et cetera [15]XXVIII.

Thonis Mant van Roebait hait vurscrevene burgemeistere und vam raide gewyst den alden bouwe, nemlich syn stoiffe und den ganck, de durch fart daby und weder Theus Kreichs

Bl. 167^v

gehuiße gemeyne ist. Und we Thonis der meynongen ist, eynen nuwen bouwe daruff zu setzen, neit wider dan der alte gestanden, umb nemans hernamals eynche bekronunge noch irronge derhalver haven dorffe, hant vurscrevene vam raide solchs entlich besichtich und eyne zeichen derhalver genomen und erloiffnys gegeven weder zu bouwen und den ganck und infart der gemeynen, so hoe und wydt zu lassen, glichs deser alte gestanden hait und geweist ist.

A II/11 1528

Uff irsten vridach in der Vasten, anno et cetera [15]XXVIII.

Van gerichtzs wegen, want dat durch Johan Valckenbergh, burger zu Collen, geladen und vorgenomen ist worden, Meus Peltzers halver umb XII Goltgulden und 1 Overlenscher Gulden schoult, Meus vurscreven Valckenbergh schuldich is, huide, datum, zu pande gegeven und kostgelt daruff gegangen, Meus vurscreven huiß und erffschafft, myt dem gereiden et cetera.

A II/11 1528

Bl. 167^r

Zwivell, uff donrestach ist in der Vasten, anno et cetera [15]XXVIII.

Rurich Becker hait zu leisten gemant Coynrait Schroder, als eynen burgen vur Wolff van Molendorff, eyne zumme.

Hait vur eynen wirt gekoren zom Isermart.

Kost VI Schilling.

Johan Staill und Peter zom Wynter, burgemeisteren, Johan Henselen und Johan Zymonis, kuyrmeister, uff vridach na reminiscere, anno et cetera [15]XXVIII.

Kirstgen Loir gnant Schoiltis hait gewyst und besichtigen laissen syn huisse gnant de Alde Arcke, we hey solchs Clais Lymbergh affgegulden hait, solchs zu besichtigen, we dat huße und gebuwes itzunt steit und gemacht geweist und noch ist.

So Kirstgen solchs affbrechen wilt laissen und eyn nuwe huß weder daruff zu setzen und sonderlich eyne uffgaynde duyr gewyst tuschent dem alden gehuisse und Reynhart Loir, de uis dem alden huisse in den hoff Reynhartzs gayende und denende ist, so Kirstgen der meynonge ist, eyn duyr uis dem nuwen bouwe weder darin denende zumachen laissen.

A II/11 1528

Bl. 168^v

Overmitzs mynen erwerdigen Hern abt, Her Hynrich Hoult, proist zu Overpleis und prior, Johan Staill und Peter zom Wynter, burgemeisteren, und me anderen vam raide, uff fridach na reminiscere, anno et cetera [15]XXVIII.

Tuschent dem Bitter van Pleis eyns und Johan, dem halffen uffme Dutzerhoeve anderdeils, als umb de buytong der perde halver eder dem anderen zwey perde zugebuyt geschat, we ire buytong alsdan he bynnen Siborgh geschiet und zuvreden worden synt overmitzs ire wynkouffslude und itzt und obgenante mynem erwerdigen Hern vort Hern und burgemeister vurscreven verhoirt ist. So sich dan befonden der perde eyn, der halffen dem Bitter angebuyt hait, gestolen geweist is und de luide den geweist bewisslich nakomen synt, so dat der Bitter solch pert halff den luiden, in biwesen und van geheisch des amptmans zu Blanckenbergh, nemlich X Overlensche Gulden darvur hait betzalen mossen, und beclagt sich daby, hey des vorder und me schadens gehat have. Und der halffen darweder spricht, hey solch pert zu Siburch uff dem vryen mart gegulden, ouch de zynse davan betzalt have, myt me anderen reden und erbuyt sich des ant recht.

Hant dan noch de vrunde darin gesprochen, so verne dat eder zweyn vrunde gekoren hant und den solchs clacklich overgegeven

Bl. 168^r

haven, sy daromb zu entscheiden und eynen spruch zu doyn beiderdeils gefolglich syn und halden willen. Hait der halffen gekoren, den werdigen Hern proist zu Overpleis und Peter van Gymenich, rentmeister. Hait [der] Bitter gekoren Heyntzs zom Somberen und Rutger van Gleem, de veir dan eynen uisspruch gedayn haven, also dat der halffen dem Bitter der X Gulden vurscreven V Overlensche Gulden wedergeven sall und darzu noch 1 Overlenscher Gulden vur den schaden Bitter clagt, hey derhalver gehat have und sust de VI Goltgulden off VI malder weyß, der halffen in der buytongan dem Bitter zugeven solde, sall ouch noch lude ihs wynkouffs gescheyn. Hemyt sollen sy aller irer sachen und schadens, we de geweist daherkomende, gescheiden, gesatzs und gesont syn. Und wilcher van in beiden solchs breiche und darweder dede, solde myme erwerdigen Hern myt XX Goltgulden und den mechelens myt X Goltgulden erfallen syn, so dick und manichmaill solchs geschege und geclagt worde. Nochtant solde de scheidonge vollentzoigen und gehalden werden.

A II/11 1528

Bl. 169^v

Gauwyn vam Huyß, scholtis, Wilhem Staill, underschoultis, Wilhem Beissell, Johan vam Zwivell, Herman Kobbenrode, Wilhem Ley, Wymar vam Loe und Rolant van Breidenbach und Richart van Wyß, uff mayndach na dem sondage oculi, anno et cetera [15]XXVIII.

Tryngen, nagelaissen wedewe Teill Verffers seligen, dem Got gnade, ist ankommen als recht ist, van crafft solcher gifft und updracht Teill Verffer, ir man selig, und sy sament gedayn, irer eynt dem anderen upgedragen hait, de leste levendige hant van in beiden, alle ire guider, gereit und ungereit, zu kerden und zu wenden, neit davan uisgescheiden war und in wat hant de wilt, lustet off enenkompt, lude des gerichtsboich, nemlich de erffschafft, myt namen das huyß den Groissen Kreuwell, am Martte, beneven dem Cleynen Kreuwell und der gassen tuschent dem Horne gelegen. Gelden datselve huis in de vromyß IIII Mark, minus III Denares in Unße Lieverfrauwenloffbroderschafft CI Schilling, dem proist zur Croicht IIII Schilling und dem kuyrmeister VI Schilling, myt Lantzenbachs erve tgen dem Hospitaill. Gelden in de Kirspekskiche V Schilling, myt Vylenbachs erve, myt syme zubehoer. Gelden jars in dat Hospitaill XV Albus, dem

kuyrmeister IX Heller und dem sengher III Schilling, und dan vort myt allen gereiden haven und guideren und pantschafft, wa de dan gelegen synt, neit uisgescheiden.

A II/11 1528

Bl. 169^r

Romp und Kobbenroide, deselве zyt.

Heitgen van Dollendorff und Greitgen, syne elige huisfraw, hant verkeufft und uffgedragen Dederich zom Horn, irem swaiger, ire deill des huß zom Horn, myt dem huisse hynden daran in der Cluysengassen gelegen, myt backhuis und stallongen und alle irem zu und ingehoren, neit davan uisgescheiden, nemlich de helffschit an vurscrevener erffschafft, we in solchs van Elsgen zom Horn seligen vurscrevenen Heitgens suster, anerstorven und zugefallen ist.

Gelden jars deselве erffschafft und alynge huis myme Hern abt V Kolnische Gulden, Martini vellich, in de Kirspelskirchen III Mark.

Ist Dedrichs deill dat halffe huis vur an der straissen, bis hynden weder den stall, de sytte zu der gassen, Teill Verffer huß, und den stall alleyn, dat huys hynden an der Cluysengassen halff zu der Cluysen zu und den hoff weder de Cluysen erve glichs dem schecht an dem hyndersten huis und der perfeyen uis dem hoeve, und nemantz uis dem hoeve perfeyen sollen dat wederdeill, als Reynart und de syne sich neit gebruchen, dan deselvige zumachen.

A II/11 1528

Semtliche scheffen vurscreven, deselве zyt.

Joiswyn Doichscherer hait weder gegeven und upgedragen Johan Dussell van Sollyngen de momperschafft tgen Ailff van Ronderoide, hey eme vur upgedragen hatte umb Johan Dussell nu selffs zu uisseren und verdedyngens, als recht ist.

A II/11 1528

Bl. 170^v

Beissell und Ley, deselве zyt.

Bernt Roide und Girtgen, syne elige huisfraw, hant verkeufft und uffgedragen Johan Roiden und Coenen, eluiden, ir huß gnant der Cleyne Wydenyst, beneven dem huyses zu Wydenyst und dem Lewensteyn, am Martte gelegen, myt syme zubehoer und gerechticheit. Gelden jars datselfe huis in dat Hospitaill IIII Mark.

Rompe, Loe und Kobbenrode, deselве zyt.

Neisgen, Heynen huisfraw zom Hasen, hait gegeven und uffgedragen Thonis, wirt zu Windeck, und Tryngen, syne elige huisfraw, irem swager und suster, ire zwey huissers vur der Molenportzen, scheissende an der Buchmoelen erve, beneven Joris erve van Ratyngen, beheltnys ir des cleynen huisgens des anhangs ir levenlanck zu gebruchen und langer neit. Gelden jars de alynge erffschafft in den Seligen Dall IIII Mark, des Waellen zwen kinderen II Mark, Martini vellich. Und darvur sollent de vurscrevene elude sy ire levedage lanck myt essen, dryncken und cleideren na noitorfft versorgen.

A II/11 1528

Bl. 170^r

Gauwyn vam Huyss und Beissell, deselве zyt.

Tryngen, Teill Verffers seligen nagelaissen witwe, hait gemompert und volmechtich momper gemacht Thonis zom Hirtzs, burger zu Sibergh, und Johan Meye, irem swaiger und dener, alle der sachen, de witwe bynnen Sibergh und darbussent itzunt zu doyn hait und vorder zu doyn kriegen worde, neit davan uisgescheiden, zu gewynnen und zu verlesen, ouch davan zu geven und zu qwiteren off zu nemen, ader vorder anderen derhalver vort zu momperen, zu doyn ader laissen, allet davan moige und macht zu haven und dat ayn argelist.

Loe und Breidenbach, deselве zyt.

Lodwich Roitgen und Metze, syne elige huisfraw, hant gegeven und uffgedragen irer eynt dem anderen alle ire guit, gereit und ungereit, we sy dat itzunt hant und vorder hernamails an sich wynnen und werffen moigen, neit davan uisgescheiden, de leste levendige hant van in beiden solchs zu keran und zu wenden, na alle irme walgevallen und enenkomptzs.

A II/11 1528

Bl 171^v

Beissell und Kobbenrode, deselве zyt.

Godart van Dollendorff und Tryngen, eluide, hant verkeufft und uffgedragen Johan Roiden und Coenen, syner eliger huisfraw zom Schaiffstalle, iren garden, nemlich de helffschit des gardens tgen der Moillen, Jan Raymen[?] hoeve, beneven Geislair gelegen, we in solchs van Stuppelhannes und syner huisfraw, irem swegerheren und swegerfraw, vader und moder, anerstorven und zugefallen ist.
Wanerdizabunt.

Vur denselven scheffen, gnante zyt.

Bertram Oem Johan und Styngen, syne elige huisfraw, hant verkeufft und uffgedragen Johan Roiden und Coenen, eluiden vurscreven, dat veirdehalff an dem vurscrevenen garden. Ist nemlich dat achtedeill, we in solchs van irem anchen und anchfrawen zuerstorven is.
Wanerdizabunt.

Deselve zyt [1528], vur den scheffen.

Johan Blanckenbergh, Lysbeth, syne elige huisfraw, und Hynrich, des obgenanten Johans son, hant verkeufft und uffgedragen Johan Roden und Coenen, eluiden vurscreven, ire deill an vurscrevenem garden, als nemlich dat deill Hynrich obgenant und Herman, syme broder seligen daran zuerstorven

Bl. 171^r

und zugefallen ist.
Wanerdizabunt.

Vur denselvigen scheffen, genante zyt.

Bertram Oem Johans und Styngen, syne elige huisfraw, hant verkeufft und uffgedragen, Godart van Dollendorff und Trynen, syner eliger husfraw, ire gerechticheit und deill am huyß zom Doym, am Martte, beneven dem huisse zu Overoide gelegen. Ist nemlich dat achtedeille an vurscrevenem huisse, we in solchs van Stuppelhennes und syner huisfraw vurscreven Styngens anchherchen und Freugen zuerstorven ist, myt lust und unlust. Gelden jars dat alynge huis uff den Berch III Mark und in de vroemyss der Kirspelskirchen III Mark.

Wanendizabunt.

A II/11 1528

Wilhem Staill, Beissell und Zwivell, deselve zyt.

Pilgrim Schomecher und Styne, syne elige huisfraw, hant erfflich verkeufft und uffgedragen Herman Vlachen, Hermans seligen

Bl. 172^v

son und Greitgen, syner eliger huisfraw seyß Marck erffrenten und jairgulden werongen, we altzit der betzalogen bynnen Colne genge und ganckber, jars uff sent Girdruitdach vellich, uis irer alynger erffschafft, als nemlich huyß, hoff, garden und alle syme zu und ingehore, bussen der Holtzportzen, tgen dem Hilgenhuisgen, tuschten Roill Becker, dem Strentzer und Slosgens erffschafft gelegen.
Gelofft werschafft zu doyn.

Sementliche schoultis und scheffen, itzunt dit gericht he geweist synt.

Schoultis und scheffen vurscreven hant besichticht den bruwekessell im huisse zom Hoen gestanden, Elsgen seligen nagelaissen.

Erkant den selven kessell vur gereit guit. Also dat Dedrich zom Hoen als vur gereit guit sich des gebruichen mach zu syme gevallen.

Ist geschiet int genwordicheit Dedrichs vurscreven und Reynartzs Loirs, beider parthien beленоне и erkentnys vurscreven der scheffen, umb irer beider gelt darzu gegeven.

A II/11 1528

172ad [*eingeklebter Zettel 125x100mm, doppelseitig beschrieben, jedoch verschiedene Handschriften.*

Nachträglich mit 172a beschriftet.]

[Vorderseite]

Vur schoultys und Beyssel.

Groyss Peter van Gummersbach und Elsgyn, syn huysfrauwen, haynt upgedragen Kyrstgen Schoultys und Geyrten, syner huysfrauwen, syn hoyffgen myt synem uysganck, gelegen an Reynaert Loyrs schoeren und an Teylen Pelerss erve und dat kleyn Werckhuysgen up der Segen und noch X Albus renthen in Peterss waenhuyse und hoff.

[Rückseite; schlecht lesbar, verblasste Schrift]

Item, Woulsdorp gedaen eynen Kolner Gulden, Mathei, noch up deselve tzydt II ffierdel?] saltz, noch eine Gulden[?] up Hunffer kyrmyß, noch an leder XIII Albus, noch I ffierdel?] saltz, Cosine und Damiam, noch III Albus, noch tzo fulwyn XVI, noch eime verlacht tzo dem schatz XI Marck, gegeven Jacob Call

A II/11 1528

Bl. 172r

Beissel und Ley deselve zyt.

Kirstgen van Steildorf und Elsgen, syne elige huisfraw, hant verkeufft und uffgedragen Peter van Pleis zu Overoide und Juitgen, syner eliger huisfraw, eyn stuck lantz umbtrint V Schilling, myn[der] off me, am Rudenbuchell over der Sygen, bussen dem zuyne gelegen, lanxs myns werdigen Hern abtzs und der van Ness[el]rode erve und weder Kirstgens vurscreven gude gelegen.

Gauwyn, scholtis, und Wilhem Beissell, vurscrevener zyt.

Groß Peter van Gomersbach und Elsgen, syne elige huisfraw, hant verkeufft und uffgedragen Kirstgen Schoiltis, loer, und Gutgen, syner eliger huisfraw, ire hoeffgen myt synem uisganck, gelegen an Reynart Loers schuyren und an Tilgen Pellers erve ire deill, als nemlich dat drytte deill an vurscrevener erffschafft, und darzu noch verkeufft, dat cleyn Werckhuysgen an der Sygen und noch X Albus renthen, alle und icklichs jars in Peters vurscreven waynhuisse und hoff, da itzont Qweryn Loer innen want.

A II/11 1528

Bl. 173^v

Wilhem Staill, scholtis, vurscrevene zyt.

Her Hynrich Stuppelgans hait zu leisten gemant Johan Geyrlach und Johan Knuitgen, synen eidomp, als burgen vur Godart van Dollendorff, eyne zumme van dem kauffe zom Doyme van VII Kolnische Gulden. Der L Gulden betzalt uff rechenschafft. Vur eynen wirt gekoren.

A II/11 1528

Deselve zyt. [uff mayndach na dem sondage oculi, anno et cetera [15]XXVIII.]

Theill Moilner zu Huetten und syn swaiger hant den kummer und verbot Johan Pylsticker van Duisseldorf in Ailff Snytzlers seligen, syns broders, huis gedayn entsatzs, umb den rechten genoich zu syn. Ist burge Meus Becker.

Gauwyn und *[Wilhem] Staill*, Ley, deselve zyt.

Johan Henselen hait vur pende hynder gericht gelacht, umb dat erfolgnys Heyntzs Acherhen, uff in als burge gedayn, nemlich vunff cleyner selveren schaelen, neit glichen grois, hait Heyntzs overmitzs Staill uffbieden lassen.

Kost VI Schilling und zu verkundigen.

Solche pende hait Henselen overmitzs Wilhem Staill, Seichtem und Breidenbach weder untfangen, dynstach na Andreas, anno et cetera [15]XXVIII.

A II/11 1528

Bl. 173^r

Loe und Wyß, deselve zyt.

Jorgen zu Kyr und Engen, syne elige huisfraw, hant verkeufft und uffgedragen Joenen zom Esell und Ailcken, eluden, eyn stuck gardens hynder irem huisse zom Spegell, beneven Joenen vurscreven und Greitgen zom Hirtzs gelegen, we sy den garden da haven, neit davan uißgescheiden, darzu verkeufft eyn spyntgen beneven irem huisse an der Portzen zom Cleynen Hirtzs zu.

Beissel und Wyß, deselve zyt.

Lodwich Hoitmecher und Elsgen, syne elige huisfraw, hant myt consent, wanst und guden willen Trynen Holtzenheuwers, Lodwichs moder, verkeufft und uffgedragen, Johan Roiden zom Schaffstalle und Coynen, eluden, syn kyntdeill als nemlich dat dritte deill an irem garden in der Vlachen an der Gronecgassen, bussen der Gromelportzen, tuschent der vromyssen erve und Johan Roiden vurscreven, schiessende vur weder Wilhem Verffers garden, we in solchs van irem vader Lyßgen vader halber anerstorven und van irer moder und swegerfrau vurscreven zusterven mach. Geldend de alynge garde in der Sengerye IX Denares.

A II/11 1528

Bl. 174^v

Overmitzs sementliche scholtis und scheffen vurscreven.

Tuschent Johan Roiden und den erven zum Groissen Wydenyst myt dem Cleynen Wydenyst, des bouwes halver, hant vurscrevene scheffen dat scheffenboich derhalver horen, lesen und bescheiden, so de zom Groissen Wydenyst de want tuschent dem Cleynen buwen mach, wilcher want sich des Cleynen Wydenyst myt zubebouwen gebruichen mach, doch bussent des anderen schaden.

Solchs hait der scheffen bescheiden, dem noch so zu gescheyn. Und moige daromb Johan Roide in de want myt bouwen wie vurscreven. Und sust mach Johan Roide den Cleynen Wydenyst bouwen so hoe und neder eme beliefft und recht is. Und der kallen halver tuschent in beiden sollent de im Groissen Wydenyst halden, lude des scheffenboichs. Und myt dem hyndersten gehuisse, solchs Johan Roide oven hait und de anderen unden, daromb mach eyn den anderen myt recht zu sprechen.

Vurscrevene scheffen, deselве zyt.

Tuschent Johan Zymonis und Styngen Kannengeissers umb irer beider huisser, gnant de Raven, am Hoynermart gelegen des

Bl. 174^r

bouwes und kallen halver, tuschent in beiden, synt daromb bescheiden, dat sy de kalle tuschent in beiden halden und machen sollen, bussen eders schaden. Und mach auch eder so hoe bouwen als eme beliefft, allet dem anderen unhynderlich an syme gebouwes zu syn.

Zweivell, Leye und Beissell. deselве zyt.

Meus Peltzer und Neisgen, syne elige huisfraw, hant verkeufft und uffgedragen, Johan Vlachen und Gritgen, syner eliger huysfrau, ire zwey huysser myt dem hoiffgen vur der Colner Portzen, hart beneven Wynantz Smytz huiß, by der Syghen gelegen, we in solchs van Neisgens alderen anerstorven und zugefallen ist. Gelofft werschafft zu doyn.

A II/11 1528

Rompe und Kobbenrode, deselве zyt. [uff mayndach na dem sondage oculi, anno et cetera [15]XXVIII.] Meus Peltzer van Molenbeck und Neißgen, syne elige huisfraw, hant verkeufft und uffgedragen Johan Vlachen und Gritgen, eluden, IX Albus erffrenthen uis irem huisse vur der Colner Portzen, tuschent Johan Muyre und Johan Kannenskirper gelegen, myt dem zubehoer, zu Halffasten zu betzalen und myt uis irem gereiden am Deirbongart, beheltnis den eluiden myt IX Kolnische Gulden aff zu loesen.

[Nachtrag:] Vacat und ist affgeloist am XXIX decembris, anno [15]L.

A II/11 1528

Bl. 175^v

Wilhem Staill, Kobbenrode, Zwivell und Rompe, vurscrevene zyt.

Myn werdiger Her abt hait laissen besichtigen im Rosenkrantz we de muyren tgen Johan Zymonis huisse geborsten, auch de balcken am understen geboyve myt dem geboyve, und auch de balcken dar bovent am anderen geboyve gewychen syn. Und solch schade sy geschiet ursachen des kellers, /den/ Johan Zymonis nuwe graven und machen hait lassen. Hant vurscrevene scheffen geseyn, de muyren we vurscreven geborsten syn, aver myt geseyn de borste van alders auch uff synt geweist, want de vurmals zugesleiffert geweist synt, und de underste geboyve myt dem balcken ist gewychen und de balcken am oversten geboyve synt vrischs gewychen, we sich dat offentlich seyn leist.

Deselве zyt.

Johan Zymonis hait geweist unden in syne keller, dat der reghen und wasser uis der soen tuschent dem Rosenkrantz dardurch in synen keller daruwer derglichen uff syme soller gewyst, de ancker uis myns Hern abtzs gehuisse in syn huiß gemacht, durch dat zulaissen sy verdedyngt eyn werdige Hern abt altzit de soe vryhalden soll, /damit/ Johans erve derhalve geyn schade en geschee und

Bl. 175^r

hait vorder gewyst durch syne perfeye, we de muyren in der soen an syme huisse und och an myns werdigen Hern gehusse zubrochen synt und vorder fuyll werden, myns Hern schulde halven, und derglichen solchs durch Johan Vlachen huiß baß laissen besichtigen und gewyst.

Rompe und Zwivell, deselве zyt.

Vais van Fleugeroide, schroder, und Merge, syne elige huisfraw, hant verkeufft und uffgedragen XII Albus erffrenthen Meus Becker und Druitgen, syner eliger huisfraw, uis irem huisse gnant dat Alde Slichthuis,

beneven Meus vurscreven huisse gelegen, uff Unser Lever Frauwendach Lichtmissen vellich, wilcht datselve huis ouch gegulden gehat und damyt verschreven steit, dat Meus doch eyne zytlanck uis syme huisse gegeven umb verdrach sy zusament under sich hatten, dan nun wederomb uis Vaiss huisse gegeven soll werden in de Cluße, we solchs in dem scheffenboich geschreven steit.

A II/11 1528

Bl. 176^v

Vur scholtis und scheffen vurscreven gemeynlichen.

Tryngen, Teill Verffers nagelassen witwe, hait gesprochen by der wairheit und irem eide und den eidt geboden zu doyn, der clagen burgemeisteren und rait an mynen werdigen Hern abt bracht sy, belangen dat sy darinnen geyn wyssen gehat, also dat sy solchs nemans geclagt noch anbracht have. Dan solchs hetten vurscrevene bussen irem wyst gedayn.

Volmar van der Leyen, Gauwyn vam Huyß, Beissell und Ley, vurscrevene zyt.

Tuschent Johan dem jongen zom Wolff und Johan van Euskirchen der slacht, hairreuffens und wonden halver synt guitlich gescheiden und verdragen overmitzs vurscrevene und ire vrunde zu beiden deillen, also dat Johan van Euskirchen dem jongen Wolff vur syn smertzen und artzloyn geven soll VI Kolnische Gulden. Und damyt sollent sy alle irer sachen strack gescheiden gesatzs und gesont syn und mymen werdigen Hern abt des reuffens und stechens halver beidesament bidden und gelden, dan off myn werdiger Hern sust iedt widers eyncher parthien wolde solde eder och verdedyngens und affdragens bussent den anderen, och en soll geynger uff den ander

A II/11 1528

Bl. 176^r

vur eme noch hynder eme, he aff anderswae sagen, dat ovell luydt wilcher dat van in beiden dede, der andere myt zwen eirbaren bewißen moicht, off wilcher dese scheidonge neit enheilte und herweder dede, solde myme werdigen Hern myt L Goltgulden erfallen syn, der haldender parthien und den mechelers myt XXV Goltgulden. Nochtant solde der scheidonge strack gehalden syn und bliven.

Peter zu Groneck und Johan Henselen, kurmeister, uff saterstach na oculi, anno et cetera [15]XXVII.

Peter Lair vur der Molenportzen hait richtlich laissen verbieden, Kirstgen Schoiltis, loir, den overbouwe, als nemlich de kroymbielen derlagen[?] an der soeen tuschent in beiden, eme so manchen dach hey daran machen leist, na desem dage zu kuyr V Schilling und den meisteren so manchen dach, de daran arbeiden, na deser zyt auch zur kuyr V Schilling. So Peter spricht geyn kruymbelen an dem alden bouwe, aver de soee geweist, dan deselve in beiden zustendich sy.

Kirstgen Scholtis hait solchs verburgt an recht. Ist burge Jong Volmar Loir und Johan Becker vur der Molenportzen.

A II/11 1527

Bl. 176ad

[eingeklebter einseitig beschrifteter Zettel, 75x130mm; nachträglich mit 176a beschriftet]

Vur de XXV Goltgulden zu Pynsten Tryngen Verffers zu betzalen ist burge Dedrich zom Horn und Johan Zymonis der jonge, ader der renten zom Gryff, in dem Johan neit burge syn wilt.

Scheffen he waren Staill, Gauwyn, Beissell, Romp, Zwivell, Kobbenrode, Ley, Loe, Wyß, und Breidenbach. Macht eder eyme II Goltgulden, VIII Albus.

A II/11 1528

Bl. 177^v

Johan Staill und Peter zom Wynter, burgemeisteren, uff saterstach na oculi, anno et cetera [15]XXVIII.

Johan van Aich, nailsmyt, und Elsgen, syne huysfrauwe, hant beleit myt Dreis van Huissen und Elsgen, syner huisfrauwe, de gesacht haven, also Johans vurscreven huisfrauwe, itzoint huide, desen dach, zu der vesper hait gayn willen, have Johan van Roynmonde, smyt, uis syme huisse komen uff de straissen und de vrouwe geweltlichen in syn huis hain willen.

Als sy neit darin kommen, have der smyt de frauwe myt eyner fuyst weder dat heufft geslagen und sy auch myt eyme vois getreden und gestoissen.

Zwivell, uff dynstach na letare, anno et cetera [15]XXVIII.

Koynrait Wymar hait uffgeboden de pende, eme van Thonis Nailsmyt gegeven synt.

Kost V Schilling, zu verkundigen VI Denares.

A II/11 1528

Bl. 177^r

Kobbenroide, Loe und Breidenbach, uff vurscrevene zyt.

Herman Moilner an der Alderportzen und Kathrina, syne elige huisfraw, hant verkeufft und uffgedragen Ailff Walraiffs und Lyßgen, syner eliger huisfraw, solch huyß und gartten, we de erffschafft dan gelegen is, tuschent Tryngen erve am Wynterberghe und Joris van Boistorff vur der Holtzportzen, nemlich de helffschit an vurscrevener erffschafft, we de vurscrevene elude solchs roider Johan uis dem kirspell Eitorff Ropichteroide affgegulden haven. Und Herman hait gelofft, Ailff davan schadelos zu halden.

Peter zom Wynter, burgemeister, uff dynstach na Judica, anno et cetera [15]XXVIII.

Tuschent Lysbeth, Herman Woilffs huisfraw, und Wylhem Wynterschit, irs eidomp, als umb dat geleynde gelt Lyßbeth Wilhem geleynt, auch dat kynt sy eme getzoigen, und eynen tabbert ire doichter ir besatzs solde haven. Darumb Lysbeth Wilhem vurscreven myt rechte vurgenomen hait, hant sich doch vur gericht, vur Peter, dem boiden, derhalver guitlich gescheiden, nemlich also dat Wilhem ir vur de III poncten vurscreven geven sall II Kolnische Gulden. Und damyt solle sy allet irer sachen vurscreven gentzlich gescheiden syn. Und de II Kolnische Gulden hait Wilhem vurscreven der frau itzunt, in biwesen burgemeister vurscreven und Peter, des boiden, betzalt.

A II/11 1528

Bl. 178^v

Johan Henselen und Peter zu Groneck, kuyrmeisteren, uff Mendellavent, anno et cetera [15]XXVIII.

Wilhem Vlach hait bekroynt und gewyst an syner erffschafft beneven Wilhem Wynterschit, we Wilhem tuschent iren beiden garden den laighsteyn uißgegraven have. Und solchs sy itzunt so vrisch geschiet, want der steyn noch hude da gestanden have. Und dat sy geschiet bussent syn wyst und willen.

Wilhem Wynterschit antwort und hait weder eynen steyn darbracht gehat, off dat eyn laighsteyn sy. Und hey en have solchs neit gegraven. Syne huisfraw moige solchs gedayn haven. Hant vurscrevene beide parthien in bywesen der kuyrmeister do vorder da graven laissen und etliche me cleyner steyne, och eynen alden post, in der erden verfuylt, vonden, und solchs also weder zugeworffen.

Vur denselvigen, deselve zyt.

Wilhem Wynterschit hait gewyst und bekroynt, der want tuschent eme und Wilhem Vlach, we Peter Loir seligen de eme zu nae, dwile hey des geyn verstant en hette, gebouwet have und de dachtroeppe davan uff dat syn valle.

A II/11 1528

Bl. 178^r

Peter zom Wynter, burgemeister, Thonis zom Hirtzs und Johan Roide, rentmeister, und Kirstgen zur Wynreven, uff sondach quasimodogenity anno et cetera XXVIII.

Overmitzs vurscrevene burgemeister und vam raide, mytsamt der hernknecht und statboiden hant besichticht eynen doiden licham eyns alden mans, uiswysende in der Syghen tgen dem Kalckthorme am Dierbongart befonden ist, in synen alden cleyderen und myt syme gurdell umbgurt, da[r]jan eyne tesche gehangen, darin befonden XII Albus.

Ist verorlofft van wegen myns werdigen Hern abtzs und des gerichtzs zu der erden zu bestaiden.

Johan Staill, burgemeister, Peter zu Groneck und Johan Henselen, kuyrmeister, uff mayndach na quasimodogeniti, anno et cetera [15]XXVIII.

Thonis Mant hait gewyst solchen nuwen bouwe, hey tuschent eme und Thewus Kreichs gehuisse uffgesatzs hait, als nemlich den ganck und infart vur an der straissen, tuschent in beiden und we Thonis unden da de kroymbeln des nuwen bouwes wenden etzt und stoiffe gemacht hait, syn houltz daruff zu legen, wilchen Bl. 179^v

Thewus, als hey clagt, an neisten saterstach affgehauwen und gesplickt have et cetera und hey neit nederter de infart bebouwet, dan ouch de alte gestanden have, davan do eyn zeichen gehauwen sy worden.

Vurscrevene burgemeister und kuyrmeister synt gestendich, dat Thonis den nuwen bouwe und etze neit nederter gemacht have, dan auch der alte gestanden hait, we vurscreven.

A II/11 1528

Johan Staill und Peter zom Wynnter, burgemeisteren, Thonis zom Hirtzs und Johan Henselen, uff mayndach na quasimodogeniti, anno et cetera [15]XXVIII.

Overmitzs vurscrevene burgemeisteren und vam raide ist solche nagelaissen guide Hern Jaspar, officiant zu Sigbergh, geweist paistoir zu Kudekoven, des ghenen hey alhe zu Sibergh gehat, besichtigt und befonden, we herna voulgt.

Zom irsten, des ghenen Beilgen Jucks syne maigt geweist, uis dem huisse zor Vynthen gedragen in Wilhem Smytzs huys, nemlich eyn bette van XV stryffen, myt pulle und kussen, zweyn meissiger kessell, eyn zynnen Bl. 179^r

kwart kanne, eyn drypintkanne und eyn zynen beirpotte, dry zynen schuttell, der zwa cleyn synt, zweyn zynen teller, eyn koymgen, eyn zynen luchter, eyn braitpan, eyn kufferen duppen, eyn messich hantfas und veir groisser boicher, in breder gebonden. Solchs ist van den kirchmeisteren bekumert worden umb gelt, der Kirchen, zugehorich Hern Jaspar seligen uffgehauen hait.

Sprechent de boiden, we solchirst van Bielgen Jucks vurscreven und Wilm Smyde bekumert sy.

Im huisse zur Vynthen befonden in der stoiffen eyn kyste was in eyn hantweilgen myt frentzen, eyn kyste zugehorich Hern Bertram, cappelyn. De hait ouch de zu sich genomen, eyn veireckige schyffe, ronde schyffe, 1 holtzen letter, V kufferen duppen, 1 kufferen hantfas, VIII zynen vleischschuttelen, 1 butterteller, 1 koymgen, IIII moißschuttelen, IIII mostertzschuttelen, VIII zynen teller, 1 saltzvaß, VIII zynen kannen, grois und cleyn, 1 zynen wykesselgen, 1 blechen luchter, 1 zynen luchter, II kufferen degell, 1 kufferen leffel, 1 kufferen becken, 1 kessell duppen, IIII kessell.

Im scheffgen in der stoiffen neit nutzberlichs II brantrichter, 1 urhaich, II grois roister, 1 braitspys, 1 schepbecken, 1 alde pan, 1 beirschyff, 1 scheiffborde, 1 vleischstander, etlich boicher, gebonden und ungebonden, alt und nuwe, 1 beslagen kystgen, was neit in, 1 bet und betstat, 1 taiffell myt II schragen, II claffkordien, III voigen und 1 kyste beslossen, zugehorich syn sallmeister Johan Snytzer.

Dit vurscreven ist bekomert van wegen myns wurdigen Hern abtzs und na van wegen den kirchmeisteren.

A II/11 1528

Bl. 180^v

Des Johannes Furstenbergh, abbas, Herr Conrady Kobbenrode, presensmeister, Her Dadenbergh, proist, Hern Zulgh[?] und Her Wedersteyn, proist zur Crocht, uff godenstach na quasimodogeniti, anno et cetera [15]XXVIII.

Tuschent Theus Kreichs und Thonis Mant, irer gebrech des bouwes halver Thonis tuschent in beiden gedayn, herkomende wilcher gebrechen beide parthien itzunt myme erwirdigen Hern abt overgeven haven eynen spruch vorder darin zu doyn.

Demna hait syne Werdicheit affscheit gegeven Thonis an dem bouwe van nu an, neit vorder zubouwen laissen. Syne Werdicheit wilt solchs besichtigen, ouch lude zu sich nemen solchs besichtigen laissen und in alsdan sagen, we sy sich halden sollen.

Johan vam Zwivell, Johan Staill und Peter zom Wynter, burgemeisteren, uff dynstach na cantate, anno et cetera [15]XXVIII.

Herman Moilner an de Alderportzen und Girde, syne elige huisfraw, hant gegeven und uffgedragen irer eynt dem anderen alle ire guit, gereit und ungereit, we sy dat itzunt hant und vorder an sich wynnen und werffen moigen, neit davan uißgescheiden, de leste levendige

Bl. 180^r

hant van in beiden, de zu kerden und zu wenden in wes hant de wilt, zu alle irme walgevallen und enenkomptzs. Ist georkunt overmitzs Zwivell und Leye, dynstach nach Andree, anno et cetera [15]XXVIII.

Johan vam Zwivell und Wymar vamme Loe, uff dynstach na vocem, anno et cetera [15]XXVIII.

Jorghen zu Kyr und Engen, syne elige huisfraw, hant verkeufft und uffgedragen Kirstgen van Steildorff und Elsgen, syner eliger huisfraw, ir huiße gnant zom Spiegell, tuschent dem Cleynen Hirtzs und Joynen erffschafft zom Esell, in der Molengassen gelegen.

Gelden datselve huyß jarlichs VI Mark Joynen vurscreven.

Overmitzs vurscrevene scheffen, deselve zyt.

Jelis Sloßmecher hait uffgeboden solche pende, eme overmitzs de boden van dem Brocher Loir gegeven ist, vur scholt, nemlich LI Kolnische Gulden, uff rechenschafft van Meus van Eitorff herkomende.

A II/11 1528

Bl. 181^v

Deselve zyt.

Thilman van Gleen und Kathrine, eluide, hant bekant schuldich zu syn Joncher Johan vam Zwivell vurscreven, so der itzunt Ruyters gewyß ryden wilt XXIIII Kolnische Gulden, wilche gelt vurscrevene elude gnanten Joncher Zwivell uff sent Mertynsdach irstkompt geloiff hant zu betzalen und es dan betzalen willen sonder langer vertzoch.

Overmitzs vurscreven, deselve zyt.

Heyntzs zom Somberen hait zu leisten gemant Johan Henselen vur eyne zumme XX Mark, als eyn burge van wegen syns broders.

Vur eynen wirt gekoren zur Blomen.

Kost VI Schilling.

A II/11 1528

Overmitzs vurscrevene scheffen, deselven dach vurscreven.

Peter Wever genant Leugebacken van Egelstorff und Merghe van Reide, syne elige huisfraw, hant gegeven und uffgedragen irer eynt dem anderen alle ire guit, gereit und ungereit, besoicht ader unbesoicht, we sy dat itzunt hant off vorder hernamails an

Bl. 181^r

sich wynnen und werffen moigen, neit davan uißgescheiden, de leste levendige hant van in beiden, solchs ir levenlanck zu irer lyfftzuicht, als nemlich de erffschafft zu gebruichen und langer neit, dan de gereide guider de leste levendige hant zu keren und wenden, in wes hant de wilt, zu alle irem walgevallen und enenkomptzs, doch na irer beider doide, dat Baltasar, der vurscrevenen Mergen neve, zuvoir uis und van iren nalaissenden guederen haven soll XII Goltgulden, in dem hey asdan selffs qweme und dan noch im leven were und de andere gueder asdan fruntdeillich syn sollen, daran Baltasar vurscreven glichen wall syn andeill haven soll.

Thonis zom Hirtzs und Peter zom Wynter, burgemeister, uff fridach na exaudi, anno et cetera [15]XXVIII. Volmargen Loir hait willen beleiden und des beleitz gesonnen de wilchen de zyt neit by den hant waren, we Peter Snormecher en godenstach neist vergangen, im huisse zom Wynter gesprochen have zu Volmargen, du und alle de loir synt myteynander bedreger und boißwichter, wilcht hey verorkondt have.

A II/11 1528

Bl. 182^v

Johan van Zweivell, uff godenstach na Pinxsten, anno et cetera [15]XXVIII.

Rurich Becker hait uffgeboden solche pende, de eme van Coynraadt Schroder as burge gegeven synt.

Johan Henselen und Johan Zymonis, kuyrmeister, uff mayndach na octava Pinxsten, et cetera XXVIII.

Johan Becker hait richtlichen laissen verbeden, Kirstgen Clapperbach, de muyre under der swollen an der soee an Kirstgens nuwen gehuisse, tuschten in beiden, neit daran zu arbeiden noch arbeiden laissen, so manchen dach zu kuyr V Schilling und Daverkuissen myt synen knechten so manchen dach de daran arbeiden herna, so manche V Schilling zur kuyr.

A II/11 1528

Zwivell und Loe, uff mayndach na corpus Christi, anno et cetera [15]XXVIII.

Koynrait Wymar und Thonis Nailsmyt hant gerechent vur vurscrevene scheffen de schoult vam oissen.

Daromb Koynrait Thonis gepant, och richtlich hait uff

Bl. 182^r

bieden laissen. Und wes an richtlichem schaden bis hude, datum, daruff gegangen ist tgen dat, gheve Thonis eme, des gegeven und itzont gegeven hait. Also, dat Thonis dem genanten Koynrait noch schuldich bleven is XIII Mark, de hey bynnen eyme maynde betzalen soll. Und soll darzu Hynrich zom Leopart vertzeitzgeltzs geven V Mark. So Thonis solch bynnen dem maynde sonder vorder richtlich gedrenge zusament betzalt, soll eme Coynrait der zummen alsdan IX Albus inen laissen. Aver so Koynrait solchs myt den scheffen de pende zu schetzen na dem maynde uisseren moisse und uisserde, alsdan solde Thonis de volt zome we vurscreven betzalen und Koynrait eme dan neit zu kurten schuldich syn, en soll we solchs van beiden partien vur vurscrevene scheffen verwilkurt und ingegangen haven, darzu den vurscrevenen scheffen ir moehe herzukomen II Mark, itzunt sent Blasiusdach, anno et cetera [15]XXIX, Staill hergewilliget.

Kost II Mark, vertzert XIII Albus, schriver VI Schilling. Factum over all XIX Mark, 1 Albus.

Hait Dreis, bode, vur pende in de herberch zom Leopart gelevert 1 quartkan, eynen luchter, II saltzsvaß, 1 pan, II degell. Ist den boiden bevolen vorder als overman vur de vurscrevene zumme pende zu leveren, ader sy davar zu sytzen. Des wynts untfangen XI Mark.

A II/11 1528

Bl. 183^v

Peter zom Wynter, burgemeister, und Johan Staill, rentmeister, uff donrestach octavan corpus Christi, anno et cetera [15]XXVIII.

[der gesamte hier folgende Text der Seite ist von oben nach unten durchkreuzt]

Heyntzs zom Somberen hait beleit myt Vais Schroider, Gehart van Engelskirchen, Greta van Molenbeek und Eille uis dem kirspell van Gommersbach, syne jongen und maigde, de gesacht haven, we Lanen Johengen-

van Buwell en dynstach vergangen, so idt vry was, vur dat huyß zom Somberen komen sy, dar Heyntzen huisfraw an irer duyr an de straissen gestanden und have sy gegwitzs. Do have sync huisfraw gesprochen, ganek, ieh en kan dir neit gedancken. Do have Johengen gesprochen, so kan ich eyn leitgen, heischt duysent duvell. Jac, als du myr de kertzen uffsatzte und wultzs van myr gehyd syn. Ich en wulde dich neit gehyen, und ieh en kondtzs ouch neit gedoyen. Und heddes du myr noch also vyll kertzen uffgesatzs, so en wulde ich doch neit doyn und en kondtzs ouch neit gedoyen. Wileht have Johengen me dan
 Bl. 183^r [der hier folgende Text ist die Fortsetzung des Textes von Seite 183v, ist jedoch nicht durchstrichen]
 eynmaill gesacht. Solchs clagt Heyntzs de schentliche wort.
 Vurscrevene burgemeistere, in affwesens des gerichtzs, und des zu urconde hait Johan Staill synen namen myt syns selffs hant unten an dese schrift getzeichnet, daromb want Heyntzs selffs gerichtzschrifer ist und de vurscrevene solchs by iren eiden und wairheit beweren.

[am linken Seitenrand ist ein Unterarm mit einer auf den Text weisenden Hand gezeichnet]
 [Nachtrag:]

Ich, Johan Stael, myn hantsaiche. Herna, na oculi, saltz du de verantweronge clair vynden.

Johan vam Zwivell, Thonis zom Hirtzs, burgemeister, und Johan Roide, rentmeister, uff dynstag na sent Margretendage, anno et cetera [15]XXVIII [Margaretha = 13. Juli].
 Bernt Roide hait beleit myt Wynant Schelten, Dreis van Huyssen und Joiswyn Doichscherer, de gesacht haven, we Johan van Euskirchen, Peter Kreichs eidomp, en neisten sondach na mytdage vur dem huisse zom Horne Bernt vurscreven gescholden habe und have zu eme gesacht, du haist by myr gedayn, als eyn boißwicht und we eyn

Bl. 184^v

verreder.

Bernt spricht myt, we Peter Kreich, Dederich zom Horn und Kirstgen Acherhenne solchs ouch gehort haven, den hey zu deme beleide myt dem boiden beschickt. Synt aver neit kommen, dan der alte Kreich. Der neit hait willen sagen. Solchs Bernt an syme rechten unvergessen, dan batlich zu syn.

Bernt spricht vorder, we hey Johan Eußkirchen den morgen myt dryn naberen, nemlich Clais Lymbergh, Lomar Johan und Bernt Bartscherer beschickt have, off hey solcher reden, hey den avent we vurscreven gesacht have, ouch noch gestendich syn wille off neit. Den have hey geantwort jae, und zuigt sich des an de vurscrevene dry manner.

Zwivell, deselve zyt.

Clais Lymbergh hait zu leisten gemant Peter Kanffenheuwer, van wegen Johans Pelers, syns broders, eyne zumme, nemlich X Mark und 1 clude wollen.

Vur eynen wirt gekoren.

A II/11 1528

Bl. 184^r

Zwivell, uff sent Jacopsavent, anno et cetera [15]XXVIII.

Johan van Euskirchen hait zu leisten gemant Lodwich Mudder vur eynen burgen van VII Overlenschen Gulden, 1 Ort, uff rechenschaft, van wegen Thonis Holtzenheuwer.

Vur eynen wirt gekoren zur Blomen. Hait acht dage dach.

Kost VI Schilling.

Overmitzs denselvigen, uff vurscrevene zyt.

Johan van Eußkirchen hait zu leisten gemant Peter Nuwedde eynen burgen Lodwich im Jonckersbroich, eyne zumme van XIII Albus.

Vur eynen wirt gekoren zom Isermart.

Kost VI Schilling.

Deselve zyt, uff vurscrevene scheffen.

Johan van Eußkirchen vurscreven hait zu leisten gemant Johan Kanffenheuwer vur Lodwich im Jonckersbroich, burge, de zumme V Mark, 1 Albus.

Vur eynen wirt gekoren zom Woilff.

Kost VI Schilling.

A II/11 1528

Bl. 185^v

Thonis zom Hirtzs und Peter zom Wynter, burgemeistere, uff godenstach na Vincula Peter, anno et cetera [15]XXVIII.

Peter Strentzer hait sich beclagt, we Daym Wever in in syme huisse geweldiget und eme vast overlast darinnen gedayn und in in eynen arm gehauwen, we hey vurscrevene burgemeistere itzunt blodich und blaew gewyst und getzoyn hait.

Der Strentzer vurscreven hait solchs itzunt beleit myt Heyntzs van Nuymberich, Roill Becker, Adam, syn son, Clais Schoymecher, Peter Kremer und Jorgen Schoynmecher, de gesacht haven, we sy haven gehort eyn geruycht und gerept in des Strentzer huyß. Ist Roell und syn son darzukomen und haven geseyn, dat Daym da in des Strentzers huisse untzuchtich geweist sy und haven in gescholden, hey dryff der dynge zu vyll.

De anderen vurscreven sprechent, we sy geseyn haven, dat Daym myt eyme groissen metze uis des Strentzers huisse uff die straissen komen sy und zu dem Strentzer gesprochen und eme eyne gaffell gelangt, dat hey sich nu werre.

A II/11 1528

Bl. 185^r

Overmitzs minen erwirdigen Hern abt, Hern Hynricus Hoilt, proist zu Overpleis, prior Thonis zom Hirtzs, burgemeister, Johan Staill, rentmeister, und Bernt Roide, vort me andere vam raide, uff sent Laurentiusdach, anno et cetera [15]XXVIII.

Tuschent Johan zom Wolff eyns und Peter Kanffenheuwer anderendeils. Als umb ire irthomen der verdrage und uißspruch tuschent in beiden hevur geschiet, des Hegeners guit halver, zu Mollendorff herkommen. Wilche verdrach itzunt vur obgenantem myme erwirdigen Hern und burgemeistern vurscreven verhort ist, sprechende, dat Johan zom Wolff des gutzs zweyn morgen haven solde, der eyner, genant der lange morgen. Und umb de gereide guider van Hynrich van Lair solde Hynrich denselven Johan und Peter dan van eyns geven VI malder korns, und de Johan zu leveren, wilchs korn Johan vur sich solde haven IIII malder. Und dat andert II malder solde Kanffenheuwer vurscreven werden und dat under penen und verbonde dem Hern und Mechelers in beiden verdragen. Solchs steit zu erkentnys und willen myns wurdigen Hern und umb ire gebrechen.

Synt affgeverdigd van vurscrevenem myme erwirdigen Hern abt, vort dem proist,

Bl. 186^v

dat Johan und Peter vurscreven de beide verdrage, der erffschafft und gereiden guitzs halver tuschent in gescheynt, vort halden und vollentzeyn sollen und eder daby zu bleven. Und als umb de II malder korns, Peter van den VI malder vurscreven werden solden, de Johan noch hynder sich hatte, ist verdragen, dat Johan solch korn zom besten haven und behalden soll, zu den zerongen und unkost seder den verdrage, we huide, datum, bynnen Sibergh daruffgegangen is. Wilch zerong itzunt gerechent ist XXVI Mark, II Albus, dat Johan uysrichten und betzalen soll, bussent vorder Peters zu doyn. Dan de II malder korns soll Peter Johan darzu zom besten laissen. Sust soll nemans van in beide den anderen vorder myt soicken beklagen noch vurnemen dan bynnen Sibergh und umb de erffgueder off sy dayromb zu doyn kriegen, im lande zu Blanckenbergh, dar de dynckplichtich gehorich synt, hant gelofft obgenante myme erwirdigen Hern, ouch burgen gesatzs, dem so zu doyn. Vur Johan ist burge Bernt Roide, vur Peter ist burge Johan Peler, syn broder.

Und hemyt sollent sy alle ire sachen schadens und unkost halver gentzlich gescheiden und

Bl. 186^r

verdragen syn und sich vortme naberlich und burgerlich halden. Und wylcher dit breiche, eyniche der vorverdrege off desen uisspruch, solde verfallen syn in de pene we vurscreven und in desem myme erwirdigen leven Hern myt X Goltgulden und den mechelens myt V Goltgulden. Nochtant solde dese verdrage und affscheit gehalden werden.

Overmitzs mynen erwirdigen Hern Johannes Furstenbergh, abt, Hern Kobbenroide, presentzmeister, Joncher Volmar van der Leyen und Ailff van Hillessem, uff saterstach na sent Johan Untheuffdong, anno et cetera [15]XXVIII.

Tuschent Hern Tilman zom Schaiffstalle pastor eyns und Johan Roiden anderdeils, irer gebrechen des erffkouffs des Groissen Schaiffstals und den bouwe tuschent in beiden geschiet, we de gebrechen dan tuschent in swebende, neit davan uisgescheiden, hant beide partien solchs itzunt clacklich overgegeven, myt halm und monde, als Her Tilman gegen obgenantem myme erwirdigen Hern abt, also dat synce Erwirden zwey man nemen soll. Und Johan Roide hait gekoren und angeven Hillessem vurscreven und soll darzu noch Bl. 187^v

eynen man keesen. We de veir man solch ire gebrechen dan setzen und stellen werden, sollent sy beiderdeils zuvreden myt syn und dem also nakomen. Solche bykomptzs steit zu myns erwirdigen Hern gevallen.

Wilhem Staill, schoultis, sondach sent Andreisavent [*Andreas = 30. November*], anno et cetera [15]XXVIII. Heyntzs Acherhen hait zu leisten gemant Thilman zom Hirtzs vur eynen burgen, eyne zume van VI Gulden und 1 vaß, van wegen eyns van Ockenroide.

Vur eynen wirt gekoren zum Leopart.
Kost VI Schilling.

A II/11 1528

Zwivell und Leye, uff dynstach na Andree [*Andreas = 30. November*], anno et cetera, XXVIII.
Johan Kesselsleger und Engen, syne elige huisfraw, hant verkoufft und uffgedragen Dederich zom Horn und Eiffgen, syner eliger huisfraw, iren garden vur der Colner Portzen, an der Syghen, tuschent dem presensmeister und dem Hospitalsgarden gelegen. Gelden jars derselve garde sent Joistbroderschafft, uff affloeße II Albus.

A II/11 1528

Bl. 187^r

Wilhem Staill, schoulten, Richart van Wyß und Thomas Roeß, uff dynstach na Andree [*Andreas = 30. November*], anno et cetera [15]XXVIII.

Greitgen Schelten, Thewus Kreichs huisfraw, hait gegeven und uffgedragen Thewus vurscreven, irem huiswirt und iren zusameten kynderen solche kyntdeill, ir van Tryngen, irem kynde, van Johan Schelten, irem vurhaußwirde, na doide syns vaders anerstorven und zugefallen ist, eyme ederen zu syme rechten.

Deselvige zyt.

Jonge Johan Knutgen hait uffgeboiden solche pende eme van Koynrait Overstoltz gegeven ist.
Kost VI Schilling.

Vurscreven zyt, overmitzs Wilhem Staill, schoulten.

Kirstgen Klapperbach hait zu leisten gemannt Reynart Loir als burge vur Boißhennen huisfraw Greta, jairs II Overlensche Gulden, zu betzalen bis ir alonge zumme betzalt ist, we sy verdragen synt.

Kost VI Schilling.

A II/11 1528

Bl. 188^v

Wilhem Leye, Zwivell und Breidenbach, uff vurscreven dach.

Johan van Seilbach gnant Wolff, hait beleit und betzuigt myt Greitgen Delfensche, de gesprochen hait, we Metzgen des alden lantschivers seligen doichter, hebevoir vur guider zyt vergangen, bynnen nachtzs, umbtrint zu halver nacht eyns, vur ir huiß kommen sy und angedeopt. Have Greitgen vurscreven uffgestanden und beseyn wer da were. Do have Metzgen gehat V kessell, eyn groiß zyne schuttell und etliche kufferen duppen. Have Greitgen gefraigt, wa sy damyt herqweme. Do have Metzgen geantwort, solchs have sy gepant. So ist solchs de nacht da verbleven. Den morgen have Greitgen solchs Zylien zom Leopart gesacht, de das do ouch weder geholt und zu sich genomen have. Das erbuit sich Greitgen myt irem eide zu beweren.

Wilhem Staill, deselvige zyt.

Nesa Zorns hait zu leisten gemannt Bernt Roide eynen burgen vur
[Text bricht hier am Seitenende ab und wird auf Seite 188^r nicht fortgeschrieben]

A II/11 1528

Bl. 188^r

Wilhem Staill, Wilhem Leye, Johan vam Zwivell, Seichtem, Roeß, Wyß und Breidenbach, uff vurscrevener zyt.

Tuschent Kirstgen zur Doiffen eyns und Johan Nuysgen, syme swaiger anderdeils, umb dat gelt van irem erffkouff, Johan syme swaiger affgeguldene, doch unbetzalt hait. Daromb Kirstgen in myt recht vurgenomen und de Ilden uff in gedyngt. Synt daromb hude, datum, van gericht dan in der guitlichkeit, overmitzs vurscrevener scheffen und Thonis zom Hirtzs, burgemeisters, verdragen, wilchen vurscrevene scheffen, nemlich dryn scheffen und genante burgemeister, den IIII manne, sy solchs overgeven hatten. Hant ouch gelofft beide parthien dem uißspruch genoich zu doyn, zu halden und zu vollentzeyn, so vyll eynen ederen dat berort. So dan de schoult heufftzomme Johan syme swaiger schuldich wass, LVI Kolnische Gulden Raderalbus, vur ederen Gulden der zomen Johan syme swager vur vurscreven scheffen betzalt hait XVI derselver Rader Kolnische Gulden. So blifft noch XL Kolnische Gulden Radergeltzs. Der Bl. 189^v

sall Johan eme geven uff sent Johansdach Mytzsomer, XIII Gulden zu Cerstmyssen neist darna, XIII Gulden und zu sent Johansmyssen Mytzsomer neist darna, XIII Kolnische Gulden, allet Radergelt, off dat wert darvur. Dat macht zusament XL Kolnische Gulden, doch na ederem termynnage eynen maynt ungeverlich. Und off Nuysgen der termyn eynchen neit enbetzalte we vurscreven idt, de irste off der ander, alsdan sall der

schoultis vurscreven, overmitzs syn recht, zu gesynnen, Kirstgens off der syner erloiffnys und pende geven laissen van Nuysgen, vur de alynge unbetzalte zomme. Und alsdan solde Nuysgen geyne stonde noch dach we vurscreven de betzalange haven.

Zwivell und Wyss, uff vurscrevene zyt.

Johan Nuysgen und Thrine, syne elige huisraw, hant verkeufft und uffgedragen Heyntzs Knutgen dem jongen und Kathrinen, syner eliger huisraw, ir huiß und garten in der Uilgassen, beneven Heyntzs egenante erffschafft gelegen, nemlich de helffschit an vurscrevenem huißerve und garten, we in solchs van dem jongen Johan Knutgen zu deille gevallen is.

A II/11 1528

Bl. 189^r

Zwivell, Roeß und Wyß, uff vurscrevener zyt.

Elßgen Nyß hait verkeufft und uffgedragen Heyntzs Knuitgen dem jongen und Tryngen, syner eliger huisraw, ir huiß, gehuisse und garten vur der Holtzportzen, an der Gebrantergassen gelegen, darzu ½ fiertel lantz am Thonißberghe, an Heyntzen bitze gelegen. Gelden jairs dat egnante halff virtell lantz am Thonißberghe, an Heyntzen bitze gelegen. Gelden jars dat egenante halff virtell lantz IIII Schilling uff den Berch. Und dat huiß und garten vurscreven jars gelden XII Albus, derfrauen zur Scheeren. Wilche beide grontzynsse Heyntze betzalen und ouch de gehuchter buwich halden soll, bussent der frauwen Elßgen Nyß schaden, aber beheltlich der frauwen am huisse vurscreven und eyn ortgen gardens daran zu irer lyfftzucht zu gebriuchen.

Wilhem Leye, Zwivell, uff vurscrevene zyt.

Coyngen, Wolters Schotенbecker seligen dochter, hait gegeven und uffgedragen Johan Zymons, irem huißwirde, alle erve und erffschafft und brive und sigell, ir van iren alderen anerstorven und zugevallen Bl. 190^v

synt, wilcher sy moigich und mechlich is, neit davan uißgescheiden.

Overmitzs Joncher Volmar Ley, amptman, Peter van Gymmenich, rentmeister, Peter zom Wynter, burgemeister, uff vurscrevener zyt.

Umb solch ordell, versigelt van den scheffen, Hern Jasper, officiant zu Sibergh, seligen, van den scheffen, Elßen Beckers seligen uffdacht betreffen, erlangt und na syme doide im huiß zu der Vynthen befonden, wilcht ordell Herman van Rongen, pastoir zu den Apostelen bynnen Collen, itzunt gelevert ist, myt dem underscheide, dat hey burgen gesatzs hait, solchs breiffsader de sache betreffen, myn erwirdigen Here abt, syn Gotzhuis noch syne burgere brot noch schaden van haven noch kriegen sollen, ist burge Thys Peltzer und jonge Schemell Johan.

Zu gedem Juncher Leyen vur eynen sadell, eyme rittermeissigen man zusteit, by syme sadeller zu Collen zu qwitien. Ist burge Johan zom Haesen.

A II/11 1529

Bl. 190^r

Zwivell, uff fridach na Agneten Virgins, anno et cetera [15]XXIX.

Peter Smyt hait uffgeboden solch pende, eme van Thonis Smyt gegeven ist.

Kost VI Schilling.

Overmitzs denselvigen, deselve zyt.

Johan Zymonis der jonge hait uffgeboden solche pende, eme van Herman an der Alderportzen gegeven ist. Kost VI Schilling.

Deselv zyt.

Styngen Kannengeisser zom Leopart hait uffgeboden solche pende, ime van Thonis Nailsmyt gegeven synt. Kost VI Schilling.

Wilhem Staill, sent Blasiusdach, anno et cetera [15]XXIX.

Clais Bartscherer hait zu leisten gemant Hancken Glaßmecher, als burge vur VII Mark, van wegen des halffen zom Heyngen.
 Vur eynen wirt gekoren.
 Kost VI Schilling.

Zwivell, vridach na Judica uffzubieden. Kost VI Schilling.

A II/11 1529

Bl. 190a

[eingeklebter einseitig beschriebener Zettel. Nachträglich mit 191a beschriftet.]

Zwivell und Romp, godenstach na cantate, anno et cetera [15]XXIX.

Clais Bartscherer hait solche pende van Hancken Glaßmecher schetzen lassen. Pantgelt vur und na II Albus.

An gericht zu verboden II Heller. Zu schetzen van der Mark 1 Schilling, facit III Albus.

Hant geschat eyne wysse, schaitze vur XX Albus, eyn kufferen dupgen van IX punt, kost IX Albus, eyne quartkan, eyne quart zynen kop und eyne zynen schuttell vur XXVII Albus, V Heller. Dat geschatzt zusament IX Mark, II Albus, V Heller.

Dreit Clais heufftzome myt gerichtz kostgelt we vurscreven VIII Mark, VI Albus, II Heller. Darzu dat schetzen zu verkundigen VI Schilling. Ist damit glich.

A II/11 1529

Bl. 191^v

Staill, deselве zyt.

Peter zom Aren hait zu leisten gemant Johan zom Isermart, als burge vur II Kolnische Gulden, Gysen van Altzenbach im Overoide.

Vur eynen wirt gekoren.

Kost VI Schilling.

Zwivell, uff sondach na Blasy [*Blasii = 3. Februar*], anno et cetera [15]XXIX.

Johan zom Isermart hait zu leisten gemant Hupricht am Thonißberch vur eynen burgen Joist Peler, und III zygenvell und VIII Albus.

Hait VIII dage dach. Vur eynen wirt gekoren.

Kost VI Schilling.

Zwivell, deselве zyt.

Johan Roide hait uffgeboden solche pende eme van Heman am Thonisberch gegeven synt.

Kost VI Schilling.

Deselве zyt.

Johan Roide hait uffgeboden solche pende eme van Johan Zymonis gegeven synt.

Johan Roide hait uffgeboden solche pende eme van Theus Kreich gegeven ist.

A II/11 1529

Bl. 191^r

Wilhem Staill und Zwivell, uff irsten donerstach, anno et cetera [15]XXIX.

Hynrich uffme Scheide hait zu leisten gemant Johan Brocher als burge vur Bitter van Pleiß, vur IIII Overlensche Gulden.

Vur eynen wirt [gekoren].

Vur denselvigen, deselве zyt.

Heyntzs zom Somberen hait zu leisten gemant, Arnt Schoynmecher, burge vur Wilhem van Menden, vur VII Mark, minus 1 Albus:

Vur eynen wirt gekoren.

A II/11 1529

Wilhem Staill, schoiltis, und Johan vamme Zwivell, uff mayndach na Invocavit, anno et cetera [15]XXIX.

Vurscrevene schoultis und scheffen, mytsamt der hernknecht und statboiden, hant besichticht den doiden licham Heyntzen van den Bucken, wilcher en neisten saterstach en avent im Seligen Daill van Palant, wirt zu der
Bl. 192^v

Warden, myt eyme pyll geschlossen und derhalven gesteren, sondach, den avent, gestorven ist. Hant man am licham befonden de wonde des pyls under syme mauell und uff dem heuffde eyne cleyne wonde, myt dem stelenboigen geslagen. Hant vurscreven scholtis und scheffen van wegen myns wirdigen Hern abtzs und des gerichtzs erloiffnys gegeven, den licham zu der erden zu bestaden.

Overmitzs scholtis und scheffen vurscreven, denselven dach.

Kirstgen Schoiltis hait zu leisten gemant Johan Kanffenheuwer, als burge vur Dedrich van Pleis, vur IIII burden twill, hey zu Pinsten vergangen gelevert gehat solde haven und nu X Overlensche Gulden darvur. Vur eynen wirt gekoren.

Wilhem Staill, deselve zyt.

Tuschent Joncher Johan vam Zwivell und Tilman van Gleen als umb de XXIIII Kolnische Gulden Tilman vurscrevenem Zwivell

Bl. 192^r

schuldich ist. Daromb itzunt verdragen durch bede der frunde.

So Tilman itzunt durch de boiden vur vurscrevene zumme, nemlich syn vleischs affgepan was. Also dat Tilman vurscrevene zome zu Paischen irstkompt betzalen soll, doch zu Pinsten irst darna volgende wall betzalt syn soll. Darvur ist burge Johan Roide und Thewus Kreich.

Und Tilman hait gelofft vur vurscrevene scholtis und scheffen, off solchs van eme neit en geschege, also dat de burgen solchs betzalen moisten, sy davan allen schadelois vry zu halden und de darvur ouch in penden moigen anstont, glichs off solchs eigencklich richtlich erfolgt und uißerdynigt were.

A II/11 1529

Gauwyn und Staill, scholtiſ, Kobbenroide, Zwivell, Seichtem, Roeß und Wyß, uff dynstach na oculi, anno et cetera [15]XXIX.

Tuschent Heyntzs zom Somberen eyns und Lanen Johengen van Buwell und syner huisfraw der kumber halver Heyntzs an

Bl. 193^v

Johengen bynnen Siberch gelacht hait, ere und gelymp betreffen, ouch VII Gulden schoult halver et cetera. Und so dan Johengen eynen urfreden gedayn Heyntzen noch de syne und Johengen und de umb synentwillen doyn und laissen willen, nyrgen zu soicken noch zu schaffen dan myt recht, bynnen Sibergh, lude der urfreden et cetera und Johengen myt syner huisfraw und kynder darbovent und darna syne wyve im lande zu Lewenburgh bekummert hant und Heyntzs daromb Johengen umb dese sachen zo Sibergh myt recht zugesprochen, hait Johengen geantwort und na umb eyne guitlich scheidonge gebeden, am scholtis und scheffen, wilcht de an Heyntzen bracht, och der guitlichkeit Johengen beden halver myt begert haven. So verne dat Heyntzs des glichs Johengen an schoiltis und scheffen vurscreven gegangen synt, daromb eynen uißspruch zu doyn, wilcht de beide ouch myt halm und monde vurscrevenen scheffen overgeven haven. So dan vurscrevene schoultis und scheffen ir sachen genoichsam verhoirt, hant vuraffscheit

Bl. 193^r

gegeven, Johengen solle Heyntzen de VII Gulden scholt betzalen. Darvur solle ouch Kirstgen Clockner, der burge, stayn, dermaissen we he vur gestanden, in XIIIII dagen zu betzalen. Zom anderen, der scheltwort halver, soll Johengen Heyntzen bidden umb gotzwillen, de zu vertzyen. Wes hey darover in und syner huisfraw gesacht have, hey van dronckenschafft und van nyde gesacht. Dan hey en wysse neit van in, dan van fromen luiden. Dem hait Johengen also gedayn und hait myt darbeneven gesprochen, hey sy eyn arme meynschs, wanne hey den wyn in sich have, en wysse hey neit, wat hey doe. Dan hey bidde umb vertzichnys. Zom dritten, der urfrede halver und daromb, dat Johengen alhe uis dem komber entwychen, darvur soll Johengen dem schoiltis und dem gericht affdracht doyn, inhalt des gerichtzboichs.

Zom virden, als umb de komber im lande zu Lewenburgh Johengen syne huisfraw und kynder Heyntzen

Bl. 194^v

Tryne daselffs bekommert haven, de kombere vort den Hern rentmeister off dynger, so weme solchs zusteit, soll Johengen affstellen, bussen Heyntzen hyndernys und schaden. Und Heyntzen burgen myt eme sollent van Johengen alle der komber halver daselffs qwyt gescholden syn, de Johengen ouch also qwyt gescholden hait vur den scheffen vurscreven. Und so Heyntzs der komber schaden gehat hait, myt fullen der wyne, zerong der burgen, louffen und anders, vur solchen schaden soll Johengen eme vernioigen 1 aym wyntzs, so guit ader buyß der wyn dit jair gewassen ist, ader dat gelt darvur, wat der wyn dit jair gegulden hait, geven. Und Johengen soll sich vort aller unbilcher wort tgen Heyntzen und de syne me myden, we hey auch vur gelofft. Und wilcher van in beiden herweder dede und dys neit enheilte we vurscreven, solde unserem

erwirdigen Hern abt myt XX Goltgulden erfallen syn und dem gericht mit X Goltgulden. Nochtant solde dese scheidonge und spruch gehalden bliven ayn argelist.

A II/11 1529

Bl. 194^r

Herman Kobbenrode und Wyß, deselve zyt.

Kirstgen zom Sternen van Bon, Johan van den Bucken elige son, hait gegeven und uffgedragen dem vesten Wilhem Staill, schoultis, solche vorderonge, ansprache, recht und gerechticheit der gereiden guide halver, hey an Greitgen, Heyntzen van den Bucken, syme oemen nagelaissen huisfraw, gehat und nagelassen hait. Kirstgens vurscreven vermeinte gebur, nemlich dat halve deill davan, vurscrevenem Staill zu eigentomp gegeven hait. Und des anderen halffen deils hait Kirstgen den selven Wilhem Staill gemompert, der sachen zu gewynnen und zu verliesen und dat och myt irer beider glicher kost[en] und anlaigen.

A II/11 1529

Seichtem und Roeß, deselve zyt.

Teill Molner van Hoitte und Tryne, syne elige huisfraw, Symon van Huitte, gnant Bisterfelt, und Lyßgen, syne huisfraw, hant verkoufft und uffgedragen Meus Becker und Drutgen, syner

Bl. 195^v

eliger huisfraw, und Clais Lymbergh und Greten, syner eliger huisfraw, ire huiß und erffschafft in der Holtzgassen, tuschent dem huys zom Hoen und Meus Beckers huisse gelegen, myt syme zubehoer.

Gelden jars in den Seligen Dall XIIIII Mark, IIII Schilling, Johannis Mytzssomer vellich.

Item, Teillen vurscrevene suster Greta soll auch kommen und de scheffen erffschafft und werschafft und derglichen.

Teill van Hermerstorff und syne huisfraw, de suster Greta, hait den anderen dach uißganck und vertzich gedayn.

Overmitzs sementliche scheffen, uff vurscrevene zyt.

Tuschent Peter zu Groneck und Johan zom Isermart irer beider erffschafft, der garden und grontzs halver, hynder Haynraitzs seligen huisser hait der scheffen solchs besichticht und vuraffscheit gegeven, der scheffen blive by syme vurordell, also dat der Isermart de III Albus jars heven solle. Und Peter solle by dem gange bliven van macht irs verdags und gewyns. Sust solle eder syn bewys levendich off ligende zom neisten brengen. Alsdan wirt der scheffen in vorder sagen, we sy sich halden sollen.

A II/11 1529

Bl. 195^r

Overmitzs vurscrevene scheffen, gnante zyt.

Peter zu Groneck hait beleit und gewyst vurscrevene scheffen de kalle tuschent Johans zom Isermart huiß in der Cluisengassen und Peter vurscrevenem huiß daselffs, eme schaden davan geschee.

Hait der scheffen dem also ist befonden, und dat de dachdruppe van des Isermartzs dach uff Peters dach valle. Demna hait der scheffen bescheiden, der wirt solle syn dach darna machen, och syne kalle so wyt machen und hoe legen, also dat Peter derhalver geyne schade an syner erffschafft en geschee.

Deselve zyt, vurscrevene scheffen gemeynlich.

Johan Roide und Bernt hait gewyst und besichtigen laissen den alden bouwe des Cleynen Wydenyst halver und we in schaden uis dem Groissen Wydenyst, der kallen halver, geschiet sy.

Hait der scheffen vuraffscheit gegeven, der scheffe blive by synen vurordelen, we hey derhalver de vur als Johan Roide solchs me beleit gegeven hait. Und des hyngersten gehuisse halver solle eder den

Bl. 196^v

anderen myt recht daromb off in beliefft, anlangen.

Sust des schadens halver spricht der scheffen, seder der zyt Johan Roide dat Cleyne Widenyst gehat hait, wat schadens eme dabynnen gescheit, solle hey vorderen an den ghenen, eme der geschiet sy. Wat vur geschiet ist, der dat huiß do gehat, were eme do eynich schade geschiet, solde hey do gewyst und beleit haven, stee dem derhalver zu voederen.

Staill, Kobbenroide, Seichtem, Roiß und Wyß, vurscrevene zyt.

Johan Staill, rentmeister zur tzyt und Wynant Schelten synt vur vurscrevene scheffen kommen und gesacht, we sy itzunt durch geschickt Kathrinen zur Clocken by Greitgen zu Lewenstein geweist synt, umb zu horen, wes sy sache und bekenne. Kathrinen vurscreven irer jarlicher renthen betzalt have und och noch schuldich sy. So havent Johan Staill und Wynant vurscreven gesacht und an de scheffen bracht, dat Greitgen zu

Lewenstein vurscreven itzt gesprochen have, der termyn der VIII Overlensche Gulden synt seder der verschrivongen II termyne betzalt und neit me.

A II/11 1529

Bl. 196^r

Overmitzs vurscreven scheffen gemeynlich, deselве zyt.

Peter zu Groneck hait beleit myt Greitgen Vleischheuwers, de gesacht hait, dat sy geseyn have by leven Greitgen Hainraitzs und dwile sy da gewant have by de XXVI jair ungeverlich, dat Greitgen Haynraitzs eyne gantz hynden uis irem huisse an den Hellenputzs gebeucht have.

Soickt he bevor, im jair XXIIII, na sent Bonefaciusdage, de ouch derhalver gekont haven. Hait byeynander Peter vurscreven beleite hoirt.

Vur vurscrevene scheffen, deselве zyt.

Thys Peltzer hait uffgebroken solchen II rock und 1 karallenpaternoster, eme van Hern Johan Peffersack vur pende gegeven ist.

Kost VI Schilling syner moder zu verkundigen.

A II/11 1529

Bl. 197^v

Kobbenroide, Seichtem, Roiß und Wyß, uff vurscrevener zyt.

Johan zom Isenmart hait vur vurscrevene scheffen bracht, Thonis Holtzenheuwer myt synen soenen, de gesacht und bekant haven, dat dem Isermart solch lant over der Syghen noch verpant steit, vur de XL Gulden, we Thonis und syne huisfraw solchs hebevoir dem wirde versatzs haven, lude und inhalt des alden gerichtsboichs, derselver montzen.

Kobbenroide und Roeß, deselве zyt.

Bernt Roide und Girtgen, syne elige huisfraw, hant verkeufft und uffgedragen Peter Vlachen und Kathrinen, sine elige huisfraw, IIII Kolnische Gulden erffrenten, als XX Albus vur ederen Gulden, uff Martini irstkompt und dan also vort alle jars zu betzalen uis irem erve und guide, gnant zur Wyden, in der Uilgassen tgen over der Bach gelegen, myt syme zubehore, so we in solchs van Johan Vlachen, irem swegerhern und swegerfrauwe, vader und moder, anerstorven und zugefallen ist, und de ghene de guider besitzen, alle jar de pacht betzalen sollen, ader de eluide, so solchs unbewant blive, off Peter und Kathrine, eluide, vurscreven mogen

Bl. 197^r

sich irer renthen an vurscrevenem guide myt dem schaden bekomen, behetenys Bernt und Girtgen, eluiden, off iren erven, altzit de afflossen myt LXXXV Kolnische Gulden und dem erschenen termyne, uff Martini, eynichs jars unweigerlich zu syn.

Kobbenroide, Roeß, Seichtem und Wyß, deselве zyt.

Thys zu Lichtenbergh hait beleit myt Johan Vreugens und Hynrich Blanckenberghs son, genant Stuppelhennes, de gesacht haven, we Thys vurscreven sy vur eyme jair ungeverlich zu Severyn Bartscherer geschickt have, umb eyn geschirpt corallenpaternoster myt silveren zeichen und steyne desenis knoiffe, dat Thys sy und Severyn hynder sich have. So de zweyn de botschafft an Severyn bracht haven, sy Severyn irst zornich worden. Und na have hey gesacht, hey have ein paternoster, sy, Thys, aver hey en have solchs van eme neit kriegen, wilcht we vurscreven synt de zweyn myt iren eiden zu beweren willich.

A II/11 1529

Bl. 198^v

Vur denselven scheffen, uff vurscrevener zyt.

Bernt Roide und Girtgen, syne elige huisfraw, hant verkeufft und uffgedragen, dem eirwerdigen Hern Johannes Furstenbergh, abt des Gotzhuis zu Siberg, in nutz und behoiff derselver abdien, ir huiss myt syme zubehore, gnant der Cleyn Rosenkrantz, tuschent dem Groissen Rosenkrantz und Prymenorde gelegen, de beide huisser ouch zu vurscrevene abdien gehoren.

Gelden jars datselve huis dem presenßmeister IX Albus.

Geloiffet werschafft zu doyn.

Vur sementliche scheffen, vurscrevene zyt.

Johan van Eußkirchen hait zu leisten gemant Peter Kanffenheuwer vur eynen burgen Butzbachs Johengen van Happenschos, eyne zomme van VII Mark, V Schilling. Hait acht dage dach van gerichtzs wegen und eynen wirt.
Kost VI Schilling.

A II/11 1529

Bl. 198^r

Thonis zom Hirtzs und Peter zom Wynter, burgemeister, Johan Zymonis, Peter Vlach, Wilhem Verffer, ald Johan Knutgen, Bertram Oem Johans und noch me vromer lude, uff vurscrevener zyt.

Tuschent Bernt Roiden und Johan van Eußkirchen als umb de scheltwort Johan Bernt zu na gesprochen, we hey de beleit hait, we vurscreven. Synt daromb hude, datum, overmitzs vurscreven verdragen und gutlich vereynigt, we herna volgt. Also dat Johan zu Bernt gesprochen hait, wat hey zu Berntt gesacht have, en have hey neit in syme hertzen also gemeynt, als Bernt solchs verstanden hait. Und hait in daromb gebeden, eme dat zu vertzyen, dan hey hedde eynen guiden dronck zu der zyt gehat und hey enwysse neit anders van Bernt dan van eyme eirbaren, vromen naber und gesellen und off emans s...mo... solchs Bernt vorder vurlugen wolde, ist Johan altzit by syme eide zu behalden willich, hey des neit also

Bl. 199^v

gemeynt have, als Bernt dat verstanden hait und van eme uffgenomen ist worden. Vorder off myn erwirdiger Here off schoultis idt van haven wolde, soll Johan altzit affdragen zu bidden und gelden, bussent Bernt hyndernys und schaden. Und hemyt sullent sy gutlich vruntlich gesatz vereynigt syn und bliven. Und wilcher van in herweder dede und dys neit enheilte, solde myme erwirdigen Hern abt myt XX Goltgulden erfallen syn, dem haldende manne myt VIII Goltgulden und den mechlers myt VI Goltgulden ervallen syn. Nochtant solde dit verdrach in syner macht vollentzogen und gehalden werden.

Thonis zom Hirtzs und Peter zom Wynter, burgemeisteren, uff saterstach na oculi, anno et cetera [15]XXIX. Peter Smyt hait beleit myt Herman Wolff, Coinrait Overstoltz, Johan Leyendecker und Jasper Metzmacher de gesacht haven, we sy haven geseyn, als Peter Smyt gesteren morgen vroe vur VII oren zu der Holtzportzen uis hait gayn willen, so hey tgen meister Johan Nailsmytzs huis komen ist, sy meister Johan van der

Bl. 199^r

Portzen komen. Weren de zweyn myt worden kommen zusammen, so dat sy sich haven. Und Johans vrouwe sy uis irem huiß myt eyner gaffelen kommen louffen, damyt uff Peter geslagen. Und so de frauwe des slayns moide geweist, have sy do irem manne de gaffell gedayn. Und Johans knecht Johan sy ouch darzu kommen und have myt eyme hammer uff Peter geslagen. Peter hait myt gewyst, an den henden hey myt der gaffell gewont sy. Und myt dem hammer sy hey uff den ruck geslagen worden.

Johan vam Zwivell, scheffen, und Thonis zom Hirtzs, uff vridach na letare, anno et cetera [15]XXIX.

Teill van Hermerstorff und Elße, syn huisfraw, hant verkeufft und uffgedrangen Meus Becker und Druitgen, syner eliger huisfraw ire deill und gerechticheit an dem huiß und erffschafft Ailff Snytzlers seligen, irs swagers und oemen seligen, geweist is in der

A II/11 1529

Bl 200^v

Houltzgassen, tuschent dem huiß zom Hoyn und Meus vurscreven erffschafft gelegen, we in solchs van obgnantem Ailff anerstorven und zugevallen ist, neit davan uißgescheiden.

Gelden de alynge erffschafft jars in den Seligen Dall XIII Mark, IIII Schilling, zu Mytzsomer vellich.

Zwivell, deselwe zyt.

Johan Geislair hait zu leisten gemant Johan zom Iserenmart, eynen burgen vur Roiderman van Molenkoven, eyne zomme van XIII Kolnische Gulden, VI Albus, mynus III Heller.

Hait VIII dage dach van gerichtzs wegen. Vur eynen wirt gekoren.

Kost VI Schilling.

Deselwe zyt, vur obgenante scheffen.

Johan Geislair hait zu leisten gemant Johan zom Haesen eyne zumme van VII Mark. Burge vur den Fois van Ruschendorff.

Hait VIII dage dach. Vur eynen wirt gekoren.

Kost VI Schilling.

A II/11 1529

Bl. 200^r

Overmitzs vurschrevene scheffen, deselve zyt.

Johan Geislair hait zu leisten gemant, Thonis uffme Nuwenhoeve, als burge vur Wilhem, synen swager, im Kirspell van Muyche, fur VIII ½ Mark.

Hait acht dage dach van gerichtzs wegen. Vur eynen wirt gekoren.

Kost VI Schilling.

Peter zom Wynter, burgemeister, Johan Roide, rentmeister, uff Palmdach, anno et cetera [15]XXIX.
Jongh Johan zom Wolff hait sich gueder betzalogen bedanckt, des kombers, hey uff dat antfeltzs Peter Smyt hynder sich hatte, Hans van Overelven im Kirspell zu Nuymbrecht zugehorich, was gedayn hait vur vurscreven burgermeister und rentmeister.

Instat myns erwurdigen Hern abt, Peter van Gymmenich, rentmeister, Thonis zom Hirtzs und Peter zom Wynter, burgemeister, Johan Staill und Johan Roide, rentmeister, Johan Zymonis, kuyrmeister, Peter zu Groneck, Kirstgen zur Wynreven, Johan Girachs und Johan Zymonis, und Bernt Roide, alle vam raide uff donrestach na Jubilate, anno et cetera [15]XXIX.

Johan Henselen hait gewyst vor Hynrich zom Leopart syne huisfrauwe,

Bl. 201^v

overmitzs sich und de ire, an syme gartten an der Gromelpoertzen, by irem garden eynen post[en] dar Henselen gardenduyr ingeslossen geweist und deselve duyr in zusliessen plach, we Henselen solchs myt derselver duyr, de itzunt noch in irem alden stainde und weghen hengt, bewyst hait, und dat itzt guit zu seyn ist, bussent synen wilhen und consent, in syme affwesen, auch ayn erkentenys und erleuffnis des rechten ader emans van der Hern off stede wegen, denselven post uißgegraven. Claigt solchs myt und begert darby Hynrich und de syne solchen post weder darzusetzen, wille emans dan dar untgegen zukomen laissen, zu bykomptzs des rechten.

Hant vurscreven rentmeister instat myns erwerdigen lieben Hern, mytsamt burgemeisteren und raide vurscreven solchs Hynrich und syner huisfrauwen vurgegeven, den post weder zu setzen, we hey gestanden hait, bis zu vorder bykomptzs und besichtigung der scheffen.

Burgemeister und rait claigt myt, we Hynrich und de syne de gemeyne an der straissen och overtuyn have, darweder zu richten.

A II/11 1529

Bl. 201^r

Johan Zymonis und Johan Henselen, kuyrmeister, uff godenstach zu Pinxsten, anno et domini XXIX.

Hermans huisfraw am Zyncelputzs hait sich beclagt und beleit, we dat Johan Schomechers huisfraw ire bytze beneven ir myt zubrochen zuyne halde, also dat dat vehe dardurch gae und kruffe, we sy solchs itzunt gewyst hait. Und so have des Schomechers huisfraw ir ire breyment geslagen, dat sy derhalver ir vercken verworpen have, we naber kondich und sy sich itzont beclait hait.

Thonis Worm, burgemeister, und Peter zu Groneck, uff fridach na Pinxten, anno et cetera [15]XXIX.
Hynrich zom Leopart und Styngen, syne huisfraw, hait geclait und willen geloven myt Belen, Jacops frauwen zur Ecken, und Zylien, irer maigt. Ist Bele neit vur de vurscrevne burgemeister kommen. Hait Zylie vurscreven gesprochen, we Merge, Johan Vreugens huisfrauwe, en neisten godenstach vergangen, zom Leopart in irer moenen huis geschickt have, myt gelde umb 1 qwart wyntzs.

Have

Bl. 202^v

Styngen, ir moene, zu dem jongen gesacht, der wyn sy gehauen und droiffe und deynt ir neit zu schicken. Als ouch wair were, dat anderen auch geynen wyn da krygen hetten.

Do sy Merge heruis kommen an dat Eckenort, da de dieffsche hoir have ir geynen wyn willen schicken, und solle sy hondert droiß/[droif?] haven.

Sy, Styngen, ir moen, darna uis irem huis gegangen. Have Merge do uis dem iren kommen und Styngen in der gassen achterrucks, als Styngen clagt, myt eyme balghe ufft heufft geslagen. Und ir son have ir do eynen cluppell bracht, damyt zu slain. Und do sy Zilie, de magt, des gewar worden, darzu gelouffen, solchs geseyn,

we Merge ir moen geslagen, und have sy eyne dieffsche hoir geheischen und ir moene also do entreidt.
Solchs have Nese Zorns und Tryngen Kochs myt geseyn, de Merge myt van irer moenen hant, zeyn helffen.

A II/11 1529

Thonis zom Hirtzs und Johan Rode, burgemeister, uff godenstach Uns Hern Lichamsavent, anno et cetera [15]XXIX.

Peter van Overode, der stat gesworen bode, hait beleit myt Wilhem Artzs, Dederich Loir, Johan Brocher und Dreis, boiden, de gesacht haven, als sy

Bl. 202^r

gestern, dynstach, so dat ungeboden gedyngk gehalden, geweist, im huyss zom Hirtzs zu wyne gesessen haven. Do weren de beide boiden van dem Somerhuiss heraff kommen. Have Herman Molner an der Alderportzen do gesprochen, da kompt eyn nummergayngen und eyn klicksteyn. Have Dreis Bode do gesacht, off hey in meyne. Have Herman do gesprochen, neyn, dir will ich wyn schencken, dan dyn gesell ist eyn nummergayngen und eyn klicksteyn. Und solchs have Herman III off IIII maill gesacht.

Zwivell, uff sondach na Medardus, anno et cetera [15]XXIX.

Jonge Johan zom Wolff hait zu leisten gemant Vais Schroder, als burge vur 1 malder korns, Johan Lairman van Wolstorff.

Hait VIII dage dach van gerichtzs wegen. Vur eynen wirt gekoren.

Kost VI Schilling.

A II/11 1529

Peter zom Wynter, rentmeister, und Johan Henselen, kurmeister, uff godenstach na Viti [*Viti = 15. Juni*], anno et cetera [15]XXIX.

Johan Schomecher am Thonisbergh hait beleit und gewyst den schaden, eme in syner bytzen an der Bl. 203^v

gersten van Hama[n]s swynen gescheyn sy, de swyn hey in den Schutzhoff gedreven. Hant vurscrevener kuyrmeister den schaden besichtcht und geport uff II sumber gersten. Konnen aver neit geseyn, off idt van swynen ader anderem qwyckt geschiet sy, want sy geyne voistrappen vonden und der schade en neisten mayndach vergangen geschiet syn soll.

Deselве zyt.

Hamman hait gewyst, den zuyn an derselver bytzen, we der neit uffrechtich als sich gebure en sy. Wilchen zuyn de kuyrmeister umb her beseyn haven, und hant neit vonden, der zuyn an eynchen ende zubrochen, so dat man geseyn off spuren moige, souwe ader qwyck dardurch gegangen have. Dan sy seynt wall, idt eyn alt zuyn ist.

Vur den vurscrevenen, deselве zyt.

Hamman hait gesprochen zu Johan Schoymecher vurscreven, du hais gesacht, du vrags nyrgen na, na geynen kuyrmeisteren. De en sollent dir dyne zuyne neit beseyn. Du schysse uff de kuyrmeistere.

Wilcht hait der Schomecher verorkont myt den kuyrmeisteren und schriver et cetera.

A II/11 1529

Bl. 203^r

Overmitz Johan vam Zwivell, uff sondach na sent Vitzdage, anno et cetera [15]XXIX.

Der eirwerdiger in Got Vader und Here, Here Johannes Furstenbergh, abt des Gotzhuis zu Siborgh, myn werdiger lieber Here, leist uch allermallich und eder besonder sagen und verkundigen, angeseyn dat de myßdait, daromb dese soene itzunt geschuyt alhe in syner overicheit stat und gebiede geschiet ist, und demna ouch alhe gesoynt und ende gegeven ist, we dat dan beiderdeils parthien vrunde verdragen und ouch eder dem anderen de hant das zu vertzyen und vertzych gedayn gegeven hait, als ir itzont geseyn und gehort hant. Demna hait myn wirdiger lieber Here vurgenant demselven Bruyn Meuschs, gegenwordich he steit, ban und vreden gedayn und gyfft eme ban und vreden vur uch sementlichen, den parthien, und vur allermallich so wydt und vernne syne Erwirden des zu doyn hait und zu doyn haven mach und dat duyren und werende so lange der wynt weedt, der reyn spreit, de moelen geynt und de vrouwen kynder dregent.

A II/11 1529

Bl. 204^v

Und dat zon ewigen zyden. Und leist uch daby sagen und gebieden de soene, vort ban und vreden, also zu halden und zu vollentzeyn, wa vurgeluyt uff dat hoeste gebot syne Eirwerdicheit zu gebieden und verbieden hait, ayn alle argelist.

Zwivell, deselве zyt.

Johan Roide hait zu leisten gemant Johan zom Isermart als burge vur den Bernartzhayner im Ockenroide, vur IIII Mark.

[Vur einen] Wirt gekoren zur Blomen.
Kost VI Schilling.

A II/11 1529

Zwivell, deselве zyt.

Jong Johan zom Wolff hait zu leisten gemant Johan van Eußkirchen, als burge vur Peter Daßeler van Olhem, vur 1 malder korns.

Vur eynen wirt gekoren.
Kost VI Schilling.

Overmitzs Hern Hynricus Hoult, proist zu Overpleis, prior et cetera Johan Roide, burgemeister, Peter zom Wyntter, rentmeister Johan Zymonis und Johan Henselen, kurmeister, uff saterstach na sent Johan Mytzsomer, anno et cetera [15]XXIX.

Thonis zom Hirtzs, burgemeister,

Bl. 204^r

Hait beleit und besichtigen laissen de hoiffstat, gnant Lymbergh, tuschen dem huisse zom Moyren und Thonis Nailsmytz huisse, uff den Berch gehorende, gelegen. Und de alde muyre zu der vurscrevene hoiffstat, Lymbergh gehorende, we solchs öffentlich overmitzs vurscrevenen Hern proist vort burgemeister und rait zu seyn was, want in derselver muyren eyn schorensteyn gestanden und auch eyn vynsteren darin gemoirt, allet in de hoiffstat deynt und gehoirt. Und de soe auch des Nailsmytzs huß und de muyr zu der hoiffstat vurscrevene ge scheidet, we solchs allet itzunt eigencklich zu seyn ist.

Hait Thonis, burgemeister vurscreven, solchs daromb itzunt beleit und overmitzs vurscrevenem Hern und van raide besichtigen laissen, so Thonis der meynongen ist, eynen nuwen bouwe uff de muyr zu setzen und de muyr, da es van noiden ist, zu verbessern umb daromb vorder hernamails geyne ironge syn dorffe.

A II/11 1529

Bl. 205^v

Johan Rompe und Wilhem Leye, uff sent Peter und Pauwelsavent, anno et cetera [15]XXIX.

Clais Lymbergh van Roebsein und Greta, syne elige huisfraw, hant verkeufft und uffgedragen Meus Becker und Druitgen, syner eliger huisfrauwe, die andeill des huß, hoefftstat und garten, myt syme zubehore, Ailff Snytzlers seligen geweist in der Houltzgassen, tuschen dem huiss zom Hoyn und Meus vurscrevene erfftschafften gelegen, we sy solchs Teillen van Huitten und Symon van Huitten und iren huisfrauwen affgegulden haven, neit davan uißgescheiden.

Gelden jairs de alynge erffschafft in den Seligen Dall XIIIII Mark, IIII Schilling, zu Mytzsomer vellich.

Thonis zom Hirtzs und Johan Roide, burgemeister, uff sondach na Ulrici, anno et cetera [15]XXIX.

Vurscrevene mytsamt der hernknecht und statboiden hant besichticht den doiden licham Johan van Wynschit, Peter Kreichs knecht, wilcher hude, sondach, in den Molengraven bovent der Paffenkoillen gegangen sich zu baeden und also verdroncken ist. Hant vurscrevene syme meister erleuffnys gegeven, den licham zu der erden zu bestaden, van wegen myns wirdigen lieven Hern, des abtzs, und des gerichtzs.

A II/11 1529

Bl. 205^r

Thonis zom Hirtzs und Johan Roide, uff mayndach na sent Margretendach, anno et cetera [15]XXIX
[Margaretha = 13. Juli].

Vurscrevene burgemeistere, mytsamt der hernknecht und statboiden hant besichticht eynen doiden licham am Tryres Wyer fonden lygen, wilcher uis dem arne kommen, als zu seyn was, so eyne sichell by eme vonden wart, und gelich gestorven was, und nemans itzt en weyß wanne hey, off wer hey wer. Ist erlofft van wegen uns erwirdigen Hern abt und des gerichtzs zu der erden zu bestaden.

Overmitzs vurscreven burgemeisteren, uff vridach na Marien Madalenen, anno et cetera XXIX.

Vurscrevene burgemeisteren mytsamt der hernknecht und statboiden hant besichticht den doiden licham Tilman, Johan Bulart kyntzs, wilcht gesteren in der Sygen, als idt de koe hoeden solde, verdroncken und in

der Sygen, bovent dem soencruitzs verne befonden. Ist van wegen uns erwirdigen Hern abtzs und des gerichtzs erleuffnis gegeven, zu der erden zu bestaden.

A II/11 1529

Bl. 206^v

Thonis zom Hirtzs und Johan Roide, uff dynstach na Vincula Peter, anno et cetera [15]XXIX.

Johan zom Haesen hait vur vurscrevene burgemeister und dem schriver gesprochen, also Ailffs eidomp van Ronderoide vordert an Johan XII Goltgulden van eyme perde, Johan Dussell kriegen have, wilcht Johan zom Haesen als vur syne scholt angenomen solle haven zu betzalen.

Dar tgen der Haese sprach, hey burge darvur were. Hait doch myt gesprochen, hey wille anstont Johan Dussell daromb soichen und erforderen. So balde hey solchs krike, wille hey idt Alff geven. Were deis neit, wille hey idt eme zu sent Matheusdage van dem syme betzalen und Ailff zuvreden stellen.

Thonis zom Hirtzs, Johan Roide, burgemeister, Johan Staill, rentmeister, Johan Zymonis und Johan Henselen, kuyrmeistere, und Kirstgen zur Wynreven, uff donerstach na Vincula Petri, anno et cetera [15]XXIX.

Vurscrevene burgemeisteren und vam reide hant van wegen des raitzs und der gemeynen Johan Eiffeler, zym-

Bl. 206^r

merman, in apwesens Hern Tilman zom Schaiffstalle richtlich doyn verbeden den bouwe, Hern Tilman understeit hynder der burger huis zu machen, neit daran zu arbeiden, we eme solchs ouch hebevoir verboden ist, und dat uff eyn kuyr, so manche dach zur kuyr V Schilling, hey daran arbeiden worde.

A II/11 1529

Johan Roide, burgemeister, und Johan Staill, rentmeister, uff donrestach nach Laurentius, anno et cetera [15]XXIX.

Gretgen vam Broich uis dem kirspell zu Overoide hait beleit myt Anna, Peter Peltzers doichter, de gesacht hait, we dat sy in acht dagen und in XIIIII dagen neist vergangen in Greden huys Under der Hallen gedragan have, uis Rurich Beckers huys, dat Johan, des Moilners was, der itzunt in krengden lygt, VIII zynen geslagen schuttell, VIII zynen moißschuttellen, II koymper, II syner roeck, eyne scheidell, eyn grois slaiffdoich, eyn klufft, eyn brantricht, II roister, IIII zynen saltzfaß, II kufferen luchter, eyn zynen luchter, eyn zynen pyntkengen,

Bl. 207^v

und III mostertzsschuttell.

Item, Tryne, Peters huisfraw Under der Hallen, und Greta, Heyn Kremers huisfraw, hant gesprochen, we sy geseyn haven, solchen huißrait uff Greden soller und in irer kuchen und garde. Have ouch zu in gesacht, den husrait hait der Moilner heebracht.

Thonis zom Hirtzs und Johan Roide, burgemeisteren, uff dynstach na Kruitwinongan, anno et cetera [15]XXIX.

Jong Volmar Leie hait willen beleiden myt Gillis Sloßmecher, Hynrich van Muych, Clais Lantschade und Johan Nuysgen, we Kirstgen Schoilten gesteren im huisse zur Vulkanen zu Volmar gesprochen have, hey hedde eme dato syn, bynnen hoemyssen, gestoillen, wilcht hey glichs myt gelde verorkunt have.

Zom anderen have Kirstgen gesprochen zu Volmar, syner huisfraw gesleicht were neit fromer, dan de kraen am galgen solden sy essen. Dese vurscrevene sprechent, idt weren me luide darby geweist, wanne sy byeyn synt, willent sagen, wat in davan wyßlich ist.

A II/11 1529

Bl. 207^r

Thonis zom Hirtzs und Johan Roide, burgemeisteren, Johan Staill, rentmeister und Wilhem Verffer, uff mayndach na Kruitwyongen, anno et cetera [15]XXIX.

Neta, Mertyns huisfrauwe an der Alderportzen, hait verorkont overmitzs vurscrevene burgemeisteren vam raide vurscreven und in biwesens des schrivers, also Her Wolffganck, pastoir, an Neten vurscreven vordert den seendt, daromb sy gefeendt was, im huisse zom Hirtzs, in biwesen den vurscrevenen under andern worden

Neta hait sprach, der pastoir sy doweder gescholden und geheischen hait eyne hair, wilcht sy do verkont hait.

Overmitzs vurscreven burgemeistere, denselven dach.

Johan Knutgen der alde, Teill Knutgens seligen son, hait bekant, hey untfangen have van Bertram Oem Johans, zwentzich Kauffmansgulden, darvur Johan demselven Bertram der vunff Kolnische Gulden, mynus 1 Albus jairrenten, hey eme jairlichs geldende ist und verschreven hait in syne erffschafft an der Klitzportzen.

Ber-

Bl. 208^v

tram und syne huisfrauwe, Lodwich, *[Johan]* Roloffs son, affgegulden haven, lude des gerichtsboichs im jair XXVII, post reminiscere, geschiet, eynen Kauffmansgulden weder verkeufft und affzuloesen gegeven hait. So dat Bertram und syne huisfraw untgain Johan da van der vurscreven renten nu vort IIII Kolnische Gulden, mynus 1 Albus geven sollen und schuldich synt zu geven in vurscreven maissen, beheltlich den eluden off iren erven och davan der affloesen uff vurscrevener zyt myt LXXIX Kolnische Gulden und dem erschenen termyne.

A II/11 1529

Johan Roide, burgemeister, Peter zom Wynter, rentmeister, und Johan Zymonis, kurmeister, uff godenstag na Bartholome, anno et cetera [15]XXIX.

Clais Lymbergh und Kirstgen Schoiltis hant sich beclagt etlicher gewalt over Johan van Euskirchen. Zom irsten claget Clais, we in Johan en neisten mayndach vergangen, bynnen nacht und nevell gewegelaigt have. Und Kirstgen clagt, we derselve Johan in bynnen nacht und nevell vurscrevener zyt myt eyme gereufften degen

Bl. 208^r

geslagen und na eme gehauwen have und allet zu eme geroiffen, ehe, Claisgen, wa bistu, und hedde in mehe geslagen, myt meren syme ungeluck darvan komen were, so in ander luide neit darvan gehalden hetten. Hant dese vurscrevene solchs beleit myt Johan Kanffenheuwer und Bernt Roiden.

Spricht Johan Kanffenheuwer, we Johan van Eußkirchen und Clais Lymbergh vurscreven, en mayndach neist vergangen, in Geislair huis sament zu wyne gesessen haven, myt anderen. Und de zweyn hedden sich zusament gewort und were doch daby bleven. Und Johan Euskirchen hette so darby sich en hatte heym gegangen. Und Clais hedde noch dablichen sytzen myt Kirstgen Scholtis und Becker Johan, de Clais by sich heym geladen zu slaiffen, so idt spade was. So hedde Clais darna heym gegangen, Kanffenheuwer hedde ouch do heymgegangen, Kirstgen und Becker Johan weren nakomen und wolden in Clais huis gayn. Entgein des Kanffenheuwerts huis sy Johan van Euskirchen kommen myt eyme gereufften metz, allet uff

Bl. 209^v

Kerstgen gehauwen und geslagen und na eme gehauwen und gesprochen, ehe, Claisgen, wa bistu nu, willent wir uns vierdelen.

Kirstgen have allet gesprochen, wat wilt du, wat han ich myt dir zu doyn. Ich enbyn der man neit der andere haue, allet dapper van sich gehauwen. Doch hedden sy also van eyn bracht.

Bernt Roide spricht, we hey solch gescheige uff syme soller gehort und zur vynsteren uisgeseyn have. Und sprechent beide, hey und Kanffenheuwer, we Johan Euskirchen darna vur Clais huis geloffen, da geroiffen, wa Claissgen, wa bistu, nun kome und laiß uns virdelen.

Vurscreven zoynt sich myt an Becker Johan, der solchs myt geseyn und gehort have.

A II/11 1529

Johan Roide und Peter zom Wynter, burgemeisteren, uff donrestach na sent Egidiusdage, anno et cetera [15]XXIX.

[Johann] Mey, verffer, und Elsgen, syne elige huisfrauwe hant gegeven und uffgedragen, irer eynt dem anderen, alle ire guider, gereit und ungereit, de sy itzunt hant und vorder hernamails an sich kriegen, wynnen und werffen mogen, nit davan uisgescheiden, de leste levendige hant van in beiden, de zu kerden und wenden, na alle irem walgevallen und enenkomptzs.

A II/11 1529

Bl. 209^r

Thonis zom Hirtzs und Johan Roide, burgemeisteren, uff saterstach, na sent Panthaleonysdage, anno et cetera [15]XXIX.

Lodwich Hoitmecher hait beleit und fraigen laissen vur vurscrevene burgemeisteren Hern Herman Brunynck, cappellayn, wes syn moder van eme begert, als de in irem doidebedde gelegen, dat hilge sacrament und den hilgen olie untfangen gehat have.

Antwort, Her Herman, we de moder have begert, Lodwicks huisfrauwe ire lange huecke zu geven, umb dat sy dat beste by ir gedayn have und noch voeder doyn wille, und dat man Lodwich betzalen solle van iren nalaissende guederen, das ghenen hey ir in iren noiden verlacht have. Hauit vort begert, dat man ir begencknys na solle halden, na irem doide, uis irem guede gereit und ungereit. Und dan sollen sy alle ire moder guit sament deillen, wanne dit he bovent geschreven uißgericht ist.

Zu getzügen heby geweist, Thonis, offerman, Peter Roitgen und Johan Hoitmecher, de dit myt gesprochen haven.

A II/11 1530

*[Die Texte der folgenden drei Seiten sind nicht von der Hand Guilichs geschrieben]*Bl. 210^v

Scholtis und sementlichen scheffen, anno XVC XXX, uff sent Laurentiusavent.

Zo wyssen, nachdem und als Johan zom Wolff ezunt vur uns scholten und scheffen, Loetwych Mutter etlycher scheltwort und smaechwort halven (so ytzgemelten Loetwych over yne in synem gemelten, Johans huys, oeve[r] yne gesacht haven soll, we sulcher geburlicher wys beleyt worden yst), myt dem strengen weghen des rechten rychtlich vurgenomen hait, damit dan beide parthien derhalven an yren eren und gelymp unverletz blyven mochten, haven wyr, scholtis und scheffen, de sache yn guylicher handelongh under die hant genomen und vur bytlich myddell nach gestalt und geleygenheyt des handels obgedachten Loetwych daehyn beweygt und gewyst, das hey yn unser gegenwerdicheyt den obgemelten Johan gebeden hayt, eme sulche worth, so er ym druncke oever yne geret haven soll, zo vertzien. Er wyß neyt anders van eme dan van eynem vromen man. Und daruff haet irer eyner dem anderen dey hant gegeven, dermayssen gesoennt und gefredigt zo syn.

A II/11 1531

Bl. 210^r

Rump und Roeß, anno XVC XXXI, dynstach post letare.

Kerstgen zor Wynreven hat geboden Hynrich Overstoltz und synen mytgetlongen alsulchen gelt as syn swegerfrawe luyde des scheffensboech obgemelten parthyen heruysgeven solt, des huyß halven zor Troven up dem Honermart geleygen, so vern sy yn versichern kennten der vorderunge hernamaels vyllicht gescheyn wurde van Herman Overstoltz, ires broders halven. Sulchs, hat Hynrich [und] Otto, gebrodere und Johan Hensseler geboden doch nyt angenomen und gesprochen het, Kersten gelt zo geven, dat hey dat avleycht et cetera.

Johan Staell, Johan Roet, beydt burgemeyster, Peter zom Wynter, rentmeyster, Bernt Roet, kuyrmeyster, Schamel Jan und Peter zor Gronnecken mytsampt der herenkneycht hant besichtiget den doden lycham Geyrtgen Lynenwebers, wylche up godestach na dem sondach Palmarum anno XXXI yn iren putz gefallen und verdruncken und hat eyn wonde up dat heufft geschossen boven dem rechten ouge. Hant darumb dey vurscrevene erleuffenys gegeven, van wegen uns Heren, des abtz, den doden lycham zo der erden zo bestaden. *[Godestag = Mittwoch; Palmarum = Palmensonntag, Sonntag vor Ostern].*

A II/11 1531

Bl. 211^v

Johan Roet, Johan Staell, burgemeysteren, und Johan Schamell, anno XVC XXXI, up Wyßenfrydach.

Thonys van Lyntlaen hat synen oervreyden gedaen, as recht, sulchs neyt zo wrechen noch nemant synenthalven zo gestaden, belangende eynen Goltgulden, den Johan van Lyntlae yn Johan Roden huyß, wey hey sprach, verloiren hat, yn der geselschaff.

Und Johan sprach, Kerstgen Scholten heit denselvygen yn syner tesschen leyf.

Doe Thonius ouch etzliche wort entfare, derhalven Kerstgen sy beyde kummerde. Sprach Thonius des morgens zo Kerstgen, hey beyde yn fruntlich, eme der sachen zo erlayssen und quyt zo schelden, hey wuste van eme neyt dan all goet. Dan hette hey myt Johan wat uystaan, me recht hey soechen, as recht und ys neyt gefessert noch gestort, dan eyn nacht los hynder dem bodden gefessert.

Bl. 211^r

Leerseite

A II/11

Bl. 212^v – Bl. 215^r

8 Leerseiten

-